

ЎЗБЕКИСТОН ЁЗУВЧИЛАР УЮШМАСИ
“ИЖОД” ЖАМОАТ ФОНДИ



Рисолат ҲАЙДАРОВА

ФУРГУРТЕПАДА САРАТОН

Қисса ва ҳикоялар

ТОШКЕНТ
“АДАБИЙОТ”
2021

821.512.133-32
84(5Ў)6
T 75

Т 75 Ҳайдарова, Рисолат
Ғурғуртепада саратон [Матн]: Қусса ва ҳикоялар / Рисолат Ҳайдарова. – Тошкент: «Adabiyot» нашриёти, 2021.
– 240 б.

ISBN 978-9943-6782-3-1

Масъул мұхаррир
Собир ЎНАР

Ушбу китобдан таниқли ёзувчи Рисолат Ҳайдарованинг “Ғурғуртепада саратон” ҳикоялар туркуми, шунингдек, “Карантин” қиссаси ўрин олган.

Адиба ҳамиша атрофимиздаги одамлар ҳақида, уларнинг содда ва шу билан бирга илдизи қадриятларимизга бориб тақалувчи ҳаётий фалсафаси ҳақида ёзади. Унинг ҳикоялари ҳам, қиссаларида ҳам инсоний қадриятлар – муҳабbat, дўстлик, садоқат, яхшиликка, маърифатга интилиш каби хислатлар улуғланади.

821.512.133-32
84(5Ў)6

*Китоб Ўзбекистон Ёзувчилар уюшмаси
“Ижод” жамоат фонди ҳомийлигида чоп этилди.*

ISBN 978-9943-6782-3-1

© Р. Ҳайдарова, 2021
© «Adabiyot», 2021

КАРАНТИН

Қисса

1

Пўлат яна икки кундан кейин Тошкентга қайтиши керак эди.

Билади: хотини унинг қайтишига мастава пишиб қўяди, чунки сафарда мудом кўча овқатини еганидан ошқозони оғирлашиб қолади.

Келишига уй қўйлаги ювиб, дазмоллаб қўйилган бўлади. Ўғли илжайиб хонасидан чиқиб келади, қизлари бўйма-бўй туриб, салом беришади, хотини вазмин кўришади.

Андижонда бошланган нотинчликни кўриб, уйига шошилди. Ҳамма бозорга, дўконларга шошган, ҳамманинг юзида ташвиш кўлагаси, икки қўлида тўрхалта, тўрва, қоп... Миш-миш...

Хитойда чиққан вирус бизгаем келганмиш... Ҳукумат расмий хабар берганмиш (Буниси энди рост эди)...

Энди Хитойдақа карантин бўлармиш (Бўлиши мумкин, тағин ким билади?)...

Касалга учраган одам ўлармиш (Ўлиши ҳам, ўлмай қолиши ҳам мумкин, буни Худо билади)...

Чегаралар ёпилармиш (Чет давлатларда ёпилди-ку, ахир!)...

Чегара ёпилса, буёғи нима бўлади?

Нархлар ошармиш...

Озиқ-овқат четдан келади-ку! Ун, шакар, ёғ...

Ва ниҳоят, энди нима қиласиз?

Миш-мишларни эшитиб, бозорлардаги аҳволни кўриб, аввалига ачинди, кейин ўйланиб қолди: Тошкентда аҳвол қандай экан?

Ўйига қўнғироқ қилди. “Эртароқ қайтишга уриниб кўраман. Сен макарон, шакар, ёғ дегандек, икки кило-икки кило қилиб, уч-тўрт жойдан опкўйгин, сабабини сўрама, ҳар хил жойдан олсанг, саволлар бўлмайди, ҳафта охиригача унча-мунча йиғиб қўясан-да”.

Хотини ҳар сафаргидек, гапни чўзиб ўтирамади. “Тушунди”, ўйлади у.

Малика эса тушунмаган эди, ваҳима қилишнинг нима кераги бор? Нега энди шунча озиқ-овқат йиғаман? Бир дунё нарсани қачон еб битирамиз?

Кечқурун қизи инстаграмни очиб кўрсатди:

– Ая, манавини қаранг, бу Андижонда, мана бу Қаршида, бозорлар ур-йиқит, ҳамма нарсани талаб кетишияпти, ҳеч нарса қолмаяпти. Битта вирус шунчалик қиляптими?

– Ваҳима босибди ҳаммани, – хулоса қилди у.

Эртаси шанба эди. Нигораси мактабдан ховлиқиб келди:

– Бизга уч ҳафтага таътил беришди!

“О, энди нима қилдим? – ўйлади у. – Душанба ишга чиқсан, Нигора кун бўйи бир ўзи қоладими?”

Бу хабар уни тамом эсанкиратиб қўйди. Нигора дарсидан кейин мактабидаги куни узайтирилган гурӯхда қолар, бунинг учун у дурустгина пул ҳам тўлар, аммо тўлаган пулига ачинмас, ҳар ҳолда бола назорат остида, мен хотиржам ишимни қиласман, деб ўйларди. Уч ҳафталик таътил хабари уни тамом эсанкиратди.

Ўғли ишга эрталаб кетиб, кечқурун келади, қизи ҳам шу аҳвол, эрини-ку, айтмаса ҳам бўлади, ўзи эса эндинигина, ёши элликка етганда дурустгина мартабага эришиб, юқори доиралар назарига тушиб келяпти,

яқинда орден ҳам олди, шу даражага етганда яна уйга қамалиб қолиш унга түгри келмасди.

Ха, майли, деди ўзича, душанбагача ҳали вақт бор. Бир гап бўлар.

Якшанба куни кечқурун Нигорага эринмай йўл-йўриқ кўрсатди. Душанба эрталаб Нигора учун кун бўйи бажариладиган топшириқлар ўйлаб, бутун бир рўйхат тузиб, музлаткичга ёпишириб қўйди.

Кейин ишига жўнади. Ишхонаси шаҳарнинг қоқ марказида, унга бориш учун чиройли хиёбонни кесиб ўтиш керак эди. Одамбўйи арча тагига қўйилган ўриндиқда бир-бирининг пинжига кириб ўтирган, дока ниқоб тақиб олган севишганларни кўрганда бирам кулгиси қистадики...

“Мана, вирусдан қўрқмайдиганлар”, деб ўйлади. Ишхонага кирса, қоровулларнинг олдида иккита ҳамшира ўтирибди, кирганларнинг иссиғини ўлчашяпти, унга ҳам термометр беришди. Ўлчади, жойида.

Хонасига кирса, бошқарма бошлиғи, юзида катта-кон дока ниқоб, қўлини чўнтағига тиққанча бўлимдаги йигитларга нималарнидир уқтиряпти. Маликанинг яқин ёрдамчиси Носиржон – баланд бўйли, қоп-қора кўзлари жиддият билан боқадиган йигит ўнг қўлини столдаги принтер устига хотиржам ташлаганча қулоқ тутади.

Бошлиқнинг бўйи паст, юзи кичкинагина эди, ниқоб тепасидан иккита кўзи билан пешонаси чиқиб турибди, узун, ялтироқ пешонанинг тепасида бир тутам мош-гуруч соч “осиғлиқ”. Бўйчан, кўркам йигитларнинг олдида бир бурдагина бўлиб кўринади, кўкрагини кериб олганидан кулранг бўйинбоғи дўмпайган қорнидан сал тепароқда ликиллайди.

– Эҳтиёт зарур, – уқтиради бошлиқ. – Дунё ваҳи-ма ичида яшаяпти. Барibir битта сайёрада кун кўргандан кейин чегарани нарёғида нима бўлса, бизгаям

келади. Илож йўқ. Тўғрими? – деди эшик ёнида тўхтаган Маликага қарата.

Малика жавоб ўрнига жилмайди. Унинг табассуми аксаран ўзига қарата айтилган гапга розилигини билдиради, лекин у жавоб қайтариш шарт бўлмаганда ҳам, содда-дўлвор сўзларга жавобан ҳам жилмайиб кўя қоларди. Маликанинг бу одатини яхши билишганидан йигитлар ўзларича кулиб қўйишиди. Бошлиқ: “Яхши ишланглар”, дея чиқиб кетди. Малика бошлиғини йўлаккача кузатиб, жойига қайтди. Йигитлар тарқалишди.

Аёл компьютерини ёқди, мониторда митти саватчага тўлдирилган бинафшалар тасвири кўринди. У кайфиятига, йил фаслларига мослаб, монитордаги суратларни алмаштириб турарди. Ҳозир эса наврўзга бир ҳафта қолган, баҳор кайфияти уйфона бошлаганидан интернетни кавлаштириб, шу суратни топган, қор босган Альп тоғлари тасвири ўрнига шу бинафшаларни жойлаштирган эди.

Унинг учун баҳор саккизинчи март арафасидан бошланарди. Баҳорни айрича кайфият, ўзгача тайёргарлик билан кутарди. Жавонни титкилаб, пойафзалини, кўйлакларини кўздан кечирав, капрон колготкилар сотиб олар, янги чиққан газламалар, кўйлак бичимлари билан қизиқиб кўрар, лекин янги кўйлак олишга негадир шошилмас, аммо сартарошга, албатта, борарди.

Бу ҳафта иш жуда тифиз бўлиши кутилаётганди. Боиси келаси ҳафта охирида Тошкентда катта анжуман бўлиши, унга ўттиз икки давлатдан вакиллар келиши керак, ишхонаси эса шу тадбирнинг асосий ташкилотчиси эди.

Ишхонасида хорижий инвестициялар билан шуғулланадиган бўлим атиги бир йил аввал тузилган, ўшанда чет тилини яхши билган, яна шу тизим фао-

лиягини яхши тушунгандан ходим идорада фақат битта эди. У ҳам бўлса унинг ўзи – Малика Сатторовна! Турған гап, бўлимни оёққа турғазиш унинг чекига тушди. Ба ўз-ўзидан номи жарангдор шу бўлимга бошлиқ бўлиб қолди. Малика ҳамиша сидқидилдан ишларди, эндиғина олий ўқув юртини битирган тўртта ёш йигитни ёнига олди, уларга паст-баландни ўзи ўргатди, мана энди қандай масъулиятли вазифа бўлса, йигитлар бемалол уддалашади, ишхонадаги энг нуфузли, энг батартиб ишлайдиган бўлим уники, каттароқ тадбирлар бўлса, ёрдамчилари оппоқ кўйлак, кўркам костюм-шимларда, дид билан танланган бўйинбоғларда унинг икки ёнида ҳозир, у эса чиройли оройишланган соchlари, хушбўй упа-эликлари билан яшнаб, сипо кўйлакда вазмин жилмайиб туради. Ташириф буюрган хорижий делегациялар билан ўзи ҳам, йигитлар ҳам бемалол тиллашганини, муҳим музокараларни юритганини кўрганлар ҳавас қилишади. Бошқарма бошлиғи энг нуфузли бўлим менинг қўл остимда, дея ғурурланиб қўяди, лекин бўлимга топшириқни бевосита вазирнинг ўзи беради.

Мана энди аксига олиб, энг масъулиятли тадбир олдидан муаммо чиқиб турибди...

Малика кўчалик пойафзалини ечиб, идорада киядиган ингичка пошнали сурмаранг туфлисини кийиб олди. Йўлакка чиқди, иккинчи қаватга элтувчи зинапоя ёнидаги деворга ердан то шифтгача етадиган кўзгу ўрнатилган эди. Тепага чиқаётib, кўзгуга қаради, эгнидаги мовийранг сипо кўйлагини тортиб-тортиб қўйди. Зинадан кўтарилаётган хушқомат, қоп-қора соchlари чиройли таралган, хушпардоз, қулоқлари ва бўйнида нозик тақинчоғи ярақлаётган аёлни кўриб, ўзи ҳам завқланди. Йўқ, уни ҳеч ким эллик ёшда демасди, уни ҳамиша етти-саккиз ёшга кичик деб ўйлашарди.

Йўлакда кўзига ким кўринса, бари билан сўрашиб ўтди. Ҳамма уни кўриб жилмаяр, эркаклар унинг саломига хушнудлик ила алик олишар, ёшлар хурмат-ла қўлларини кўксиларига босишарди.

Вазирнинг қабулхонасига етмасидан уни биринчи ўринбосар тўхтатди.

– Маликахон, – деди у. – Хабарингиз бўлдими, Москвага кетган делегация етиб келдими?

Аёл сергак тортди:

– Самолёт тонгги олтида келиши керак эди.

– Бугун кечаси ўн иккida чегаралар ёпилган, хабарингиз бор-а?

– Ҳа...

– Бояқишлиар эсон-омонмикин?

Малика, гўё ўзи қилиши керак бўлган ишни Носиржонга топшириб, хато қилгандай туюлди-ю, хижолат тортди.

– Йигитлар аниқлашаётувди буни... – деди юzlари ловуллаганча.

Ўринбосар ўйланиб қолди. “Юринг-чи”, – дея хонасига бошлади. Аммо унинг хонасига етиб бормасларидан орқаларидан Носиржон югуриб келди.

– Минг бор узр, – деди у шошқин. – Ҳозиргина Самарқанддан қўнғироқ қилишди. Шунинг хабарини берай деб келяпман. Делегациямиз ўша ерда экан.

Ўринбосар “тушунмадим” дегандек бароқ қошлирини баравар тепага кўтарди:

– Нега Самарқандда бўлишади?

– Элчихонадагилар чипталарни Самарқандга учадиган рейсга алмаштириб беришибди, кеча кечқурун Самарқандга келишган экан, аэропортдан карантинга жўнатворишибди. “Охалик” санаторийсидамиз, дейишибди. Ўн тўрт кун ўша ерда бўлишаркан.

– Э... – ўринбосар турган жойида серрайиб қолди. – Бу... жуда жиддийга ўхшайди-ку, а, опа?

– Эҳтиёт чорасидир-да, илойим, соғ-саломат бўйлишсин.

– Ишқилиб, ўн тўрт кун ичида тинчлик бўлиб турсин, одатда карантинда шаҳарни ҳам ёпиб қўяди-да, бояқишилар уйига келолмай қолмасмикин?

Малика бу эҳтимолни хаёлига келтириши билан юраги шувиллаб кетди. Сафарни Наврӯздан кейинга кўчираильик, дейишган эди-я, шундоғам музокара чўзилияпти, орқага суриса янада кечикамиз, деб туриб олган эди. Энди карантинга тушиб қолган бояқишилар ич-ичида Малика Сатторовнани сўкаётгандир?

Малика боши гангиги ортига қайтди.

Хонасига кирувди ҳамки, телефоны жаранглади. Нариги томондан котибнинг овози эшитилди:

– Ассалому алайкум, опа, сизни вазир йўқлаяптилар!

Вазирнинг кенг-мўл қабулхонаси одатдан ташқари сокин, дераза ёнидаги катта мониторли компьютер қаршисида котиб – озғин оқ сариқ йигит ўтиради. Маликани кўриб, кираверишга ишора қилди.

Ичкарида шошилинч мажлис ўтказишга мўлжалланган узун стол тўрида оқ оралаган қуюқ сочлари кўпириб тошган вазир, стол атрофида олти-етти киши – ишхонанинг турли даражадаги бошлиqlари ўтиришарди.

– Келинг, Маликахон, – деди вазир ҳорғин, чап томондаги бўш стулни кўрсатаркан. – Москвага жўнатган делегациямиз карантинга тушиб қолибди. Энди бу – эҳтиёт чора, умид қиласман, одамларимиз соғ-саломат, вақт ўтиб ёнимизга қайтишади.

Бир-икки киши Маликага қараб қўйди. Маликага бу худди “Сен шунга айбдорсан”, дегандек туюлди-ю, беихтиёр бошини эгди.

– Битта буйруқ тайёрланлар, – вазир ўринбосарга ўгирилди. – Карантинда қолган ходимларимизнинг оиласига моддий ёрдам ажратайлик, ўзингиз икки-уч

киши билан бориб, ҳол-аҳвол сўраб, ёрдам пулини ташлаб келасиз. Кейинги масала: йигирма тўртингидаги анжуман қолдирилди, Маликахон, таклиф этилганларга чиройликкина қилиб, узр билан билдириш жўнатасиз, хўпми? Бугундан ҳамма ёқда карантин, биз ҳам карантинга ўтамиз. Идорада асосан бошқармалар, бўлимлар бошлиқлари, ўта зарур техник ходимлар қолади, бошқаларга таътил, таътилнинг шарти, шакли, хуллас, ҳамма томони ходимнинг ўзи билан келишилади. Биринчи навбатда аёллар... чунки мактаблар таътилга чиқди, болалар ёлғиз қолмасин... – тўсатдан ёдига тушгандек, ўтирганларга бир-бир кўз ташлади. – Айтганча, аёлларимиз! Ёкутхон, – дея бош ҳисобчига ўгирилди. – Сизга ҳам таътил, Камолиддин ишни эплаб турагар... Маликахон, ўрнингизга ишни ким бажариб тура олади?

– Носиржон уddaрайди, – деди у.

– Носирジョンга бор топшириқларни, йўл-йўриқларни айтасиз. Хуллас, масалани тушундинглар, а?

Ҳамма ўрнидан қўзғалди.

2

“Тўғри айтади, – ўйлади Малика ариза ёзаркан, ходимлар бўлимидаги опанинг гапини эслаб. – Болта тушгунча кунда дам олади. Ҳали нима гап-у, нима сўз? Нигора ҳам ўзимнинг кўз олдимда бўлади. Баҳонада дам оламан, ахир неча йилдан бери тузук-қуруқ таътил олганим йўқ”.

Аризани топширгач, Носирジョンга баъзи кўрсатмаларни берди-да, бошқарма бошлиғи билан хайрлашиб, ташқарига чиқди.

Ишхонасига кираверишда, дарвозанинг шундоққина ёнида қийғос гуллаган бодом дарахтини кўрди. “Ажаб, – ўйлади у. – Қачон гуллаб улгурди? Кечагина йўқ эди-ку!”

Машинасида мотор ўт олишини кутаётиб, уйига күнфироқ қилди. Нигора анча куттириб, кейин гүшакни күтарди.

– Нега гүшакни күтармайсан? – дея итобга тута бошлади у. – Хавотир олади, деб ўйламайсанми? Яна күчага чиқиб кетувмидинг?

Нариги томондан қизчанинг титроқ овози келди:

– Йўқ, телевизор кўраётувдим.

“Оббо, Сулаймон йўқ, девлар қутулди экан-да!” – ўзича кулди у.

– Мен ярим соатга қолмай бораман, болам. Ҳадеб телевизор кўравермасдан, берилган топшириқларни бажар.

– Бажариб бўлдим.

– Ҳа, яна чалакам-чатти бажариб қочдингми? Борсам, текшираман!

– Йўқ, ҳаммасини яхшилаб бажардим. Ошга гуручҳам тозалаб қўйдим.

– Мен сенга гуруч тозала, демадим-ку!

– Айтиб қоласизми, дегандим-да. Телевизор кўраверайми?

– Майли.

Малика кулиб юборди. “Бу ёғи энди Золушканинг ўзи бўлди-ку, гуручни ҳам тозалаб қўйибди”.

Уйига қайтаётиб, атайлаб кўчаларга разм солиб қаради. Ҳаммаёқ осойишта, машиналар доимгидек шошилмай, ўз ўзанида оқади, одамлар йўлкаларда хотиржам кетиб боради...

Ваҳиманинг асоси йўқдай туюлади ҳатто.

3

Андижондан эртароқ қайтишнинг иложини қиломади. Охири кўз олдида рақамлар сакрай бошлади, қоғоз ҳидидан кўнгли ағдарилар даражага келди. Охирги хужжатни имзолаб, муҳр босгач, жомадонини

палапартиш йифиб, Тошкентга қатновчи киракаш машиналар бекатига жўнади.

Шундай хавотирли қунларда биринчи бўлиб ҳайдовчилар нархни оширадилар, буни хизмат кўрсатиш хавфли бўлиб қолаётгани, жонларини хатарга қўяётганлари билан изоҳлайдилар.

Шунаقا пайтда ҳайдовчини бўралаб сўккинг келади, аммо иложинг йўқ, кунинг шуларга қолиб ўтириди. Савдолаша-савдолаша нархни бироз туширган бўлди-да, жомадонини юхонага жойлаб, олд ўриндиққа ўтирди-да, кўзларини юмди.

...Уйи ёнида таксидан тушганида қуёш ботиб, шаҳар осмонига ғира-шира қоронғилик тўри ёйила бошлиганди. Катта серқатнов йўлга қаратиб солинган беш қаватли уйининг орқаси қадимий маҳалла бўлганидан, замонавий теп-текис “кути” билан унинг рўпарасига терилган, ичида дарахтлар диккайган турли-туман ҳовлилар гўё қарама-қарши икки соҳилдек туюлар, улар ўртасидан ўтган текис асфальт-бетон йўлка худди икки қирғоқни бўлиб турган бир ирмоқча эди.

Маҳалла мачитида аzon айтилиб битаёзган, муаззин алоҳида қунт билан “Ҳайа алал фалаҳ” дея чақиради.

...Эшикни хотини очди.

- Ассалому алайкум, - жилмайди аёл.

Унинг ортида ўғли, кейин қизи кўринди, ҳаммадан кейин Нигора югуриб чиқди.

- Э, қандай ўтирибсизлар? – болаларини баравар кучаркан, худди Андижондан эмас, дунёning нариги четидан келгандек сезди ўзини.

Ҳар сафаргидек кийимлари жавонда тайёр, озода ваннахонада топ-тоза сочиқ илиғлиқ, қозонда эндинга пишган мастава...

Ўттиз икки йил бўлибдики, уйига шошади, назарида ўзи кун бўйи дуч келадиган ташвишлар ва бош-

оғритар муаммолар бир денгиз, уйи эса денгиз ғала-ёнларидан холи бир орол. Ўйлаб қараса, у мана шу орол атрофидаги денгизда тўфон кўтарилиганидан, оролини сув босишидан кўрқкан экан.

Болалари уйқуга ётгач, хотини иккови тун ярмидан оққунча гаплашиб ўтиришди. Уни эртанги кун хавотирга соларди: умрида бунақанги аҳволни кўрмаган, бошидан бу каби қунларни кечирмаган эди. Шу онда у улкан ернинг нариги бир чеккаси – неча юз минглаб чақирим олисда пайдо бўлган оғатнинг юртига етиб келгани-ю, одамларнинг тинчини ўғирлагани, эртага яна қанчалаб ўзиники каби тинч ўтирган оиласларга мусибат келтиришини ўйларкан, замин, барибир, кичкина экан, деган хulosага келди.

– Эртадан тамом бошқача бир ҳаёт тарзи бошлилади, – деди хотинига.

Малика деразага боққан кўйи жим ўтириб қолди.

– Биляпман, – дея шивирлади. – Тоқатимиз етса бўлгани. Бунақанги оғатнинг келиши осон, кетиши...

– Бошга тушганни кўз кўради-да... Ўзга иложи ҳам йўқ.

4

Малика ҳар доимгидек, ишни нимадан бошлишни, карантинда ўтадиган вақтни нималарга сарфлашни ўйлаб, режа тузиб чиқди.

Дастлаб ҳаммаларига дока ниқоб сотиб олиш керак. Бусиз кўчага чиқиб бўлмайди.

Кейин Нигора таътилда нима қилади, шуни ҳал этиш керак, муаллимаси билан гаплашиб олмаса бўлмайди, балки уйга вазифалар берар? Телевизорни чеклаб, охирги сотиб олган китобларини ўқишига ўтқизиш керак қизчани.

Фурсатдан фойдаланиб, уй “кўтариш”: пардалардан тортиб, адёлларгача, ошхона, ҳожатхона девор-

ларидан то шифтлари, деразаларигача, хуллас, ҳамма ёқни ювиш керак, яна қишки кийимларни йиғиштириш (шу пайтгача телпагу пальтоларни йиғишга вақти бўлмаган), баҳорги, ёзги кийимларнинг ҳаммасини олиб, қўздан кечириб, жавонларга тақсимлаш, қизига олиб қўйган чинниларини, биллурларини саранжомлаб тахлаш (ё Худо, жавоннинг тепаси қутиларга тўлиб кетибди!), ниҳоят, келинга ва қизига аталган матоларни алоҳида-алоҳида қилиб пакетларга жойлаб, сандиққа солиш (жавоннинг ичига шилдироқ пакетлар тиқилиб кетибди, ё тавба, шунча нарса қандай сиққан экан?)...

Ниҳоят, “Таом.уз” сайтидан кўчириб олган бир талай “рецепт”лари бор. Шуларни пиширишни машқ қилиб кўриши керак. Бир вақтлар ошхонада куймаланишни яхши кўрарди, охирги йиллар ўта банд бўлганидан, осон пишадиган беш-олтита овқатнигина пишириб қўя қоляпти. Аксарият пишир-куйдирни қизининг қўлига топшириб қўйган-у (оиласа бека бўлади ахир, қўзи пишсин-да!), лекин ўзи бу ишга бош-қош бўлиб ўргатмаяпти, шунинг учун қизи бирда нордон, бирда тузсиз, бирда шўр овқат қиласи. Кейин тоқати тугаб, қизини нарига итариғди-ю, ўзи ошхонага киради...

Ва энг, энг зарур яна бир ишини қандай ниҳоялашни яхшилаб ўйлаб олиши керак. Ўғли ўттизга чиқди, ҳалигача уйлангани йўқ, ўта бандлигидан совчиликка ҳам тузук-қуруқ юролмаяпти, қизи йигирма бешга қараб кетяпти, совчиларни кутиш учун эса ҳар шанба-якшанба уйда бўлиши керак, у эса... ҳа, шу кунлари ҳам банд! Тўқсон иккига кирган отасини кўришга улгурса, шундан хурсанд! Демак, у ниманидир нотўғри қиляпти...

...Дорихонага чиқиб кетган қизи иккита бир марталик ниқоб кўтариб келди.

– Энг арzon, қадрсиз нарса нодир матоҳга айланиб қолибди, – деди у. – Зўрга топдим, антисептик умуман йўқ, одамлар талаб кетишяпти.

– Йўқ бўлса, қайтиб келавермайсанми? Бунаقا пайтда кўчада кўп юриб бўладими?

Қизи қулиб юборди:

– Вой, сиз ташқарига қаранг! “Дўм”имиздаги ҳамма келинлар, ҳамма хотинлар кўчада! Катта йўл тўла машина!

– Бошқалар ўзини томдан ташласа, сен ҳам ташлайсанми, нодон?

Назарида ортиқча қизишиб юборгандек туюлди-ю, тилини тишлади. Ахир қиз бола – меҳмон, нега аччиқ қилади?

Жавондан икки метр оқ дока топиб, ниқоб тикишга ўтирди. Малика авваллари ҳам тикиш-бичишига нўноқ эди, шароит тақозо қилгандан кейин қунт қилади-да! Робинзон Крузо шароит туфайли янгидан шиша яратган эмасмиди? Дока ниқоб нима бўлибди? Докани тўртга буклаб, тўрт четига тўртта тизимча улади, холос!

Ниҳоят, урина-урина, икки соат деганда иккита ниқобни тикиб битирди. Йўқ, докани тўртга буклаб, тизимча улаш фақат оғиздагина осон экан. Чоклари сал қийшиқ чиқди, майли, ҳар нечук, йўқдан кўра борку! Ниқобнинг ўнгу терсини дазмоллаб, целлофан пакетга тиқиб қўйди.

Кечга томон ниқоб тақиб, дўконга чиқди. Сурхондарёлик сотувчи йигит, ўзи қорамағиз-у, оғзи-бурнини қоп-қора бўз ниқоб билан тўғсанига кишини чўчитарлик бир тусга кирибди. Дўкон одатдагидан гавжум эди. Йигит оёғи толганидан касса олдидаги курсига ўтириб олган, лекин қўллари тинмас, ёд бўлиб кетган ҳаракатлар билан харидларни халталарга жойлаб, пулини олиб, чаққонлик билан қайтим қайта-

пар, пластик карталарни терминалга тиқиб, керакли тугмаларни тез-тез босарди. Дўкон эгаси – дум-дума-лоқ эркак сут-қатиқлар жойланган шаффоф эшикли музлаткич ёнига ўтириб олганча келиб-кетувчиларга ҳорғин тикиларди.

– Нималар бўляпти, а, кенномай? – деди у Маликани кўриб. – Одам ҳеч нарсани тушунолмай қолди-ку! Вирусдан одамлар ўлаётган жойлар қаёқларда-ю, биздаги ваҳимани қаранг!

Дўкондор Маликани ҳам, унинг эрини ҳам катта бир идораларнинг ваколатли одамлари деб ўйларди, шекилли, ҳамиша салом-аликни қуюқ қиласар, мамлакатдаги каттароқ бирон-бир янгилик юзасидан ўзича фикр билдириб қўярди.

– Ер битта-ку ахир! – жилмайди Малика.

– Тўғри-ю, лекин ер катта-да! Ўртада дарёлар, тоғлар, океанлар бор. Вирус барибир етиб келган бўлса, унда, бошقا давлат билан кирди-чиқди қилган ҳам ёмон экан-да!

Малика елка қисиб қўя қолди. Бу кишига бирон нарсани уқтирган бефойда, деб ўйлади. Унинг ўз қарашлари, ўз мулоҳазаси бор, у ҳамма нарсага ўз дунёсидан туриб назар солади.

Халталарни кўтариб, уйига кирди, қизини ёнига олиб, лағмонга уннади. Ҳатто Нигора ҳам қизиқиб, кичкина хамир зувалачаларни юмалатиб кўрди.

Карантиннинг биринчи куни тугади.

5

Тонгда ташқаридан эшитилган чуғур-чуғур товушлардан уйғониб кетди. Пастдаги маҳалла томонда қушлар сайранарди. Малика ётган кўйи сайраётган қушнинг номини эслашга уриниб кўрди. Билолмади. Қушларнинг сайроғини эшиитмаганига неча замонлар бўлди? Умуман, нечта қушнинг номини билади

у? Беш-олтита, шекилли. Лекин уларнинг сайроғини ажратолмайди.

Кийиниб, айвончага чиқди. Осмон ёриша бошлаган эди. Пастдаги ҳовлилар ичида тиккайган дарахтларнинг учлари оқараётган осмон тагида қорайиб кўринади, олисда, уфқда бир парча булут уялгансимон қизаради...

Маҳалла мачитидан аzon товуши янгради. Шикаста бир овоз дардли нола каби тўрт карра “Оллоҳу акбар”, дея қайтарди-ю, кетидан “Ашҳаду алла-а илааҳа иллал-ло-оҳ”, деди. Малика дераза олдидаги курсига ўтириб, муаззин айтаётган калималарга қулоқ солди. “Мунча чиройли бўлмаса, – дея ўйлади. – Кишининг дили худди сув ичгандек ёришади... Бирам чиройли тонг отяптики... Худди дунёда ҳеч қанақанги офат, карантин деган нарса йўқдек”.

Уфқ ёришди, ҳовлилардаги новдалари куртакка тўлган дарахtlар яққолроқ кўринди. Шундоққина рўпарасида, йўлканинг бўйидаги кекса ўрик дарахти бошига оппоқ гулларини кўтарганча туради. Бир вақт мачит гумбази узра бир тўп капитар кўкка отилди. Тонг осуда, ҳавода ёқимли салқинлик. Қаерлардадир вирус ҳукмронлик қилаётганига, одамлар азоб чекаётганига, ўлаётганига, дунё шаҳарлари хувиллаб қолаётганига ишониб бўлмайди...

Аёл латтани ҳўллаб, айвончадаги дераза токчаларини артиб чиқди, кейин чой ичиладиган, ошхонадаги масаллиқлар тўғраладиган стол устини тозалаб артди, чойнак-пиёла, қошиқ, ликопчаларни чайиб, nonуштага ҳозирлик кўра бошлиди. Ўттиз икки йилки, ҳар кун тонгда бир хил тартибда, бир хил ишларни ба жаради: кўча эшикни очади, эшик олдини ҳўл латта билан артиб олади, чанг қўнмаган бўлса ҳам, nonушта олди айвонча деразасининг токчаларини артиб-сур-

тади, кечқурун тозалаб ювган бўлса-да, чойнак-пиёла, ликопча, қошиқларини бир қур чайиб олади, ҳатто чой қайнатадиган чойгуми ҳам кунига икки марта “душ қабул қилади”. Бу одат унга ёш қизлигидан сингган, онаси ҳар кун такрорлайвериб, ёдлатиб юборган. Энди эса у мана шу одатни қизига сингдиряпти, Нигорага ўргатиб боряпти...

Сал ўтиб, Нигорани эргаштириб қизи чиқиб келди, кейин ўғли, эри уйғонди. Шундай қилиб, карантиннинг кейинги куни бошланди.

– Бугундан шаҳарда метро ҳам, автобуслар ҳам юрмайди, – деди эри. – Мен ҳам масофадан туриб ишлашга ўтсам керак. Бундан буён дўконга фақат ўзим чиқаман, уйда бўлган пайтлари Жавлон чиқади.

– Агар уйда бўлсан... – дея илжайди ўғли. – Мени сафарбар қилишлари мумкин. Инфекционистман ахир.

Ўғлининг охирги сўзи сўнгги кунларнинг таҳликаси оиласига ҳам кириб келганига ишорадек туюлди-ю, Маликанинг юраги шувиллаб кетди.

...Тушдан кейин ташқаридан карнай-сурнай товуши келди.

– Тўйми? – ҳайрон бўлди аёл. – Тўй қилиш таъкиқланмаганмиди?

Қизи қиқирлади:

– Карантин тугагунча келин-куёв айниб қолмасин, дегандир-да.

– Гапинг қурсин, – кулди она. – Жаримага тортилади-ку, ўйламайдими?

– Сиз тоғамни эсланг, – бўш келмади қизи. – Тўрт юзта одам чақирсанг, жарима тўлайсан, дейишганда нима қилдилар? Ҳукуматга эътиroz қилиб бўлмайди деб, олдиндан ўша жаримани тўлаб, кейин тўйни ўтказдилар-ку. Бизникилар тўй бошласа, тўхтатиб бўладими?

– Бас қилинглар, – нариги хонадан эрининг жаҳлдор овози эшитилди. – Ишлагани қўясизларми, йўқми?

Қизи кафти билан оғзини түсди. Нигора айвончанинг деразасидан эгилиб қаради.

– Опа, қаранг, – дея қичқирди у. – Тўй шундоқ пастимизда, Иродаларникида бўляпти. Ана, куёв!

Пастда ўнтача йигит куршовида қора костюм-шим кийиб, капалакнусха бўйинбоғ таққан куёв кўринди. Йигитларнинг баъзилари оғзи-бурнига дока ниқоб тутган, сурнайчи ниқобини ияги остига тушириб олиб, бетларини шиширганча асбобини пуфлайди, ногора чалаётган йигит гўё юзидаги қоп-қора ниқобдан уялгандек бошини эгиб олиб, чўпларини чарм юзага пайдар-пай уради.

Подъезд эшиги ёнида беш-олтита эркак қўл боғлаб туришибди. Келиннинг отаси – Мирвоҳид кулранг пиджаги чўнтакларига қўлларини тиқиб, келаётгандарга паришонҳол боқади.

– Етар, бас, – Малика деразани ёпди. – Ишимизга қарайлик. Нигора, шеърингни ёдла, менга айтиб берасан.

Кўп ўтмай, телефон жириングлади. Нариги йўлакдаги қўшниси экан.

– Вой, Малика опа, яхши ўтирибсилами? Кўчада кўринмадиз, а? Шунга хавотир олиб, телефон қилаётганим... Тинчмисила?

– Карантин-ку ахир, – Малика кулиб юборди. – Кўчада шунинг учун кўринмаганман.

– Тўйни томоша қиганиям тушмадиз-а!

– Нега тушай? Мумкин эмас-ку.

Кўшни шарақлаб қулди:

– Вой опам-ей, ажойибсиз-де! Ҳеч нарса бўмийди, бир чеккада турас, холос. Пастда яхшигина томоша бўлди-де ўзиям! Кўрмий қолдиз!

– Ҳа, майли, маҳалламиизда тўй кўп бўлади, худо хоҳласа. Томоша ҳам қиласиз.

– Вой, бунақа томоша бўмаган, – қўшни яна шақиллади. – Участка нозиримиз келиб, келин-куёвниу Мирвоҳид акани, Роҳила кенайини опкетди. Нима гап, деб идорасига мўраласак, вой, видеосини кўтариб мухбирлар келишипти, оқсоқолимиз ўшатта, женсовет ўшатта, ҳокимиятдан одам кепти, куёвни отасини чақиришипти... Роса тўполон! Нозиримиз чиқиб, бизага “тарқалийла, тарқалийла” деб, роса гапириб-гапириб, мажбурлаб кеткизди. Нима минам тугади, билолмадик, ишқилиб, яхшилик бўсин!

– Ҳа, яхшилик бўлсин, – деди у ҳам малол кела бошлаган “сұхбат”дан қутулиш умидида. – Тинч бўлинг, ўргилай, яхши кунларда кўришайлик!

Тоқати тугаб, қўшнининг хайр-маъзурини ҳам охиригача эшитмай, гўшакни қўйди.

Фаройиб хотин-да бу қўшниси! Ҳозир яна бошқаларга қўнғироқ қилиб чиқади, кўрганларини батафсил қилиб, ўзидан ҳам қўшиб айтади, энг қизифи, ҳикоясини бир тингловчидан иккинчисига етказиб бўлгунча унга яна янги тафсилотлар қўшиб, ўз фикр-мулоҳазалари билан “бойитиб”, “сайқаллаб” боради. Унинг “сұхбати”га рўйхуш бермаганлар эса алоҳида таърифлар билан “сийланиб”, бошқа бир танишларга ахборот сифатида тақдим этилади.

Малика ҳозир қўшниси уни бошқаларга нима деб тавсифлашини ҳам ўйлагиси келмади.

– Одамларга нима бўляпти? – деди ўзига-ўзи.

6

Эртасига эрталабдан ташқарида ғовур-ғувур бошланди. Кимдир нималардир деб бақирди, кимдир хўнграб йиғлади, эркак сўқинди. Кетидан аёл киши фарёд кўтарди, жаранглаб шиша синди, ёш йигит кимнидир болохонадор қилганча қувиб кетди.

Малика айвончага чиқиб, деразани ёпиб келди.

– Шунаقا пайтда тинч ўтиришса бўлмайдими? –
дека ўйлади, кейин журналини қўлига олиб, диванга
ўтириди.

Үйдагилар уйғонгунча бир финжон қаҳва ичиб,
журналини варақлаб чиқмоқчи эди. У эрта тонгда,
кундалик ишлари, ишхона, рўзгор ташвишларига
тўла кунни бошлашдан олдин худди шунаقا, иссиқ
қаҳва тўлдирилган нозик финжонни олдига қўйиб,
журналини оз-оздан ўқиб боришни яхши қўрарди. У
бир ўтиришда ўқиб тугатмасди, худди хуштаъм қаҳва-
ни ичиб тугатишни истамай, аста-аста хўплаб борган-
дек, секин, саҳифама-саҳифа ўқиб туширад, бу лаз-
затни имкон қадар узоқроқ чўзишга ҳаракат қилас-
ди. Болалигида онаси эрта тонг маҳали, дераза ёнига
ташланган кўрпачага ўтириб олиб ўзининг севимли
“Саодат”ини варақлаганини кўп марталаб кўрган, на-
зарида тонгги сокинликда қоғознинг шитирлашидан
ёқимлироқ товуш йўқдек туюларди. Ўша-ўша хоти-
расига “Саодат”ни варақлаб ўтирган онасининг сий-
моси муҳрланиб қолган, қачон онасини эсласа, фақат
шу манзара кўз олдига келади: сокин, оппоқ тонг, кат-
такон дераза, ҳовлидан эсган салқин эпкин райҳон
ҳидини олиб киради, онаси, бошида ўзининг доимги
қаймоқранг рўмоли, эгнида кўкракбурма кўйлаги,
саҳифаларни аста-секин, худди бехос йиртилиб қоли-
шидан кўрққандек авайлаб очади. Ўқиркан, лаблари
билин-билинмас шивирлайди...

Малика ҳам “Саодат”ни ўқииди, неча ёшдан ўқий
бошлаганини аниқ билмайди, ҳамон уни ўқииди, на-
зарида шу журнални қўлига олса, онасининг нафаси-
ни туяди, ҳолбуки... Ҳолбуки, ҳар ой янги журнал ола-
ди, онаси ҳам йўқ, ўтганига беш йил бўлган...

Бир вақт телефон жиринглади. Гўшакдан нота-
ниш бир йигитнинг овози келди:

– Ассалому алайкум, кеннойи, яхши ўтирибсизларми? Мен участка нозирингизман. Пўлат ака дам олмаяптиларми? Чақириб беролмайсизми?

Телефон жиринглаганини эшитган чоғи, ётоқдан эрининг ўзи чиқиб келди. Гўшакни олиб, жимгина қулоқ солиб турди-да, “хўп, хозир”, деб оғзи-бурнига дока ниқобини тутиб чиқиб кетди.

“Тинчлик бўйсин, илойим”, – ўйлади Малика ошхонага чиқаркан.

...Тушдан кейин, қизи Нигорани етаклаб хоналрига кириб кетгач, эри:

– Бекорчи ҳою ҳавас одамни эсдан айиаркан, – деди. – Орзу-ҳавасим дейишгани ҳам мақтанчоқлик, шекилли.

– Нима бўлибди ўзи?

– Кеча Мирвоҳид билан қудаси фақат куёв навкарни кутдик, холос, катта тўй қилмаймиз, деб келишганмиз деворишган экан. Кўрқишишган, менимча, карантинни бузганга жиноий иш очиб юбориши мумкин экан-да. Кейин эркак қуда келин-күёвни машинага солиб, жимгина уйига обкетибди. Тўйхонага ҳам ҳабар кетган бўлса керак-да, катта жаримага тушишдан қўрқиб, эшигини ёпиб олибди, қариндош хотинлар ясан-тусан қилиб боришка, киргизишмабди. Шунга Мирвоҳиднинг опаси қуданикига бориб жанжал қипти. Оғирроқ гап қилгандир-да, келинни опкелиб ташлаб кетишибди.

– Вой... эсини еганми... Нима бўлади энди? Роҳила кеннойи-чи?

– Кеннойи йиғлаб, хун бўлиб кетибди. Мирвоҳиднинг опаси, тавба, хотин кишининг оғзи ҳам шунаقا шалоқ бўладими, а? Кўрсанг, шунақанги чинқиряптики... “Э, опа, қизнинг ота-онаси бор, улар жим ўтирганда сиз нега аралашасиз”, деса, оқсоқолга ташланяпти! Охири мен нозирга: “Карантин пайтида жамоат тар-

тибини бузган одамни нима қилишади”, дедим. Нозир: “Керак бўлса, жиноий жавобгарликка тортишади”, деди. “Мана бу опани опкетинг, тинч ўтирган одамларнинг уйига бориб, жанжал қилган, карантин тартибини бузган, анави йигитнинг машинасига тош отиб, ойнасини синдирган, қонун бўйича қанақа жазо кўзда тутилса, берилсан”, дедим. Нозир зийрак йигит экан, дарров тушунди, “Хозир баённома тузаман, патрул машинани чақираман”, деди, опа бир-икки бақириб кўрган бўлди-ю, нозир баённома ёза бошлаган эди, ўчди-қолди. Хуллас, иккала қудани яраштириб, келинни куёвнинг уйига қўйиб келдик. Тўйнинг жаримасини иккала қуда ўртадан бўлашиб тўлайдиган бўлишди. Машинанинг синган ойнасини, опаси тўлолмайди-ю, Мирвоҳид тўлаб беради-да. Асли эркаклар тўйни кечиктирайлик, дейишган экан, хотинлар йифи-сиғи қилиб қўйишмабди-да! Ўзи шунақа, – деб кулди у охирида. – Хотинлар бир иш қилса, охири тўполон билан тугайди.

Малика кулиб юборди:

– Яхшиям, хотинлар бор, ҳамма айбни тўнкаб қутласизлар! Мен ваъда бериб айтаманки, тўй қилсак, ҳамма ишни сиз билан келишаман, асло йифи-сиғи, тўполнон қилмайман!

...Кечга томон телефон жиринглади.

– Вой, опа, тузукмисиз? – яна ўша қўшнисининг овозини эшитди-ю, энсаси қотди.

– Раҳмат, ўзингиз яхши ўтирибсизми? – деди-ю, беихтиёр: “Яна нима дер экан, тинчликмикин?” деб ўйлади.

– Хўжайниз қаёқда ишлийдила?

– Нимайди?

– Прокуратурадамасми? Узр энди, шу пайтгача қаёқда ишлашларини негадир ҳеч гапирмагансиз...

– Йўқ, прокуратурас, – деди-ю, “Нега энди айтишим керак экан”, деб ўйлаб қўйди.

– Мунира опага баённома туздирмоқчи бўптилар-ку. Патрул мошина опкетмоқчи бўпти.

“Жуда ажойиб маҳалламиз бор-да, – хаёлидан кечирди у. – Манаман деган ахборот агентлиги ҳам шунақангি тез ишлолмайди”.

– Мунира опа – бахтсиз, кўнгли ярим қари қиз, жиянига ичи ачигандан гапирган-де қудага, – давом этди қўшни. – Гулдей қизни тўйсиз, ими-жимида уйига обкетволди-ю, арzonгина... Одатда жувонниям ўн-үн бешта хотин минам чиройли қип кутишади. Бу ўн тўққиз яшар қиз, очилмаган ғунча-я, тўйи жувон хотинникиданам хароб бўлди-ю... Хўжайниз опага зуғум қип нотўғри иш қиптила, ўзларига эйтиб қўйинг!

– Синглим, – деди Малика осойишта. – Қўшнининг уйида ўтган синоат билан қизиқиш яхшимас. Узр, ошхонада қозоним қайнаётувди...

Гўшакни жойига қўяркан, маҳалладаги бошқа хотинларга қанақа таърифу тавсиф кетибди экан, деб ўйлади, кейин қўл силтаб, ошхонасига кириб кетди.

7

Димоғида бинафша ҳидини туйиб уйғонди. Бошини ёстиқдан кўтариб қаради. Каравоти ёнида, шундоққина тумба устида кеча Жавлон олиб келган бир даста бинафша митти гулдон бўғзидан ёйилиб чиқиб турарди. “Ў, бугун Наврўз-ку! – хаёлидан кечирди у. – Наврўзга етдикми?”

Бошини ёстиққа ташлаб шифтга тикилди. Шифтнинг бир чеккаси уйи рўпарасидаги симёғочнинг чироғи ташлаган шуъладан ёришиб турибди. Атрофга сукунат чўккан. Фақат эри тумба устида, гулдоннинг

ёнгинасида қолдирған қўл соатининг аста, бир ма-
ромда чиқиллаши эшитилади.

Малика жимликни бузиб қўйишдан чўчиб, кўзла-
рини юмиб олди. Шу пайт гўё тонгги сукунатнинг ин-
тиҳоси келганини билдиргандай ташқарида, маҳал-
ла томонда хўroz қичқирди, кетидан қушларнинг
чуғур-чуғури бошланди.

Ўрнидан туриб, кундалик артиб-суртиш, ювиш,
чайишлардан кейин қаҳвадонни қўлига олди-ю, тўх-
тади. Кеча эри ялпиз, исмалоқ олиб келган эди. Нав-
рўзда кўчага чиқа олмасалар ҳам, ҳеч қурса, байрам
келганини ҳис қўлсинлар! Жавондан ун солинган хал-
тани олиб келди. Кўкатларни тўғаркан, назарида бу-
тун айвончани ялпиз ҳиди тутгандек туюлди. О, бола-
лигига сомсани онаси тандирда ёпарди. Малика ўша
сомсаларни эслаб ютиниб қўйди. Юм-юмалоқ, ҳамири
кўринишидан қаттиққинага ўшарди-ю, бир чекка-
сини тишлиши билан қирсиллаб синарди. Шу заҳо-
ти сомса ичидан иссиқ ҳовур кўтариларди-ю, ялпиз,
исмалоқ, отқулоқнинг аралаш иси димоғига уради.

Наврўзда ҳамиша ҳовлиларида сумалак қайнати-
шарди. Онаси байрамга бир ҳафта олдин тайёргарлик
кўра бошларди. Айвонга, хонтахта атрофига чиройли
сатин кўрпачалар тўшарди, шу куни аммаси келарди,
икки ёнларидаги қўшнилари чиқарди, кеннойилари
эшиқдан чақчақлашиб киришарди, кейин ҳаммалари
хонтахта устига буғдойни уйиб олиб, ўзларининг аёл-
ларга хос сухбатларига берилиб, донни тозалашарди.
Малика уларнинг гапларига аксарият тушунмасди,
лекин аёлларнинг босиқ ғовур-ғувуруни эшитиш-
ни яхши кўрарди. Шунинг учун уларнинг атрофида
ўралашиб, тез-тез чойни янгилаб, пиёлаларни чай-
қаб келтирас, чойни қайтарган киши бўлиб, бир ма-
ромдаги ғовур-ғувуррга қулоқ тутарди. Лекин аммаси
уни ўрнидан турғизиб юборарди: “Қиз бола хотинлар-

нинг гапини пойламайди, болам, уят бўлади". Онаси қовоғини солиб ҳовлига ишора қиласарди: "Бор, сабзи тозала!"

Онаси бир неча кунгача ертўлага ёйиб қўйилган буғдойга совуқ сув сепиб, униб чиқишини кутарди. Малика челакчасига сув тўлдириб олиб, онасига эргашарди, унга буғдой доналарининг ниш уриб чиқишини кузатиш ёқарди.

Отаси ҳовлида ерўчоқ қазирди. Кейин бобосидан қолган катта чўян қозонни ўрнатарди. Ҳовлилари қариндошлар, кўни-кўшнилар, болалар билан аста-секин тўлиб, уйларига байрамона руҳ кирарди. Хотинлар ўзаро бир нималарни муҳокама қилганча буғдойни янчишиб, шарбатини чиқаришарди, Малика қариндош қизчалар билан биргалашиб шарбат юқи тоғораларни ҳавасга чайқашарди. Ўғил болалар бир-бирларининг елкаларига минишиб ўхлик қилишарди.

Кейин аёллар ерўчоқ ёнига тупроқни шиббалаб ясалган қўлбола супачага шолча ташлаб ўтиришарди-да, сумалакни ковлай бошлашарди. Аммаси ошхонада қатлама пиширади.

- Пиёзли қатлама қилиб бери-и-инг, - ялинишарди болалар.

- Хўп, болажонларим, - дерди аммаси. - Пиёэсиз қатламада маза-матра бўлармишми? Албатта, пиёзли қатлама яхши-да!

Кўп ўтмай аммаси дастурхон устига иккита лаганга уйилган қатламалар қўярди. Бири – пиёзли, иккинчиси – пиёэсиз қатламалар. Кейин болаларга изоҳ берарди:

- Мана шунағанги маза-матрасиз қатламани ҳам яхши кўрадиганлар бор-да!

Лекин болалар пиёзли қатлама ортидан "маза-матрасиз" қатламаларни ҳам еб тугатишарди. Шу куни

онаси тандирда кўк сомса ёпарди, ҳовлига йиғилган аёллар кўплашиб кўкатларни тўғраб, кичкина-кичкина зувалачаларни жўвада ёйиб, сомсаларни туғиб беришарди.

– Кўпчилик яхши-да, – дерди холаси. – Мана, бир соатга қолмай бир тандир сомса пишди.

Шу куни ҳовлига қўшнилари Жажа Эдик ясаган узун стол, харракларни қўйишарди. Дастурхон усти қариндошлару қўшнилар олиб келган пишириқлар билан тўлиб кетарди. Кечқурун отаси ҳовли тўрида чўян ўчокда ош дамларди. Амакиси, тоғаси, поччалири, ёнларидаги қўшнилари – Жажа Эдик, Баҳодир амаки ўтиришиб, сабзи тўғрашарди. Ўчақдаги палёнлар чирсиллаб ёнарди, ҳавога доғланаётган ёғ, қайнаётган сумалакнинг аралаш иси кўтарилади.

Оқшом чоғи отаси лаганларни тўлдириб ош сузарди, зарчавадан олтин тусга кирган гуруч орасида маиз, қорақанд доначалари қорайиб кўринарди, палов “чўққи”си устига гўшт соларкан, қозондан кичкина шолғомни ликопчага кўтариб оларди. Отаси ош қилаётгандан қайнаб турган сабзи-пиёз орасига шолғомни ҳам бутунисича ташлаб юборар, таомни сузганда шолғомни тўғраб, алоҳида ликопчага солиб келарди-да, паловга қўшиб ерди.

Ош сузилганда ҳовлида чуғур-чуғур, айниқса, кўпайиб кетарди. Болалар харракларга қатор ўтириб олишарди. Қоп-қора сочли бошлар орасида Жажа Эдикнинг ўғиллари Миша билан Гришанинг сап-сариқ бошчалари ажралиб турарди. Эркаклар орасида ёши ҳаммадан кичик бўлгани учун лаганларни Баҳодир амаки таширди. Жажа Эдикнинг хотини, маҳалла болалари Чуча деб чақирадиган калтасоч малла аёл уйидан катта, чуқур ликопга уйиб тузланган карам олиб чиқарди. Болалар ошга қўшиб карамни ҳам пок-покиза тушириб олишарди.

Сумалакни тун бўйи ковлаб чиқишарди. Малика минг уринмасин, тонггача ўтира олмас, тун ярмига етар-етмас ухлаб қоларди.

Эрталаб уйғонганда ҳовли сокин, қозон усти ёпи-либ, сумалак димлаб қўйилган, шундоққина ерўчоқ ёнидаги хонтахта устида духоба ёпқич ёпилган чойнак, қариндош аёллар, ким пастак курсида, ким қозон атрофидаги супачада тизилишиб сухбат қуриб ўтиришар, онаси дам-бадам ёпқични кўтариб, чойнақдан пахта гулли пиёлаларга аччиқ чой қуийб узатарди.

Кўп ўтмай, қўшни аёллар чиқишарди, ҳовли юзаси чуғурлаган болаларга тўларди. Аммаси алоҳида бир ихлос билан “Бисмиллоҳир-раҳмонир-раҳи-ийм”, дея қозон устидаги катта бўз дастурхонни кўтарарди. Ҳамма сумалак юзасида ҳосил бўлган тасвирни кўриш учун бараварига қозонга эгиларди.

- Қани, нимага ўхшайди? – аммаси барчага бир-бир қараб чиқарди.

Қайнайвериб қуюла бошлаган сумалак димлангандан кейин кул тагида қолиб кетган чўғнинг тафтида оҳиста билқиллай-билқиллай совиганидан унинг юзасида ғалати-ғалати шакллар ҳосил бўларди. Ҳаммага мана шу шаклларни бир нималарга ўхшатиш ёқарди, барча сумалак устида кўринган тасвир ўша йилнинг қандай келишига ишора деб биларди, лекин ажабки, сумалак юзасидаги шакллар ҳамиша хайрли воқеалардан дарак берарди (балки одамлар уни яхшиликка йўйишарди).

Кейин онаси катта чўмични олиб келар, аммаси сумалакни идишларга тақсимларди. Сумалак барақали бўларди, қариндошлар, сумалакни пиширишда қатнашган қўшниларга идишларини тўлдириб берилгандан кейин қозонда қолгани пиёлаларга қуилиб, бутун маҳаллага тарқатиларди.

– Мунчаям мазали-я, – дерди Чуча сумалакка ботириб олган қошиғини яларкан. – Оқ шарбат жигарранг сумалакка айланади. Мўъжизанинг ўзгинаси!

Ҳозир ўша Жажа Эдик ҳам, Чуча ҳам, Гриша ҳам йўқ, Малика отасини кўргани боргандা болалар тили келишмаганидан Жажа деб чақирган дядя Эдик – Эдик амакини, Чуча – тётя, яъни Валя холанинг хотираси ҳурмати Миша – профессор Михаил Эдуардович нинг уйига бирров кириб чиқади. Профессор Малика ни кўрса доимгидек, тили келишмагандан “қ”ни “к” тарзида талафуз қилиб, илжаяди: “Докторлик нима бўлди, а, йоклайсанми, йоки Пўлатни фан докторлиги сангаям етадими?” Малика кулиб қўя қолади.

...Нонушта дастурхонига кўк сомса қўйди.

– Бугун Наврўз-а? – деди Нигора. – Телевизорда байрамни кўрсатадими?

– Йўқ, – жавоб берди Малика хўрсиниб. – Ҳозир карантин, болам. Катта байрамларни ўtkазишмайди.

– Вой, маҳаллада сумалак ҳам бўлмайдими энди? – қизча гўё улкан хафагарчиликка учрагандек тумтайди.

– Сумалакни карантин тугаса пиширишади, – юпатди Феруза.

– Байрам ҳам ўшанда бўлади. Ўзим сени томошага обораман, – ваъда берди Жавлон.

– Бугун ош пиширасизми? – яна тинчимади Нигора. – Шолғом ҳам бўладими устида? Ошга нега шолғом соласиз?

– Бу аямнинг муаллифлик паловлари-да, – кулди Феруза. – Ростдан ҳам, нега ошга шолғом қўшасиз? Ҳеч ерда шунақасини кўрмаганман.

– Буванг соларди шолғомни, – хўрсинди Малика. – Нега десанг, отамнинг болалиги уруш пайтига тўғри келган, уйда онда-сонда ош қилишаркан, гўшт йўқ, ёғ, гуруч йўқ, бувим бечора сабзи-пиёзни қайнатиб, устига оқшоқ солиб дамлаб бераркан, паловнинг устига

гўшт ўрнига шолғомни тўғраб қўяркан. Уруш тугаганда ёғ билан гуруч топишибди-ю, гўштнинг иложи бўлмабди. Ҳаёт оғир экан, анча пайтгача шолғом босилган ош ейишган экан. Ўша-ўша буванг паловга шолғом солади, биламан, сизларга ёқмайди, лекин менга ёқади.

8

Куёш ботди. Уфқقا қадар пасайиб борган тарам-тарам булувлар қизғиши-қорамтири тусга кирди. Оловранг нурлар булуут тасмалари орасидан ёриб чиқди-ю, кўп ўтмай, ёниб битди.

– Яна битта кун ўтди, – деди эри нозик тўрпардани дераза кўзига қараб тортаркан.

– Олдинда яна қанча кун бор экан? – хўрсинди Малика. – Тузалганлар бормикин?

– Бир куннинг ўзида элликта одам вирус юқтирибди, шундан билиб олавер... Бу аҳвол оғирлашиб боряпти, дегани. Бунақа пайтда... кўпларнинг тирикчилиги қуяди, йўғон чўзилиб, ингичка узилади. Ишқилиб, охири баҳайр бўлсин. Сен акангга қўнфироқ қилдингми?

– Кеча гаплашувдим...

– Йўқ, сен бугун қўнфироқ қил, Тошкентга кириш-чиқиш маън бўлди-ку. Зангиотада қолиб кетмадими, ишқилиб? Чала қурилган иморатда туриб бўладими?

– Усталари уй-уйига жўнаган, акам шаҳарда.

– Дуруст...

– Отам акамнинг янги иморатини кўра олмаганидан хафа. Акам Наврўзга яқин обораман деган экан, отам “карантинни баҳона қилиб обормаяпти”, деди.

– Аҳвол маълум-ку, тушунтирмадингми?

– Айтдим...

– Карантин билан ҳазиллашиб бўлмайди...

– Жавлон ҳалигача келмади...

– Жавлон келмаслиги ҳам мумкин. Бунақа пайтда уни биринчилардан бўлиб сафарбар қилишади. Шунга тайёр тур.

– Ну нима деганингиз?

– Ну... Жавлон вирус ўчоғида ишлайди, деганим. Расмий хабарда нима айтилганини тушунмадингми? Касалларнинг учтаси дўхтирлар экан, Жавлон ҳам мана шу хатарнинг ичига жўнайди.

– Э, Худо...

– Йиғлама... йиғлама, кўзёшингни болалар қўрмасин! Ие, қўнғироқ жирингладими?

– Жавлон келди! – Малика сапчиб ўрнидан турди.

Ўғли оғзидағи дока ниқобини, қўлларидағи қўлқопини ечиб ташлади-ю, ҳавони исказ, кўзларини юмди:

– Ў, бу ҳид ошхонадан келяптими? Нима пиширдинглар?

– Яхши овқат, сизга ёқади, – кулди синглиси.

– Опам билан дўлма пиширдик, – дея қичқирди Нигора. – Мен ҳам туғишвордим. Ейсизми? Қорнингиз очми?

– Жудаям оч, ичакларим қулдираб кетяпти, – ўғли қорнини ушлаб юзларини буриштириди.

Нигора хохолаб кулди-да, акасининг қўлларига осилиб олди. Жавлон эркалаб қизчанинг соchlарини тўзитиб ташлади.

Малика уларнинг шўхликларига кулиб қараб турди. Ўғли яна бирпас Нигора билан ўйнаган бўлди-да, кейин айвончадаги шифт бўйи жавондан сафар сумкасини олди.

– Тинчликми? – сўради отаси.

– Мени сафарбар қилишди, дада, – деди ўғли жиддий. – Айтувдим-ку ахир...

– Ҳа, ҳа, айтувдинг, – паришон жавоб қилди отаси.

– Саҳарда ишхонамдан машина келади опкетгани.
Мен касалхонада қолиб ишлайман. Тартиб шунаقا.

Ота бошини силкиди:

- Тўғри, тўғри, карантинда тартиб шунаقا бўлади.
- Қачон келасан? – Малика шундай деди-ю, тўсатдан саволи ўринсиз эканини тушуниб лабини тишлади.
- Билмадим, – хотиржам жавоб берди ўғли. – Кўнғироқ қилиб тураман.
- Ҳа, қўнғироқ қилиб тур, – дея хўрсинди отаси.
- Овозингни эшитсанк бўлгани, шу билан хотиржамизда.

“Нима деяпти? – беихтиёр ўйлади Малика. – Бунақа пайтда хотиржам ўтириб бўладими? Минг қилса ҳам эркак киши-да, бамайлихотир гапиришини қаранг!”

Шундагина қўнглига туккан ишини ҳали ҳам бажармаганини, ўғли билан очик-ойдин гаплашмаганини, бунга имкон тополмаганини эслади.

...Ўшандга у: “Кўнғилнинг кўзи кўр бўлади”, деди ўғлига. Ҳа, шундай деди...

...– Сенга нимаси ёқмади? – деб итобга тутди эри.

Дафъатан айтольмади. Унга нима ёқмаганини айтиб бериши қийин, фақат кўнгли чопмаган, дили ғаш бўлаверган эди. Аммо нега шунаقا эканини изоҳлаб беролмасди. Шунинг учун дидига ўтиришмаган жиҳатларни бирма-бир айтишга қарор қилди:

– Онаси ёқмади. Жуда бесаранжом хотинга ўхшайди, дастурхон устини росаям безатибди, ноз-неъмат деганин тўкиб ташлабди-ю, чинни жавонининг чангани артиб қўймабди. Бор тилласини тақиб ясанибди-ю, кўйлагига дурустроқ дазмол урмаган. Гапининг ҳам тайини йўқ.

Эри уни биринчи марта кўраётгандек юзига тикилиб қаради.

– Сен ҳаммани ўзингга қиёслайсан, шекилли, – деди. – Бор-йўғи жавони чанг бўлгани учун одамни “брак”ка чиқариб бўлмайди.

Малика яна гапиришга чоғланди-ю, ўзига кулим-сираб қараб турган ўғлини кўрди.

– Сен қулма, – деди ўғлига қатъий. – Кўнгилнинг кўзи кўр бўлади.

– Бас, – дея гапни кесди эри. – Мен ўзим қизнинг отаси билан гаплашиб келаман.

– Ахир қиз отасиз ўсган, эсингида йўқми, айтган эдим-ку.

– Ҳеч қурса, тоғаси бордир?

Малика уҳ тортди:

– Тоғаси ҳам йўқ, онаси ёлғиз фарзанд бўлган экан.

Эри нима дейишини билмай тутилиб қолди.

– Майли, яна бир бориб кўр, – деди охири. – Биринчи тасаввур алдамчи бўлади.

Лекин Малика қайтиб бормади, боролмади. Эрим тўғри айтади, биринчи тасаввур кўпинча нотўғри бўлиб чиқади, яна бир бориб кўриш керак, дея уқтириди ўзига-ўзи, аммо негадир ҳеч йўли тўғри келавермади. Ана бораман, мана бораман билан икки ҳафтани ўтказиб юборди. Эсида: сешанба куни эди, ўғлим хафа бўлаётгандир, ҳафта ўртасида бўлса ҳам бораман, деган қарор билан қизнинг онасига қўнғироқ қилди. У аёл Маликанинг сўзини эшитиб турди-да:

– Кеч қолдингиз, – деди кескин. – Қиздан айрилдингиз, келаси ҳафта яхши бир жойдан фотиҳа келяпти. Сўз бериб қўйдим. Қизимгаям жуда ёқди.

Маликага аёл жаҳл аралаш истеҳзо билан гапиргандек туюлди.

– Шунақами? – Малика бирдан енгил тортди. – Ило-йим, баҳтли бўлсин, борган жойида тиниб-тинчисин!

– Раҳмат, ўғлингизга ҳам яхши жойлардан ато қилсин! – бўш келмади аёл.

“Илойим, яхши жойдан ато қилсин!” – ўйлади Малика.

Аммо кечқурун бу хабарни ўғлига қандай айтиши ни билмай боши қотди.

Йўқ, ўғли буни эшитган экан, “хабарим бор”, деди бош силкиб. Ўғлининг оғир-вазмин туриб жавоб қилишини кўриб, онанинг юраги бир тўқилдики... Ўғлим армон қилиб қолди, деб ўйлади, мен шунга сабабчи бўлдим, феълим қурсин, деди.

Кейин эса қизнинг уч ойгина турмуш қилиб, қайтиб келганини эшитди. Юраги яна бир эзилди, шу қизнинг бебаҳтлигига сабаб бўлмадимми, деб ўйлади, ҳозир ўғлининг йўли очилмаётгани, шу пайтгача тенги топилмаётганидан сиқилса, яна ўша қизни эслайди. Қанча дуруст жойларга борди, бироқ ўзига матьқул келган оила унга “йўқ”, деди, розилик бераёзган оиланинг қизи эса ўғлига ёқмади... Ўша воқеадан ке-йин, мана, тўрт йилни ўтказишиди, ўғли ҳамон бўйдоқ. Охирги йили ўзи ҳам совчиликка юришдан безиллаб қолди, доимий мавҳумлик, ишончсизлик уни чарчатиб юборди. Неча марталаб қўл силтади, тақдирига ёзилгани бўлади, деди, лекин Худо ўша тақдирни ҳам инсоннинг қўли билан ёздиради-ку, дея яна отланди. Йўқ, у қизларга катта талаблар қўймаган, ахир олдида қизи бор, бирорвнинг қизини ўпоқ-сўпоқ қилолмайди, аммо негадир бўл-ма-яп-ти!

Балки ўшанда кўзини чирт юмиб, муросага кела-вергани яхшимиди...

Ҳозир майда-чуйдаларини йиғиб, сумкасига жой-лаб юрган ўғлига қараб, кўнглидаги мана шу гаплари-ни айтгиси келди.

– Жавлон, – деди. – Болам... Ҳалиям ичимни бир нималар тимдалайди-да...

Ўғли ҳайрон бўлиб қаради.

– Ўша қизни... Насибани... онаси билан амаллаб тил топишсам бўлмасмиди, дейман... У ҳам, бечора, баҳтсиз... Бу ёқда сен...

– Менга нима қилибди?

– Ҳалигача уйланганинг йўқ, сенга ҳеч ким ёқмаяпти... Насибани унутолмаяпсан-а? Сенга ёмонлик қилиб қўйдимми, деб... Ҳалигача қийналаман, билсанг агар...

Ўғли эса негадир жилмайди. Ниҳоятда беғубор жилмайди у, худди болалик пайтидагидек...

– Йўқ, сиз яхшилик қилгансиз, ая. Агар ўшанда унга уйлансанам, мен ҳам ажрашиб кетардим. Ўшанда гапингиз тўғри экан, буни бир ҳафта ўтар-ўтмас тушунганман.

Малика йиғлаб юборди.

– Нега ҳеч кимни ёқтирмаяпсан бўлмаса?

Ўғли ҳазиллашган бўлди:

– Илгари ғур эдим, қизларнинг чиройига қараб баҳо берардим, ҳозир анча пишиб, талабчан бўлиб қолганман. Сизнинг ўғлингизман-да.

– Менга ўшамай қўя қол, – деди она хўрсина-хўрсина кўзларини артаркан. – Мен аёл кишиман, агар ҳаммаёқни ялаб-юлқасам, ҳар ишни ипидан-нинаси-гача батартиб қилсам, ҳар ҳолда буни тушунса бўлади, сен йигит кишинан, – кейин қўшиб қўйди. – Психиатрлар мендақа феъли атвортга ҳам ном ўйлаб топган экан, аълочи синдроми деган...

Ўғли энди росмана кулиб юборди:

– Э, сизда ҳеч қанақанги синдром йўқ, ўғлингизга ишонаверинг, – онасининг елкасидан қучиб, худди ёш болани юпатгандек силкитиб қўйди. – Сиздан ибрат олиб ёмон бўлмадим-ку, Павлов университетида¹ ўқи-

¹ Академик Павлов номидаги Санкт-Петербург биринчи давлат тиббиёт университети назарда тутиляпти.

дим, ишляяпман, мана, Худога шукур, қўлимдан иш келади, уқтирганларингиз фойда берди. Каантин тугасин, уйланаман, бир ой ичидәёқ уйланаман, тезда тўй қилишга қийналиб қолмайсизми?

Малика бошини чайқади: “Яна ҳазил қиляпсан-а?”

9

Нонуштадан кейин Малика рўзғорга керакли майдада-чуйдалар рўйхатини тузиб берди-да, эрини кузатгач, бор қариндошлари, ўртоқларига қўнғироқ қилиб чиқишига аҳд қилди. Телефон ёнига ўтириб олди-да, дафтарчасидаги рўйхатдан ўзига кераклиларини белгилади. Қараса, қариндошлари, ўртоқлари кўп экан, яrim куни кетиши аниқ. Шунинг учун рўйхатни икки қисмга бўлди: биринчи бўлиб энг яқин қариндошлари, дугоналари, кейин узоқроқ қариндошлари билан ҳолаҳвол сўрашмоқчи бўлди. Рўйхатни аниқлаган пайдада яна фикридан қайтди. Узоқроқ қариндошлардан бошлаган маъқул, деди, улар билан гап-сўз қисқароқ бўлади, яқинларинг билан одатда узоқроқ гаплашсан, одамнинг ўз яқинига айтадиганлари кўп бўлади.

Шундай қилиб, аввало қуда холаларга – акаси, укаси, қайнинглисининг қайноналарига қўнғироқ қилди. Кейин амакиваччалари, холавачча ва тоғаваччалари, аммаваччаларига навбат келди, кейин яқин қариндошлар – иккала холаси, иккала аммаси, учала тоғаси, амакиси, кеннойилари, овсини, қайнинглиси... қариндошлари кўп экан! Шукурки, ҳаммалари соғ-саломат, ҳаммалари Малика билан эри, болалари саломат бўлгани учун, Маликанинг овозини эшитганлари учун хурсанд экан! Ҳаммалари бир иш билан банд, улар учун каантин битирилмаган у-бу ишларни бажариб олиш учун бир имконият ёки оламда бўлиб турган, яаш тарзларига ҳеч бир ўзгартиш киритолмаган бир воқеа.

...Амакиси:

– Ўтирибман, болам, оёқдан қолганман, карантин бўлса ҳам, бўлмаса ҳам шу... Қайтага акам тузук, ҳали бардам-бақувват, акангни иморати битдими, акам кўргани бораман деб, боролмабди...

...Аммаси:

– Невара келинга каникул берган, ҳозир биргалашиб талқон қовурамиз, деб турувдим, ўргатвомман, агар ўлсам, савоби бувимга тегсин деб, ҳайитимга ўзинг қовурасан, дедим. Ҳозир дастахончилар йўқ бўп кетган, талқонни ким қиласди? Ҳайитда талқонсиз исчиқариб бўлармишми?

...Тоғаси:

– Ўтирибман, нима қилардим бошқа? Жума намозга чиқилмаётиби. Уйда ўқийман. Кечадан “Тафсири ҳилол”ни бошладим, шу ҳафта охиригача ўқиб тушираман, Ўзи куч берса... У ёғига яна Ўзи билгувчи...

...Аммаваччаси:

– Нуриддин келолмий қолди, чартер рейсни кутиб Москвада, аэропортда ўтирибди. Бу йилча бормий қўя қол, девдим-а... Кулоқ солмади-де... Мана энди буёқда ман ўтирибман, юрагимни ҳовучлаб... Манзура дурустми, келадиганми? Билмийсанми? Униям уйидан илон чиққан-де, кўмилибгина ўтирса бир нима бўп қолади...

...Тоғаваччаси:

– Ишга бориб-келиб турибман, банк ишламаса бўмийди-ю... Ишхонадан мошина келади. Уй тинч, Худога шукур. Ўзинг қалайсан?

...Осини:

– Ниманинг шовқиними? Дадаси болаларди ишга солиб, булғори эктирияпти. Майли, ўқисин, деб бўш қўйиб, ўргатиб қўйиппиз-да, кетмондан чиқиб қопти денг, ҳеч экинга тушгиси келмаяпти... Риштонда ун қимматлаб кетяпти, Тошкентда арzonмикин?

Қайноаси:

- Вой, пошшо қизим-ей... Тузукман. Ишсиз ўтирумай деб Ферузахонга тўшак қавияппан... Бахти очилса зора...

...Укаси:

- Ҳаммомдаги жўмракни тузатаётувдим... Хотин опам чақирдилар деганига хавотир бўпман... Тинчмисиз?

...Синглиси:

- Ишлаб турибман, ишхонам яқин, пиёда етса бўлади. Нигора яхшими? Гапга қулоқ соладими, ишқилиб?

...Акаси унинг товушини эшитиб, қичқириб юборди:

- Э, Малика, сингилжон! Ўзим ҳозиргина сен билан бир дардлашсан деб турувдим-да.

- Тинчликми?

- Худога шукур! Шунақангги тинчликки... Инстаграмда мени қўрдингми?

- Йўқ... Нима гап?

- Ие, кун қаҳрамони бўлиб кетдим-ку! Акангдан хабар оласанми, сингил? Телевизорда ҳам, газетада ҳам, интернетда ҳам ўзим-у, менинг машинам! Фейсбуқдан тортиб, инстаграмгача безабман!

- Бир гап бўлдими ахир?

- Машинамга рухсатнома олгани ариза ёзувдим, “Ягона дарча”га борсам, мухбирлар боплаб расмга тушириб ётиби! Куръер машина шунаقا бўларканми, дейди! Қанақа бўлсин ахир? Мен универсал одамман, директор, бухгалтер, кассир, куръер – ҳаммаси ўзимман! “Жип”им ҳам ўзимга ўхшайди, банкками, омборгами, қариндошларнинг тўйигами, бозоргами, чойхонагами, ҳаммасига боради, аптекаларимни дориларини ҳам шунга ортиб келавераман, олифтагарчилик қилиб, алоҳида машина ёллаб ўтирумайман, баъзида кечикиб кетса, сотувчиларимни ҳам шу машинамда уйига обориб қўяман. Шуни ўшаларга қанақа қилиб

тушунтирай? Йўқ, рухсатнома бермади! “Жип”ини уялмасдан куръер машина деб ёздириди”, деб танқид қилишибди мени.

– Аптекаларингиз ёпилдими?

– Ёниб бўладими? Одамларга дори керак-ку! Лекин ҳукуматга эътироz қилиб бўлмайди. Қўшнимнинг “Дамас”ини ижарага олдим. Ишонч қофоз қилдириб борувдим, берди рухсатномани!

– Нотариус ишлайптими?

– Соддасан-да! Зарил бўлгандан кейин ишлайди! Халқнинг қозони бор, бу қозон қургур қайнаши керак!

Малика кулиб юборди:

– Жуда ажойибсиз-да, aka!

10

Эрталаб янги қоида чиқди. “Эртадан шаҳарда оддий машиналарнинг юриши тақиқланади, фақат махсус рухсатномаси бўлган автомашиналаргина ҳараратланиши мумкин...”

Пўлат музлаткични, айвонча деворига ўрнатилган жавонни текшириб чиқди. Кейинчалик ташиш қийин бўлмасин учун қўлда ташиш нокулай бўлган баъзи егуликларни келтириб қўймоқчи эди.

Машинасини бозор томонга бурди, бозор дарвозаси олдида машиналар турнақатор бўлиб киришга навбат қутаётганини қўргач, “Менга ўхшаб “ҳисобини тўғри оладиган” кўп экан-да, деб ўйлади. Чиқиб кетиш қийин бўлади, деб машинасини бозордан нарироққа, йўл четидаги тўққиз қаватли уйнинг бурчагига қўйиб келди.

Бозор гавжум эди. “Тинчгина супермаркетга кираверсам бўларкан”, дея ўқинди. Супермаркетда одатдагидан қимматроқ пул тўлашга тўғри келарди, шунинг учун Пўлат мева-сабзавотни бозордан олишни маъқул кўтарди. Чунки бозорнинг энг қадрсиз моли

ҳисобланган кўкатга ҳам ўн беш фоиз устама тўлаш ёқмасди. Ҳозир рўзгор ғамида ғимирлаётган харидорларни, тирикчилик кўйида растага чиққан майда савдогарларни кўргандা “Тирикчилик тошни ёради”, деган гапни эслади.

Бозор зоҳиран ўзгармаганди, ўша-ўша расталар, ўша-ўша гавжумлик, ўша-ўша шошганлар... Фақат кираверишдаги катта дарвозани ёпиб, ҳаммани ён томондаги кичкина эшиқдан киргизишяпти, эшикнинг икки чеккасида оғзига қалин ниқоб тутган икки киши, кўринишидан тўппончага ўхшаб кетадиган лазер термометрни кирувчиларнинг чаккасига теккизиб иссиғини ўлчагандан кейин киришга рухсат беради, улардан сал нарида респираторли ниқоб тутиб олган тартиб посбони атрофни кузатиб туради. Савдогардан тортиб харидоргача, фаррошдан тортиб аравакашгача, ҳамманинг оғзи-бурнида дока ниқоб.

Аммо ботинан кўп нарса ўзгарган, бозордаги аввалги кайфият, киши тасаввурида фаровонлик, тўқчилик, осойишталик уйғотадиган руҳ кўтарилиган, харидорларда ҳам, савдо аҳлида ҳам жонсараклик, асабийлик кузатилади. Расталар оралаб юрган маҳсус оқ комбинезон кийиб, респиратор ниқоб таққан одамлар киши дилида ҳадик уйғотади, ниқоби тепасидан иккитагина кўзи кўриниб турган тартиб посбонлари худди бирон хавфдан дарак бераётгандек туюлади, одамлар орасида кўқимтири маҳсус куртка кийган бозор ходимлари кўринади.

Айниқса, картошка, гуруч, макарон сотаётгандарнинг савдоси қизиган, ёғ идишлари, ун, шакар халтлари тахланган дўконлар олдида одам тирбанд. Бирон тартибсизлик чиқмасин учун бу ерда ҳам яшилтоб кийимли посбонлар кўринади. Улар одамларни ғуж бўлиб турмасликка чақирадилар, дўконга битта-бит-

талаб киришни буюрадилар, бу эса худди катта хатар арафасидек туюлади.

Бир вақт дўйконлардан бири атрофида шовқин кўтарилди. Аёл кишининг қичқириғи эшитилди. Атрофини одамлар ўраб турганидан у ерда нима бўлаётганини кўриб бўлмасди, шовқинни эшитиб, нариги томонда яна яшилтоб махсус кийимли икки йигит ўша томонга шошли. Посбонлар одамлар даврасини ёриб бақалоқ бир аёлни қўлтиқларидан тутганча олиб чиқиши. Хотин ҳамон бир нималар деб қичқиради.

Ўз-ўзидан атрофга томошабин йифила бошлади. Кимдир қўл телефонини олиб, тасвирга туширишни ҳам бошлаб юборди.

– Ҳаммага етади, опа, ортиб ҳам қолади, – деди бозор хизматчиси, дароз бир эркак. – Омбор тўла, Худога шукур. Тугаса, эртага яна опкелишади.

– Э, ман эртага келомийман, мошинала юрмаса! Такси бўмаса, қанақа опкетаман? – бақираиди хотин. – Бутун танишларига “без очерет” бервотти-ю! Турвураманми ҳадеб?

Навбатда турганлар жунбишга келиши. Охирги кунларнинг таҳликаси, хавотири ҳаммани шунчалик чарчатиб юборган эдики, одамлар ўз қиёфасини унтар даражага келган, қақшаган асаблар салга чатнарди. Бақалоқ хотиннинг қичқириғи мана шу учқун вазифасини ўтади. Ҳамма бараварига дўйонга отилди. Тартиб посбонлари бунақангидан пайтларда нима қилиш кераклигини жуда яхши билишарди. Бир зумда қўлма-қўл ушлашиб, занжир ҳосил қилишиди-ю, дўйон эшиги олдини тўсишди.

– Одамлар эсдан оғяпти, – деди кимдир орқадан. – Шундоқ пастдаги растага ўтса, ҳамма нарса бор, bemalol олса бўлади-я...

– Бу дўйонда моллар арzon-да...

– Вой, фарқи ҳеч қанча эмас, асабини бузганга арзимайди...

– Камбағалга ўша ҳеч қанча эмас деганингиз ҳам пул-да!

Бир вақт ўнг томондаги растанда жанжал кўтарилди.

Пўлат бу издиҳомда ортиқ қолгиси келмай, дарвоза томонга қараб юрди. Дарвозага етиш учун автомобиллар қўйишга мўлжалланган майдонни кесиб ўтиш керак эди.

Темир панжаралар билан ўралган бу майдоннинг растанга туташ қисмида картошка ва пиёз ортган юк машиналари қатори, машиналар кузовига чиқиб олган сотувчиларнинг қўли-қўлига тегмайди. Кимга қопи билан, кимнинг катта-катта тўрваларини тўлнатиб картошка беришади. Бу ерда ҳам ҳамма шошган, асабий...

“Сал ўтмай янги картошка чиқади-ку, қоплаб олишдан нима фойда? – ўйлади у. – Барибир ишлатиб улгурishмайди, кўкариб кетади”. Аммо ҳозир буни ҳеч ким ўйлашни истамасди, балки кўчага умуман чиқолмай қолишдан, янги картошкага етишиш у ёқда турсин, мана шу кўкариб кетадиганидан ҳам қуруқ қолишдан қўрқарди...

Расталардан чиқаверишда киракашлар мижоз кутиб туришади. Аммо узоқ кутмайдилар, мижозлар тезда топила қолади, кира ҳақи ҳам “талабга яраша”. Ким аччиқланиб киракашга дўқ уриб кўради, ким сўзсиз терс бурилади-ю, юкини кўтариб инқиллаганча нари кетади, ким юмшоқ сўз билан нархни сал бўлса-да, туширишга уринади, ким эса умуман савдолашиб ўтирайди... Киракашлар бамайлихотир, бугун уларнинг савдоси қизиган, ахир эртадан кўчага чиқмайди, ҳеч курса бироз маблағ йиғиб олар-ку! Тирикчилик ҳамманинг гарданига ўзига яраша юк осган!

Пўлат бирйўла улгуржи бозор – Ўрикзор ёки Экобозорга бораверган маъқул экан, дея ўйлади, аммо

у ерда ҳам машиналар тирбанд бўлиши мумкин эди, қолаверса, харидлари қоп-қоп маҳсулот эмас (қоп-қоп сабзавотни ёки ун-гуручни қаерда ҳам асрайди?), шундай экан, ёнилғи сарфлаб шаҳарнинг нариги че-тига бориш ҳам ақлдан эмас.

Шу асно Лимонарийдаги улгуржи дўкон ёдига тушди-ю, рулни Катта ҳалқа йўли томон бурди.

Каттагина бир ҳовлининг усти ёпиқ гаражида очилган бу дўконни бир-бирига икки томчи сувдай ўхшаган Ҳасан-Хусан эгизаклар юргизарди. Дўкон анча осуда эди, ерда беш-олти хил гуруч, етти-саккиз тур макарон, яна мош, нўхат, ловия кабилар тўлдирилган оғзи очиқ қоплар, одам бўйи токчаларда зич қилиб терилган турли хил қадоқдаги егуликлар. Шаҳардаги таҳлика бу ерларга етиб келмаган, харидорлар ҳам қандайдир вазмин, дўкон эгалари осойишта, бошига оппоқ қалпоқ кийиб олган елкадор бир йигит ичкаридан ҳали қоп, ҳали қути, ҳали шаффоф плёнкаларга ўралган пластик идишлар тўпламини кўтариб чиқади.

“Ажаб, бозор билан бу ёқнинг ораси нари борса етти чақирим келади-ю, орадаги тафовутни қаранг!” – хаёлидан кечирди Пўлат.

11

Карантин Маликанинг кундалик одатларига ҳам ўзгартиш киритиб юборди. Ҳар кун эрта тонгда, ҳали кўшнилари ухлаб ётганда ташқаридан ҳеч ким ушламаган бўлса ҳам, кўча эшик тутқичларига спиртли эритма пуркаб чиқади, резина қўлқоп кийиб, уйи бўсағасини, зинапоя майдончасини, зина тутқичларини хлорли сув билан ювади. Баъзида меъёрдан ошириб юбормадиммикин, деб ўйлади-ю, кейин майли, эҳтиёт бўлган яхши, деб қўяди.

Қаҳва дамлаш учун сув қайнатаётиб, интернетдаги хабарларни кўздан кечириб чиқади. Ортиқча

тафсилотларга чалғимайды, фақат қисқа мазмунини ўқыйди, ҳамма ахборот сайтлари очилиши билан вируснинг катта-катта қилиб ёзилган номи кўринади, телеграм, инстаграм, ижтимоий тармоқ, ҳамма ёқда ҳар куни вирус, карантин, "...юқтирганлар сони фалончага етди", "вирусдан фалонча одам вафот этди", бутун дунё фақат шу вирус номини айтиб уйғонаётгандек, шу вирус номи билан уйқуга кетаётгандек туюлади. Охири хўрсишиб, қаҳвасини дамлайди-ю, диванга ўтириб, "Саодат"ни қўлига олади. Бир соатча ўқыйди, кейин айвончага чиқиб, нонушта тайёрлайди, аксарият шу пайтда ўғлидан телефонига хабар келади, ўғли атиги учта сўз ёзади: "Ассаломалайкум, мен яхшиман". Малика учун мана шу учта сўздан зиёдароқ ёқимли, ширин калом йўқдек, унинг бугунги, эртанги куни мана шу учтагина сўз ёритиб тургандек кўзлари ёшланиб, дили тўлқинланиб кетади.

– Жавлондан хабар келди, – дейди эрига. – Яхши юрибман, деяпти.

Эрининг юзлари ёришиб кетади.

– Менга ҳам ёзди, – дейди у.

Холбуки, у электрон хатларнинг имкониятларини яхши билади, ёзилган битта хатни кўплаб манзилга кўп нусхада жўнатавериш мумкин, ҳатто бир кунда ёзиб қўйган хатини сон-саноқсиз кунлар давомида яна ўша кўплаб манзилларга жўнатса бўлади. Аммо ўғли хатни айнан ҳар куни тонгда, унга алоҳида, отасига алоҳида ёзадигандек туюлади, Малика шунга қаттиқ ишонади.

– Акангдан хат келди, – дейди нонушта пайти қизига.

Нигора мақтанади:

– Акам менга смайлик жўнатдилар! Опам кўрсатдилар.

“Э, Худойим, – ўйлайди у. – Битта кичкина нарса билан ҳам одамнинг бошини кўкка етказиш мумкин экан-ку!”

Шундай пайтларда ўзининг ҳар ишга улгуриш илинижда елиб-юргургандлари, эътироф учун, нуфуз учун интилганлари бирам майда бўлиб кўринадики...

...Эсида: ўғли кўричак бўлиб қолганда номзодлик ишининг ҳимоясига бориши керак эди. Эрта тонгдан сочига жингала қиладиган пластмасса найчаларни тақиб олган, атайлаб шу кунга тикирилган зумрад ранг кўйлагини кийим илгичга илиб, сотиб олинган нозик пошнали туфлисини қутидан чиқариб кийишга тайёрлаб қўйган, эрининг кечқурунги зиёфатда кийишига мўлжаллаб оппоқ кўйлагини, қоп-қора костюм- shimини дазмоллаб қўйган, ошхонада шошиб нонушта тайёрларди. Жавлон ўрнидан тура солиб ҳожатхонага юрганини, ўқчиб қайт қилганини кўриб хуши бошидан учди. Бора солиб, пешонасини ушлади: қайноқ. “Энди нима қиласман? – йиғлагудек бўлди у. – Келиб-келиб шу куни-я!”

Эрига ёлворди:

– Жавлоннинг мазаси йўқ, дўхтир чақириб, бола билан ўтириб туринг, мен ҳимоямга бориб келай...

– Эсинг борми, – аччиқланди эри. – Қанақа онасан ўзи?

Малика йиғлаб юборди:

– Сиз-чи, сиз ота эмасмисиз? Қанчалик тайёргарлик кўрганимни биласиз. Лоақал шунаقا пайтда суяшни ўйлайсизми?

– Ҳимоя ҳаёт-мамот масаласими ахир? Яна салга кечиктирса осмон узилиб тушадими?

– Шундоғам ҳимоям чўзилиб кетди-ку! Ўзингиз ёқлаб олдингиз-да, а? Нега ҳамма балога фақат мен рўпара бўламан? Институтда сиздан яхшироқ ўқирдим, ўзингиз ҳар ишда мендан ёрдам сўрайсиз-ку,

мақолангизнинг таҳриими, маърузангизнинг таржимасими, лекин менга ёрдам қилишни хоҳламайсиз! Нега?

Эри шунда икки оғизгина гап айтди, холос:

– Сен – аёлсан.

Малика кўзларини катта очиб, эрига қаради-ю, бирдан йиғидан тўхтади.

– Ҳа, тўғри айтасиз, – деди кўзёшларини артиб. – Мен – аёлман. Аёл ҳамиша илож топади, эркак дегани ҳар нарсани хотинига ортмоқлаб қутулади. Ўзим илож топаман, шу пайтгача топганман! – Эрининг пиджагини илгичдан олиб узатди. – Борақолинг! Ишхонангизга кеч қолманг.

Эри унга анграйиб қараб турди-да, кейин елкасига пиджагини ташлаб индамай чиқиб кетди.

Малика астагина ёпилган эшикка қараб, яна ийғлаб юборди. Кўзёшларини тиёлмай ўғлининг иссиғини ўлчади, бечора боласи қорнини чангллаб фужанак бўлганини кўриб, “Тез ёрдам” чақирди. Кейин илмий раҳбарига қўнғироқ қилди. Раҳбари олди-кети невара билан тўлган кекса киши эди.

– Майли, майли, қизим, – деди. – Болангизга қаранг, ҳимоя ахир бир кун ўтади-да, муҳими – диссертацияни ёзиб қўйгансиз. Ўзим бу ёқда ҳаммасини келишаман, хавотир олманг.

...Малика чошгоҳгача касалхонада, ўғлини олиб кириб кетишган эшикка термилиб ўтириди. Эрининг шу пайтгача уни изламагани, ўғли билан қизиқмагани шу қадар алам қилдики... Ахир Жавлон фақат Маликанинг ўғлими? Кўзларига ёш тўлиб келаётганини сезиб, қўллари билан юзини тўсди-ю, бошини эгиб олди.

Бир вақт кимдир елкасига қўлинни қўйди. Бошини кўтарди: эри. Малика ростдан ҳам сени кўряпманми, дегандай кўзларини катта-катта очди.

– Уйга қўнғироқ қилсам, гўшакни қўтармадинг, ҳа-
вотир олиб борсам, эшик ёпиқ...

– Қандай қилиб топдингиз бизни?

– “Тез ёрдам” бўлимидан сўрадим, шу касалхонани
айтишди.

Кўнгли тўлиб, хўнграб юборди.

– Кўйсанг-чи, – эри унинг елкаларини силаб юпат-
ди. – Бас қил энди... – Кейин хотинининг қулоғига
шивирлади: – Сен... сочингдаги анави нарсаларингни
ечиб ол.

Малика шошиб қўлини бошига теккизди. Сочида-
ги пластмасса найчалари билан келаверган экан...

...Ўшанда ҳимояси олти ойга кечикиб кетди. Ўн
беш кун ўтар-ўтмас раҳбари қазо қилди, янги раҳбари
ўтакетган инжиқ одам бўлиб чиқди, бутун ҳисоб-ки-
тобларини имиллаб, қайтадан текшириб чиқди, тай-
ёр ишнинг тўртта бобини янгидан ёздириди. Малика
ўша пайтда чеккан азобларини эсласа...

Шундай мушкул кунлардан қандай қилиб ўтган
экан-а? Шунчалик кучи, иродаси бор эканми?

Хозир ўғлидан дарак кутишнинг ўзигагина юраги
сиқилиб кетяпти. Йўқ, бугунги куни аввалгиларидан
оғирми ёки енгилми, Малика буни таққослаётгани
йўқ. Ҳар бир куннинг дарди ўзича бўлишини яхши
билади у. Унга бошқа ўй тинчлик бермайди: инсон бо-
шига ташвиш тушмаган кун борми ўзи? Ўйлаб қараса,
шу кунга қадар бир ташвишдан қутулиб, иккинчиси-
га тутилиб яшабди! Бирон кун беғам, беташвиш, ба-
майлихотир ўтириб, шунчаки, оддий нарсалар ҳақида
гаплашиш, масалан, об-ҳаво, пиширган овқати, бола-
ларнинг ёқимли қилиқларинигина муҳокама қилиш
мумкинми? Наҳот тирикчилик деган бу фидиракни
тўхтатиш, ҳеч бўлмаса, уни бетафт даладан эмас, чи-
ройли чаманзор оралаб ўтказишнинг иложи йўқ?

12

Эрталаб эри унга интернет хабарини кўрсатди.

– Икки киши ўлибди, ўқидингми? – деди.

Малика бош силкиди:

– Ишқилиб, қолганлар омон бўлсин... – Кеча ёйган кирларини йифиштириш учун айвонча деразасини очиб, ташқарига эгилди. – Йўлкада итлар санқиб юрибди, – деди.

Пўлат дераза пардасини хиёл кўтариб қаради:

– Кеча дўйконнинг атрофида кўрувдим бу итларни. Настя опанинг итлари. Яна чиқарворибди-да. Биррамас, учта ит-а, қорни очга ўхшайди. Нозиримизга қўнғироқ қиласай, маҳсус отрядни чақириш керак, итлар тағин биронтага ташланиб қолмасин, қорни очса, бу маҳлуқлар жуда хавфли бўлади.

Эри ичкари хонадан қўл телефонини олиб чиқди. Керакли рақамни топиб тугмани босди-да, кутиб турди.

– Гўшакни олмаяпти, – деди. – Ҳали уйғонмаган шекилли. – Кейин чойнакдаги иссиққина чойдан пиёласига қуйиб олди.

– Кел, ёнимда бирпас ўтириш, – деди айёrona қулимсираб. – Яқин келмаганингга ҳам аллақанча вақт бўлдими?

Малика жилмайди:

– Болалар уйғониб қолади.

– Мен сенга ёнимга кел, бирпас гаплашиб ўтирайлик у ёқ-бу ёқдан, бирон-бир ёқимлироқ нарсани эслашайлик, деяпман. Гапни нега эгриликка бурасан?

– Қўйинг-е, нега эгриликка бурай? – Малика юзлари ловуллаб кетаётганини сезиб, кафтларини чаккаларига босди.

Эри баралла кулди. Кейин пиёлани хотинига узатди:

– Ол, мен ҳам чой узатай сенга! Одамнинг ёши каттайгандан кейин эҳтирослари ҳам босилиб, кузги сувга ўхшаб сокин тортиб қолади, а? – Маликанинг елкасидан қучиб, бошига бошини тиради: – Қачон қарама, елиб-югурмиз, “унга улгуриш керак”, “бунга улгуриш керак” билан тонг отади-кун ботади, шунақсанги фаол бўп кетганмизки, оддийгина гаплашиб ўтиришга вақт етмайди, ҳаёт “мана сенларга” деб уйга ўтқизиб қўйди, а?

Шу пайт пастдан кимнингдир фарёди эши билди. Малика сапчиб туриб, деразага отилди. Пастда ёшгина жувонни учала ит курсаб олиб, қўлидаги халтани тишлаб тортқилар, жувон қўрққанидан додларди-ю, ўзини йўқотиб қўйганидан қочиш эсига келмас эди. Шу пайт итлардан бирига каттагина ғишт парчаси келиб тегди-ю, ит увиллаганча нарига қочди. Қолганлари қорни очлигидан шеригининг увиллашига парво қилмай, ириллаганча халтани тишлаб тортаверишди. Уйнинг бурчагидан дўкон сотувчиси – сурхондарёлик йигит супурги боғланган узун таёқни қўлида силталағанча югуриб чиқди-да, таёқ билан калласи катта малла итни урди. Зарба қаттиқ бўлганидан итнинг бели майишиб кетди, увиллаб чекинган бўлди-ю, кеин ўзини ўнглаб йигитга ҳамла қилди, йигит ўзини йўқотиб қўймади, яланг қўли билан итнинг бўйнидан сиқиб ушлаб, нарига отиб юборди, шу пайт халта йиртилиб, ичидаги нонлар сочилиб кетди-ю, шундагина жувон қочиш кераклигини англаб, ўзини уй йўлагига урди, учинчи ит эса эпчиллик билан ерга тушган нонни тишлаб олиб, қочди. Нариги шериклари уни қувиб кетишиди.

Шу онда Пўлатнинг қўл телефони дириллаб, кетидан шошқин куй эши билди. Эри телефоннинг дисплейига қаради-ю, ошиғич қўлига олди.

– Э, ваалайкум ассалом, ҳа, мен қўнғироқ қилувдим. Настя опа яна итларини чиқарворибди, боқишни хохламай қолди, шекилли, ихтисослашган отрядни чақириб, бервориш керакмикин, демоқчи бўлувдим... Укам, огоҳлантирганингиз билан фойдаси бўлмабди-ку! Ҳозиргина пастда ўша итлар бир аёлга ташланиши, яхшики, Маҳмуд аканинг дўкони очиқ экан, сотувчиси чиқиб, итларни ҳайдаворди. Ҳа... Шундай қилинг!

– Настя опа вирус юқтиради, деб қўрқиб ҳайдаб чиқарган экан, кеча ўзига тушунтирганман, олиб кетган эди, дейди. Ўзинг торгина битта хонада яшасанг, учталаб итни нима қиласан асраб?

...Чошгоҳга яқин телефон жиринглади. Малика капкирни ташлаб, даҳлизга югурди, гўшакни кўтарди.

– Салом алейкў-ўм! – дея чўзилган овозни дарров таниди: Саъдулло!

– Ваалайкум ассалом, яхшимисиз? – деди истамайгина. Ўзи атрофга олазарак қаради: “Нигора қани?” Қизча тағин телевизорни қўйиб олган, ўнинчи мартадир, Харри Поттернинг саргузаштларини берилиб томоша қиласарди.

– Нигор яхшими? – сўради Саъдулло.

– Дуруст. Нимайди?

– Хабар олиб телефон қиляпман. Нима, мумкин эмасми?

– Йўқ, нега энди? Ҳайрон бўлаётганим – неча замонлардан бери дарагингиз йўқ эди-да.

– Вақт йўқ, тириклилик... Синглийиз телефон қип турибдими?

– Шукур.

– Нигор нечанчи мактабда ўқийди?

– Мактабга чиққанда сизга айтувдим-ку.

– Эсимда борми?

– Нигорани чақирайми? Гаплашасизми?

– Кейин... Мактаби қаёқда?

- Тинчликим?
- Манга справка керак. Ёрдам олишга.
- Ёрдам?
- Мошинани рухсатсиз күчага чиқармаётибди-ю!

Таксицилик касод бўлди, хабариз бордир? Сигаретгаям пул тополмий қолдим-ку! Ҳокимиятга чиқиб, ёрдам беринглар, болам бор, десам, неччи ёш, қатта ўқийди, дейди. Справка оборсам, ёрдам олувчиларни рўйхатига киргизаркан. Қайси мактаблигини айтса-йиз, ўзим бориб гаплашвурман.

- Мактаб ёпиқ ҳозир, борган билан ҳеч кимни тополмайсиз.
- Э, бу ёғи мани бошоғриғим, хўпми? Гапни нега айлантирас? Сиздан ош-нон сўрадимми?
- Болани рўкач қилиб ёрдам сўраш уят эмасми? Айниқса, ўзингиз ташлаб қўйган болани.
- Ман ташлаганим йўқ! Суд ўзи болани онасида қолдирган. Тўғрими? Болани ташлаган синглийиз, ё нотўғрими? ...еб юрибдими Туркияда? Ман ўзимни ватанимда ўзимни хукуматимдан ёрдам сўравомман. Мани ишсиз қип қўйдими, ёрдамниям берсин!

Шу пайт ётоқдан эри чиқиб келди-да, индамай Маликанинг қўлидан гўшакни олиб, хотинига “Нари тур!” дея ишора қилди.

- Божа, – деди вазмин. – Ваалайкум ассалом! Тушундим... Хўп, мен ёрдам бераман. Йўқ, мактабига бориши маслаҳат бермайман, у ёқдаям ҳар хил одам бор, болангиз уялиб қолмасин. Мени олдимга келинг, ўша ёрдам пулини ўзим бераман. Бегараз. Йўқ, ниятим холис. Нега? Нигоранинг отасисиз, қариндошмиз, ахир! Хўп. Келинг.

Гўшакни қўйгач, нариги хонага мўралади. Нигоранинг берилиб телевизор қўришига бирпас қараб турди-да, хотинига “Бери кел”, дея ишора қилиб, ётоқхонага кирди.

– Нега гапни кўпайтирасан? – деди эшикни зичлаб ёпаркан.

Малика лабини тишлади.

– Нигора эшитиб қолишини ўйламайсанми? Отасини ким деб ўйлайди кейин?

– Нигора – эслик қиз, – хўрсинди аёл. – Отасининг кимлигини билса керак. Еган калтакларини унутмандир.

Эри уҳ тортди:

– Зап ғаройиб синглинг бор-да! Саъдуллога тек-кунча ҳамма ёқни ағдар-тўнтар қилувди, бермасанглар ўзимни у қиласман, бу қиласман, деб. Кейин бўлса, “Дод, ажрашгани қўймасанглар ўзимни у қиласман, бу қиласман”. Туркияга кетиши ҳам шу: йўлимни тўссанглар, ўзимни у қиласман, бу қиласман! Шунча одам бўла туриб битта сингилга кучларинг етмаса-я!

– Нима қиласман, айтганини қилдириб ўрганган!

Малика ортиқ бу ҳақда гаплашгиси келмаганидан:

– Саъдуллони келади, деб ўйлайсизми? – дея сўради.

– Кўрамиз, – жавоб берди Пўлат. – Келса, пул бераман, келмаса... орқасидан қидириб бормайман.

13

Уйда ўз-ўзидан қатъий тартиб ҳукмрон бўлиб қолди. Нонуштадан кейинги икки соат вақт Нигоранинг дарсларига ажратилар, қизча дафтар-китобларини узун столга ёйган кўйи телевизорда кўрсатиладиган дарсларни томоша қиласар, бу вақтда столнинг нариги томонига жойлашиб олган Пўлат қулоқчин тақиб олганча ўзининг ёзувлари билан овора бўларди. Малика тушган кунлик кирларни йиғишириб, машинага тиқарди-да, компььютери ёнига ўтириб, электрон почтасини текширар, Носиржон билан расмийлаштириладиган у-бу хужжатлар юзасидан гаплашарди. Кейин телеграмни очиб, синглисидан хат-хабар

бор-йўқлигини текширади. Аксарият ўзи хабар йўлларди: “Тинчмисан?” Интернетни очганда Туркияда нима гап экан, дея қизиқарди, ижтимоий тармоқ хотриждаги бири-биридан ваҳимали воқеаларни ёзарди: жаҳонда мана мунча одам вирус юқтириди, мунча одам ўлди, мунчаси тузалди, фалон мамлакатда озиқ-овқат етишмаяпти, фалон давлатда фавқулодда ҳолат эълон қилишди, фалон мамлакатда дўхтирлар ишдан бўшаб кетяпти, фалон мамлакат мана бу мамлакатни вирус тарқатишда айбдор деб айтди... Дунёда шунчалик ваҳима тургани учун синглисининг биргина “Тузукман”, демаслиги фалокатдай туюларди. Ҳолбуки, синглисининг борди-келди, салом-алик борасида ҳафсаласиз эканлигини, мулозаматни хушламаслигини билади, аммо ҳозир, ҳамма юрагини ҳовучлаб яшаётган бир пайтда икки оғиз тасаллини қизғаниши оғир ботади.

Қизи эса бу вақтда идиш-товоқ ювиш асносида ошхонани яна бир карра тозалаб чиқар, икки соатлик “ТВ-дарс” тугагач, Нигорани ҳам ишга солар, иккови шовқин-сурон билан хоналарни супуришиб, полини ювишар, Малика билан Пўлат эса бу вақтда айвончага чиқиб олишар, аёл тушлик тадоригини кўрар, эри дे-раза ёнидаги курсига ўтирганча, қўлидаги телефонидан интернетни кавлаштиради ёки нималарнидир ўқиб ўтиради. Тушликдан кейин Маликанинг талаби билан “осойишталик вақти” кучга киради. Қизлар хоналарига кириб кетишарди, Нигора ухлар, Феруза эса планшетида нималарнидир ўқиб, ёзиб ўтиради. Эри диванга ёнбошлаган кўйи ўзининг севимли ҳажвий телешоусини томоша қилар, Малика бунақангичомашаларни хушламагани учун ётоқхонага кириб кетар, каравотига чиқиб олиб, “Донишманд Сизиф”ни¹ ўқирди. Шу билан соат бешларда Малика қизини бошлаб ошхонага чиқарди-да, кечлик таом пишириш билан

¹ Ҳурийд Дўстмуҳаммад романи.

андармон бўлишарди. Кечки таом одатга кўра узоқча чўзилмасди, кейин ҳаммалари биргалашиб телевизор кўришар, аммо нимани кўришни ҳал қилишдан аввал шовқин солишиб, баҳслашиб олишарди. Аммо Малика бу баҳсда қатнашмасди, кўпчилик нимани кўрамиз деса, индамай рози бўлар, агар телевизордаги томоша ёқмаса, бир чеккага ўтириб олиб, қулоқларига қулоқчин тиқарди-ю, кўзларини юмганча севимли қўшиқларини эшитиб ўтираверарди, эри эса қизларга қараб кўзини қисиб илжайиб қўярди.

...Ўша куни ҳаво очик, дераза пардалари четга сурниб қўйилганидан айвонча офтоб нурларига ғарқ бўлган, эри “Экономическое обозрение”ни варақлар, қизлар одатдагидек шовқин солишиб хоналарни тозалашарди. Малика қозони қайнаб чиқишини кутиб, инстаграмдаги сурату видеотасвиirlарни томоша қила бошлади.

Бирдан инстаграм лентасида жиянини кўргандай бўлиб, тўхтаб, орқага қайтди. “Карантиндаги севги” деган ёзувни ўқиди. Кейин тасвирида бўум-бўш кўча кўринди. Катта йўл четида нозиккина бир қиз кетиб боряпти, йўлнинг икки чеккасига қараб тортилган симларда ажабтовур нақшлар ёнади, олисда светофорнинг ёниб-ўчаётган чироғи кўзга чалинади. Қиз ортига ўгирилиб, шабадада тўзиётган ёйик соchlарини қўллари билан текислаган кўйи камерага жилмайиб қаради.

– Ҳа, мана шундай, кулиб қараб тур, – деган овоз эшитилди кадр ортидан. Бу, чамаси, қизни тасвирга олаётган йигит эди. – Шаҳноз, ану фонтанга қараб юр, фонтанга.

Қиз йўлкага бурилди, ундан хиёбонга ўтди. Ўртадаги фаввора ўчиқ, лекин унинг атрофидаги чироқлар ёниб туарарди.

– Ҳеч ким йўқ, – қиқирлади Шаҳноза. – Қани одамлар? Э-э-эй! Яшасин карантин! Ҳаммаёқ жимжит!

Кадр ортидаги йигит хохолаб кулди-да:

– Ҳеч ким мешат қилмайди, – деди. – Ке!

Қиз истиғноланди:

– Йўқ!

Кадрда йигитнинг қўли кўринди. Чамаси, йигит бир қўли билан камерани ушлаганча, иккинчи қўли билан қизнинг елкасидан қучишга интилди. Қиз кула-кула қочди. Йигит уни қувиб етди-да, қўлидан тортиб, ўзига қаратди. Кейин иккови бошини бир-бирига тегизишиб, камерага қарашди, йигит қизнинг чаккасидан ўпид олди. Шаҳноза гўё қитифи келгандай елкаларини қисди-да, юзини йигитга бурди, йигит эса пайтдан фойдаланиб, севгилисининг лабларидан сўриб ўпа бошлади. Шунда ҳам қўлидаги камерасини қўймади, тасвир чайқалиб-чайқалиб турса-да, бўса “жараён” и тўлиқ “намойиш этилди”. Бир вақт қиз туртиб юборди шекилли, тасвир қийшайиб, оёқ остига тўшалган ғиштин қопламалар кўринди. Қизнинг:

– Жиннимисиз? – дея нозланиб кулгани эшитилди.

Ортидан йигитнинг товуши келди:

– Янгича селфи. Зўр эсдалик бўлди. Карантиндаги севги! Ха-ха-ха!

Малика лабини тишлади, эрига қаради, унинг журнал билан андармонлигини кўриб хотиржам тортиди. “Тентак қиз! – ўйлади у. – Куёв ҳам ўзига ўхшаркан! Инстаграмга шунаقا нарсани қўядими? Шаҳнозага айтиш керак, олиб ташлашсин буни. Акам хабар топса ўлдиради-ку!”

Ётоқхонага кириб, жиянининг қўл телефонига қўнғироқ қилди. Анчадан кейин Шаҳнозанинг ўрнига кеннойиси жавоб қилди.

– Шаҳноза керак эди, кеннойи, – деди салом-алиқдан кейин Малика эҳтиёткорлик билан. – Ишим бор эди...

– Ҳа, синглингизни ишидан эмасми, мабодо?

Малика довдираб қолди:

- Нима?

- Синглингиз Туркиядан туриб буйруқ берган аллақачон! Ҳеч хавотир бўлманг!

Шу пайт Шаҳнозанинг ўкраб йиғлагани, “Ойижо-о-он, жон ойи”, деб ёлворгани эшитилди.

Малика жавоб учун энди оғиз жуфтлаган эдики, кеннойиси телефон тугмасини босиб қўйди.

“Оббо, Манзура бир нима деган шекилли, – хаёлидан кечирди у. – У ҳам қўрибди-да! Жаҳли тезроқ эди, қаттиқ гап қилган, шекилли. Бечора қизгина-я...”

Боши қотиб даҳлизга чиқди. Пойафзал қўядиган пастак жавончада кир латта, унинг ёнида гилам тозалайдиган чўтка қолиб кетибди. “Мунчаям беҳафсала-я...”

- Нигора, – дея чақирди у.

- Ҳм?

- Бу ёққа чиқ.

Эшикда Нигора кўринди. Малика жавончада қолиб кетган латтани кўрсатди.

- Сенинг ишингми?

Нигора “уф” тортди.

- “Уф”лама! Нега доим ишингни чала ташлаб қочсан? Латтага шундоқ совун суркаб, чайиб қўйиш қишинми? Чўтканинг жойи қаёқда?

Қизча зарда билан латтани олиб ваннахонага кириб кетди.

- Малика! – айвончадан эрининг чақиргани эшитилди. – Бу ёққа кел-чи!

Эри уни қовоғини солиб кутиб олди. Хотини киргач, эшикни зичлаб ёпди.

- Шу қизча сенга оғирлик қиляптими? – деди кейин.

- Нима қилибман?

- Латтани ташлаб кетганига телевизорнинг ёнидан турғизиб келдингми?

- Тартибга ўргансин, деяпман. Нимаси ёмон буни?

– Қаёқдан ўрганғансан бунақанги тарбия усулини? Болага бирпас тинчлик бермайсан, ҳар қадамида тергайсан! Агар шунчалик оғир тушаркан, олиб қолмагин эди!

– Ким сизга уни оғир тушяпти деди?

– Сен!

– Астағуриллох! Нималар деяпсиз?

– Сени тергашларингни кўрган одам шунаقا деб ўйлайди.

– Бўлмаган гап! Мен болаларимни ҳам худди шунақа тергардим, агар эътибор берган бўлсангиз!

– Йўқ, болаларингга қўллаган усулни бу қизчага татбиқ этма, тушундингми? Олий маълумотли одамсан, фан номзодисан, оддийгина ҳақиқатни билмайсан. Нигора бошқа ота-онанинг, бошқа муҳитнинг фарзанди, унинг гени – ирси бошқа, сенинг одатларинг унга сингимайди, унга бошқача ёндошув керак, тушундингми, бошқача!

– Бизнигiga келганига беш йилдан ошди, демак, Нигора беш йилдан бери бизнинг муҳитда ўсяпти! Унинг ирси, гени томирида, миясида эса бизнинг қарашларимиз, одатларимиз, у энди бутунисича бизнинг муҳитга қўчган! Тартибга, интизомга ўрганинг ёмон томони йўқ! Бўлди, бас, ҳозир бу ерда сиз билан жиқиллашмайман, қизлар эшигади. Бу масаланинг муҳокамасини кейин давом эттирамиз.

– Қачонга қолдирғанларини маълум қиласидарми, Малика Сатторовна?

– Истеҳзони бас қилсалар маъқул эди! Бугун кечқурун, қизлар ухлаганда гаплашамиз.

Эри “маъқул” деган каби бош силкиди. Шу пайт эшиқдан қизи мўралади.

– Жанжаллашиб бўлдингларми? – дея айёrona жилмайди.

- Ҳеч ким жанжаллашгани йўқ, даданг билан гапимиз бор эди.

- Ҳа, эшик маҳкам ёпилиб қолибди-да... - янада кенгроқ жилмайди қизи.

- Бизда ишинг бормиди?

- Телефонингиз жиринглаяпти.

Малика қизидан телефонини олиб, қўнғироқ қи-
лувчининг рақамига қаради-ю, саросималаниб қолди.
Шу ерда гаплашаверсинмикин ё нариги хонага чиқиб
кетсамикин? Агар чиқиб кетса, ортиқча саволлар бўл-
масмикин?

Ўйлашга ҳам улгурмасидан телефондан Шаҳноза-
нинг “Амма!” деган ийғлоқи овози чиқди.

- Лаббай!

- Аммажон, - деди-ю, Шаҳноза яна ийғлай кетди.

Малика энди ўйланиб ўтирмади. Телефонни қу-
лоғига тутганча ётоғига кириб кетди.

- Тинчликми, жоним, нима гап?

- Амма, ойимга ўзиз тушунтириинг, ман билмов-
дим уни инстаграмга қўйворишини... Ҳозир обташа,
десам қўнмиёпти.

- Эси борми?

- Подписчикларим камайиб кетади девотти...

Жинни, тўйим бузилиб кетади-ю, десам...

- Шошма, бу йигит ким?

- Ану... блогер-чи...

- Нима? Бу Шавкат эмасмиди?

Шаҳноза жавоб ўрнига ўқириб йиғлади.

- Вой эсинг қурсин сен қизни! Нима қилдинг, а?

Шавкат кўрса нима бўлади?

- Билмийма-а-ан!..

Шу пайт кимдир кириб қўлидаги телефонни олиб
қўйди. Ўгирилиб қаради. Қизи.

– Кўйинг,, ая, бу жиннига ачинаверманг, баттар бўлсин, – деди. – Унаштирилган қизсан, бало борми бошқа йигит билан кўча-кўйда ўпишиб?

– Нима? Ҳали сенам кўрдингми?

– Бўлмасам-чи! Бу блогерни етмиш мингта подписчики бор! Шунча одам кўргандан кейин...

– Вой, эсинг курсин сени! Сен ҳали расво блогерларни саҳифаларини кўриб юрасанми?

– Мени обуна бўлишим шартми? Шундоғам кела-веради, сизга ҳам келибди-ю... Бўлмаса, Шаҳноза билан бекитиқча ниманиям гаплашардингиз?

Оббо! Бу маҳмадонанинг билмаган нарсаси йўқ!

...Кечқурун, қизлар ухлашга ётгандан кейин телевизорга қараб ўтирган пайти эри келиб, унинг елка-сига қўлини теккизди:

– Аканг билан гаплашдим, руҳи жуда сўник. Эрталаб бир ҳол-аҳвол сўраб қўй.

Малика бошини силкиди: “Хўп”.

– Күёв томон тўйни тўхтатиби.

– Ўзим ҳам шунаقا бўлади, деб қўрқувдим...

– Энди... бўлар иш бўлди...

– Ёшлар жинни бўляпти...

– Сен... қизимииздан боҳабармисан ишқилиб? Уйида ўтирган кеннойинг қизидан бехабар қолибди-ку!
Сен ҳар куни ишдасан!

– Мени кеннойим билан солиштирманг!

– Ҳеч шу кеннойингни ёқтиримадинг-да!

– Кеннойим – чўридан чиққан бегойим! Босар-тусарини билмайди. Нимасини ёқтирай?

– Ҳа, майли... Боя нимани гаплашмоқчи бўлувдинг мен билан?

– Қачон?

– Боя, қизлар ухлаганда гаплашамиз, девдинг-ку!

- Ҳа, уми... Э, йўқ, нимасини гаплашамиз? Нигора – бизнинг қизимиз, бизнинг оилада катта бўляптими, Феруза билан бир хилда тарбия топади, бир хилда камолга етади. Шундай бўлгандан кейин икковига ҳам талаб бир хил бўлади.

- Ҳа, Нигора – бизнинг қизимиз, лекин...

- “Лекин” деган гап йўқ!

- Яхши, лекин ҳаддидан оширворма.

- Хўп.

- Мана бу бошқа гап! Менга шу “хўп” деган гапинг ёқади-да!

Пўлат пультни олиб, телевизорни ўчирди.

- Тинч кўй шу телевизорни, – деди саволомуз қараган хотинига. – Яна бир марта “хўп” деган гапингни эшитай. – Кетидан айёrona илжайди. – Қизлар ухлаган, айни пайти... Тонггача вақтимиз bemalol...

Малика қулоғининг тагига келиб урилган иссиқ нафасдан энтикиб кетди. Эшикка хавотирланиб қаради, кейин ўрнидан туриб, ётоқхонага кирди.

14

Даҳлиздаги қўнфироқ худди дўқ ургандек жиринглади. Малика журналини бир четга қўя солиб, даҳлизга шошди: ким бўлди экан, эрталабдан қўнфироқ қилаётган?

- Тузукмисиз, опа? – гўшакдан яна ўша қўшнининг овози эшитилди. – Хафа бўлмий ўтирибсизми?

- Йўқ, нега хафа бўламан? Кўпга келган тўй-ку бу карантин!

- Вой, ман карантинни гапирмиётибман. Карантин ўзимиззики бўп қолди-ю! Ану... Жиянизга жиноий иш очилибди-ю, а? Кеча кечқурун телевизорда айтди. Жиянизни эсладийизми, қишида опамни ўғлига деб борувдик-ку, ўзиздан адрес олиб!

- Эсимда бор...
- Ўша жиянизга очилибдими?
- Менам худди сизга ўхшаб карантинда уйида қимирламай ўтирган одамман! Бошқанинг уйида нима гап, билмайман.

- Вой, қаттан билмийсиз? Бутун Ўзбекистон билиб турибди-ю! Карантинда кўчада йигит билан оғиз-бурун ўпишиб юрибди-я! Уятсиз қиз экан-а, қаранг! Яхшиям, олмадик. Битта фалокатдан қутулган эканмиз.

- Акам бермади-ку, ахир.
- Вай, биз олмадик!
- Шуни айтгани қўнғироқ қилувмидингиз?
- Ҳа!

- Бўлди, ниятингизга етдингиз. Хайр, яхши қолинг!
Гўшакни илди-ю, бирдан юрагида оғриқ туйди.
Мунчаем бемаза хотин экан бу? Негаям ўша куни Шаҳноза келган экан-а? Нега ўша куни шу хотин ўтирган экан пастда? Негаям шу хотинга акасининг манзилини ёзиб берибди? Йўқ, деса бўлмас эканми? Вой Шаҳноза қурмагур-а, шунақаям тентак бўласанми?

Телефон яна жиринглади. Тағин ўша бемаза қўшни шекилли? Малика телефонни симидан узиб кўйди.
Шу заҳоти қўл телефонни дириллади. Қаради: кеннойиси. Тинчликмикин?

Кеннойисининг руҳи сўник, овози шикаста, чамаси туни билан ухламаган эди.

- Акангиз сизникига келмадилами? – дея сўради у.
- Йўқ...
- Ўғлимизникигаям бормабдила. Телефонларини кўтармиётибдила. Занготага боролмийдила. Овснимга телефон қиломиётибман, ноқулай-де... Ўшаттамикинла? Сўраб беринг.

- Майли.
- Бугун пешинда Шаҳнозани суди бўладиган... – кеннойиси пиқиллаб йиғлаб юборди. – Бунақанги

ишлага ўн беш сутка қамоқ бераркан. Судья билан гаплашсина, штраф қиб бера қолсин... Қиз бола қамоқда ётадими энди аллакимлага ўхшаб? Ўзиз тушунтилинг... Мани гапимни эшигилариям кемиётиби. Яккаш “ҳукуматга эътиroz қилиб бўйийди”, дейдила...

– Майли, кеннойи, акам билан гаплашаман, – бечора аёлни юпатишга уринди Малика. – Сиз Шаҳнозага айтинг, энди ҳадеб йиглайвермасин... Бу кунларам ўтиб кетар...

– Ўлсин бу кунларам! Қиз ўлгур уйда ўтируриб сиқилиб кетдим, бир айланиб келий, деса, хўп депман. Бу башаранг қургурни алдоқчилиги! Бир ойдан бери учрашиб юраркан. Ўша блогериниям ер ютсин! Унаштирилган қизниям бошини айлантирадими? Йигитлада номус йўқ! Бирорга аталган қизниям етаклаб кетвуради!

“Ўзингизнинг қизингиз-чи? – ўйлади Малика. – Кўнғиз боласини оппоғим, деркан...”

Гўшакни қўйгач, анчагача ўйланиб ўтирди. Ҳе йўқ, бе йўқ, “акам борми”, деёлмайди-ю! Ўйлаб ўйига етмасидан телефони дириллади, қараса, укасининг уий. Нариги томондан келиннинг товуши келди:

– Ассалому алайкум, опажон, дадам гаплашмоқчидила сиз билан. Мана, ҳозир...

– Алё, Малика? – отаси доимгидай овозини баралла қўйиб, унинг жавобини ҳам кутмасдан гапира кетди. – Ваалайкум! Уйинг тинчми?

– Худога шукур, дада.

– Манзура-чи? Туркияда тинчликми, ишқилиб? Гаплашганмисан?

– Тинчлик, дада.

– Тушларим алоғ-чалоғ бўп турибди-ю! Онанг йиглаб юрибди тушимда! Аканг телепонни кўтармиётиди. Нима гап?

– Ҳозир кеннойим билан гаплашдим. Яхши ўтиришганмиш.

– Унақа бўлса, тузук... Тинч бўлларинг ишқилиб!
Отаси жавобни кутмаёқ гўшакни қўйди.

Малика нима қиларини билмай қолди. Акасининг
кўлидаги телефони ўчиқ эди. Зангиготага боролмайди,
йўл ёпиқ. Балки... ҳа, дорихонасида бўлиши мумкин.

Дорихонага қўнғироқ қилди. Гўшакдан акасининг
овози эшитилди:

- “Саломатлик” дорихонаси, ассалому алайкум!
- Ака? Дорихонангизда ухладингизми?
- Йўғ-э, уйқу қаёқда? 24 соатлик режимга ўтганмиз.
- Сотувчингиз қани?
- Уйига жўнатганман, ҳалироқ кеп қолади.
- Уйга нега бормайсиз?
- Ишдаман, дедим-ку!
- Телефонингиз нега ўчиқ?
- Ие, ўчиб қоптими?
- Ака, менга артистлик қилманг!
- Малика, сингилгинам, ишхонани телефонини
кўп банд қилиб бўлмайди. Хўп-а? Кейин гаплашамиз.
- Йўқ, ҳозир гаплашамиз. Телефонингизни ёқинг.
Бўлмаса, ўзим олдингизга бораман. Пиёда бўлса ҳам
бораман!

Акаси “ух” тортди.

– Майли, – деди. – Ҳозир ёқаман.

Малика бироз ўйлаб турди-да, телефонидан іто-
иловасини ёқиб, қўнғироқ қилди. Нариги томондан
акасининг киртайган кўзлари, соқоли қиртишланма-
ган юзи кўринди.

– Эҳ-ҳе, – деди Малика. – Ўзингизни “ташлаб” юбо-
рибсиз-ку!

Акаси илжайди:

- Вазиятни кўриб турибсан-ку.
- Бугун Шаҳнозанинг суди бўлармиш...
- Хабарим бор...
- Судья билан гаплашиб кўрмадингизми?

- Нозик айтдими сенга, судья билан гаплашсин деб?

- Йўқ, ўзим айтяпман. Ҳар ҳолда қиз бола, қамалиб чиқди, деган иснод яхшимас-да.

- Сингилгинам, сингилжоним, иснод нималигини аканг жуда-а... яхши билади! Нима қилайлик энди, хукumatга эътиroz қилиб бўлмаса?

- Акажон, шу гапингизни қўйинг. Шаҳноза ҳам тушуниб қолгандир нима қилиб қўйганини?

- Шаҳноза ҳамма нарсани ўйин деб ўйлади, Нозик пулга ҳамма нарсани тўғриласа бўлади, деб ўйлади. Ҳолбуки, унақама-а-ас... Бор, ана, судья билан гаплашдим дейлиқ, майли, судья менга сотилди дейлиқ, ёки суд қиз болага раҳм қилиб, қамоқни ўрнига жарима солди, дейлиқ, мен шу жаримани тўлаб бердим, дейлиқ, ҳа, тўлаб бераман-да, хукumatга эътиroz қилиб бўладими? Лекин, лекин! Тушундингми, лекини бор буни! Бу билан бўйнимдаги иснод камайиб қолмайди! Мени... ўша судьяга рўпара бўлиб, aka, энди шунаقا бўп қопти, қизим шундоқ-шундоқ қип қўйипти... дейишга бетим чидамайди! Дунё ўзи қалқиб турибди, мен Нозикни гапи билан иш тутсам, ўзи шундоғам қалқиб турган вазиятни баттар чайқатвораман. Бунинг жавобини ким беради? Йўқ, синглим, гапим – гап, у ёғига Худо пошшо!

- Ҳеч бўлмаса уйга боринг, aka, бунаقا қилиб юрманг.

- Бораман. Соқол-поқолни олиш керак-ку, судга шу аҳволда бормай.

- Ҳа, судга борасизми?

- Бўлмасам-чи? Хукumatга эътиroz қилиб бўладими? Шаҳноза билан Нозикни олиб, судга бораман, нима ҳукм бўлса, жим туриб эшитаман!

...Кечқурун телевизорда кун янгиликларида суд жараёнидан репортаж кўрсатиши. Малика юм-юм ийғлаётган кеннойисини, юзларини тўсиб қалтира-

ётган Шаҳнозани, безрайиб турган блогерни, ранги оппоқ оқарған акасини кўриб ўтирди. Судья блогерга ҳам, Шаҳнозага ҳам каттагина жарима солди, қўшимча яна ўн беш сутка қамоқ жазоси тайинлади.

15

Бир ҳафта бўлдики, Пўлат оқсоқолнинг илтимоси билан маҳалладаги хайрия ишларини ташкил қилишда қатнашади. Оқсоқол, аёли яқинда инфарктдан турди деб масъул котибини, уйида невараси чиллали деб маслаҳатчисини безовта қилмасдан, бир ҳафтача ўзи уриниб юрди, охири қийналганидан, давлат идорасида ишлайди, бунақа пайтда фойдаси қўп тегади, дея ёрдам сўраб Пўлатга қўнғироқ қилди.

Ташкилий ишлар ҳақиқатан қўп эди. Пўлат, аввало эҳтиёжманд оиласлар рўйхатини қайтадан тузайлик, дея таклиф қилди, карантин сабаб ишсиз қолганларни ҳам, хасталик боис ётиб қолганларни ҳам рўйхатга киритиш, бериладиган ёрдам жўялик бўлиши учун эса ким нимага муҳтожлигини аниқлаш зарур эди. Пўлат бунинг учун маҳалланинг ёрдам хизматини йўлга қўйишга киришди. Эҳтиёжмандларнинг мурожаатини қабул қилиш учун алоҳида телефон рақами керак, дея масъул котибнинг қўл телефонига янги сим-карта олиб беришиб, уни уйида ишлашга ўтқазишди. Уйларининг ҳар бир йўлагига, маҳалланинг кўзга кўринарлик жойларига ёрдам хизматининг телефон рақамлари катта-катта қилиб ёзилган кўрсаткичларни осиб чиқди. Шу ишлар билан андармон бўлиб юрган пайти Малика:

– Ўзингизни қийнагандан кўра маҳалламизнинг “Даракчи”сидан фойдаланиб қўя қолмайсизми? – деб кулди. – Кимнинг уйидан нима гап ўтганини билиб олиб, ҳаммага ёйиб юрса... Баҳонада савобга ҳиссаси

тегиб қолади! Унга шунақа-шунақа хайрлик иш қил-япмиз, фалон рақамга қўнфироқ қиласа бўлди, деб бир оғиз айтинг, ярим соатнинг ичидаги бутун маҳалла ха-бар топади-кўяди. Сизнинг кўрсаткичларингизни ким ўқиёдиги, ким йўқ?

Пўлат эса хотинининг кулги аралаш айтган гапи-ни жиддийга йўйди:

– Ўша қўшни кимнинг хотини? Мен эрини таний-манми?

– Танийсиз, муюлишдаги вулканизацияда ишлайди.

– Э, Рихсивойнинг хотиними у? Ҳеч хаёлимга кел-маганди-я...

– Ха, албатта хаёлингизга келмайди, уларнинг бири – боғ, иккинчиси – тоғ.

Пўлат шу оннинг ўзидаётк Рихсивойга қўнфироқ қилиб, ундан “кеннойиси” шу хайрлик ишга ёрдам беринини илтимос қилди, “кеннойи”, турган гап, йўқ демади.

Шундай қилиб, янги рўйхат бир куннинг ўзида тайёр бўлди. Хайрия қилувчилар эса аллақачон ишни ўзлари бошлаб юборишган эди, ким қўй сўйиб, гўштини тарқат-ган, ким исириқ тарқатган, ким дока ниқоб... Пўлат энди хайрия қилувчиларнинг ташаббусини тартибга солиши-га киришди, чунки карантин шунчаки кампания эмас, узоқ давом этиш эҳтимоли бўлган зарурат, шунинг учун тушадиган хайрия ҳам, унинг тақсимоти ҳам расамади билан бўлиши керак, деб ҳисобларди.

Хайрия қилувчиларга маҳалла мачити сардор бўлди. Имом мачит биносини таъмирлаш учун тўпланган пулларни эҳтиёжмандларга дея маҳаллага топширганидан ибрат олиб, катта йўл бўйидаги басавлат тўйхонанинг эгаси идорага келди-да, исталган пайтда нима, қанча керак бўлса, айтинг, деб телефон рақамла-ри ёзилган зарҳал қоғозчани қолдириб кетди, Маҳмуд эҳтиёжманд оиласарга нонни бепул бераман, деди.

Ҳар қуни кечқурун масъул котиб кимдан қандай мурожаат келиб тушганини Пўлатга хабар қилас, Пўлат эса уларни компьютерида жамлаб, рўйхат қилиб ёзарди-да, кейин уни телеграмдан оқсоқолга узатарди.

– Бунақа пайтда давлатнинг ёрдамига кўз тикиб ўтиравериш яхши эмас, – дерди оқсоқол. – Бир ернинг одамлари бўлсак, ҳарна ўзимизни эплаганимиз дуруст.

Шундай кунларнинг бирида кўчма бозор келадиган бўлди. Эрталаб оқсоқол қўнғироқ қилди:

– Ҳокимият ташкил қилди. Одамлар бозорга бошиб юрмайди, шундоқ ҳовлидан олишади-қўйишади.

Кўп ўтмай, катта оқ фургон келиб, маҳалла билан уларнинг уйлари ўртасидаги йўлканинг қоқ ўртасида тўхтади.

– Бирон нарса керакми? – сўради Пўлат.

– Ҳа, ошга сабзи олсак яхши, кам қолувди.

Нигора деразадан пастга эгилиб қаради:

– Одамлар тўпланишяпти, вой-вуй!

Малика эрини кузатгач, дераза ёнига келди. Дарҳақиқат, фургон ҳали эшигини очмасидан одамлар тўдалашиб улгуришган, кўплар бир-бирларига гал бермай нималарнидир мухокама қилишарди.

– Қаранг, ана, поччам! – қичқирди қизча. – “Икки метр, икки метр” деяптилар. Нима деганлари бу?

– Тўдалашиб турманглар, орангларда икки метр масофа бўлсин, дегани. Одамлар шунақа қилиб бир-биридан узоқ турса, вирус юқмайди.

– Вой, одамлар қулоқ солмаяпти-ю, ана, милиционер келди!

– Одамлар жинни бўляпти...

– Нима дедингиз? Эшитолмадим.

– Ҳа, эшитишинг шарт эмас. Деразадан нари тур.

Хозир телевизорда дарсинг бошланади.

– Вой, қаранг, расмга олишяпти!

- Деразадан нари тур дедим-а! Дарсинг бошлана-ди ҳозир!

...Бир соатлардан кейин Пўлат бўм-бўш халтани қўлида юмалоқлаганча кириб келди.

- Сабзинг тугаса, Маҳмуд аканинг дўконидан оп-келиб бераман, – деди асабий бир тарзда. – Бунақангги тиқилинчда турсанг... Керакмас ўша сабзи! Кўчма бо-зор қайтага одамларни ўтирган уйидан суғуриб чиқ-ди. Шуям карантин бўлдими?

- Вой тавба, худди ўзингиз юз фоиз карантинда ўтиргандек гапирасиз-а? Кунора кўчадасиз.

- Сайрга чиқаётганим йўқ, билиб турибсан-ку! Йигирма беш йилдан бери шу маҳаллада яшаймиз, болаларимиз шу ерда катта бўлди, оқсоқол фойданг тегсин деса, бурилиб кетоламанми?

Малика эрининг аччиғи келганини билиб, тилини тишлади. Пўлат уст кийимини ечиб, юз-қўлни совун-лаб ювди-да, жавондан сўнгги кунларда берилиб ўқи-ётгани “Иқтисодий таҳжил тарихи”ни олиб, ётоқхона-га кириб кетди.

...Кечга томон даҳлиздаги телефон жиринглади. Малика яна ўша қўшни хотиннинг овозини эшилди:

- Хўжайниз жа яхши одам эканла-я?

“Буни ўзим ҳам биламан”, – ўйлади Малика.

- Боя ҳокимиятни одамларини роса бопладила. Фургонни олдида турволиб расмлага туша кетишуви, “Кўчма бозорингла қайтага карантинни бузвор-ди-ю, бир иш қилишдан олдин ўйлий силами ўзи?” дедила. “Шу савдони маҳалламизни дўкони силадан яхширо эплаб туриби”, дедила. Кейин айтдилаки, “Бу-нақангги хўжакўрсин ишингла билан ҳаммани ғазаби-ни қўзғатасила-де, кейин одамла нага норози деб ҳай-рон бўласила”, дедила. Роса тўғри гапирдила лекин!

- Кўпчиликни ичида шунча гапни гапириб ташла-диларми? Чатоқ бўпти-ку!

– Йўғ-а, хўжайиниз унақа жанжалкашмасла-ю, ҳаммаларини узокроққа опкетволиб, кейин “тузладила”!

“Узокроққа обкетган бўлишса, бу хотин қаёқдан эшита қолибди?”

– Хўжайинизга котта раҳмат айтиб қўйинг, хўпми? Ҳамма қўшнила хурсанд бўлишди.

“Оббо, ҳамма қўшнилар-а! “Даракчи” жуда яхши ишлайди!”

16

Бирдан совуқ турди. Қунлар тобора исиб бораётган бир пайтда кутилмаганда турган изғирин қуёшли қунларга ўрганиб улгурган кишилар наздида қишини қайтараётгандек туюлди-ю, ҳамма қунишиб олди.

Маликага ҳатто уй ҳам совиб кетгандек туюлди. Ҳавонинг авзои икки кунгача очилмади. Ниҳоят, шомга яқин қорайиб боққан булувлар торсиллаб ёрилди-ю, ёмғир қуайиб юборди.

Кечқурун ҳамма иссиққина мошхўрдани ичиб ўтирган пайт Нигора:

– Қаранглар, қор ёғяпти! – деб қичқириб қолди.

Ҳамма баравар деразага қаради. Йўлка четидаги ёниқ симёғоч нурида ялтиллаб ёғаётган қор кўринди.

– Мана, ўрик гулининг қорига ҳам етиб келдик, – Пўлат дераза пардасини тортиб қўйди.

Гапига ҳеч ким жавоб қилмади. Пўлат жавоб кутмаганди ҳам. Хотинига қаради. Малика қўлини ўнг жағига босганча хомуш ўтиради.

“Бечора, – ўйлади Пўлат. – Шу пайтда тишининг оғриганини... Ҳозир дўхтирга боришнинг ўзи муаммо”.

Қор тобора кучайиб борарди. Сал ўтмай, қор парчалари йириклишиб кетди. Бу лайлакқор эди. Малика шамолда учиб-ўйнаб тушаётган қор парчаларига боқиб, ғамга ботди. У азалдан баҳорда ёғадиган қорни

хушламасди. Айниқса, бу йил тузукроқ қиши бўлмай, ҳатто қора совуқ ҳам турмай, баҳорда, дарахтлар авжи гуллаган паллада бунақанги қуюқ қор ёққани унинг назарида ноҳушлик аломати эди.

Ичи ёришмай, эрта ётиб олди. Меҳмонхонадан Нигоранинг хоҳолаши, Ферузанинг кулгиси, шодон мусиқа садолари эшитилди. Кейин ташқаридан қарсак садолари янгради. Унга қўшни хонадан Нигоранинг қийқиргани, Ферузанинг “Ура!” деб қичқиргани, чапак чалгани қўшилди. Беш-олти кундан бери шаҳарда шунақа одат бошланган, кечқурун ҳамма бир вақтда касалхоналарда ишлаётганларни шарафлаб қарсак чаларди, бошқа кунлар ўғлини эслаб, Малика ҳам шуларга қўшилишарди. Аммо ҳозир оғриқнинг кучидан шу нарса ҳам ёқмади. Бошини ёстиқ остига тиқди. Сал ўтмай, шовқин тинди. Нигора дўпирлаб у ёқ-бу ёққа ўтди-да, хонасига кириб кетди.

Қоронғи шифтга тикилиб, уйга чўккан сукунатга қулоқ солди. Жимжитлиқда жағининг лўқиллаши янада кучайгандек туюлди. Ташқарida ҳамон шитирлаганча қор ёғарди. Унга қўшни хонадан компьютер клавиатурасининг чиқиллаши қўшилди. Эри яна ишга ўтирган эди. Ўрнидан туриб, қутини титкилаб, оғриқ қолдирадиган хандори топиб, ичди-да, бошини ёстиққа кўйди.

Тонгда оғир тортиб уйғонди, ёришиб келаётган шифтга тикилиб бироз ётди. Оғриқ босилган эди. Ўрнидан туриб, айвончага чиқди.

О! Ҳаммаёқ оппоқ, деразадан қалин қор босган шоҳлар мўралаб турибди. Пешонасини ойнага тираб, кўчага қаради. Ўрик дарахтининг каттакон шохи синиб тушибди. Йўлканинг нариги четидаги ҳовлида танаси тиккасига иккига бўлиниб тушган навқирон дарахт кўринди. Ток ишкомлари гўё қор залворини кўтаролмагандай энкайиб қолибди.

Малика шу пайтда шошганига, иссиқ кийимлари-ни йиғиштириб ташлаганига ўкинди. Чунки тиши дўхтирига бориш керак эди, поликлиника эса яқин эмас, бешта бекат нарида. Шу қорда, оғриб турган тиши билан бориш осонмас, лекин дўхтирга боришни орқага суриб бўлмайди, бу совуқда қайтага газаклаб кетиши мумкин.

Эри билан бошлишиб кўчага чиққанларида оёқ остидаги қор эрий бошлаган эди. Кўп қаватли уйлар ёнидаги йўлкадан аста-секин кета бошлиши. Кўча кимсасиз, онда-сонда яккам-дуккам машина ўтиб қолади. Оёқ остидаги қор ёқимсиз чилпиллайди, ҳавода аллақандай ёқимсиз, чиринди хиди анқийди, кўчаларга анчадан бери супурги тегмаган, унда-бунда дайди мушуклар буталар тагидан егулик излаб санқийди. Қор оғирлигидан синган дарахт шохлари шундоққина йўл устида ётади, уларни йиғиб оладиган кимса йўқ. Шох-шаббаларни айланиб ўтишга тўғри келганидан кўпинча қатнов йўлга чиқиб кетишиади, Пўлат: “Барibir машиналар йўқ, юравер”, дея далда беради.

Уч-тўрт жойда нафас ростлагани тўхташи, лекин эри бекатдаги ўриндиқларга ўтиришга йўл қўймади, чанг, лой босиб кетган ўриндиқларга ўтириш имконисиз ҳам эди.

Келаётуб, тўққиз қаватли иккита уй ўртасидан ичкарига қараб кетувчи йўлка олдини оғзи-бурнига респиратор тақиб олган маҳсус кийимдаги аскарлар йўл-йўл тасма билан тўсиб ўтирганини кўришди. Тасма ёнида ичкарига кириш ва чиқишни таъқиқловчи белги ўрнатилган. “Э, бу ёқда кимдир вирусни юқтирган экан-да”, – ўйлади Малика.

Нарироқдаги икки қаватли магазин олдида узун-чоқ фургон, елкадор бир йигит катта-катта қутиларни туширади, магазиндан ўттиз одимлар наридаги

яна бошқа бир күча ичидан елкасида каттагина баллон, қўлида пуркагич уланган шлангни туттганча, оппоқ комбинезон кийиб, қўзларига қалин ойнак, юзига ниқоб тутиб олган уч-тўртта эркак чиқиб келади.

Поликлиника олдида олти-еттитача одам кўринади. Баланд зиналардан чиқиб боришаркан, эшик олдида уларни санитар хотин тўхтатди.

– Мана шу турганларнинг ҳаммаси тиш дўхтирга, ичкарига битта-биттадан киритилади.

Унинг ёнидаги ёшгина ҳамшира қўлидаги термометрни Маликанинг пешонасига тутиб, иссиғини ўлчади. “Иситмаси борлар киритилмайди, – изоҳ берди у. – Кимнинг иссиғи чиқса, дўхтириңи уйига чақириши керак”.

Бино эшигининг икки томонига, баланд зинанинг тепасига ўриндиқлар қўйилган эди. Малика ўтириди-ю, сал ўтмай, ўрнидан туриб кетди. Ён томондан кучли елвизак келганидан, жағи баттар лўқиллай бошлаган эди. Рўмолининг бир четини дока ниқоби устидан тортиб боғлади. Оғриқ пасайгандай бўлди. Ҳарна шамолдан пана, дея устун ортига ўтиб, навбат кутаётгандарни кузата бошлади. Озғин, оқиш куртка кийиб олган йигит ёқасини кўтарганча сигарет қолдиқлари ташланадиган идиш ёнида қунишиб ўтиради, оғриқни босади, деган умидда бирини-бирига улаб чекади. Қалин камзул кийиб, жун рўмолга ўраниб олган заҳил юзли аёл қўлларини чўнтакларига тиққанча қўзларини ерга тикиб, сабр билан кутади.

Бир вақт иккита ёш жувон зиналардан ҳорғин кўтарила бошлади.

– Тиш дўхтирига бўлса, навбатга туринг, – буюрди унга бояги санитар.

– Мен аёллар дўхтирига кираман, – деди келувчи-ларнинг бири, жигарранг иссиқ камзул кийган қора-мағиз келинчак.

– Нима дард билан келяпсиз? – тап тортмай санитар.

Келинчак қизаринқиради:

– Вой, секинроқ сўранг, шунча одам турибди-ю...

Керак бўлгани учун кираман-да, шунаقا пайтда ким бесабаб келади?

– Оғриқли дард бўлса, кирмайсиз, “Баҳодир ошёни”га – аёлларнинг маслаҳатхонасига борасиз.

– Ўша ердан келяпман, опа, сиз айтган жойни карантинга ёпиб қўйибди.

– Бўлмаса, билмадим, лекин бу ерга киргизмайман, мумкин эмас.

Келинчак йиғлагудек бўлди:

– Опа, ахир сиз ҳам аёлсиз-ку, жоним оғрияпти, бўлмаса, шу совуқда келиб менга нима зарил?

Санитар тўрсайиб, эшикни ёпиб олди. Келинчак пиқиллаб йиғлаб юборди. “Тошми бу хотин?” – шивирлади йиғи аралаш. Шериги хўрсинди. Малика ачиқланиб, эшикни қаттиқ тақиллатди:

– Нега манави келинни киритмайсиз? – деди зарда билан эшикни очган санитарга. – Ташқари қор, совуқ. Бир дарди иккита бўлмайдими бечоранинг?

Санитар хотин қовоғини солди:

– Киргани билан фойдасиз, дўхтири стерилланган асбобим тугади, деган. Бунаقا пайтда асбобларни ўзимизда стериллаш мумкинмас. Хўй универсамни нарёғидаги клиникага обориб, ўша ёқда маҳсус аппаратда стериллаш керак. У ёққа боролмаяпмиз. Мошинамиз бузилган, уста тузатишга улгурмиётиби, чунки ҳаммаёқ ёпиқ, карантин!

– Шуни ётиғи билан айтсангиз бўлмайдими?

– Ўзингиз менинг ўрнимда бир соат туринг-чи, кейин қўрамиз, қанақа сайраркансиз?

– Опа, бу ерда турганингиз – ўзингизнинг хизмат бурчингиз, хўпми? Касалларга бунаقا муомала қилиш...

Шу пайт Пўлат келиб, Маликани четга сурди-да, аёлга:

– Қани, менга бош врачни чақиринг-чи! – деди қатъий.

– Нима гапингиз бор? – бўш келмади санитар. – Менга айтаверинг.

– Чақиринг деяпман!

Термометр ушлаган ҳамшира бир шеригига, бир Пўлатга жовдираб қаради:

– У киши хирургни ўрнига касал кўраётувдилар... – дея бўшашибди. Кейин ичкарига кириб кетди.

– Кўрдингизми, вазият қанаقا? – санитар хотин овозини бир парда баландлатди. – Сиз бўлар-бўлмасга жанжал қиласиз, бизда бош врач ҳам касал кўряпти, оғир шароитда, ҳарбий ҳолатда ишляпмиз, билсайиз агар...

– Ким сизга айтдики, бунақа пайтда одамгарчиликни унтишиш керак деб? Ҳеч бўлмаса, касал одамга заҳар сочманг!

Шу пайт ичкаридан барваста, резина қўлқопига гипс гарди уннаган киши чиқиб келди.

– Тинчликми? Нима гап?

Пўлат энди росмана аччиқланган эди:

– Бу қанақангидек? Касалларни ташқарида кутишга мажбурлаш, қорда, совуқда? Бунақангидек аҳмоқона қоидани ким ўйлаб топди?

Бош врач қаддини кериб тек қотиб турган санитарга ўқрайиб қаради.

– Одамлар ичкарида кўп тўпланмасин, дейилганди-ю... – минғирлади санитар.

Бош врач қовоғини солди:

– Саллани ол деса, каллани олади булар... Фойега киритинг одамларни!

– Ичкарига ёпирилиб кириб кетишади-ю ҳаммалари...

– Сизни нимага қўйғанмиз буёқقا? Ҳамма ёпирилиб кетмасин, қараб туринг, деб қўйибмиз.

Санитар бақрайганча қолди. Бош врач кирувчи-ларга фойедаги диван, креслоларни кўрсатди:

– Икки метр оралатиб ўтиринглар... Ҳа... шундай. Узр, акалар, опалар, қийнаб қўйибмиз сизларни... Минг бор узр... Ким қайси мутахассисга келган?

Бояги келинчак пича дадилланди. Фурсатдан фойдаланишга, дардини айтиб олишга чоғланди:

– Мен аёлларни дўхтирига келувдим.

– Дўхтир шу ерда, кираверинг.

– Анави опа оғриқли дард бўлса кирмайсиз, барibir, фойдаси йўқ, деяптилар-у...

Санитар бошлиғи жазо беришидан чўчиди, чамаси:

– Боя стерил асбобим тугади, дебди... Асбоби бўлмаса касални кўролмайди-ю... – дея сўз қўшди.

Бош врач ҳорғин кўзларини санитарга тикди:

– Бу масалани, опа, сиз эмас, дўхтирининг ўзи ҳал қиласди, – дея ичкарига кириб кетди.

...Тиш дўхтири соchlари оппоқ оқарган жиккак киши экан.

– Э, дард қоплама тишнинг тагида экан-ку, – деб бошини чайқади. – Милкка йиринг тўпланяпти. Бунинг олдини олмаса...

Ойнабанд жавонини очиб, мис рангидаги дори тўлдирилган ампулани олди.

– Ҳозир сизга дексаметазондан блокада қиласман, антибиотик дори, уч хил доривор ўт ёзиб бераман, ичасиз, дамлама билан оғизни тез-тез чаясиз, икки кунга қолмай ўтиб кетиши керак.

Малика милкига чуқур ботган игнани сезди, бу бирам ёқимсиз эдики... Сал ўтиб, юз териси жимирлаша бошлади.

– Кун совуқ, эҳтиёт бўлинг, газаклаб кетмасин, –

деб қолди дүхтир. – Пиёда келдингизми? Эҳ-хе... Рўмолингизни танғиброқ боғланг... Агар газак боғласа, жарроҳга боришингизга тўғри келади, бу осон бўлмайди, машиналар юрмас...

Уйга қайтаётганларида йўл устидаги қорлар эриб битган, оёқ остида кир қўлмаклар ёйилиб ётарди. Кўчада тўрхалта кўтарган одамлар кўринишади. Ҳамманинг юзида ташвиш кўлагаси, болалар, кексалар деярли кўринмайди, катта йўлда ўз юмуши ортидан кетаётган машиналар ўтиб қолади. Аммо улар ичида йўловчи йўқ, фақат рулда оғзи-бурнига дока ниқоб таққан ҳайдовчигина ўтиради, машина ойнасида катта-катта ҳарфларда “Рухсатнома” деб ёзилган сарғиш ёрлиқсифат қоғоз – стикер ёпиштирилган. Бир вақт кўча ўртасида бронетранспортёр кўринди. Унинг тепасида каска кийиб, респиратор таққан аскар овоз кучайтиргични ушлаб келарди. Ҳарбий машина ичида эса тинмай аудиоёзув айланарди: “Хурматли фуқаролар! Карантин қоидаларига риоя қилинг. Фақат энг зарур ҳоллардагина кўчага чиқинг. Уйда қолинг!” Унга эса олдинда кетаётган милиция машинасининг сиренаси кўшилар, бундан ҳосил бўлган шовқин қулоқни қоматга келтиради.

Маҳалла бошига қайрилаётуб, пальтолари тагидан этаги узун ялтироқ кўйлаклари “мўралаб” турган беш-олтита хотинга дуч келишди. Хотинлар оғиз-бурниларида дока ниқоб, қўлларида оппоқ дастурхонга ўралган тоғоралар, ниманидир берилиб муҳокама қилганча ён томондаги кўчага бурилишди. Аёллар, тоғоралар, бариси шаҳардаги манзарага тамоман зид, гўё қорамтири суратга теккизилган ёрқин доғ, фақат хотинларнинг бетидаги дока ниқоб охирги кунлардаги таҳликага мос келарди, холос.

– Мана буни ўзбекча карантин дейди, – хотинига ўғирилди Пўлат. – Шунаقا пайтда ҳам тоғоралар!

Уйга етиб келиб, юз-қўлларини юваркан, Малика бети музлаб қолганини сезди. Сув гўё ях устидан сирғалиб тушгандек эди.

...Тонгга яқин лўқиллаган оғриқдан уйғонди. Ваннахонага кирганда кўзгуга қаради-ю, юраги орқасига тортиб кетди. Ўнг бети шишиб, кўзлари юмилиб қолибди. “Газаклаб кетибди, – ўйлади у. – Энди нима қилдим?”

Термометрни олиб, қўлтиғига тиқди. Иссиғи кўтарила бошлабди. Оббо, шуниси етмай турувди! Жарроҳ қабулига кириш учун Шивлидан ҳам нарига бориши керак. Туманнинг бош стоматология поликлиникаси ўша ерда. Кечагина телевизорда соғлиқни сақлаш вазири шошилинч тиш жарроҳи керак бўлса, “Тез ёрдам”ни чақиринглар” деганди. Агар вазир айтгандек “Тез ёрдам”ни чақирса, иссиғини ўлчашади, унда тамом! Вирусология институтига олиб боришиди, тест топширади, ана ундан кейингина жарроҳга! Аммо бошқа илож йўқ, поликлиника анча олисда, пиёда этишнинг ўзи бўлмайди.

Касалхонага олиб боришилари мумкин дея, ҳар эҳтимолга қарши сумкасига тунги кўйлагини, шиппагини, тароғини солди, кейин вирус юқтирган деган гумонда карантин зонасига жўнатишса, нима қиламан, деб ўйлади-ю, юраги музлаб ўтириб қолди.

Бир вақт миясига: “Дори ичиб олсам-чи?” деган хаёл келди-ю, ўз-ўзидан хурсанд бўлиб кетди. Битта хапдорини ютиб, диванга чўзилди.

Шу пайтда Феруза чиқиб келди.

– Ая, – деди қўрқувдан кўзлари катта очилиб. – Вой, Худо! Сизни стоматология институтига олиб бориши керак. “Тез ёрдам” чақирайми?

– Айтаётган жойинг қаердалигини биласанми? – Маликанинг назарида эрининг зардаси қайнади. – Бу ердан етти километр нарида.

– “Тез ёрдам” оборади-ку, дада?

– Ҳа, оборади, лекин қайтариб олиб келмайди. Такси юрмаяпти, машинамизда боролмаймиз, жаримаси – отнинг калласи, пиёда қайтишга түғри келади.

– Бошқа иложи йўқ-ку, дада! Муҳими, аямнинг дарди арисин, қайтишга бир илож топилар... Ўзим обраман.

– Йўқ, – деди Пўлат қатъий. – Сен уйда Нигора билан қоласан. Тезда чой дамла. Дўхтир кўргандан кейин икки соатгача овқат ейиш мумкинмас. Аянгни силласи қуриб қолади.

Феруза айвончага чиқиб кетаётуб, онаси тайёрлаб қўйган сумкани кўриб қолди.

– Бу ҳар эҳтимолга қарши, – тушунтириди Малика. – Бирданига карантин зонасига жўнатворса ёки вирусология ётасан деса... Иссифим чиқди-ку!

Қизи лабини тишлаб қолди.

– Ая, – деди охири. – Сиз ваҳима бўлиб қолибсиз. Дўхтиrlар тиш оғриғи билан вируснинг фарқига боришади-ку!

– Қаёқда? Нариги даҳада нима бўлганини билсанми? Бечора икки марта иситмаси чиқиб, касалхонага борган, у ердагилар дори-дармон қилиб, уйига жўнатаверган. Охири “оғирлашиб” қолгандан кейин Вирусологияга обориб текширишса... Мана энди бутун даҳани ўраб олиб, ҳеч кимни киргизмаяптиям, чиқармаяптиям. Ўша касалхонаям карантинда!

– Бас! – Пўлат хотинининг гапини бўлди. – Ҳозир “Тез ёрдам” чақирамиз, қолган масалани шунга қараб ҳал қиласиз. Тамом!

Малика нафасини ичга ютиб, эрининг телефондаги гап-сўзига қулоқ тута бошлади.

– Кеча поликлиникага борганмиз, милки йиринглаган, жарроҳга бориш керак, дейишган. Йўқ, бизда жарроҳ йўқ. Иссифи? – хотинига қаради. Малика бош чайқади. – Иссифи йўқ. Хўп, обориб қўйсанглар, қай-

тишни бир гап қиласми. Қанча? Йўғ-е... Шунаقا денг?
Майли, майли...

Гўшакни қўйгач, муҳим бир ишга қарор берган кишидек кескин ўгирилди.

– Хуллас, Шивлидаги поликлиникага борганинглар яхши, клиникаларнинг кўпи ёпиқ, деяпти. “Тез ёрдам” чақираётган одамлар кўп, биз аввало оғир касалларга борамиз, агар обориб қўйинглар десаларинг, анча кутишингларга тўғри келади, дейишди. Нима қиласми?

Малика бирданига енгил тортди:

– Ўзимиз борамиз, аста-секин, шошиб нима қилдик? Бир жиҳатдан, шуниси яхши, касалхонага бормас эканман.

Пўлат кулимсиради:

– Уйдан Шивлигача тўрт километр, қайтиш – тўрт, ҳаммаси бўлиб саккиз километр йўл юрамиз.

– Майли, бошга тушганни кўз кўради. Одамлар марафонга югурди-ю! – Малика кийингани хонасига йўл олди.

– Дада, Шаҳристонда хусусий поликлиника бор эди-ку, балки очиқдир, а? Шундоқ йўлингларда... барабири ўша кўчадан ўтасизлар...

– Ҳозир хусусий клиникаларнинг кўпи ишлама-япти-да. Майли, қани, йўлга тушаверайлик-чи?

...Кечқурун яна даҳлиздаги телефон жиринглади. Нигора юргилаб бориб гўшакни кўтарди. Салом берди-да, қўнғироқ қилувчининг сўзларини жим туриб эшитиб, кейин ётоқхона эшигини тақиллатди:

– Хола, сизни телефонга чақиришяпти!

Малика лунжидаги шиши қайта бошлаган бўлса-да, гапиришга қийналар эди. Ўрнидан туриб, даҳлизга чиқди.

– Ўзлари кейинроқ қўнғироқ қиласканлар, де, жоним, тишим оғрияпти, гапиришим қийин, – деди зўрға оғзини очиб.

Нигора гўшакни қулоғига маҳкам босганча холасининг гапларини такрорлади. Кейин гўшакни унга узатди:

– Кўп нарса сўрамайман, чақир, дейиши.

Малика гўшакни олиб, қулоғига яқин келтирди:

– Ассалому алайкум!

– Вой, опа, бу ман, тузукмисиз? – нариги томондан “Даракчи”нинг овози эшитилди. – Боя хўжайиниз билан бошлишиб кетвотган экансиз. Жағиз шишиб кетибди, тишиз оғридими, а?

“Ё, тавба, юзимда ниқоб бор эди-ю, шунда ҳам кўра қолибдими? – ҳайрон бўлди Малика. – Бу хотин ҳақиқий даракчи”.

– Стоматология клиникасига бордийизми? – ўсмоқчилагандек сўради у.

– Йўқ, бормадим.

– Ростдан бормадийизми?

“Оббо!”

– Ростдан бормадим. Шаҳристондаги поликлиника очиқ экан. Ўша ерга кира қолдик.

– Э... Шунаقا дeng? Омадийиз боракан. Эшиидийизми, ўша клиникани карантинга ёпиб қўйишибди. Кеча вирус юқтирган одам қабулга борган экан, бугун гвардиячилар келиб, клиникани ичидаги бор одамлари билан ёпиб ташлашибди, ҳамма ичкарида қолиб кетибди. Энди кечадан бери у ёққа қабулга боргандарни топишиб, тест топширтиришаётганмиш. Сизни тишийиз оғригани эсимга тушиб қолиб, сўрадим-де, ўшаққа борган бўсайиз, бекитиб ўтирмасдан ростини гапириб, тест топширгани боринг-де, унақа... маҳаллани хавф остига қўйманг, демоқчийдим.

Малика лўқиллаётган жағига қўлини босди:

– Йўқ, у клиникага бормадим, – деди аранг. – Яхши қолинг.

– Майли, тузалиб кетинг, – шақиллади қўшни. – Сизга қўп гапириш мумкинмас, дамизни олақолинг.

Малика гўшакни жойига илди-ю, кафтини юзига босганча кулиб юборди.

17

Эрталабдан қўл телефони дириллади. Қаради: Носиржоннинг рақами. Тинчликмикин?

- Ассалому алайкум, опа! Соғ-саломатмисиз?
- Раҳмат. Ўзингиз тузукмисиз? Ишхонада нима гаплар, Носиржон? – сўради у.
- Э, ишхонага фақат тўрт кишигина келяпти, – жавоб берди у. – Қолганлар уйда. Мен ишни уйдан туриб баҳоли қудрат бажариб турибман.

Носиржон бир зум тин олди.

- Самарқанддан хабар келди, – деди. – Одамларимиз соғ-саломат, карантинлари тугабди.

Малика енгил тортди:

- Хайрият-а, жуда хавотир бўлаётувдим. Хижолат-пазлиknи-ку, айтманг. Фақат... Тошкентга қандай қайтишади? Шуни аниқлаш керак. Балки маҳсус руҳсатнома олиш керакдир?

- Вақти билан ҳал қиласмиз буни, – Носиржоннинг жавоби мужмалроқ бўлгандек туюлди Малика-га. – Ишхонага сизнинг номингизга хат келган экан домладан. Шуни электрон почтангизга жўнатвордим. Ўқирсиз. Майли, опа, яхши кунларда кўришгунча!

Ишхонада инновацион лойиҳалар билан шуғулланадиган бошқарманинг раҳбари – ёши олтмишлардан ошган басавлат кишини домла деб чақиришарди. Домла Молия институтида дарс ҳам берар, аспирантлик пайти Малика унинг “Таклиф иқтисоди ғояси”¹ китобини берилиб ўқиганди.

“Синглим, Маликахон! Карантин яхши ўтъяптими? Биздан хавотир олманг, хижолат чекманг, соғ-сало-

¹ Макроиктисодда “Таклиф иқтисоди” номли ғоя 1970 йилларнинг иккинчи ярмида олға сурилган бўлиб, ушбу мактаб тарафдорлари ишчи кучи таклифи ва капитални рағбатлантириши иқтисод ривожининг муҳим омили, дея таъқидлашади.

матмиз, Ўзига шукур. Муҳими, керакли ҳужжатларни түғрилаб олдик, агар Наврўз ўтсин десак, қолиб кетаркан. Меҳнатимизнинг ҳосили келади ҳали. Баҳо-нада “Охалик”ни кўрдик, бошқа пайт бу санаторийга бориш хаёлимизга келармиди? Табиати жуда чиройли, шароити яхши, яқин ўртада бўш вақтим бўлмаган эди. Бирйўла икки йиллик дамимни оляпман, бу ерда яхши кутубхона бор экан, китоб ўқияпман. Бир-икки-та яхши фикрлар келди, ёзиб қўйдим, карантин тугаса гаплашамиз. Яхши кунларда кўришамиз, хайр”.

Малика хатни ўқиб, ўйланиб қолди. “Бирйўла икки йиллик дамимни оляпман”, дегани нима? Домла Маликанинг ичини хижолат кемираётганини қаердан била қолди? “Тавба, домла мени юпатяптими? Аслида акси бўлиши керак эмасмиди?”

Шу топда Малика Самарқандга, домлага қўнғироқ қилишга, ҳол-аҳвол сўрашга фаҳми етмаганидан уя-либ кетди. Телефонидан домланинг рақамини топиб, тугмани босди. “Телефон аппарати ўчирилган” деган ҳиссиз овозни эшитиб, Носиржонга қайтадан қўнғироқ қилди.

– Опа, улар яна ўн тўрт кунга “Охалик”да қо-лишяптийкан, – деди Носиржон.

– Нега?

– Икки кишидан вирус чиқибди. Шунга бошқаларни яна карантинда қолдиришаркан.

– Оҳ, Худо! – Малика оёқлари бўшашиб диванга чўқди. – Чатоқ бўлибди-ку!

– Кеча вазиримиз карантиндагиларнинг оиласига яна моддий ёрдам қилинсин дедилар, у-бу бозорлик қилиб, ёрдам пули билан бирга оилаларига обориб бердик.

– Яхши, яхши иш бўлибди, – деди Малика нима дейишни билмай. Шу онда хаёлига келган фикрдан

ўзи ҳам севиниб кетди. – Сизда делегатларимизнинг уй телефонлари борми?

– Кўйинг, опа, ишхонадан бордик ахир, кўнгил сўрадик. Сиз кўп хижолат бўлманг, шунаقا бўлишини ким билибди?

– Йўқ, ўзим биттама-битта қўнғироқ қилиб чиқаман. Менга телефон рақамларини ёзиб беринг.

Носиржон бироз иккилангач, жавоб берди:

– Телефонингизга хабар қилиб ёзвораман.

– Мана бу бошқа гап.

...Домланинг уйида гўшакни овози бўғиқ йигит олди. Маликанинг назарида бу суҳбат эмас, монолог бўлди. Йигит бошқаларнинг гапини эшитишдан кўра ўзи гапиришни афзал кўраркан, шекилли.

– Онамни чақиролмайман, узр, – деди у. – Отам карантинга тушганларидан бери мазалари йўқ, қон босимлари “сақраб” ётибди. Боя бир дунё нарса опкелишибди, раҳмат каттакон-у, шукур, топиш-тутишим ёмонмас, онамни зориқтириб қўймайман. Бизга отам етишмай турибди-де, биттаю битта камчилигимиз шу. Кўлинглардан келса, шу камчиликни тўлдириб беринглар... Опа, энди узрни замминистрдан эшиздик, министрни ўzlари қўнғироқ қилдилар кўнгил сўраб. Сизники энди... Ўзи кекса одамни шунаقا шароитда Москвага жўнатиш тўғрими, айтинг, опа? Хўп, ўша пайтда бизда касаллар йўқ эди, а? Йўқ эди! Майли, Россия тинч эди ҳали, а? Лекин масъул одам глобал миқёсда фикрлай олиши керакми, йўқми? Бутун дунёда вирус қутуриб ётган маҳалда ҳар қанақанги халқаро лойиҳани тўхтатиб туриш керакмиди? Давлат манфаатлари устувор, буни ўзим ҳам биламан... Отам қанақа шароитда яшаётганини биласизми? Мен биламан. “Охалик” Самарқанддан ўн беш километр нарида, энг яқин аҳоли пункти – бу Охалик деган посёлка, агар Худо кўрсатмасин, малакали, тиббиётчилар тили билан айтганда тор

мутахассиснинг ёрдами керак бўп қолса, айниқса, шошилинч керак бўлса, шаҳарга етиб боролмайсиз, улгурмайсиз... Ҳа, у – яхши санаторий, лекин у ердагилар карантин шароити қанақа бўлиши кераклигини билмайди, чунки умрида бунақа ишларни қилмаган, кўрмаган, бунақа ишга маҳсус ўқитилмаган, ўргатилмаган. Овқатланадиган жой битта, тўлиқ изоляция деган нарса йўқ! Ҳар ҳолда СЭС бошлиғиман, у-бу нарсага ақлим етади. Уҳ... Илойим, отамга юқмаган бўлсин... Бошқа яна нима дей? Узр, кўнглингизни хира қилган бўлсан! Халқаро ҳамкорлик яхши нарса, лекин... Майли, кўнглимни кўтардингиз деб ҳисоблайман! Раҳмат!

...Кечқурун бўлган гапни эрига айтиб берди.

- Нима учун аёллардан раҳбарлар кам? Биласанми? – деди. – Чунки аёл аввало она, ҳамма нарсага оналиқ психологиясидан туриб ёндошади. Раҳбарлик эса тошбағирликни тақозо қилади, маълум маънода, албатта. Мана, масалан, кимнидир жазолаш керак бўлади ёки хавфли жойга жўнатиш... Аёл кишида раҳмдиллик кўп, мана, ўзинг карантинга тушиб қолган домлага ачиниб ўтирибсан. Мамлакат миқёсида тасаввур қилгин, давлат раҳбари керак пайтда кимларнингdir ўғлини ўлимга жўнатиши керак бўлади. Агар аёл давлат тепасида ўтирган бўлса, бунақа пайтда ич-этини еб юборади, чунки аёл ҳиссиётга бериувчан бўлади, ҳиссиётлар устун келган жойда ақл чекинади! Шунинг учун ҳам аёллардан катта раҳбарлар кам чиқади. Бу гендер тенгсизлиги эмас, оддийгина психология.

Маликанинг тумтайиб қолганини кўриб, илжайди:

- Битта ношуд нотиқнинг монологидан хафа бўлиш ҳам фақат аёл кишининг қўлидан келади.

- Дардимни келиб-келиб сизга айтдимми, а? – Малика ўрнидан туриб кетмоқчи бўлди. Пўлат унинг елкасидан қучди:

– Эртага Самарқанддаги филиалимизга қўнғироқ қиласман, қани, билиб беришсин-чи, домланинг аҳволи қандай экан? Сен домланинг исм-шарифини ёзиб бер, хўпми?

18

Кўл телефони дириллаб, дисплейида домланинг исм-шарифи кўринди. Малика худди тезда телефонни қулоғига тутмаса, ўчиб қоладигандек шошиб, журналини ташлади.

Домланинг овози доимгидек тетик эди:

– Э, синглим, Маликахон, яхшимисиз? Уй ичларингиз, болалар? Одамни жуда хижолатга қўйдингиз-ку! Ие, нега энди? Бу ернинг шароити яхши, овқатлари мазалик. Тағин бир тоғора самарқандча ош, катта саватни тўлдириб мева-чева киритишибди бизга. Пўлат Тўраевнинг ҳамкасларидан дейишди, нима ёрдам керак бўлса, тайёрмиз деб қўйишиди. Сизнинг умр ўртоғингиз шекилли, а? Омон бўлсин, катта раҳмат айтиб қўйинг.

Маликанинг томоғига нимадир тиқилгандек бўлди.

– Саломат бўлинг, домла, – дея олди аранг. – Илоҳим, яхши кунларда кўришайлик. Қолганлар тузукми?

– Оллоҳга шукур, ҳаммамиз соғ-саломатмиз. Зерикишга ўрин бўлмаяпти. Йигитларни ишга ўтқиздим. Хаёлимга бир яхши ғоя келиб қолди. Шунинг ишланмасини ёзасизлар, дедим. Лойиҳа ёзишяпти.

– Э, у ерда компьютер бор эканми?

– Компьютер йўқ, қофозга қўлда ёзасизлар, дедим. Бир вақтлар дунё-дунё ишларни қўлда ёзардик, ҳозиргилар бир варақ аризани қўлда ёзгунча терлаб кетади. Барибир вақтимиз кўп, дедим. Ёзаётганингиз лойиҳа, ҳисоб-китобларини кейин ҳам тўғрилаш мумкин, муҳими – ғояни асослаш. Тўғрими?

– Тўғри...

– Йигитларимизни китоб ўқишига ўргатяпман. Ёшларимизнинг китоб ўқишига рағбати йўқ, “Нега ўқимайсан?” десам, Ҳамдамжон: “Китоблар ҳаётдан орқада қолган”, дейди, қаранг. Мен унга “Сен “Дарё”¹ деган романни, “Боқий дарбадар”² деган романни ўқи, дедим. Кейин “Ўнинчи декабрь”³ деган китобни топиб бердим. Қани, мана шуни ҳам ўқиб кўр-чи, энди ям менга эътирозинг борми, деб.

– Ўқидими?

– Ўқиди-и! Учала китобни ҳам ўқиди. Хуллас, мана шунақанги ишлар билан бандмиз. Карантин – бу ка-салмисан, соғмисан, шу аниқ бўлишини кутиб, ғамга ботиб ўтириш дегани эмас. Карантин дегани – бироз вақт хилватга чекиниб, бундан буён қанақа яшайсан, нима ишлар қиласан, қайси ишни қандай қилсанг, одамлар сендан рози бўлади, шуларни мулоҳаза қилиб, бундан кейинги йўлингни белгилаб олишингга берилган имкон.

– Тўғри айтасиз, – Малика бўғзига тиқилган йифини аранг тутиб қолди. – Тўғри айтасиз...

– Майли, ўртоғингизга салом айтинг, каттакон раҳматимни етказинг. Биздан хавотир бўлманг, яхши кунларда кўришайлик.

– Сизни қийнаб кўйдим-да, домла...

– Ие, нега қийналарканман? Йўқ, сиз хижолат бўлманг, йиғлаляпсизми? Энди бунақамас-да... Вазирлиқда халқаро ҳамкорликни йўлга кўйган, соҳада бутун бир тизимни ишга солган одамсиз-а! Орқангиздан қанча ёшларни эргаштирдингиз? Буни ўйлаб кўрмагансиз,

¹ Абдуқаюм Йўлдош романи.

² Исажон Султон романи.

³ Жорж Сондерснинг ҳикоялар тўплами. Ж. Сондерс АҚШлик ёзувчи, қатор адабий мукофотлар соҳиби (жумладан, О. Генри номидаги миллий мукофот, халқаро Букер мукофоти).

а? Карантин тугасин, ҳали ишлаймиз, шунақсанги ло-
йиҳалар қиласизки!

– Илоҳим...

– Мана бу – бошқа гап!

Телефонни кўйгач, кўнгли тўлиб айвончага чиқди. Баҳор кучга тўлган эди. Ўрик шохларида ғўралар кўзга кўриниб қолибди. Мачит гумбази оппоқ беҳи гулларию нимяшил, навқирон баргларга кўмилган дараҳтлар қуршовида худди оқ-яшил кўпик ичига тўнкарилган нилгун пиёлани эслатарди. Бир вақт мана шу кўпириб тошган яшиллик бағридан бир тўп каптар отилиб чиқиб, кўкка парвоз қилди. Кимдир чийиллатиб ҳуштак чалди, бунга жавобан каптарларнинг қанотлари тапиллади. Йўлканинг нариги томонидаги ҳовлида ишком бағазларини маҳкамлаётган мўйсафид кўринди, айвон эшиги очилиб, саҳнга чақалоқ кўтарган келинчак тушиб келди.

Малика кўз олдида очилган бу осойишта ҳаётга кўзларини тўлдириб қаради. Бир вақт мачитга қараб чўзилган кўча ичидан “Тез ёрдам” машинаси чиқиб келди, катта йўлдан милиция машинасининг сиренаси, унинг ортидан овоз кучайтиргичдан янграётган “Заруратсиз кўчага чиқманг, карантин қоидаларига риоя қилинг”, деган огоҳлантириш эшитилди. Йўлкадан оғзи-бурнига ниқоб тутиб, кўлларига резина кўлқоп кийган участка нозири ўтиб кетди. Шу билан гўё салгина қиялатсанг, бир тасвир тагидан бошқаси чиқиб келадиган стерео-суратдек, осойишта кўринган манзара ортидан хатарли воқелик юз кўрсатди.

Шу пайт телефони СМС-хабар келганини билдириб, астагина “жир-ринг” этиб қўйди. “Жавлондан хабар келди”, – дея шошиб, телефонни қўлига олди, ўқиди: “Тана ҳароратингиз кўтарилса, зудлик билан “Тез ёрдам” чақиринг. Ўзингизни ўзингиз даволашга уринманг. Эҳтиёт бўлинг!”

Уҳ тортди. Жавлон касалхонага кетганига ўн тўрт кун бўлди. Ўн тўрт кунда смена алмашади, дейишган эди. Негадир жимжит...

Назарида ўтаётган мана шу кунлар бир маромда ишлайдиган механизмга айлантириб қўйяпти уни: ҳар куни бир турдаги иш, ниманидир кутиш, уйдаги тартибни ушлаш, бунинг учун Ферузага, Нигорага айтиладиган бир тусдаги ўгит-танбеҳлар, баъзида эри билан гаплашадиган гапи ҳам қолмагандек туюлади. Шунда ваннадан нам латта олиб чиқади-да, дераза токчаларини, эшикларни арта бошлиди, латтасига ғубор илашмаса ҳам артаверади. Кейин чўткани олиб айвончадаги пояндозни тозалашга тушади, Нигора: “Боя тозаладик-ку”, дейди, Феруза онасининг феълини билганидан индамай, Нигорани етаклаб хоналарига олиб кириб кетади. Малика айвончадаги ишини битиргач, нафас ростлайди-да, жавонни титиб, ўқимай қолган бирон китобни қидиради.

Хозир эса домла айтган китобни ўқиб кўргиси келди. Лекин аниқ билади, жавонида бу китоб йўқ. Қизига ўхшаб, интернетдан электрон шаклини қидириб кўрсамикин?

Иш хонасига айлантирилган меҳмонхонага кириб, ноутбукини ёқди. “Ўнинчи декабрь”, роман” деб ёзди. Эҳ-ҳе, бу роман эмас, ҳикоялар тўплами экан-ку! Тошкентда бу китоб ҳали босилмаган экан, фақат русча, инглизчаси бор. Домла оламдаги бор янги китобдан хабардор экан! Уни бежиз “Домла” дейишмас экан-да!

Малика китобнинг инглиз тилидаги нашрини топиб, компьютерига кўчириб олди. Ўқий бошлади: “Тўйларидан кейин дастлабки йилларда улар тез-тез жанжаллашиб туришарди. Бир-бирларига аллақандай бўлмагур уйдирмаларни ағдаришарди. Баъзан иш кўзёш тўкишгacha борарди. Тўшакка ётволиб ҳўнграрди ҳам, тўғрими? Кейин эса улар... кейин Молли қай-

ноқ, хўл юзларини унинг хўл, иссиқ бетига босарди. Кечир мени, дейишарди улар вужудлари билан, яна бир-бирларига юракларини очишарди, ўшанд... сенга яна юракларини очишганда, сен юз мингинчи бор афв этилганингда, севимли кишигнинг сенга меҳри янада ошганда туғилган бу туйғу сенга сингишиб кетган барча янги қусурларингдан баландга чиқади, шунда бундан-да чуқур, бундан-да нозикроқ туйғу бўлмайди..."

Фаройиб! Шунга ўхшаш туйғулар Маликанинг бошидан ўтмаганмиди? Пўлат билан ораларида мана шунақангি ҳолатлар бўлмаганмиди? Бўлган эди! Ҳозир, орадан ўттиз йилдан ортиқроқ фурсат ўтгач, худди баҳорги тошқин дарё сунбулага келиб, тинганидай, туйғулар ҳам сокин тортган. Фақат болаларнинг ташвиши, яқинларнинг бирон-бир тадбири ёки маросими, рўзгорнинг у-бу камчилигини тўлдириш ҳақидаги гаплар бош ўринга кўтарилади, Пўлат баъзида ўзининг файласуфона мулоҳазаларини хотинига гапириб ўтиришни севади, Малика эса унга жавобан ё раддия, ё ризолик билан жавоб қиласади, у-бу фикрларини билдириб ҳам қўяди, лекин бу ишни анча эҳтиёткорона қиласади, чунки унинг хаёлига келган ўйлар аксарият Пўлатни лол қолдиради. Малика эса бу эримга ёқмайди, деб ўйлади.

Эшикдан Пўлат мўралади:

– Эрталабдан ишга кўмилиб қолибсан? У-бу нарса емаймизми?

Малика ўрнидан турди.

– Жавлоннинг сменаси тугабди, – деди Пўлат хотини стол устига қўйган нонни ушатаркан, худди анчайн, аҳамиятсиз бир гапни айтгандек. – Карантинга жўнабди. Ҳозир қўнғироқ қиласади.

– Менга қўнғироқ қиласади-ку...

Хотинининг руҳи тушиб кетганини кўриб, қулган бўлди:

– Қизиқмисан, менга айтди нима-ю, сенга айтди нима?

– Ундай бўлса, нега менга қўнғироқ қилмайди? А? Агар барибир бўлса?

– Энди... унақа майда гап бўлмагин... Онамга айтсан, кўнгли бузилади, дегандир, отамга айтсан, ўзи тушунтиради, дегандир... Ҳолбуки, кетаётганда аниқ эди, касалхонадан кейин карантинга жўнайди, шунча касалнинг ичидан чиққандан кейин бирданига соғлом одамларнинг орасига кирмайди-ю!

– Буни-ку биламан-а... Уҳ... Овозини эшитсан, кўнглим тинчирди...

– Қўй, онаси, кўпга келган тўй бу. Бу дунёда тугамайдиган нарса йўқ. Сен домладан гапир, қўнғироқ қилдими? Кайфияти тузукми?

Малика бош силкиди:

– Жуда хурсанд. Сизга катта раҳмат айтди. Ажо-иб одам-да, иродали, доно... Мени юпатяпти, хижолат бўлманг деб...

Бугунги кун Маликанинг назарида ўзгача бўлди. Худди елкасидан тоғ ағдарилгандек сезди ўзини, домланинг сўзларини ичидаги қайта-қайта тақрорлади: “Карантин дегани – бироз вақт хилватга чекиниб, бундан буён қанақа яшайсан, қайси ишни қандай қилсанг, одамлар сендан рози бўлади, шуларни мулоҳаза қилиб, кейинги йўлингни белгилаб олишингга берилган имкон”. Тўғри гап! Ахир Малика шунга уриниб кўрмаяптими? Пўлат билан ўтган ўттиз икки йиллик турмушини у ёғидан-бу ёғигача хаёлан қайта кезиб чиқди, ўз вақтида қилган хатоларини таҳлил қилди, болалари, эри, қариндошлари, ҳамкаслари, дугоналари билан бирга кечирган бирда шодон, бирда қайғули дамларини ёдга олди, карантиндан кейинги ҳаёт

қандай бўлишини тасаввур қилишга уринди, қизини келинлик либосида, ўғлини куёвлик сарполарида кўз олдига келтирди, Нигорани чиройли сипо қўйлакда ўқишига жўнашини ўйлади, неча марталаб хаёлан ишхонасига кириб борди, Носиржон, бўлимидағи шогирдлари, ўша қулгили бошлиғи, қорамтири кумуш соchlари қуилиб тошган вазир, унинг аксича, тепакал ўринбосар, кўхъликина Ёқутхон, мудом жонсарак де-вонхона мудири билан саломлашди, домланинг тетик овозини, оқил сўзларини тинглагани унинг хонасига кирди, домла барваста қоматини вазминлик ила кўта-риб, келувчининг истиқболига турди... Неча-нечча марталаб шуларни тасаввур қилди ахир!

Кун ўтгани сайн хабарлар хавотирли бўлиб боряпти. Касал бўлганлар соат сайн кўпайиб боряпти, соғайганлар эса жуда кам. Қурилган янги карантин зонасини телевизорда кўриб, ваҳми келди. Автобусларда олиб келинаётган юзлаб одамлар, минглаб контейнерлар, контейнер қаторлари оралаб юрган, кийимбоши скафандрни эслатадиган зона хизматчилари, зона атрофини кўриқлаётган қуролли ҳарбийлар... Карантин зonasи юқоридан туриб қаралганда худди қаторлаштириб териб қўйилиб, атрофи ўраб олинган гугурт қутиларини эслатади. Мана шу "қути"ларнинг ҳар бирида одамлар жон сақлаётганига баъзида ақл бовар қилмайди.

Телевизор ҳамиша бир гапни такрорлайди: "Кўл бериб кўришманг, оралиқ масофани сақланг, тиббий ниқобсиз кўчага чиқманг, ташқарига фақат ўта зарур юмуш билангина чиқинг, карантин қоидалари..."

Ҳаммаёқда карантин, карантин, карантин!

Кўчага ўта зарур юмуш билангина чиқинг! Ҳозир Маликанинг энг зарур юмуши – отасини кўриб келиш! Лекин у кўчага шу зарур юмушини адо этиш учун чиқа оладими? Бу не қисматки, яқининг билан

дийдор кўришолмасанг, қучоқ очиб хушлашолмасанг, дўстингнинг кўлидан тута олмасанг?

Бу қўрқинчлар қачон енгигб ўтилади, қачон енгил нафас олиш мумкин бўлади?

19

Тонг ёришар-ёришмас қўл телефони жиринглаб, дисплейида масъул котибнинг исми кўринди. Одатда у кечқурун кўнғироқ қиласади. Тинчликмикин?

– Настя опа вафот этибди, – масъул котибнинг овози уйкуга тўймаган одамники каби бўғиқ чиқди. – Ҳозир Назокат опа хабар қилди. Келасизми, ака? Оқсоқолимиз сизни чақирияптилар.

Пўлат айвончага чиқди. Малика қаҳва дамларди.

– Чиқиб кетяпман, – деди. – Хавотир олма.

– Бир гап бўлдими?

– Маҳаллага чақиришяпти.

Пўлат ортиқ изоҳ бериб ўтирмай, даҳлизга ўтди, курткасини кийиб, оғзи-бурнига дока ниқобини тақди. Ўзини кузатиб чиқсан хотинига хўшлашиб бошини силкиди-да, эшикни ёпиб чиқди.

Настя опа дўкон билан бурчакма-бурчак тушган панель уйнинг энг охирги йўллагида яшарди. Йўлак оғзида “Тез ёрдам” машинаси турибди. Тор пиллапоялардан юқорига чиқаркан, учинчи қаватдаги зинапоя майдончасидан келаётган ғовур-ғувурни эшилди. Чап қўлдаги эшикдан Назокат опанинг невараси – етти-саккиз ёшлардаги қоп-қора бола мўралар, зина тутқичлари оша эгилиб, тепа қаватдаги қўшни – ёшгина жувон қизиқсиниб қарап, ўнг қўлдаги эшик ланг очиқ, бўсағада оқсоқол уни кутиб турарди.

Даҳлизда, оёқ остида бетартиб ечиб ташланган пояфзаллар, ичкарида маҳсус оқ комбинезонга ўрагиб олган шифокор йигит столга бағрини бериб узунчоқ қофозни тўлдириб, нималарнидир ёзади. Шериги

участка нозирига бир нималарни тушунтиради, йиғидан кўзлари қизарган Назокат опа полдачувалиб ётган жун ипни калавасига ўрайди. Уй ичини шиптирҳиди аралаш валеръянка иси босган.

Опа Пўлатни кўриб, ҳикоясини неchanчи мартадир қайтара бошлади:

– Кечабинойидеккинайди, маҳалладан ёрдам ташлаб кетишган экан, телпон қип чақирди, юрагим увишиб турибди, юролмиётибман, халтани бўшатиб, ичидагиларни жойлаб бер, деди. Каравотида тўқиб ўтирувди, мастава қилувдим, ичасанми десам, ичаман деди. Опчиқдим, ичволди. Чиқиб кетаётсам, борвур, эшикни ўзим ёпволаман, деди. Эрталаб бўсағани шундоқ тозалаволай деб эшигимни очсан, Настя опани эшиги қия очиқ турибди, даҳлизида чироқ ёниқ. Нима бўлди, деб мўраласам... – охири чидолмай пиқиллаб йиғлади. – Ман... мазаси қочиб хушидан кетган, деб ўйлабман... Дўхтири чақирсан...

Шифокор йигит майда ёзувлар билан тўлган қоғозни стол чеккасига қўйиб, ўрнидан турди.

– Мана, хужжатни шунга қараб беради, – деди қоғозга ишора қиласкан. – Бизга рухсат этасиз энди.

– Қариндошларига хабар қиласизлар, – қўшиб қўйди шериги.

Оқсоқол шифокорларни эшик тагигача кузатиб қайтди. Опа баттарроқ йиғлади:

– Бечора, бола-чақаси йўқ, ёлғиз эди... Ёнида бирон яқини бўлганда тирик қолармиди... Маниям ғафлат босганини қаранг!

– Бўлди, бас, опа, жуда-а... ўзингизни еворманг, шунаقا бўлишини ким билибди? Боласи бўлмаса, қариндоши бордир? – сўради Пўлат.

– Биттагина жияни бор, Ғазалкентда туради, Павел, Павел деб эси кетарди. Лекигин телпонини билмийман.

Нозир пешонасини қашиди.

– Настя опани телефони бормикин? А? – дея ён-атрофга аланглади. – Телефонини қарайлик-чи?

– У қўл телпони тутмасийди, – деди опа. – Уйимдаги телпоним етади, дерди.

Нозир каравотнинг бош томонида турган телефон аппарати ёнини кўздан кечириб, қорамтири узунчоқ дафтарча топди. Уни очиши билан ичидан кўкимтири юпқа китобча оёқ остига тушиб кетди. Кўлга олиб қаради: омонат дафтарчаси.

– Бояқиши қора кунига атаб йиғиб-терган экан-да, – ачингансимон бош чайқади оқсоқол.

– Бу йиққан-терганини фақат меросхўри ишлата олади-да, лекин уни ҳам қонун белгилаб қўйган муддат ўтгандан кейин, – нозир омонат дафтарчани телефон ёнига ташлади-да, узунчоқ дафтардаги қайдларни ўқишига тутиндиги.

Пўлат курсига ўтирган кўйи хонани кўздан кечира бошлади. Узунчоқ энсиз хонанинг тўрида бундан ўн йиллар аввалги русумдаги телевизор, деворда, шундокқина каравот тепасида ранги униққан гиламча, каравот бош томонидаги тумба устида бир ҳовуч дори идишлари, эшикнинг рўпарасида пастаккина жавон, унинг чанг босган шиша токчаларида беш-олтита биллур идишчалар, жавон устида қайнин пўстлоғидан ясалган, ҳар турли рангдаги калавага тўла саватча, хона ўртасида сарғимтири дастурхон ёпилган думалоқ стол устида қадимий чойнак билан ювуқсиз финжон, оёқ остида арzonбаҳо палос...

– Мана, топдим, манави бўлса керак, – нозир дафтарчанинг очиқ бетини Пўлаттга кўрсатди. – Павлуша деб ёзиб қўйибди.

Пўлат чўнтагидан телефонини чиқариб, нозир кўрсатган рақамларни терди. Кўп ўтмай, гўшақдан уйқусираган товуш келди:

– Алло!

– Павел? – сўради Пўлат. – Здравствуй. Меня зовут Пулат, я представитель махаллинского комитета¹.

Нариги томондаги йигит ҳафсаласиз жавоб қилди:

– Очень приятно².

– Извините, но я вынужден сообщить вам прискорбную весть. Сегодня скончалась ваша тётя, – Пўлат стол устидаги қофозни олиб қаради. – Анастасия Павловна³.

Павел хушёр тортди, шекилли:

– Бог ты мой! – деб юборди. – Ох, несчастье какое!

И во время карантина! Ведь въезд в Ташкент закрыт, как мне быть⁴?

Павел бир муддат жимлиқдан кейин деди:

– Я постараюсь придти, ну, что-нибудь придумаю. Если получится, я вас извещу, ну, извещу при любом раскладе⁵.

– Иложини топиб, келаман, деяпти. Хуллас, хабарини бераркан.

– Пўлат ака, – нозир оқсоқолга ўгирилди. – Амаки, Павелнинг етиб келиши даргумон, Ғазалкент карантинга ёпилган, амаллаб у ердан чиққан тақдирда ҳам Чирчиқдан ўтолмайди.

– Қани кўрайлик-чи, балки иложини топар, постда турғанлар ҳам одам-ку, тушунар, – гапга аралашди оқсоқол. – Агар келолмаса, ҳаракатни ўзимиз қила-миз-да, Сиз, – у нозирга қаради. – Машинангизда бемалол юра оласиз. Ёрдамингиз тегсин, мархуманинг

¹ Павел? Салом. Мен – Пўлатман, маҳалла қўмитаси вакилиман.

² Ғоят хурсандман.

³ Узр, сизга қайғули хабарни айтишга мажбурман. Бугун холангиз Анастасия Павловна оламдан ўтди.

⁴ Ё Ҳудойим-е! Ох, қандай баҳтсизлик! Карантин вақтида-я! Ахир Тошкентга кириш тақиқланган-ку, нима қилдим?

⁵ Боришига ҳаракат қиласман, бирон нарса ўйлаб топарман. Агар бора оладиган бўлсан, хабардор қиласман, умуман, ҳар нима бўлганда ҳам сизга хабар бераман.

хужжатларини тўғрилаб беринг, вақт кетмасин, бу ёғи бир гап бўлар, – кейин Пўлатга ўгирилди. – Мен ҳар эҳтимолга қарши тўйхонанинг эгаси билан гаплашиб кўрай. Шунча сўрадик, ийќ демади, бу сафар ҳам зора ёрдам берса... “Қора лола” деган бюро бор, қариндошлиари вафот этса, насронийлар шунга мурожаат қилишади. “Қора лола” билан гаплаша оласизми? Жияни етиб келса ҳам, барибир, шу масалани ҳал қилиш кепрак бўлади. У Фазалкентда турса, Тошкентда бунақа ишлар қандай қилинади, билмайди-ю...

Пўлат розилигини билдириб бош силкиди.

– Ишинглар битган бўлса, чиқиб турасизларми, а? Бу ёқни артиб-суртиб олай, – опа энди анча ўзини бошиб олган эди. – Шу аҳволда бирор келса уят бўлар...

...Бир соат ўтиб-ўтмай, Павел қўнғироқ қилди:

– Пулат ака, я уже полчаса стою у поста в Чирчик. Меня не пропускают, никакие уговоры, просьбы не действуют. Я им говорю, что кроме меня у нее никаких родственников нет, но все бесполезно! Я не знаю, что делать¹!

– Павел, ну, не надо нервничать! Что поделаешь, закон – есть закон, придется подчиняться².

– И я не смогу похоронить тетку? И что тогда с ней будет³?

– Мы вам поможем. Всё-таки в одной махалле живем. Только вы мне скажите куда нужно ее хоронить, какое кладбище, ну, надеюсь, вы меня поняли⁴...

¹ Пўлат ака, ярим соатдан бери Чирчиқка кираверишда, постнинг ёнида турибман. Мени ўтказишмаяпти, ялинишлар, илтимослар фойда бермаяпти. Унинг мендан бошқа қариндоши ийќ, дедим, барибир, унашмаяпти! Нима қилишни билмаяпман.

² Асабийлашманг, Павел. Нима қилардик, қонун – қонун-да, бўйсунишга тўғри келади.

³ Холамни дағн қилолмайманми? Унда нима бўлади?

⁴ Биз ёрдам берамиз. Ҳар ҳолда битта маҳаллада яшаймиз-ку. Фақат холангизни қаерга дағн қилиш кераклигини айтинг, қайси қабристон, хуллас, тушундингиз деб умид қиламан.

– Ах, да! – гўшақдан Павелнинг узун сўлиш олгани эшитилди. – В Домбрабадскую кладбище, рядом с моей мамой. Все данные я вам пришлю телеграммой или через СМС. В Ташкенте живет родственник моей жены, я ему позвоню, он тоже поможет¹.

Сал ўтмай, оқсоқол кириб келди. Тўйхонанинг эгаси анчагина пул берибди, орқама-кетин Павелнинг қариндоши қўнғироқ қилиб, бир соатга қолмай, топганимни олиб етиб бораман, деди, нозир тайёр бўлган хужжатларни олиб келди, “Қора лола” вакилиман, деб бақалоқ бир йигит эшиқдан кирди.

Узун қора жубба кийиб, бўйнига темир хоч осган, учбурчак қўнғир соқоли узунчоқ юзига ярашиб тушган руҳоний ширали йўғон овозида дуо сўзларини чўзиб-чўзиб хониш қилаётган пайт Пўлат айвончага чиқди. Айвонча қаровсизликдан анча тўкилиб қолган, ҳар ерда Настия опанинг чанг босган қақир-куқурлари ётарди. Хонанинг очиқ эшигидан мум ва ладан ҳиди келар, руҳонийнинг хитоблари орасида ладан солинган темир идишининг тақиллаши эшитиларди. Кун иссиқ, ҳавода киши руҳини эзадиган, лоҳас қиларлик димлик. “Эртага ёмғир ёғади шекилли”, – ўйлади Пўлат. Айвончадан эгилиб, кўчага разм солди.

Йўлак олдида усти ёпиқ узунчоқ қора машина турибди, оппоқ маҳсус кийимга ўраниб олган ҳайдовчи кабинадан бошини чиқариб, нарироқда турган оқсоқолга нималарнидир гапиради. Йўлкадан майда-чуйдалар тўлдирилган елим халта кўтариб ўтиб кетаётган аёл тўхтаб, машинани қизиқсиниб томоша қиласди.

Ичкарида руҳонийнинг овози тинди. Пўлат маро-

¹ Ҳа, Дўмбиробод қабристонига, онамнинг ёнига қўйиш керак. Керакли маълумотларни телеграммадан ёки СМС қилиб ёзиб юбораман. Тошкентда хотинимнинг қариндоши яшайди, унга қўнғироқ қиласман, сизга ёрдам беради.

сим тугаганини англаб, ичкари кирди. Хона ўртасида қопқоғига хоч ўрнатилган қора ёғоч тобут туради. Павелнинг қариндоши тобут қаршисида эгилиб, ихтиёрсиз етказган озор ва ранжлари учун афв сўра-ди-да, тобут устидаги хочга пешонасини босди.

Шамлар пуфлаб ўчирилганидан ҳавога ҳарир ту-тун пардаси кўтарилиди. Жавон ёнида кутиб турган бақалоқ йигит ёнидаги ёрдамчиси билан тобутни кўтаришга ҳозирланди. Павелнинг қариндоши то-бутнинг учинчи бурчагига келди. Буни кўрган Пўлат ёрдамга ошиқди. Рухоний олдинга тушди. Тўрт киши-лашиб тобутни кўтаришиб, ҳовлига чиқишиди.

Тобутни машинага қўйишгач, оқсоқол Павелнинг қариндошига бир нималарни шивирлади-да, қўлига конверт тутқизди.

– У меня есть¹, – эътиroz қилди йигит.

– Возьми, – деди оқсоқол. – При таких случаях никогда не знаешь, сколько понадобится. Будут непредвиденные расходы².

– Раҳмат сизларга, – деди қариндош йигит русча талафузга хос тарзда “а”ни чўзиб. – Катта раҳмат!

Бақалоқ йигит машинага чиқиб, рухонийнинг рўпарасига, ёрдамчисининг ёнига ўтирди, қийшайиб қолган гулчамбарни ғамхўрлик ила тўғрилаб, тобутга суюб қўйди. Кейин машина ичидан бошини чиқарди:

– Вы можете оставаться, все-таки карантин, сейчас запрещено присутствие на похоронах более четырех человек. Если понадобится, на кладбище всегда есть помощники³.

¹ Менда бор.

² Ол. Бунақа пайтларда қанча тул керак бўлишини ҳеч қачон билолмайсан. Кутимаган харажатлар бўлиб қолади.

³ Сизлар қолсангиз ҳам бўлади, ҳар ҳолда карантин пайти, ҳозир дағн маросимида тўрт кишидан ортиқ одам қатнашиши мумкин эмас. Агар керак бўлиб қолса, қабристонда ҳамиша ёрдамчи топилади.

Қариндош йигит машинага чиқиб, тобут ёнига ўтирди, Пўлат билан оқсоқолга қараб қўлини қўксига босди.

Йўлкадан катта йўлга томон аста ўрмалаб бораётган машина ортидан қараб қолишаркан, оқсоқол:

– Одамнинг умри омонат нарса-да, – дея хўрсинди. – Бугун борсан, эртага йўқ.

Пўлат атрофга қаради. Деразалардан маҳалладошлиари қараб туришарди.

...Малика ётоқхонасининг деразасидан тобут ортилган машина узоқлаб кетгунча қараб турди. Беихтиёр Настя опани эслади. Ҳамиша эрталаб, Малика ишига кетаётганда учала итини эргаштириб, йўлкада сайр қилиб юрган бўларди. Оқшомлари дўкондан шаффофф халта кўтариб чиқиб келаётганини қўрарди. Кекса аёлнинг халтасида аксаран бир дона нон, бир шиша қатиқ бўларди, баъзида майда-чуйдасини шалоғи чиққан эски аравачасига ортиб, эски шиппагини судраганча бозордан пиёда келарди. Бу аёлнинг бир вақтлар авиация заводида бутун бир цехни бошқарганига, юздан ортиқ ишчиларга бошчилик қилганига ишониб бўлмасди. Малика янги кўчиб келган пайтларида кўрган Настя опани яхши эслайди. Эллик ёшларда, қўнғир соchlари калта кесилган, турли-туман башанг кийимлари ярашган, пардоз-андози жойига келтирилган хушқад бир аёл! Кунда ярқираб турган чиройли машинада ишдан қайтарди, кўпинча қўлларида кўркам гулдаста, ширинлик солинган чиройли кутича бўларди.

– Шу ёшида ҳам гул берадиганлари бор-а! Ҳусни борида тузук бир кишига эрга тегмайдими, – деди бир куни Пўлаттга. – На боласи бор, на...

Эри илжайди:

– Бизнинг шарқона қарашларимиз ҳаммага ҳам тўғри келмайди.

...Энди бир пайтлар ўзининг башанг юришлари билан маҳалла аёлларини ҳайратга солган ўша Настя ора-сира итларига деб сотиб олган бир халта суяқ-саёқларини кўтариб ўтади, йўлкирага пул сарфламаслик учун аравачасини судраб, бозордан пиёда қайтади, бозорга кираверишда майда-чуйда сотиб ўтирадиган хотинга улгуржига бериш учун ҳафта ичи уйида ўтириб пайпоқ тўқийди...

20

Кечқурун электрон почтасини очаркан, Фрайбургдан келган хатни кўрди. “Малика, ассалом, синглим! Мен янги спектакль қўймоқдаман. Номини “Хўжа Насриддиннинг янги саргузашлари” деб қўйдим. Менга ёрдаминг керак. Ойингнинг катта сўзанасини расмга олиб жўнат, интернетдан олган расмларим тўғри келмади. Мен оригинал парда заказ қилдирмоқчиман, рассом катта газламага сўзанани расмини чизиб беради. Бунаقا спектаклни ҳали ҳеч ким кўрмаган, бу ерда қўғирчоқ театр йўқ, мен тузган труппанинг томошалари аншлаг билан кетмоқда. Асосий даромадим шу. Ёрдам бер, жоним синглим. Сени соғиниб, Гриша аканг”.

О, Гриша ака янги спектакль қўйяптими? Яна Хўжа Насриддин! Шу афанди ҳақида нечта томоша қўйди? “Бунаقا спектаклни ҳали ҳеч ким кўрмаган...” Албатта-да, Шарқ Европа томошибини учун экзотика! Асосий даромади унинг труппаси қўйган томошаларидан келаётган бўлса, демак, аншлаг бўладиган асар керак. Бу эса Германияда ҳали ҳеч ким кўрмаган, билмаган Хўжа Насриддин!

Дунёning ишлари ғалати экан. Гриша маҳаллада, танишлари, дўстлари орасида Насриддин афанди латифаларини моҳирона ҳикоя қилувчи сифатида донг таратган эди. У латифани соф Тошкент шеваси-

да айтарди, айтаркан, ўзбекча сўзларни ўзгача бир завқ билан талафуз қиласардики, эшитувчилар аввало унинг мана шу талафузини эшитишни ёқтиришарди. Гриша ҳамиша латифани “Бир куни Апанди...” деб бошларди ва шу заҳоти атрофда кулги кўтариларади.

Гриша тўйларда ўзбекча қўшиқ ҳам айтарди. Маҳаллада кимницида тўй бўлса, узоққа бориб юрмай, Гришани чақиришарди, у ўзи бошқараётган маданият уйидаги йигитлар билан келиб тўйни қиздирив берарди.

– Гриша, битта латифа ҳам бўлсин, – кулишарди тўйхонани тўлдирган ёш-яланг.

– Йў-ў, – дерди у бош чайқаб. – Тўйда Апанидан гапирмийди. Бошқа сапар... Мана, маданият уйимга ке, санга икки соат Апанди гапирмаган... биласанми ким? Тўйда ашула айтаман, ҳамма рақс тушади.

Кейин электр гитарасини олиб, йигитларга имо қиласарди:

– Қани, бошладик, шўхидан!

Ҳамма ёқимтой бу йигит кимга уйланаркин, дерди. Жуда чиройли қизни танласа керак, шундо-о-оқ йигитга кимлар тегмайди, дейишарди.

Гриша уйланганда бутун маҳалла келинни кўргани эшик тагига тўпланди. Пиджаги ёқасига оқ атиргул тақиб ясаниб олган Гриша содда оқ кўйлак кийиб, калта қирқилган сомон ранг соchlари устига узун тўр ташлаган озғин, кўримсиз бир қизнинг қўлидан ушлаб машинадан туширди. Тенгсиз гўзал бир қизни кўрамиз деб турганларнинг бирданига ҳафсаласи совиди. Келиннинг исмини эшитиб-ку, ҳайратлари яна ошди: Адалинда! Бунақа исмни ҳеч ким эшитмаганди. Кўп ўтмай, кимдир айтди: келин немис экан, келиннинг бобоси урушдан олдин Москвадан қувғин қилиниб, оиласи билан ўзимизнинг Тўйтепадан паноҳ топган экан.

Бояқиши Чучага негадир шу келинини хушламади. Бирйўла эгизак ўғиллар туғиб бердиямки, эримади.

– Адалинда – жадугар, – дерди у тили келишмаганидан “о”ни “а”га айлантириб. – Баба Яга ёшлик пайти шунака бўлган, – у “к”ни ҳам “к” деб талаффуз қиласади.

Маликанинг онаси куларди:

– Кўйинг, Валяхон, келинингиз ювош, “пишир-куйдир”га уста-ю...

– Вай, Зумрад апа, бу ювашни ичидаги нима бар... В тиҳом омуте чёрти водятся¹! Канча гўзал рус кизлар бар, Гриша уни севди. Нега? Чунки у – Баба Яга! Факат ёш!

– Адалинда баламни Германияга апкетмакчи, – дея йифлади бир куни Чучага. – Адаси тирик бўлганда, Гриша бу Баба Ягани уйга апкелмас эди. Адаси йўқ, мани кучим кам, лекигин баламни кеткизмийман! Германияда пишириб кўйган йўқ!

Малика Чучанинг куйиб-пишишларидан билардиди, зоҳирлан сокин кўринган бу хонадонда тўфон пишиб келяпти, бир кун у кўтарилади-да, ҳаммаёқни остин-устун қиласади.

Эсида: кунлар совиб қолган, эрта оқшом тушган пайт эди. Ток кўмиш учун ҳашарга чиққан Гриша Зумрад опа ўчоқда пиширган ошни еб олиб, ҳамма билан хайларашди-ю, лекин ҳовлига чиққач, уйига кетишга шошилмади, мевалари териб олинган беҳи тагига кўйилган пастак курсига ўтирганча осмонга, кейин чор-атрофга бир-бир қараб чиқди. Қозонни ювгани чиққан Маликани ёнига чақирди.

– Қара, – деди осмонга ишора қилиб. – Ой дарахтга илиниб қолибди.

Малика яқинлашиши билан димоғига ўткир тамаки ҳиди урилди.

– Мунча кўп чекмас эдингиз-ку, Гриша ака! Тутунга кўмилиб кетганга ўхшайсиз.

¹ Тинч ўпқонда шайтонлар яшайди (рус халқ мақоли).

– Э, Малика... Ҳаётим тутун бўлиб кетган! Сигарет нима? Ёнади-тугайди.

“Бечора, – хаёлидан кечирди Малика. – Уйида тинчи йўқолган, юраги шунга сиқилса керак-да”.

– Қара, чиройли-я? Бунақа чиройли куз бошқа ёқда бўмийди, – Гриша қўлларини икки ёнга ёйди. – Бу дарахтлар, бу шамол, бу ҳовли...

– Германияга кетмай қўя қолсангиз-чи?

Гриша Маликанинг елкасидан кучиб, бошига бoshини теккизди.

– Жон сингил, – дея шивирлади. – Агар кетмасам, Адалинда Ваня билан Даняни опкетади. Кейин болаларим у ёқда фақат немисча гапирадиган бўлади, рус тилини эсидан чиқарворади, билдингми? Онам шуни тушунмиётиби. “Ну и пусть уходит, скатертью дорога¹”, дейди. Билмиётибдик, келини кетса, неваралариям кетади, бегона бўп кетади!

– Ох, акагинам-ей... Нега шу Адалиндага уйландингиз-а? Яхши қизлар кўп эди-ю!

Гриша хўрсинди:

– Сизларда битта мақол бор эди-ю, нима дерди? Муҳаббатнинг кўзлари кўр. Шунақами? Бизда бўлса айтади: “Любовь – зла, полюбишь и козла²”.

Маликага йигитнинг бу сўзларида надомат ҳам бордек туюлди. Гўё тугунни ножоиз боғлаган-у, энди ечишнинг иложини тополмаётгандай.

Эртаси кун тўсатдан қора совуқ турди. Изғирин забтига олиб, изиллаган шамол тўкилиб битмаган

¹ Кетаверсин, қайтиб кўринмасин (русларда “скатертью дорога” деган ибора қадимда меҳмонни кузатган пайтда эзгу тилак сифатида айтилган. Русларнинг назарида дастурхондан текисроқ, чиройлироқ мато бўлмаган, Россияда эса йўллар ёмон бўлган. Шу боис йўлингиз дастурхондай текис бўлсин, деган маънода шу иборани ишлатишган. Вақт ўтиб бу ибора тамоман тескари маънода, кетса ачинмайдиган одамга нисбатан қўлланила бошланган).

² Севги – ёвуз, эчкини ҳам севиб қолишинг мумкин (рус халқ мақоли).

баргларни бешафқатларча узиб олиб тўзитаверди. Осмон қорайиб, томлар устига энкайиб тушган кунларнинг бирида елкаларини тивит рўмоли билан ўраб олган Чуча айвонларига кириб келди.

– Вой Валяхон, мунча юпун кийинибсиз, ташқарида изғирин юрибди-я... – деди Зумрад опа чойнақдан иссиқ чой қуиб узатаркан.

– Э, ман ёниб кетвомман, – Чуча курсига ўтириб оғир уф тортди. – Яхшики, сиз бар, Зумрад апа, юрагимдагини айтваламан, бўлмаса, юрагим ёрили-иб, ўлиб калардим, – аёл оғир бош чайқади. – Бутун документлари тайёр бўпти. Германия унга тарихий Ватан экан. Мани жахлим чиқди. Бу ер-чи, бу ер санга нима, дедим. Тўйтепа санга хич нимами? Тўйтепа дедушкангни хаётини саклаб калган, бабушкангни ачлиқдан куткарган, агар Тўйтепа бўлмаса, сан бўлармидинг, дедим. “Ну, я благодарна этому посёлку, но мне лучше в Германии жить¹”, дейди. Бизда хаёт бардак эмиш, тартиб йўкмиш, адамни кадри йўкмиш. “За что деды боролись, непонятно²”, дейди-я!

Чуча йиғлаб юборди. Зумрад опа ошиқиб унинг бошини кўксига босди. Кўшнисини юпатиб, соchlарини силаркан, кўзларидан шашқатор ёшлар оқди.

– За что боролись деды³? Ман айтувдим-а, дедушкам Владимир губерниясида земский врач⁴ бўлган деб? Ўша ерда чечак эпидемияси бўлган, кўп одам ўл-

¹ Ҳар ҳолда бу посёлкадан миннатдорман, лекин Германияда яшаганим маъқул.

² Боболаримиз нима учун курашишган, тушуниб бўлмайди.

³ Боболаримиз нима учун курашишган?

⁴ Россия империясида шўролар давригача амалда бўлган тиббий тизим шифокори, уйзига белгилаб берилган қишлоқ ҳудудларида даволаш-профилактика ишларини олиб борган. Одатда уларга белгиланган ҳудуд таҳминан 17 чақирикни ташкил қилган бўлиб, хизмат кўрсатадиган аҳоли сони 28-30 минг атрофида бўлган.

ган, ҳукумат мужикларни вакцинасига кам пул берган. Ўшанда Россияда чечакдан йилига эллик минг одам ўларкан, шунака бўлгандан кейин чиновниклар¹ битта земствоудаги эпидемия нима бўпти, деб ўйлаган-да. Дедушкам земство мажлисида гапирган, кейин уни Туркестангга сургун килишган. Лекигин у давлатдан хафа бўмади, ти-инч ишлади, касалларни тузатди. Большевиклар келгандаям касалларга каради, байни-ям, батракният, большевикният, хаммани касалдан тузатган! Кейин репрессия бўлиб, атиб ташлашган, саксан ёшли чални атиб ташлашган! Гўри каёқда, билмийман! Мани адамни ординатурадан хайдашган, шунийчун бир умр аддий врач бўлиб ишлаган! Лекигин адам ҳам, ман ҳам Ватанин яман кўриб калмадик-ку. Булар нега бунака?

– Ким билсин, Валяхон, нега булар бунаقا бўлиб ўсади? – деди кўзларини артиб Зумрад опа.

– Ман Гришага айтдим, – Чучанинг овози қатъ-иyllашибди. – Мани адам, сани аданг Ташкентга кўмилган, сани аданг уруш пайти эшелонда келганда Ташкент нан берган, аданг манга нан берган шахар учун ишлийман деб, бир умр шу ерда уйлар курди, мактаблар курди. Бу шахар сани Ватанинг, кетсанг, факат мани ўлигимдан ўтиб, кетасан, дедим.

Зумрад опа чўчиб кетди:

– Вой, нафасингизни ел учирсин, фаришталар омин дейди-я, ниятни яхши қилинг, Валяхон!

– Йўқ, – Чуча бош чайқади. – Гапим – гап, только через мой труп²!

...Эртаси кун қўшни уйга жуда кўп одам йифилди. Маҳалла аҳли ўзларининг дўхтирлари Валяхонни сўнгги йўлга кузатгани чиққан эди. Катта хона ўрта-

¹ Амалдор.

² Фақат ўлигимдан ҳатлаб.

сига қўйилган тобутнинг қопқоғи ёпилиб, одамлар уни кўтаришга ҷоғланган пайт Гриша ўкириб ўзини тобутнинг устига ташлади:

– Прости, мама! Прости-и-и¹...

Малика шунда ўша машхур мақол тўғри экан, деган хulosага келди, ростдан ҳам фаришталар ҳар бир сўзга омин деркан...

...Янги йилга яқин уйларига Миша кириб келди.

– Энди мен сизларга кўшни бўламан, Саттор ака, – деди у ўзига узатилган пиёлани оларкан. – Гриша Германияга кетадиган бўлди.

– Ие, шунаقا де? – Саттор ака дўпписини бошидан олиб кўрпачага ташлади. – Кетмайдиган бўлди деб эшитувдим-у!

– Мен ўзим айтдим боракол, деб. Адалинда билан ажрашмокчиди, болаларинг бор, дедим. Онам энди тирилиб келмийди... – Миша хўрсиниб бир муддат жим қолди. – Отам етим ўсган, чунки бобом, момом ўлган эди, сен тириксан, болаларинг етим бўлса яхши-мас, дедим.

– Тўғри ўйлабсан.

– Германияга боришга, у йоқда ўзини тутволишига пул керак, ҳовлини сотаман, деди. Мен йўқ дедим... Кейин квартирамни, машинамни сотдим, – Миша ўнг қўлини чўзиб, кўрсатди. – Кўрдийизми, мана бу “обручалий”ниям сотдим. Хотиним узугини, зирагини сотди. Ҳамма пулни Гришага бердим, Адалинда ҳисоб-китобни яхши билади, ҳовлини пулига тўғри келиши керак-де мен берадиган пуллар. Шунака бўлди...

– Тўғри иш қилибсан, Миша, – гапга аралашди боядан бери жим ўтирган Зумрад опа. – Отанг қурган ҳовлининг чироғини ёқасан. Илгаригидай қўшни бўлиб яшаймиз.

Миша илжайди:

¹ Кечир, ойи! Кечир!

- Йанги йилга норин киласизми?
- Бўлмасам-чи, ҳар янги йил норин қиласиз-ку.
- Татиб кўргани чикаман.
- Кел, бола-чақанг билан кел, яйраб норинхўрлик қиласиз.

...Малика сандиги устидаги кўрпаларини тушириди. Келинлик сепидаги қадимий ипак палагини авай-лаб, чит чойшабга ўраб сандигига солиб қўйган эди. Майли, Хўжа Насриддин шунча олисда, Европадаки хайрли иш қилаётган экан, Малика нега ёрдам берма-син?

21

...Кечқурун қизи хонасидан планшетини кўтариб чиқиб келди-да, столга ёйиб ташланган диаграммаларга қараб нималарнидир қизғин муҳокама қилаётган ота-онасига қараб турди.

– Нима гап, Феруз? – Пўлат муҳим гаплари бўлиниб қолганидан тоқатсизланди. – Тинчликми?

Қиз “Айтаверайми?” деган каби онасига қараб қўйди.

– Ҳа, бизда ишинг бормиди? – далда берди онаси.

– Мен волонтёр бўлиб ишга кирмоқчиман, йўқ демайсизларми?

Эр-хотин бир-бирларига қараб қўйишиди.

– Хайрия марказига волонтёrlарни қабул қилишаётган экан, гуруҳимиздагилар борайлик, дейишяпти...

– Бутун гуруҳ бўлиб боряпсизларми? – Малика эндиғина қизи нима деётганини тушуниб етди.

– Ҳа.

– Борсанглар қабул қилаверар эканми? Ўзига яраша талаблари бўлса керак?

Қиз онасининг саволидан хафа бўлди.

– Икки тилда эркин гаплашадиган, компьютерда ишлашни биладиганлар колл-марказга олинаркан, мен учта тилни биламан, компьютерни айтмаса ҳам

бўлади, ҳатто машина ҳайдашни биламан, ҳужжатим бор. Магистратурани битиряпман-ку! Ҳоҳлаганлар озиқ-овқат ташийди, юк туширади.

Пўлат “жим” деган каби хотинининг елкасидан босиб қўйди.

- Қизгинам! – деди имкон қадар вазмин бўлишга интилиб. – Савоб иш қиласман, десанг хурсанд бўламиз. Лекин бу иш ҳавас эмас-да, кун бўйи телефонда саволларга жавоб бериб ўтирасан. Ҳар хил одам бўлади, бири жаҳлдор, бири эзма, бири инжиқ... Ҳаммасига дуруст муомала қила билишинг керак бўлади, сабр-тоқат керак бунга, шуларни олдиндан тушуниб, бораман, деётган бўлсанг, хўп, агар шу иш баҳонада кўчага чиқаман, ёзилиб келаман, ўртоқларим билан гап сотаман деб ўйлаган бўлсанг, хато қиласан. Ундан кўра уйда ўтирганинг яхши, мен уятга қолишни хоҳламайман.

- Дада, мен буларнинг ҳаммасини тушунганман. Пўлат Тўраевнинг қизиман, ахир.

- Рухсат берамизми? – Пўлат хотинига ўгирилди.

Малика ҳамон қизининг гапини ҳазм қилолмай ўтиради. Феруза онасининг сўз тополмай қолганини ўз фойдасига изоҳлади. “Раҳмат!” дея юргурилаганча даҳлизга чиқиб, дугонасининг телефон рақамини тера бошлади. Пўлат даҳлиз томонга бир қараб олди-да, секингина:

- Сен ҳам бир вақтлар мана шунаقا олов эдинг, – деб илжайди. – Сени яхши кўраман, деганимда нима девдинг? А?

Малика қизаринқираб кулди:

- Эсим йўқ эди ўша пайтлар.

- Йўқ, баҳона қилма! Ҳаммасини билиб, тушуниб турувдинг, индаёлмайди деб ўйлагансан!

...Малика ўшанда: “Ҳа, биринчи январь – журъат уйғонадиган кун”, – деди. Шундай деди-ю, Пўлат тутган гулдастани олди.

Малика енгил кўйлаги бир ҳовучгина, патила соч-

лари елкасига етиб-етмаган, ушласанг, қанотига лат етадиган капалақдек нозик бир қиз эди. Лекин шу нозиккина қизнинг жиддийлиги, закийлиги ҳайратомуз, тенгдошлари тугул, ҳамма билими ўткир дейдиган Пўлатнинг тиши ўтмаган мавзуларни осонгина “ҳазм” қила олар, унинг фаҳми етган масалалар курсдошларининг тушига ҳам кирмаган, ўзига ишончи баланд, гап учун чўнтақка тушмайдиган бу қиздан йигитлар ҳайқиброқ туришарди.

Пўлат бу қиз менга йўқ деса керак, деб ўйларди, шунинг учун унга юрак ютиб, дилини ёролмаган. Бир куни... Пўлат ўша Жумагулдан бир умрга миннатдор, оғзидан “лоп” этиб чиқиб кетган ўша истеҳзоси учун ҳам миннатдор.

– Жинни бу қиз, – деди Жумагул. – Ректор келин қиласман деса, йўқ депти. Отасини жаҳли чиқсан экан, биринчи январда, эрталаб соат саккизда кимдан совчи келса, шунга тегаман, агар шу куни ҳеч ким келмаса, аспирантурани битиргунимгача менга индамайсиз, депти. Агар анави “Оловиддиннинг сехрли шамчириғи”га ўхшаб, эшиқдан вазирнинг тентак ўғли кириб келса-чи? Маликамиз нима қиларкан?

“Йўқ, вазирнинг тентак ўғли кирмайди эшиқдан”, – деди ўзига-ўзи Пўлат.

Айнан биринчи январь куни эрталаб соат саккизда Пўлатнинг онаси Маликаларнинг эшигини қоқди.

– Ошиқ бўлмай қолгур-а, – деди онаси кейин. – Мени хижолатга ўлдиргани Риштондан етаклаб келдингми? Гапингга қараб, фақат келишим қолган экан, холос, деб ўйлабман. Ҳали уйқудан туришмаган экан-у...

...Малика биринчи январда, яна эрталаб соат саккизда ҳеч ким келмайди, деб ўйлаган эди. Ректорнинг ўғлини кўрди, кўллари оппоқ, бармоқлари қизларни кидай узун-узун, қоп-қора соchlари жингалак, чиройли қўғирчоқقا ўхшарди, овози худди нозли келинчак-

никидек ингичка... Йўқ, деди. Отасининг назарида йўқ дейиш ноқулай эди, ўқиши қолиб кетади, деб қўрқмаса ҳам бўлади, ўша аспирантурасида ҳам ўқийверади, кейин институтда дарс ҳам бераверади. Йигит – тузук, ўқишларини битириб олибди, яхши жойда ишларкан... Аммо Малика сўзидан қайтмади.

Қиз аслида тамом бошқа бир йигитнинг журъат қилишини кутарди. Малика сезарди ахир, дарс пайти ўзи томонга қадалган нигоҳлар орасида уники ҳам бор эди. У эса индамасди, тортиниб-қимтиниб ўтираверарди, қизнинг эса жаҳли чиқарди: шунақаям журъатсиз бўладими йигит деган?

Кейин Жумагулга ўзи айтди, отамга шунақа дедим, ким ҳам биринчи январда совчи жўнатади, тағин ҳамма ухлаб ётган бир пайтда, бопладим, деди. Атайлаб Жумагулга айтди, чунки унинг ичидагап ётмаслигини биларди. Баҳонада ўша йигитда журъат уйғонади-ю, онасини жўнатади, бунақа имкониятдан ким фойдаланмайди, деб ўйлаган эди. Аммо совчини Пўлат жўнатиши хаёлига келмабди...

Чунки Пўлат ҳеч қачон дилидагини ташига чиқармаган, қиз бирон марта бўлсин, унинг ошиқона термилганини сезмаганди. Пўлат курсларидағи энг ёши улуғи эди. Биринчи кун ўқишга кирган кунлари аудитория эшиги тагида чуфурлашиб турган курсдош қизларни қўрганда “Кунимиз болалар ичидаги ўтаркан”, деб қулганини эшитган, шунда Жумагул шартакилик билан “Ҳа, сиздақа бобонинг насиҳатини эшитгани болалар керак-да”, дея жавоб қилганда қизлар билан баробар хоҳолашган эди. Лекин Пўлат бунга жавобан беписандлик билан илжайиб қўя қолган, Маликанинг эса жаҳли чиққан, бу йигитга қарши кек сақлаган эди. Ҳар сафар ҳаммани қойил қилган пайти: “Кимни ёш бола деяпсан?” деган каби Пўлат томонга кибр билан қараб қўярди. Ўзини парвосиз тутиб ўтирган йигитни

кўрган чоғ янада аччиғи чиқарди. Кун келиб, шу йигитга хотин бўлиш хаёлига кирибмиди?

22

Тушга яқин ёмғир шивалай бошлади. Малика шошиб кирларини йиғиб оларкан, ҳавонинг вазни енгиллашганини сезди, билакларига илиқ томчилар тушди. “Хайрият, энди қунлар исиб кетади, – енгил тортди у. – Офат ҳам чекиниб қолар...”

Уйи ҳувиллаб қолган. Яхшиям, Нигора бор экан, ҳарна чуғурлаб турибди, бўлмаса, ҳайҳотдек тўртта хона ютиб юборарди. Яна беш кун ўтса, Жавлоннинг карантини тугайди. Балки келиб қолар? Лоақал бир қунга келиб кетсаям майли эди...

Эри маҳаллага чиқиб кетувди, бошяланг эди-я, ёмғирда қолдими... Шамолламаса эди, бунаقا пайтда дўхтирга бориш осонмас. Ўзининг тиш дўхтири баҳона тортган азобларини эслади-ю, эти увишди.

...Яхшики, Шаҳристон кўчасидаги поликлиника очиқ экан.

Бошдан-оёқ кўқимтири кийимга ўранган йигит кўзига дурбинсифат асбобни тутиб, милкини, тишлари ни обдон кўриб чиқди.

– Опа, милқдаги йирингни чиқариб ташламаса бўлмайди, – деди қатъий. – Кесиш керак.

Малика бош силкиди: “Майли”.

– Уколсиз кесамиз, опа, чунки у таъсир қилмайди ҳозир, томирлар шишган-да. Бироз чидайсиз энди, хўпми?

Жарроҳ жавоб кутиб ўтируй, ялтироқ асбоблар солинган металл идишни келтириб ойна қопланган столчага шарақлатиб қўйди. Ҳамшира ёрдамга ҳозир бўлиб кресло ёнига келиб турди. Бу тайёргарликни кўриб Маликанинг юраги шувиллаб кетди. Кўзларини юмиб олди. Оғзига силлиқ, совуқ темир киргани-

ни, милкига қаттиқ тиғ ботганини сезди. Оғриқ худди миясига ўрмалаб киргандай бўлди. “Чида, чида, – деди ўзига ўзи. – Аёл кишисан, бундан баттар оғриқларга чидагансан, буниси ҳеч гап эмас. Ҳозир тугайди, кейин енгил бўлади”. Аммо қийноқ ҳали-вери тугайдиганга ўхшамасди, жарроҳ унинг оғзига асбобларини тиқар, милкларига шафқатсизларча нималарнидир санчар эди. Тиғ қозиқ тишининг тепасига теккан пайти азоб шу қадар кучайдики, қаттиқ инграб юборди. Бирданига оғзи шилимшиқ алланимага тўлди, жарроҳ унинг оғзидан узунчоқ, қошиқсимон асбобини чиқариб, ён томондаги туфдонга ишора қилди.

Малика туфдонга эгилди, оғзидан қон аралаш йи-ринг оқиб тушишига ижирғаниб қаради. Симилаган оғриқ миясигача чиқиб борганидан пешонасини ушлаган кўйи бир муддат ўтириб қолди.

Ўшанда тўрт кунгача иккитадан оғритадиган укол олган, тиғ теккан жойни йирингидан тозалатгани икки кун Шаҳристонга пиёда қатнаган, роса азоб чеккан эди.

...Эшик қўнғироғи жиринглади.

– Ие, даданг шекилли, – деб юборди беихтиёр.

– Адам келдиларми? – қистирғичларни йиғиши-раётган Нигора ранги ўчиб, ерга ўтириб қолди.

Шундагина Малика уйда қизи йўқлигини, Ферузага эмас, Нигорага гапираётганини эслади. “Ё, Худо, шунчалик ҳам юрак олдириб қўйганми, а?”

– Йўқ, Нигора, мен адашиб кетдим, поччанг келди! – дея даҳлизга ошиқди.

Пўлат шаффоф халтада икки буханка нон кўтариб турарди.

– Бирйўла икки кунлик қилиб олдим, – изоҳ берди у. – Кўчага кунда чиқаравермайлик. Нигора қани? Нигора! Кел, мени дезинфекция қилмайсанми?

Қизча спиртли аралашмани пуркашни яхши кўр-

гани учун Пўлат ҳар сафар кўчадан келганда Нигорани чақиради-да, қўлларини икки ёнга ёзиб, кўзларини юмиб турарди, қизча пуркагични олиб, ҳафсала билан поччасининг устки кийимларига аралашма пуркарди.

Хона эшиги тагида Нигора кўринди.

– Кел, Нигора!

Қизча ҳадиксираб йўлак эшигига разм солди.

– Бир ўзингиз келдингизми? – сўради у.

– Ҳа, бир ўзим келдим.

Нигора пуркагични қўлига олди. Одатдагидан-да кўпроқ ҳафсала билан аралашмани сепиб чиқди. Пўлат кийимларини ҳидлаб, маза қилиб қулиб олди-да, қўлларини ювгани ваннахонага кириб кетди.

Шу вақт телефони хориждан қўнғироқ бўлаётганини билдириб, чўзиб-чўзиб жиринглади. Дисплейда Тўпқопи саройининг сурати кўринди. Манзура!

– Бормисан? – деди Малика. – Бир ҳафта бўлди, қўнғироқ қилмайсан? – Аста айвончага мўралади. Нигора халтани бўшатиш билан овора эди. Малика телефонини қулоғига тутганча ётоқхонага кирди. – Тинчмисан?

– Кеча телеграмдан ёзувдим, ўзингиз ўқимабиз-ку!

– Телеграмдан ёзсанг, менга ёзасан, боланг-чи? Боланг овозингни эшитгиси келмайдими? Нега шуни ўйламайсан?

Нариги томондан синглисининг уф тортгани эшитилди.

– Сиз телеграмни очиб қаранг, кейин айтаман.

– Яхши, – Малика тумба устидан ноутбукини олди.

Уни ёқаркан, сўради: – Истанбулда тинчликми, тармоқقا видео қўйишибди, кўчага чиқиш таъқиқланибди, одамлар нон ғамлаб оламан деб дўконларда уриқит қилишибди. Хавотир бўлдим, қўнғироқ қилсам, телефонни олмадинг, аҳволинг дурустми, билолма-

дим.

– Аҳволим яхши. Ишхонада қолиб ишлайпман, пансионат қарияларга мўлжалланган, улар туну кун назоратда бўлиши керак, шунинг учун ҳамма ходимлар ишхонада қолган, шуниси хавфсизроқ.

Манзурадан келган хабарда ҳарбийларниги ўхшаб кетадиган кийим кийган чакка соchlари оппоқ дароз бир эркакнинг сурати кўринди.

– Ким бу? Полициячими?

– Йўқ, миграция хизматида ишлайди. Сизга тенгдош. Менга уйланмоқчи.

– Буни қара-я! – Маликанинг юраги симиллай бошлиди. – Қаерда таниша қолдинг?

– Миграция хизматида ишлайди, дедим-ку!

– Ҳа-я... Нима, хотини йўқ эканми?

– Ўлган экан, биттагина қизи бор экан, ўтган йили узатиби, ёлғизман, деяпти. Топиши ёмонмас, Башакшехирда¹ уйи бор экан.

Маликанинг дили оғриди. “Шу нияти бор экан, кўёвни ўзимиздан топса ҳам бўларди-ю”, – ўйлади беихтиёр.

– Тошкентга қайтмайсанми? – деб сўради.

– Нима қиласман у ерда? – зарда аралаш жавоб берди синглиси. – Бир хонали уйда тиқилишиб ўтираманми?

– Акам кейинчалик каттароқ уйни ҳам олиб бераман, деганди-ю!

– Кейин кеннойимнинг миннатини эшитаманми? Керакмас! Ўша акам оберган бир хона уйни орқасидан қанча гап қилди у хотин!

– Кеннойим ҳар ҳолда қариндош, яхши-ёмон кунимизда қараб турмаган, сен унақа дема!

Манзура энсаси қотганнамо “Э!” деди.

¹ *Башакшехир* – Истанбулдаги сокин туманлардан бири, 200 мингдан зиёд аҳолиси бор.

– Ундан кўра уйга қайтишни ўйла! Қанчалаб одам юртга қайтолмай сарсон бўлиб юрибди ҳозир. Ишсиз, пулсиз, егуликсиз! Чarter рейсни қутиб аэропортларда ётишибди, элчихонамизнинг эшиги тагида ўтиришибди. Кўраётгандирсан? Билаётгандирсан? Майли, сенинг-ку аҳволинг тузук, илойим, ўшаларнинг ҳолига тушма. Лекин келажакни ҳам ўйлагин-да! Ҳозир ёшсан, кучинг бор, ишинг бор, ётофинг тайин, топишинг дуруст. Қарисанг, масалан, етмишга борсанг ҳолинг нима кечади? Касал бўлсанг, бошингга бир ташвиш тушса ёлғиз бошинг билан нима қиласан? Яқинларинг Тошкентда, неча минг километр нарида.

Гўшакдан Манзурунинг асабий кулгиси эшитилди:

– Етмишга киришимга ҳали ўттиз беш йил бор, унгача – Худо пошшо! Қайтсан яна касалхонанинг ойлигини учма-уч қилиб юраманми? Ҳозир менинг шу қариялар пансионатида олаётган ойлигим ўша ўзим ишлаган касалхонадаги врачникидан етти баравар кўп! Агар бу ердаги касалхонада олий тоифа врач бўлиб ишласамми, Тошкентдагидан ўн баравар кўп пул оламан. Ҳозир пулимни хоҳлаган нарсамга сарфлайман, унга етармикин, бунга етармикин деб ўтирмайман, бу ернинг бозорларини, дўконларини кўринг, Чорсу, Абу Сахий ҳам бозор эканми, дейсиз. Бу ерда шаҳар чиройли, денгиз чиройли, ҳаёт чиройли! Одам қаерда яхши кун кўрса, ўша ерда яшashi керак. Ер – ҳамманини!

Манзура яна нималарнидир узоқ гапирди, лекин Малика эшитмади.

Суратга синчиклаб разм солди. Эркакнинг қўллари узун, пешонасида икки қатор чуқур ажин, бурни тепасида ингичка чандик, юз-кўзларида аччиқ-чучукни хўп татиган одамларга хос жиддият сезилади. Манзурани кўз олдига келтирди, кўнғир соchlари қуюқ, юз-

лари тиниқ, кўзлари тийрак, қадди-бастидан ёшлик таровати кетмаган жувон! Синглисими ёши қайтган мана шу қўримсиз эркакнинг ёнида тасаввур қилди-ю, дили ғаш тортди. Манзурунинг феъли-хуйини ўйласа, кўнгил хирагиги янада ошди, танлаган аёлининг феъл-атвори қанақалигини билармикин, бунга чидармикин у одам?

- Нигорани чақириб берайми, гаплашасанми? - сўради охири.

- Майли, поччамга тайинланг, шуни билиб берсинлар.

Нимани билиб бериш керак экан? Малика эшитмай қолибди. Лекин ҳозир буни қайта сўрагиси келмади.

Айвончага чиқди. Нигора ликопчага печенье тўлдириб олган, энди столга бағрини берганча ширинликни битта-битта мужилаб, “Гулхан”ни ўқирди. Истанбулдан қўнғироқ бўлганини эшитиб, тезда телефонни олиб қулоғига тутди.

Малика оғир тортиб, эрининг олдига, меҳмонхонага кирди. Пўлат бир талай қофозларни қалин файл-папкага жойларди. Эри охирги пайтлар анча тўлишган, дағал соchlарига мўлгина қор қўнгган савлатли бир эркакка айланган эди. Аёл унинг орқасидан келиб, елкаларини оҳиста силади, кейин бўйнидан қучиб, соқоли ўсиқ бетига юзини босди. Малика нимадандир сиқилса, шундай қилар, шу билан енгил тортарди. Пўлат хотинининг билагини авайлаб силади:

- Тинчликми?
- Манзура эрга тегмоқчи...
- Э... шунақами...
- Танлаган одами Туркия фуқароси эмиш...
- Ҳм... Ёш аёл, умрини увол қилгиси йўқ... Сенга нимаси ёқмаяпти?
- Нигоранинг тақдири нима бўлади, буни гапир-

мади.

– Чунки қизчанинг тақдири белгилаб бўлинган: у бизницида яшайди. Эсингда бўлса, сенга айтувдим, Нигорани олиб қолишга розилик бердингми, кейинги тақдири ҳам сенинг қўлингда бўлади, шунга тайёр тур деб.

Шу пайт Нигоранинг шошқин қадам товушлари эшитилди. Малика қўлини тортиб олди.

– Катта бўлсам, Истанбул университетида ўқирканман, – мақтанди қизча. – Унинг учун мактабни фақат яхши баҳоларга битиришим керак экан, чет тилини билишим керак экан. Ойим Феруза опангдан ўрган, дедилар.

“Мана, Нигорага хукм ўқилди, – ўйлади Малика. – Худди қўлидаги ортиқча юкни ташлагандек, қутулди-қўйди... Тарбия кўриб, оқ-қорани таниб, болаликнинг ҳамма бошоғриқларидан ўтиб бўлган, вояга етган қизини қабул қилиб олади! Тайёргина! Шундай бўлгач, Истанбул университетининг нима кераги бор? Тошкент университетлари ҳам жуда яхши”.

23

Тушдан кейинги “осойишталик вақти” эди. Малика тинчгина ухлаб ётган Нигорага анчагача тикилиб ўтириди. Қизча юзини кафтига қўйганча ғужанак бўлиб олган, тушида ширинликни қўраётгандек тамшаниб қўярди.

Охири бир пойи устига иккинчиси чиқиб кетган шиппакни тўғрилади, Нигора палапартиш ташлаган кўйлакни оёқ остидан олиб, жавонга илди. Қизчанинг ёстигини тўғрилаб, эшикни ёпиб чиқди.

Яна даҳлизни шовқинга тўлатиб телефон жиринглади. Тағин ўша қўшни хотиннинг овозини эшитиб, дили ғашланди. Бу хотинга қандай қилиб тушунтирса бўларкин-а, бўлар-бўлмасга ҳаммани безовта қила-

верма, деб?

– Опагинам, – шақиллади қўшни. – Қизизни телевизорда кўрдийизми?

Ферузани айтяптими? Ҳа, албатта, Ферузани, деди ўзича, бошқа кимни гапириши мумкин?

– Кўрмадим...

– Йўғ-ей, телевизор кўрмийизми? Қизифакан-сиз-у, кунни қанақа ўтказасиз телевизорсиз?

– Секин-аста ўтиб турибди...

– Вой тавба-а... Қизизни кўрсатди, мухбирни саволларига жавоб берди. Бирам ақлли гапларни айтди... Қанақилиб кўрқмасдан қиз болани шунақа ишга киргизиб қўйибсиз?

– Иши кўрқинчли эмас-ку! – эътиroz қилган бўлди Малика.

– Барибир осон ишмас-де... Шунақа яхши қизиз борақан-у, билмас эканмиз. Қиз қидирган бир-иккита танишларга адресизни бервордим. Карантиндан кейин кеп қолишади.

Гўшакни қўйгач, чуқур хўрсинди. Диванга ўтириб, кўзларини юмди. Кийимларни дазмоллаш керак эди, лекин қўли бормади.

– Қизгинам-ей... – шивирлади у. – Қайсаргинам-ей... Кун бўйи бошдан-оёқ ўралиб ўтириб, нафасинг қисилмаяптими, а? Қандай чидаяпсан?

Феруза болалигида анча нимжон, салга шамоллар эди. Эсласа, ҳали ҳам юраги симиллайди: қизи бир ёшдан салгина ошган эди. Ёз чилласида қариндошларни кўргани Риштонга боришли.

Ойнабанд бинолари офтобдан ярқираган, оёқ остидаги асфальт тўшамаларидан олов пуркаётган дим пойтахтдан кейин кенг далалар оралаб ўтиб, кейин довонни ўраб буралган йўл, вилоятнинг дарахтларга кўмилган салқин шаҳарчаси, уни осмонга қадалган тераклар ортидаги қишлоқ, икки чеккасида

ям-яшил ток чирмашган пастак ишкомлар терилган күчалар Маликанинг кўзига ажиб жозибага тўла бир диёрдек кўринди.

Кўшнилар, қариндошлар тошкентлик келинни кетма-кет йўқлаб келишар, Пўлат ҳали у, ҳали бу ўртоғи билан қайларгадир жўнарди. Айниқса, болалари га маза бўлди. Жавлон қишлоқ кўчаларини тўлдирган болаларга қўшилиб яйраб ўйнади. Феруза кенг-мўл ҳовлида оппоқ кўйлакчасини ҳилпиратганча чопқиллай кетди. Қайнонаси неварасининг ортидан ҳарсиллаб юурди: “Вой, асалгина балам, тўхтанг-а, йиқилиб кетманг, вой шакаргина балам-а, аяқчаларингиз чиқиб қолиби-та, ўргилай...”

Мана шундай ёқимли, киши дилига нур тўқадиган кунларнинг бирида Ферузанинг тўсатдан нафас олиши оғирлашиб, хириллаб қолди. Пўлат саҳар-мардондан синфдошига қўшилишиб қаергадир кетган эди. Кўшнининг ўспирин ўғли моторли велосипедига мингаштириб келган қишлоқ фельдшери – қирқ ёшлардаги қорамағиз аёл Ферузанинг оғзига кичкина қошиқчани солиб, тилини пастга босди-да, томоғига қаради.

– Муртак бези шишиб кетибди, – деди. – Нафаси қисиб келяпти, бояқишигина... Балани тезда Риштонга олиб бормаса бўлмайди, йўқса, оғир тортип полади. Аши ердаги касалхонадан Робияхон Мухаммаджонова деган опани топасизлар, опа айнан шунаقا беморларди даволайди, ниҳоятда қўли енгил.

Малика ўша куни худди иситма аралаш юргандек сезди ўзини. Қайниси бостиurmадан аравачали мотоциклини олиб чиқди. Малика қиззасининг икки сидра кўйлак-иштончасини палапартиш йиғишириб сумкасига тиқди-ю, ҳовлига югуриб чиқди. Қайнонаси Ферузани бағрига босиб, мотоциклнинг аравасига чиқиб олган эди.

– Ая, сиз қаёқقا кетяпсиз? – деди қайниси бошига

шлемини кияркан.

– Менам бораман-та, – деди она “Шуни ҳам сўрайсанми?” дегандек.

– Мен ниҳоятда тез ҳайдайман, ўнқир-чўнқирда ичакларингиз тўкилиб тушади. Яхшиси, сиз қоловринг.

– Йўқ, – бош чайқади она. – Нима бўлдийкан, деб мен бағда адо бўламан. Юраги ёрилиб, ўлип помасин, десаларинг, мениям опкетасизлар.

– Об-бо! – ўғил “Энди нима қиласман?” деган каби қўлларини икки ёнга ёйди.

– Бораверсинлар, – ёлворди Малика. – Тортишиб ўтирмайлик.

– Ўзларинг биласизлар, – дея елкасини қисди йигит. – Аммо менга шикоят қиласизлар. Балани зудлик билан етказиш керак деди опа. Гапини эшитдинглар. Риштонгача ўн саккиз чақирим йўл.

– Ҳа, майли, қирқ чақирим эмас экан, етамиш-та. Тез мингашинг, пошшо қизим, – қайнонаси Маликанинг исмини айтмас, ҳамиша “пошшо қизим”, деб чақиради.

Малика шошиб, қайнисининг орқасига мингашди.

– Ҳай, Салимахон-ув, – қичқирди қайнона дарвозани очаётган кенжা келинга. – Жавлонжонимга кўз-қулоқ бўлинг-а!

Қайниси мотоциклини кўчаларидан ҳайдаб чиқди-ю, қишлоқ гузари орқали катта йўлга чиқмай, рулни далага қараб бурди. “Кесиб чиқамиз”, – дея қичқирди у. Ғўзалар гуркираган майдон ўртасидаги тракторга мўлжалланган кенггина сўқмоқдан кета бошлади. Фиддирак босаверганидан шибаланиб кетган тупроқда тарам-тарам излар қолган, мотоцикл бор тезлиги билан уларнинг устидан ўтганда аравачаси дириллаб сакрар, рўмоли бошидан сирғалиб елкаларига тушган бечора она бир қўли билан аравачанинг четини

маҳкам ушлаб, иккинчи қўли билан неварасини бағрига босиб бораркан, қўрқувдан қўзларини катта очганча, ўзича бир нималар дея пичирлар, аммо моторнинг шовқинидан унинг нима деётганини билиб бўлмасди.

Малика ўтирган ўриндининг чеккасини икки қўли билан чанглаб олган, силкиниш зўридан бутун танаси зирилларди. Бир-икки жойда ғилдирак чуқурчага тушиб, тепага қараб отди. Малика ўриндиқдан тўрт энликча тепага учиб, қайтиб тушди. Оғриқ қуймичидан то елкаларигача чиқиб борди. Чидолмай инグラб юборди. Ёнига, аравачага назар ташлади. Қизчалини оғзини каппа-каппа очиб, зўриқиб нафас оларди. Қайнонаси бир болага, бир ўғлига қараб нималардир деб қичқирди, Малика шовқинидан эшифтади.

Ниҳоят, дала тугаб, мотоцикл катта йўлга чиқди. Малика енгил нафас олди. Юз-кўзига саратоннинг қайноқ шамоли урилди, юзини аравача томон бурди. Қайнонаси рўмолини елкасидан тортиб туширган, энди унинг бир учи билан Ферузанинг юзини офтобдан тўсив бораарди.

Кўп ўтмай икки ёнида каллакланган тутлар қаққайган экинзорлар тугаб, пастак ишкомлар ортига беркинган уйлар кўринди. “Етиб қолдик, шекилли”, – умид билан ўйлади Малика.

Мотоцикл рангдор панжаралар билан ўраб олинган тўрт қаватли бино дарвозаси олдига келиб тўхтади. Қайниси қоровулхонада ўтирган кишига қараб, қўлини кўксига босди-да, кейин аравачага ишора қилди. Чорпахил қоровул дарвозани очиб, тўғрига юравешини буюрди.

Кейинги воқеалар шу қадар тез рўй бердики, Малика зўрға ҳушини йиғиб улгурди. Қизчалини қўлларидан олиб, узун йўлакнинг охиридаги эшикка олиб кириб кетишиди. Малика оёқларидан мадор кетиб, шундоққина девор тагига чўнқайди. Қайниси қўлла-

рини қовуштирганча бошини эгиб, жим қолди. Қайнонаси қўлини тишлаганча, йўлакда у ёқдан-бу ёқса юрар, ора-сира: “Асалгина балам-а...” дея инқиллар эди.

Маликанинг назарида икки-уч соатлар ўтиб кетгандек туюлди. Бир вақт эшик очилиб, тўлагина аёл қўли билан келишга ишора қилди.

Киришганда Феруза баланд кат устида ухлаб ётар, хонани кишини элитувчи чучмал бир ҳид босиб кетган эди. Қизчанинг бош томонида тўртбурчак аппаратга уланган узун найчани ушлаб турган аёл оғзи-бурнига тутиб олган дока ниқобини ечди.

– Бала яна тўрт-беш кун шетта қолади, – деди. – Ҳозир қабул бўлими расмийлаштириб олади. Яхшики, вақтида апкесилар, яна бир соат кечиксаларинг, армонда қолардиларинг.

Малика пиқиллаб йиғлаб юборди.

– Энди йиғламанг, пошша келин, – жилмайди аёл. – Балангиз бағрингизда қолди. Ҳали бир чиройли, сунбулсоҳ қиз бўладики...

Қайнонаси елкаларини силаб юпатди. Шундагина Малика қайнонасининг бармоғи қонаётганини кўрди. Бечора она, тишлайверганидан этини қонатиб юборган экан...

Шундан бери Малика қизчасининг томоғи оғришидан кўрқиб қолган, Ферузага ҳар бир нарсанни илитиб берарди.

Қизи институтга қабул қилинган куни кечқурун кулган ҳам ёдида:

– Ая, сиз музқаймоқни ҳам эритиб, илитиб берардингиз-а? Мен ҳайрон бўлардим, бошқалар бунаقا бемаза нарсанинг нимасини яхши кўришаркин деб! Бугун билдим, у жуда мазали бўларкан! Акам иккита музқаймоқ олиб бердилар, тўйғунча едим. Қаранг-а, болалигим музқаймоқнинг мазасидан бебаҳра ўтган экан!

...Қизалоғи, салга томоғи бўғилиб қоладиган Фе-

рузаси бугун улғайиб соғлом, лобар бир қизга, дадил одамга айланган, ҳозир кун бўйи нафас қисарлик махсус кийимда юрибди, ишляяпти. Лекин Малика ҳамон кўрқадики, қизимнинг нафаси қисилиб қолмаяпти-микин деб.

...Малика айвончага чиқиб, стол устидаги чой-нақдан чой қуиб келди. Пиёлани журнал столчасига қўйиб, ноутбукини очди. Кеча интернетдан кўчириб олган электрон китобларини кўриб чиқмоқчи эди. Мониторнинг чап бурчагидаги юмалоқ белгига кўрсаткични теккизди, охирги очилган файлларининг номлари чиқиб келди. Ажаб, рўйхат бошида “Ўнинчи декабрь” туради. Очди.

Бир вақт елкасида эрининг қўлларини сезди. Бoshини кўтарди.

– Самарқанддан қўнғироқ қилишди. Домла вафот этиби, – деди шивирлаб, хотинини чўчитиб юборишдан кўрқандек.

– А?

– Юрак хуружи тутиб қолибди. Касалхонага етказиб боришолмабди.

Малика юзини нимадир кўйдириб ўтганини сезди. Кафтини бетига босди, ҳўл бўлди.

– Домлани Тошкентга олиб келишармикин? – сўради овози титраб.

– Бунаقا шароитда... Менимча, ўша ерга қўйишиди. Йигитлар ёрдам берамиз, дейишди.

– Ўзининг хилхонасига олиб келиб бўлмаймиди? Она шаҳридан узоқда...

– Қизиқмисан? Самарқанд ўзимизники-ку! Ёт элда қолиб кетишдан асрасин.

Малика титроқ қўлларини телефонга узатди:

– Уйига, ишхонага хабар қилиш керак...

Пўлат хотинининг қўлларини ушлади:

– Бунаقا нохуш хабарни сенсиз ҳам етказишади.

Диваннинг ёстиғини тўғрилаб, Маликанинг елкасидан авайлаб босди.

– Ёнбошла, – деди қатъий. – Ноутбукни бер, бир чеккага олиб қўяй. Бироз мизғиб ол.

– Домлани... ҳеч ўйламовдим...

– Дунёда хаёлимизга келмаган ишлар кўп бўлади.

...Кечқурун Малика охирги очган файллари рўйхатида биринчи турган файлни очди. Ўқиди: “Салом, болалар. Бугун – улуғ кун. Ҳа, албатта, у билан тузукроқ видолаша олсак, яхши бўларди. Лекин ниманинг эвазига? Дарҳақиқат, у буни билган. Тушуняпсанми? Бизнинг отамиз. Оталар мана шунаقا иш тутадилар. Улар яқинлари ва ҳабибларининг ғам-ташвишларини енгиллаштирадилар. Яқинлари ва ҳабибларини сўнгги куннинг оғир, бутун умрга хотирага қуилиб қоладиган ноxуш томошасидан эҳтиёт қиласидилар”¹.

24

Қуёш мачит гумбазини ярқиратиб кўтарилди. Йўлканинг нариги томонидаги ҳовлида айвон эшиги очилиб, яшил рўмол ўраган келинчак кўринди. Тўғридаги кўчадан кичкина фургон чиқиб, уйларининг бурчагига, дўконга қараб кетди. Бояги келинчак энкайиб, саҳнни супура бошлади. Кекса ўрик тепа шохларида тизилган ғўраларнинг оғирлигини кўтаролмагандай вазмин силкинди.

Малика тонгги юмушларини тугатиб, финжонга қаҳва қуиди. Диванга чўкиб, журналини қўлига олди. “Бугун сешанба, – беихтиёр ўйлади у. – Кун чиқиб, тун киряпти, вақт ўтяпти”. Кўзи китоб жавонининг ойнасига ёпиштириб қўйилган календарга тушди. Ўн еттинчи апрель. Эҳ-ҳе... Шунча йил ўтдими? Ўттиз икки йил аввал шу куни, шу соатда нима бўлганди?

Онаси кўзёш тўкиб оловуди (“Куда бир марта бўл-

¹ Жорж Сондерснинг “Ўнинчи декабрь” ҳикоясидан.

син, розимисиз, деб сўрамади, келибоқ тўйдан гапирди-я, сен писмиққина...”), отаси хушнуд, ҳовлида амакиси, тоғалари билан гурунг қилувди (“Янги қудам жуда гаплашадиган одам экан”), холаси ачиниб бош чайқовди (“Қайсаргина бўлмай қол, довоннинг нарёғига кетасанми энди?”), кеннойиси Маликанинг тўр рўмолига заррин гулни тескари тикиб қўйиб, кулгига қолувди, Манзуранинг мушуги йўқолиб, тоғаваччалирию амакиваччалари тоза қидиришиб, тополмай ҳоришган, эрка синглиси ҳеч кимнинг гапига кўнмай, роса хархаша қилувди. Ҳа, ўша кун мана шунақсанги ҳангома билан бошланиб, ҳангома билан тугаган, энг охирги ҳангомани Жумагул ясаган эди.

Жумагул ўша куни янги чиққан шахмат нусха атласдан қўйлак кийиб келди.

– Пўлат ака совға қилган, – мақтанди у.

– Ие, Пўлат ака атласни сенга совға қилиб, Маликага уйланяптими? – дея хохолашди қизлар.

– Вой, бекоргамас, ҳалол хизматимга берган, – дея шанғиллади у. – Малика ким биринчи январда совчи қўйса ўшанга тегаман, девди, мен шуни қизиқчиликка Пўлат акага айтибман денг. Пўлат ака бу гапни менга айтдингиз, бирорга айта кўрманг, гапимга кирсангиз, хурсанд қиласман, деб қолди. Атлас оберсангиз, айтганингизни қиласман, деб кулсам, майли, бўлмасам деб, ростакамига Чорсуга бошлаб бориб, ёққанини танланг, олиб бераман, деди. Мана шуни танладим.

Қизлар чуғурлашиб кетишиди.

– Ҳа, нима? – бўш келмади Жумагул. – Жим бўлсам кифоя, шахмат атлас тайёр экан. Йўқ дейманми?

Эсида: қишлоққа шомда кириб боришувди. Машина дарвоза ёнида тўхташи биланоқ бир аёл қадамнингиз баракали бўлсин, деб қўлтифига нон қистириди, турмушингиз ширин бўлсин, деб оғзига парварда солди, бошига паранжи ташлади. Атрофдаги шо-

вур-шувурни босиб, чилдирма тараклади, ширали бир овоз куйлай кетди:

– Ой юзимни яширган
Қора чиммат, ёр-ёр,
Шу уйларга келтирган
Шириң қисмат, ёр-ёр...

Кейин майда қавиқ мовий түн кийиб, бошига дүп-пи бостирган Пўлат уни машинадан даст кўтариб олди-да, ҳовлида, бўсағадан икки қадам ичкарида ерга қўйди. Малика ҳовлидагичувур-чувурдан аёллар кўп эканини сезди. Чилдирма энди бир маромда, вазмин тараклади:

Тўрга гилам тўшаган,
Тўрадай ўғил ўстирган
Қайнотасига салом,
Ассалом, келин салом!

Ёнида кимдир шивирлади:

– Келин салом бошланди, эгилиб салом қилинг, ўргилай!

Кимлардир келиб қучди, чиммат устидан ўпиб қўйди, кимдир енгини қайириб билагузук тақди.

Оқшом чоғи, оппоқ никоҳ қўйлагида давра тўрида ўтирганида хонанда ўша пайт машҳур бўлган қўшиқни куйлади:

Энди тунлар йиғлар менга қўшилиб,
Кўйнимда бир ёр-у, кўнглимда бир ёр.

“Мунчаям бемаза қўшиқ бўлмаса, – ўйлади у. – Ҳамма нарсани ҳам шеърга соловерар экан-да! Нега энди бошқа-бошқа ёр? Нега? Йўқ, бундай бўлиши мумкин

эмас, йўқ!"

Тунда, боши оппоқ ёстиққа теккан пайти шивирлади:

– Сизни яхши кўраман...

Пўлат тирсагига таяниб қаддини кўтарди. Эгилиб, хотинининг юзларини силади:

– Менга бор бўйингча, шу туришинг, шу феълинг билан кераксан. Сени кўрган биринчи пайтимданоқ хаёлимга ўрнашгансан. Сен бир сўзли қизсан, буни биламан, хаёлимга кирдингми, энди ҳеч қаёққа кетмайсан.

...Кейинчалик Жумагул унга: "Тўйингда кимлар ийғлади, айтайми?" деб илжайганида Малика кулида: "Бунинг менга қизиги йўқ", деди-қўйди, ўзича эса: "Журъатсизнинг жазоси шу бўлади", дея қўл силтади...

Баъзан ўзи ўйлаб ҳайрон қолади, агар ўшандада Жумагул Пўлатга дуч келмагандада нималар бўларди? Ҳаёти қай ўзанга бурилиб кетарди?

...Пўлат ғаройиб йигит эди. Тўйлари бўлгунча ўтган тўрт ой ичида Малика учун тамом бошқа бир Пўлат очилди, кун ўтгани сайин қиз уни ўзича кашф эта борди. Бу кутилмаган даражада ажойиб бир давр эди.

Бир куни Сайлогоҳ кўчасидан ўтаётиб, мольбертларини ёйиб қўйган рассомлар олдида тўхташди. Қатор териб қўйилган хомаки портретларни қизиқиб томоша қила бошлишди.

– Ўтилинг, синглим, – илжайди сочи ўсиб елкасига тушган, ғижим кўйлак, ранги униқан жинси шим кийган озғин бир киши. – Суратингизни ишлаб бераман.

– Йўғ-е... – қиз орқага чекинди. – Керакмас.

– Ўтираверинг, – деди Пўлат. – Эсадлик бўлади.

Малика иккиланиб қолди. У рассомнинг хизмат ҳақи қиммат бўлишидан хавотирда эди.

Пўлат яна далда берди:

- Ўтиринг.

Малика этакларини йигиштириб тўқима курсига чўқди. Рассом мольбертига тоза оқ қоғозни ўрнаштириб, қаламининг учини тарашлади-да, ишга киришди. Пўлат чўнқайиб унинг ишини кузата бошлади. Рассом қизга бир-бир қараб оларди-да, қоғозда дадиллик билан чизгилар торта борарди.

Сурат бир соатлар ичида тайёр бўлди. Малика қора қаламда чизилган ўз расмини томоша қиларкан, рассомнинг Пўлатдан қанча хизмат ҳақи сўраганини эшилди-ю, капалаги учди. Портрет стипендияларининг учдан бир қисмига тушган эди. “Пули етармикин? – дея хавотирга тушди қиз. – Уялиб қолмасмикин ишқилиб?” Ўзи эса ҳамёнида қанча пули борлигини эслай бошлади. Мабодо, Пўлатнинг пули етмай қолса, ёнидан қўшиб юбормоқчи эди. Йигитнинг сўралган пулни бамайлихотир тўлаганини кўриб кўнгли тинчиди. Сўнг дили ғашланди: “Олдинда шунча харажати бор, яна талаба бўлсак, бекор розилик бердим-да, сурат зарур эмасди-ку ҳозир!”

Охири хаёлидан ўтганларни айтди. Пўлат қулиб юборди.

- Бир вақтлар суратингизни чиздиришни ўйлагандим, хў, ўша... биринчи курсда ўқиётган пайтимиз. Имкони бўлмаган, сизни Сайлилгоҳга қандай қилиб олиб келишни билмаганман. Нархига келсак, буни қанчага тушишини билардим, шунга қараб тайёргарлик кўрганман. Қолаверса... бу сурат бир умрга қолади, бунақа пайтда мумсик бўлиш яхшимас.

Дарҳақиқат, ўша сурат бир умрга эсадалик бўлиб қолди. Чиройли ҳошияяга солиб, китоб жавонининг тепасига ўрнаштириб қўйган. Куюқ соchlарини саришталааб йигиштирган, бўйни учбурчак қилиб ўйилган содда кўйлак кийган қиз зоҳирان жиддий кўринади, аммо

кўзларида мулойим қулимсираш сезилади. Суратнинг пастида сана: 1988 йил, 21 март.

Ажабо, шу пайтга қадар ўтган ўттиз икки йиллик турмушини ўйласа, негадир ёруғ кунлари эсига тушади. Энг қийналган кунлари ҳам, ижарама-ижара кезган пайтларида, уй олиш учун асосий ишини четга суриб, пул ишлаш умидида эрининг ёнига тушиб, тиним билмай уринганларида, болаларининг дардида юргурганларида, бирда туртиниб, бирда қоқилганларида ҳам ўша қилган ишидан афсус чекмабди, ўзини баҳтсиз сезмабди, ҳамиша ўтаётган кунларининг ортидан ёруғлик келишига ишонибди!

Телефони хабар келганини билдириб, қисқа товш чиқариб қўйди. Қаради. Видеохабар келибди. Жавлондан.

Ўғлининг соқоллари ўсан, соchlари кирпининг тиканидек диккайган, қўйлаги ғижим эди. “Сочини қирдириб ташлаган экан-да, – ўйлади у. – Болам-а...”

– Ассалому алайкум, аяжоним! Бугун оиласизнинг туғилган куни, дадам икковингизни, Ферузани, Нигорани, ўзимни ҳам табриклайман!

Жавлон илжайди, ботиб кетган бетларида чуқур кулгичлари кўринди.

– Доимо соғ-саломат бўлайлик.

“Илоҳим!” – шивирлади она.

– Бугун карантиним тугайди. Худога шукур, соғман, вирус мендан қўрқаркан, четлаб ўтиб кетди.

Ўғли яна қулимсиради-да, иягини силаб қўйди.

– Соғ бўлсанг, келмайсанми, Жавлон? – деди Малика гўё ўғли уни эшитаётгандай.

– Касалхонага кетяпман, ая. Қачон келаман, айттолмайман. Дўхтирлар етишмаяпти. Вирус юқтириб олган дўхтирлар бор-да, уларнинг ўрнини босиш кепрак. Орамизда болаларини қолдириб келган дўхтир опаларимиз, ҳамшираларимиз бор, улар турганда мен

чарчадим, энди бошқанинг гали десам уят бўлади, ая, тушунасиз-ку. Хавотир олманг, узоқдамасман, ўзимизнинг Тошкент, ўзимизнинг одамлар... Худо ҳоҳласа, яхши кунларда кўришамиз.

Жавлон янада кенгроқ илжайди, тиканакка ўхшаган соқоллари ғалати бир тарзда тиккайди.

Малика журналини ҳам, қаҳвасини ҳам унутди. Кўлини пешонасига тираганча ўтириб қолди. “Худо ҳоҳласа, яхши кунларда кўришамиз...” Илоҳим, айтгани келсин! Аммо... қачон келаркин ўша кун? Касаллар кун сайин кўпайиб боряпти. Карантинга киришганига бир ой бўлди. Дуруст, эпидемия авжига чиқиб, кейин пасаяди, буни билади, шу пайтгача эпидемиялар, пандемиялар тўғрисида, мана шу вирус тўғрисида қанча мақолалар ўқиди! Дунёнинг қаерида нима аҳвол, ўзларида нима гап, қай вилоятда нималар бўляпти, қай бир санага келиб касаллар сони нечта бўлди, неча киши даво топди-ю, нечаси ўлди, қай бир давлатда қурбонлар кўпайиб кетганидан ўлганларни биродарлик қабристонларига дафн этиб юборишли, қай бир мамлакатда касаллар ҳаддан ортиқ кўпайиб кетганига оғир bemорларни даволамай қўя қолиши, қай бир давлатда тириклик оғирлашиб кетганидан, одамлар норозиланиб кўчага чиқиши, қаерлардадир қон тўкилди ҳатто, ҳаммасини кузатиб борди. Дунё қанчалик қалқиса, у шунчалик юрагини ҳовучлади. Чунки ўғлининг, қизининг бағрига қайтиб келиши, ўзининг отасини кўргани бориши, севимли ишига қайтиши, ёқимли, ёруғ ташвишларга тўла кунларга этиши, ниҳоят, қизини келинлик либосида, ўғлини куёвлик сарпосида кўриши, Нигоранинг кунда мактабга жўнаши, кўчада ўртоқлари билан берилиб ўйнай олиши шунга боғлиқ эди! Чунки у яшаётган Тошкент шу дунёнинг ичиди, жаҳонда нимаики рўй берса, унга ҳам тааллуқли, боиси – ернинг юмалоқлиги, заминнинг,

барибир, кичкиналиги.

Малика яхши кунларнинг келиши умидида яшади. Раҳматли домла тўғри айтган: карантин – бу касалмисан, соғмисан, шу аниқ бўлишини кутиб, ғамга ботиб ўтириш дегани эмас. Карантин дегани – бироз вақт хилватга чекиниб, бундан бўён қанаقا яшайсан, нима ишлар қиласан, қайси ишни қандай қилсанг, одамлар сендан рози бўлади, шуларни мулоҳаза қилиб, бундан кейинги йўлингни белгилаб олишингга берилган имкон.

Малика бундан бўён қандай яшайди? Нима ишлар қилади? Одамлар ундан рози бўладими?

Остонада Пўлат кўринди.

– Бугун ўн еттинчи апрель, – дея илжайди у.

Маликанинг кўзларига беихтиёр ёш қалқди:

– Яхшиям, Жумагул ўшанда сизга айтибди. Агар бошқаларга ҳам гапириб юргандами...

Пўлат кулиб юборди:

– Йўқ, биринчи январь куни эшигинг тагида турнақатор совчи тизилганда ҳам онам эшикни ҳаммадан олдин қоққан бўларди. Мен бошқача бўлишига йўл қўймас эдим.

Малика кўзларини кафтига артиб, кулимсираган бўлди.

– Жавлон яна касалхонага жўнади... – деди эрига.

– Биламан... Шунаقا қилмаса бўлмайди. Бу кунлар ўтиб кетади. Карантиндан кейинги ҳаёт қандай бўлади? Нима ишлар қиламиз? Шунинг режасини пишитиш керак.

– Ў, карантиндан кейин қиладиган ишлар жуда кўп! Домла раҳматли қандай лойиҳа ишлаган экан? Шуни билиш керак. Жавлон “Карантин тугасин, бир ой ичидәёқ уйланаман” деган эди, кўз остига олгани бормикин? А?

Пўлат кулди:

- Каратин тугаса, биламиз.

- Каратин ҳаётни ўзгартириб юборди, тўрт девор ичига тиқилиб ўтиришлар ҳам кун келиб тугар, лекин у ёғига қандай яшайди одамлар? Каратинга киришдан ҳам кўра ундан чиқиш қийин бўлади, шекилли...

Пўлат хотинининг елкасидан қучиб қўйди.

- Бу энди одамнинг ўзига боғлик. Ҳар қалай, сен билан мен шу пайтгача ёмон яшамадик, бундан кейин ҳам инсонга ўхшаб яшаш қўлимиздан келади.

Айвончадан, очиқ деразадан шабада кириб, дера-за пардасини тортқилади. Оёқ остига тушган офтоб нурлари гиламнинг қизғиши нақшларини оловлантириб юборди. Тонг қувватга кирган, чор-атрофга илиқ-лик ёйила бошлаган эди.

ТАМОМ

2020 йил,
29 марта – 17 мая, Тошкент

ҒУРҒУРТЕПАДА САРАТОН

(Туркум)

СҮЗБОШИ

Кимки “Ғурғуртепа қаерда?” — деб сўраса, билингки, у Тошкентга томошага келган бир меҳмон, холос. Ғурғуртепа Бодомзорнинг пасти, Шивлининг биқини ва Дархонариқ, хусусан, Оққўрғон арифининг тепасида. Ғурғуртепа ўтган замонларда ям-яшил боғлар маскани бўлган экан (ҳар ҳолда шаҳарга ўтган асрнинг 50-йиллари охирида қўшиб олингани ҳам шундан дарак). Ғурғуртепалик чоллар аслида бу ерларда саратонда ҳам ғир-ғир шабада эсгани боис Ғирғиртепа деб аталиб, кейинчалик Ғурғуртепага айланган, дейишади. Баъзилар эса бу ерларда ғурраклар кўп бўлганидан шундай ном олган, деб даъво қилишади. Шунда маҳалла чоллари астойдил хафа бўлишиб: “Ғурғуртепада қўмри, майна, булбулла бўган. Ҳовлиларида мусичала ку-кулашган, осмонида каптарла умбало ошган. Лекигин ғуррак буёғда бўмаган”, – деб қўйишади.

Бугунги кунда Ғурғуртепа Тошкентда бошқа бир ном билан танилган. Шаҳарнинг исталган бурчагида такси тўхтатинг-да: “Қазичилар маҳалласига”, – денг, сизни тўппа-тўғри Ғурғуртепага олиб келишади. Чунки Тошкентдаги энг яхши қазилар фақат Ғурғуртепада бўлади, пойтахтимиз шевасига хос бетакрор ибо-

ралар айниқса, мана шу маҳаллада чиройли жаранглайди, аёллари эса янги хабарларни севиб муҳокама қилишади.

Фурғуртепадан Тошкентнинг энг катта меъмори, ўзбек элининг машҳур спортчisi, мусиқа театри саҳнасининг арбоби, бир вақтлар ашуалари радио-телефизорни забт этиб ташлаган қўшиқчи-шоир ва маҳаллий тадбиркорликнинг бир талай намояндалари етишиб чиқишиган. Фурғуртепанинг фазилатлари кўп, ўзбекнинг катта ёзувчиси айнан мана шу маҳаллани афзал билиб, Қарноқдек жойдан кўчиб келгани ҳам бежиз эмас.

Фурғуртепа ўзининг кўз кўриб, қулоқ эшитмаган воқеалари билан ҳам машҳур. Биргина саратонда рўй берган воқеа ва ҳангомаларнинг ўзи бир талай ҳикоя учун мавзу бўлдики, мен уларни жамлаган эдим, бинойидеккина туркум чиқди. Бу воқеалар ҳақиқатан ҳам бўлиб ўтганига ишонаверинг. Жуда бўлмаса, Фурғуртепага келганда маҳаллий аҳолидан: “Шу ерда Сижо бува, Жамила амма, Ғофир ака, ниҳоят, Турсун ака яшайдими?” – деб сўранг, албатта, тасдиқ жавоби оласиз. Кетидан эса “Қази омоқчимисиз? Маҳалламизи қазиларига гап йўқ, шунақайкан, атайлаб Сижо бувани қидириш шартмас, бизаям бормиз”, – дейишади.

КУЁВ ТЎРА

Аслида бу йигитнинг Фатхулла деган чиройли исми бор. Аммо исми тилдан тилга ўтавериб, Патхилла бўлиб кетган. Баъзи ошналари уни қисқагина қилиб: “Пақи” дейишарди. Телевизорда Мексиканинг аллақайси сериали кўрсатилиб, машҳур бўлдию, Патхилла-Пақи Педрога айланди. Чунки Фурғуртепа аҳли Пақи Педрога ўхшайди, деган тўхтамга келди. Ҳақиқатан ҳам бу йигит худди мексикалик қаҳрамондек

қоп-қора, озғин, эпчил, спортчилар киядиган калта енгли оқ майка, оқ латта кепка кийиб, оёғидаги енгил чарм шиппаги билан маҳалла кўчаларидан юриб эмас, учиб ўтади. Педронинг яна бир фазилати унинг қўли гул йигит эканлигидир. Фурғуртепанинг машина минадиган ҳамма йигитлари Педро билан оғайнни. Шунинг учун ишлари тушса, тушмаса, кунда Педронинг ишхонасига бош суқиб, бирров саломлашиб кетишади.

Маҳаллага кираверишдаги кўримсизгина устахонанинг “Мотор таъмиглаш, карбюратор тиклаш, балансировка, вулканизация” деб ёзилган чиройли кўрсаткич тахтаси атрофида доимо машиналар бўлади. Устахона эшиги ёнида ўсган қари ўрик тагига ўрнатилган бесўнақай стол ва ўриндиқларда йигитлар чақчақлашиб ўтиришади. Йигитлардан нарироқда, йўл чеккасида маҳаллий тадбиркорлардан бири ихчамгина курсига ўрнашиб олиб, олдидағи яшик устига сигарет, гугурт, сақич териб савдо қиласди. Ёнгинасида устига дока ёпилган каттагина сирланган челак. Челак ёнида кичикроқ картон. Унга каттагина ҳарфларда “мева шарбати” деб ёзилган. Тадбиркор қўли кўлига тегмай савдо қиласди ва ич-ичида Педрони дуо қилиб қўяди. Ҳа-да, Педро бўлмаса, бу кўримсиз жойга шунча одам келармиди?

Педро устахонасига келадиган ҳар қандай одам билан яхши салом-алик қиласди. Лекин улар орасидан фақат бир кишига – Кудратга орқаваротдан кунига икки марта салом айтиб юборади. Кудрат Фурғуртепанинг энг обрўли қазичиларидан бўлмиш Давлат аканинг кенжা ўғли. Давлат аканинг отаси Сирожиддин ёки ғурғуртепаликлар тили билан айтганда Сижо бува қадим қазичилар авлодидан, ўзининг дағдағасию дўйқиллаган ҳассаси билан донг таратган одам. Педронинг саломини эгасига Кудратнинг ўн саккиз яшар синглиси Чарос элтади. Чарос ҳар куни эрталаб

сариқ, яшил ёки пушти қўйлакларининг этагини ҳилпиратиб ишхонасига – маҳалла бошидаги поликлиникага ўтганда Педро устахонасининг эшикларини ланг очиб, ёпилиб қолмасин учун тавақалар тагига ғишт қўяётган бўлади. Қиз одоб билан салом беради.

– Ваалайкум ассалом, – дейди Педро кўзлари чақнаб, – қалейсан, Чарос?

– Раҳмат, яхши, – қиз қадамини секинлатади.

– Кудрат ишга кетгандир?

Чарос бош силкийди.

– Майли, мандан салом эт.

– Хўп.

Қиз ўтиб кетади. Йигит унинг ортидан кўз қири билан кузатиб қолади.

Кечга томон Чарос қайтиб ўтаётганда устахона гавжум, Педро тузатилган машинанинг рулига ўтириб синаб кўраётган ёки капотини очиб эгасига бир нарсаларни тушунтираётган бўлади. Қиз салом беради.

– Ваалайкум ассалом, – дейди Педро босиқлик билан. Ёнидаги одам ҳам алик олади ёки бош силкийди.

– Кудрат яхши юрибдими? – сўрайди Педро.

– Ишлаб юрибдила, – қиз қадамини тўхтатмай, ерга боққанча жавоб қилади.

– Майли, акангга салом эт!

– Хўп.

Педро шу билан қиз томонга қарамай, ёнидаги одам билан гаплашаверади. Чарос эса атрофдагиларга билдирмай, йигитга кўз қирини ташлаб қўяди.

Баҳордан буёғига ҳисоблаганда салом айтиб қўйишилар сони юздан ошганда, ниҳоят, Педро бошқача гапларга ҳам журъат қилди.

Шу куни йигит аzonданоқ устахонасини очиб олган, гўё улкан ишга бел боғлаган мисол йўл четида қатъий турарди. Бир вақт ям-яшил қўйлагининг этакларини ҳилпиратиб Чарос кўринди. Педронинг

йўл четида ўзига қараб турганини кўриб, пешонаси-
га тўкилган соchlарини четга қайирди. Яқинлашгач,
салом берди. Педро негадир алик олмади. Чарос ҳай-
рон бўлиб бошини кўтариб боқди. Йигит лабларини
қимтиб, қатъийлик билан унга қараб турарди. Қиз
“нима гап?” дегандек киприкларини пирпиратди.

– Чарос, ман сани яхши кўраман, – деди йигит.

Қизнинг қорамағиз юзларига қизиллик югурди.

– Биламан... – деди секингина.

Педронинг кўзлари ҳайратидан катта очилиб
кетди:

– Қанақасига... а?

Чарос жилмайди:

– Манам одамман-ку, манам сезаман...

Йигит бу сўзлардан кейин янада дадиллашди:

– Чарос, ман санга уйланаман.

Қиз истиғноланди:

– Ҳозирни ўзидами?

– Нима қипти? Битта мулла, бир калла қанд, уч сўм
пул...

– Боринг-э, бир калла қандмиш! Сиз олдин бувам-
ни кўндириб кўринг!

– Кўндирысам кўндирураман!

– Кўндириб бўпсиз, – деди қиз овози титраб. – Бу-
вамлани жаҳллари ёмон...

Шу пайтда кўча бошида қандайдир машина кўрин-
ди. Чарос чўчиғина кўча бошига қараб қўйди. Педро
четланиб қизга йўл берди.

– Бугун уйингга ойим борадила, – деди шошиб.

Кечга яқин Педронинг камтаргина онаси Давлат
аканинг данғиллама ҳовлисига тортинибгина кириб
келди. Чароснинг онаси “Қизлик уй – сарой”, деган
қоидани сув қилиб ичиб юборган аёл эди. Маҳалла-
дош қўшнисини очиқ юз билан қаршилади. Чиройли
меҳмонхонага киргазиб, дастурхон устини тўлдириб

ташлади. Совчи қоидага биноан Чаросни мақташга тушди:

– Чаросхон, ақлли, ҳушли қиз. Жа қўли енгил. Ҳамма касалла уколини Чаросга қилдирсам дейди...

Қизнинг онаси совчилик қоидаларини адо этиб, камтарлик билан жилмайди:

– Энди уйга ҳам битта дўхтири, жа бўмагандан ҳамшира керей... Адамиз шунаقا деб Чаросни Боровскийда ўқитганла...

Шу пайтда ҳовлидан Сижо буванинг жаҳлдор овози эшитилди:

– Ану хотин қаттан келди?

Невара келин қўрқа-писа жавоб қилди:

– Раҳматилла амакини уйидан... Педрога сўрашвотти...

– Ким?

– Ану... мошина тузатадиган бола бор-у...

Сал ўтмай, остоңада аёллар кўринишиди. Сижо бува эгнида оппоқ яктак, бошида мoshранг духоба дўппи, кўзида қалин кўзойнак, ҳассасини маҳкам ушлаганча ҳовли ўртасида ғоз турарди. Педронинг онаси ўнг қўли билан ёқа олдини тутамлаб салом берди.

– Алайкум ассалом... – чол қовоғини солди. – Раҳматилла соғми?

– Раҳмат, Сижо бува, юрибдила...

– Ҳалиям аптобус ҳайдавоттими?

– Ҳм, шунаقا...

Чол бошқа ҳеч нима демади. Райҳон тури ёнидаги курсига чўкиб, кўзларини юмиб олди. Она совчини дарвозагача кузатиб чиқди.

Эртаси куни Педро яна саҳарлаб устахонасини очиб, йўл четига чиқиб турди. Сал ўтмай Чарос кўринди. Йигитга кўзи тушди-ю, “дув” қизарди. Кейин лабини тишлади.

– Қалейсан, Чарос? – деди Педро ич-ичидан титраб.

Кутилмаганда қизнинг кўзлари ёшга тўлди:

– Бувамни жаҳллари ёмон, дегандим-ку!
– Буванг... йўқ дедилами?
– Бувам... роса бақирдила... Неварамни бой хона-
донга бераман дедила... – Чарос юзини четга бурди.
Кейин йифидан титраётган овозда: – Пули мошинага
сиғмийдиган одамни куёв қиларканла... – деб қўшиб
қўйди.

Йигит юраги увишиб туриб қолди. Бир оздан ке-
йин сўнгги умид билан сўзлаётгандек:

– Аданг нима деди? – деб сўради.
– Адам... индамадила...
– Ойинг-чи?
– Ойим... ҳеч нарса демадила...
– Аканг-чи?
– Кудрат акам гапирдила! “Педро яхши бола”, – де-
дила. Лекигин бувам акамни уришиб бердила... “Ишинг
тушади-де, шунинг чун яхши дейсан”, – дедила...
– Кудрат гапирган бўса, унда иш жаям ёмонмас, –
шивирлади йигит ва ўйланиб қолди. Йўл бошида ким-
нингдир қораси кўринди.
– Чарос, кимдир кевотти. Майли, борақо.

Қиз кўзларини катта очиб йигитга қаради. Йигит
ғусса тўла нигоҳлар билан жавоб қилди.

Пешинга яқин устахонага Қудрат бош сукди. У
ёқ-бу ёқдан гаплашган бўлди. Одам камайиши билан
Педродан узр сўрагандек ғудранди:

– Оғайни, хафа бўмагин, бувамлани биласан-ку...
Педро қўлидаги аллақандай темирни бурчакка
отиб ўрнидан турди:
– Қудрат, “Халқ банки”да ишлардинг-а?
Кудрат ҳайрон бўлди:
– Ҳозирам ишлийман. Нимайди?
– “Оғайни”, деган гапинг ростми? Ё хўжакўрсинга,
ишинг тушганичунми? Тўғрисини гапир, ростми?
– Рост! Ман қачон ёлғон гапирганман?

– Унда манга ёрдам берасан!
– Хўп, қўлимдан кеса, гап бўлиши мумкин эмас!
Нима қиласиз ўзи?

...Намозшомга яқин дўконидан қандайдир иш билан бирров уйига қайтган Давлат ака дарвозаси ёнида тўхтаган “Тико”ни кўриб, қизиқсиниб, яқин келди. Машинага синчковланиб қаради.

“Тико” катта йўл ёқасидаги озиқ-овқат дўконида савдо қиласиган Муроджонга тегишли эди. “Тико”нинг орқасига автоаравача тиркалган. Муроджон одатда бу аравачада дўконга нон олиб келарди. Бу сафар ҳам нон бор, шекилли, аравача устига каттакон бўз мато ташлаб, чеккалари маҳкам ёпилиб тугун қилиб қўйилган эди. Рулда Муроджон, ёнидаги ўриндиқда Педро ўтиради.

Педро Давлат акани кўриши билан машинадан тушди. Қўл қовуштириб, одоб билан салом берди. Муроджон ҳам салом бериб, оғайнисининг ёнига келиб турди.

– Келийлар, йигитла, нима гап? – Давлат ака бир Педрога, бир Муроджонга қаради.

– Амаки, – Педро гўё ҳукм эшишигга чоғланган айбланувчикидек қаддини тик тутди. – Ман Сижо бува этган нарсани опкелудим.

– Адам сандан нима сўрагандила? – Давлат ака бир йигитларга, бир машинага қараб қўйди.

– Кеча неварамни пули мошинага сифмийдиган одамга бераман деган эканла... Мана, опкелдим!

Педронинг ишораси билан Муроджон бўз матони кўтарди. Аравача тўла танга пуллар эди!

Давлат ака эсанкираб қолди. Аравачанинг у ёқбу ёғига ўтиб қаради. Кейин кутилмаганда хохолаб юборди.

– Сан... жа яхши бола экансан-у! – деди охири кулги сабаб кўзига келган ёшларни кафти билан артиб. –

Оббо Патхулла-я! Вой, Педро! Фурғуртепаликсан-де, а? Кудрат жа тўғри гапирган экан!

Давлат ака қизиқсаниб, тангаларни бирпас томоша қилди. Кейин жиддий туриб:

– Раҳматиллага айт, ҳалироқ дўйонга чиқсин, хўпми? – деди.

...Икки кундан кейин Фурғуртепада миш-меш тарқалди:

– Давлат ака Педрони куёв қилаётганмиш...

– Йўғ-э, Раҳматилла ака Чаросни келин қилаётганмиш!

* * *

– Ўзи пули қанчайкан?

Отам тўқсон бешинчи чойни шошилмай хўпларкан, бепарвогина қўлини силтади:

– Биламанми? – деди. – Битта маҳаллани нони сиққан мошина бўса... Карней-сурнейга етар, э, бор ана, қўйни пулидир, йў гуруч минам савзи-пиёззи пулидир?

– Ва-а-ай... Нима бўлади бу?

Отам пиёласини узатаркан, онамга хўмрайиб қаради:

– Сан Фурғуртепада ўтирибсан! Раҳматиллани ўғлиям Фурғуртепадан! “Вай-вай” лама!

ОСМОН ТЎЛА ФАРИШТА...

“Ҳамма Мақсад амакиникига худойига!”

Аслида Мақсад амаки йилига икки мартадан худойи қилиб, унга маҳалланинг обрўли кексаларини чорлар, турган гап, бу тадбирда у кишининг ўғиллари ёнида маҳалланинг чаққон йигитлари хизматда туришарди. Шу боис бу хабар одатдаги янгиликлардан бири бўлиши мумкин эди. Лекин...

Лекин Мақсуд амакининг уйида худойи учинчи марта ўтказилаётган бўлиб, Ғурғуртепа аҳлини шу нарса ҳайрон қилаётган эди.

Кўп ўтмай, хабарга миш-миш илакишиб чиқди: “Мақсуд амаки уйланәётганмишла”.

Ғурғуртепа аёллари бунга муносабат билдиrmай туришолмади, албатта.

– Вай, уйланмий ўлсинла, ким қўйибди?

– Ким тегаркан-а?

– Келинлаям яхши-де, қаренг, индамий рози бўлишипти...

– Сиз уни гапиравс, амакини кампир танлаганларини эшитинг!

– А... Вай... Танлабдилами?

– Уй ичлари минам чарчаб кетишибди-ю, югурувуреб...

Бутун маҳалла шу хабарни “ҳазм қилиш” билан овора бўлиб юрган бир маҳалда Мақсуд амакининг уйида, ҳовли пастидаги ошхонада баҳс авжга чиқиб борарди.

– Майли энди, нима бўсаям, тинчийлик, одам жа чарчаб кетти, – деярди амакининг катта қизи.

– Сиз ойда-йилда бир келасс, опа, яшийдиган биза, ҳар нучук, бизага ёқиши керейми? – бўш келмасди катта келин. – Шу хотин тузуккинага ўхшади-де...

– Опажон, яшийдиган сизамас, биза, сиззи уйиз нариги кўчада, – бидирларди кенжа келин. – Бу хотин тузуккинага ўхшади, заметьте себе, ўх-ша-ди! Тағин яна билмадим, одамми оласи ичида...

– Ҳадеб хотинни қаёданам топамиз? Адамла кўндила-ю, бўлди-де! – кенжа қиз томонларни муросага келтирмоқчи бўларди. – Ўзи шундоғам икки йил овораи сарсон бўпмиз! Ёш йигитгаям шунча воҳт қиз қидиришмас!

– Тўғри, – навбатни яна катта қиз олди. – Битта хотин бирйўла шунча одамга ёқиши мумкинамас, тағи-

нам, ҳар томонлама бўймасаям, ишқилиб, икки-уч томони минам ёқиб тушди-ю ҳаммамизга. Бўлади-де!

– Ўзи уйланадиган додамла-ю, хотинни “ёқади-ёқмийди” қиладиган биза бўлдик! – қиқирлади кенжакелин.

Шунча “бошоғриқ”қа сабабчи бўлган Мақсуд амаки эса дераза пастига ташланган юпқагина кўрпачага чўзилганча, деворга осилган суратга қараб ётарди. Эрталабдан бери юраги негадир увишиб келарди. Кўшнисининг касалхонада ишлайдиган келинини чақиртириб, қон босимини ўлчаттириди: жойида. Нима бўлдийкин? Ҳар эҳтимолга қарши, ҳар кунги ҳандорисини ичиб олди. Икки йил бўлди, дорисиз туролмайдиган бўлиб қолган, оёғи салгина совуқни ҳам сезади. Ўзини ҳеч қари, деб ўйламасди, отасининг ёшига ҳам етгани йўқ-да ҳали! Онасининг йилини ўтказибоқ, синглиси билан хотинига буюриб, тул аёлни топтириб, уйлантириб қўйганда отаси етмиш уч ёшда эди. Ўзи икки йилдан кейин етмишга киради. Етмишга етмай, хотинидан айрилиши тушига ҳам кирмабди!

– Мана, онаси, ўрнингга бирор келадиган бўй туриби, – деди беихтиёр овоз чиқариб. – Мандан ўпка қима энди, қийналиб қолдим. Кўрдингми, юпқа кўрпачада ётипман, оёғим совқотвотти, устимга чопон ташаб қўядигон одам йўқ. Ҳовли тўла, ҳамма мани деб кеган-у, ўзим минам ҳеч кимми иши йўқ...

Хотини “Осмон тўла фаришта, ҳар қайсиси ҳар ишда”, деб қўярди. Тўғри гап экан! Бахтиёри ёнида бўлганда ҳам бир нави эди. Тунда ўрнидан қўзғалса, Бахтиёр дарров ёстиғидан бошини кўтарарди. “Ташқарига чиқассми, дода?” – дерди-ю, сакраб туриб, қозиқдан тўнини олиб берарди. Кейин қоронғида зинада қоқилмасин деб эҳтиётлаб, қўлтиғидан оларди. Бувасининг чиқишини пойлаб, қумғонни икки қўллаб ушлаганча ҳалажойнинг шундоққина ёнгинасида

чўнқайиб ўтиради. Мақсуд амаки қўлларини ювиб, неварасининг елкасидан сочиқни оларкан, ич-ичидан алқар эди: “Барака топ, болам, тупроқ осенг, олтин бўсин”... Мана, Бахтиёри ҳам ёнида йўқ, чемпион бўламан деб, интернатга ўқишига кирган, ҳафтада бир келади. У келса, чолнинг назарида уй ёришиб кетгандек бўлади, невараси елкасидаги кўм-кўк сумкасини гурсиллатиб палосга ташлайди-да, келиб бувасини қучоқлайди, “туззумисиз, дода?” – дея оғзи қулоғига етгудек илжаяди, шунда эндиғина чиқа бошлаган мўйлаби кулгили бир тарзда қийшаяди. Кейин палосга чўккалаб ўтириб олади-да, бир ҳафта ичидаги кўрган-кечиргандарини ҳикоя қила кетади. Чол берилиб эшитади. Эртаси кун эса невараси интернетдан ўқиб олган бир дунё ҳабарларни тўкиб солади, буваси Африкадаги қайси бир давлатда тўнтариш бўлганини, Хитойдаги кўмир кони ўпирилиб тушганини, Россияда ўрмонлар ёниб кетганини, Италияда вулқон отилиб, одамлар уйсиз қолганини, Америкада улкан тошқин вайронгарчилик олиб келганини эшитиб, жаҳон қанчалик катта эканини яна бир бор ҳис қиласди. Шунда ўзининг дарди чивинчалик кўриниб кетади-да, ич-ичидаги шукур қиласди. Охири невараси унинг соқолини қайчилаб, тартибида келтириб қўяди, буваси чўмилиб олиши учун ҳовли адодидаги ҳаммомни иситиб беради. Кейин... кейин кафтларини очиб, бувасининг узундан-узоқ дуосини олади-да, сумкасини елкасига ташлаб, кетади. Чол яна келаси шанбани кутиб қолаверади.

Бугун кечга томон Бахтиёр келади. Чол неварасининг бир дунё ҳикояларини эшитишини ўйлаб, дили ёришди. Ўрнидан қўзғалиб, дераза пардасини кўтариб, ҳовлига қаради. Патнис кўтариб тўрдаги айвон томонга пилдираб кетаётган кенжакелиндан:

– Бахтиёр кемадими? – деб сўради.

– Йў, додажон, кемади, ҳали вохли, икки-уч соатла-да кеп қолади.

Чол пардани тушириб, яна кўрпачага чўзилди. Ҳовлидан тўнғич ўғлининг товуши келди:

– Хў, ким бор? Халта-хулталани ким олади? Керей бўмаса, этийла, қайтариб бервораман.

– Вай, муллака, ҳазилиззи қаренг, доим пластин-кейиз бир хил-а? – шарақлаб қулди келин. – Бера қо-лин халталариззи, ўзим қабул қиволаман. Ошпазийиз кеган, ана, савзи-пиёззи тўғраб, келадиган гуурчлани кутиб ўтирипти.

“Э, гуурч... – ўйлади Мақсуд амаки. – Бугун меҳмон келади-я...”

Яна юраги увишди. Суратга қаради. Назарида аё-лининг қоши сал чимирилгандек қўринди, рўмоли ҳам қийшайибдими?

Аёли унга ҳеч қачон қош чимирмаган. Ҳатто оғир ётган маҳали ҳам инқиллаган эмас эди, бирон марта жоним оғриди демабди ҳам. Бўлмаса, дўхтири ҳали жуда қаттиқ оғриқлар бўлади, энди Ўзи сабр берсин, биз ожизмиз деб айтган эди. Хотин киши мунчаям бардошли бўларкан! Ўзи бўлса, мана, эркак бўла туриб, оёғининг оғриғига чидолмай, инграб қолади.

Меҳрибон эди жуда. Бир кун кечаси чарчаганидан устини яхши ўрамай ухлаб қолибди. Тунда бадани жунжикиб уйғонди. Қўллари билан пайпаслаб кўр-пасини излай бошлади. Шу пайт кимдир елкаларини авайлаб кўрпага ўради. Қовоқларини базўр йириб, кўзларини очди: хотини!

– Маъмурा? – деди. – Қанаққиб келдинг? Нага турдинг?

Хотини индамай унинг пешонасини силаб кўйди. Кейин ўзининг тўшагига қараб эмаклаб кетди. У бўлса анграйганича қолаверди. Ҳеч бўлмаса, тўхта, ўзим

ўрнингга обориб қўяй дейишга ҳам фаҳми етмабди. Ҳозир шуни ўйласа, уятидан ерга киргудай бўлади...

Токча устида турган эски соат “жир-ринг” деган товуш чиқарди-ю, зум ўтмай ўчди. Пешин бўлай деб қолибди-ку. Чол қўлларига таяниб, гавдасини кўтарди, дераза токчасидан дўпписини олиб кийди. Эшикни эҳтиётлик билан очиб, зинага оёқ қўйди. Ҳовлига тушиб, атрофга аланглади. Ҳамма шошади, ким патнис кўтариб у ёқقا чопади, ким идиш-товоқ кўтариб бу ёқقا пилдираиди, неваралар шовқин солиб, бир-бирини қувади, ошхона томонда, шундоққина ўрик тагига ўрнатилган қозон-ўчиқ атрофида бир тўп йигит ҳангомалашиб, гуриллаб кулади. Мақсад амаки зинагининг энг юқори пиллапоясида турган қумғонни олди. Кувалашиб юрган неваралардан бирини тўхтатди.

– Бор, шунга илиқ сув тўлатиб ке!

Невара қулоғининг ортини қашиди.

– Дода, ҳаммомда илиқ сув бор-ку, шундо... кранни бурийсиз, бўлди! Нима қиласс қийналиб? – бижирлади бўйи тикроғи.

– Котта гапирганда гап қайтармий, хўп деб турди, – аччиқланди чол.

Шунда бўйи етаёзган яна бир невараси чопқиллаб келди.

– Манга беринг, дода, ман опкеб бераман, – деди бижирлаб. Кетидан қўшимча қилиб қўйди: – Сочиғам опкеламан.

– Ҳа, барака топ, яхши жойладан ато этсин...

Қизгинанинг юзи ловуллаб кетди. Қумғонни кўтара, ошхонага қараб юргилади.

Шу пайт катта ўғли ўчиқ атрофидаги даврани ёриб, отасининг олдига келди.

– Ада, – деди. – Маҳалладагила мачитдан чиқиб, Сижо бувани бирровгина кўриб, кейин келадиган бўлишди. Имомни Асад опкелади.

Чол бепарвогина “ҳм” деб қўйди. Ўғил ҳайрон бўлиб тўхтади: “Нотўғри бир гап гапириб қўйдимми?” Отаси индамаганини қўриб, яна изоҳ берди:

– Қуда томон сал кеч қоламиз, дейишипти.

Чол лоқайд қўл силтади: “Манга нима?” Ўғил гапидан тутилиқди. Ота невараси кўтариб келган қумғонни олиб, ҳаммом томонга қараб кетаркан:

– Пешин бўп қолди, – деди.

Ўғил буни ўзича тушунди. Им қоқиб хотинини чақирди.

– Овқат-повқатинг борми? Адамга сузиб бермийсанми? Қорни очганга ўхшийди-ю! Кун пешин бўпти!

– Вай... – деди келин. – Шўрва пишган, сувзурийми? Ман номоз ўқисала, кейин опкирийми, деб...

Ўғил ўқрайди. Келин ошхона томонга йўрғалаб кетди.

Мақсад амаки пешин намозини ўқиб, айвонга чиққанда, хонтахта устида оппоқ дастурхон солиғлиқ, унинг устида чиройли косада буғи чиқиб турган шўрва, бир жуфт обинон, хонтахта ёнига ташланган кўрпачада тўнгич ўғли ўтиради.

– Ада, очқаб кетгандирсиз, чопа-чоп минам бўлиб қаролмабмиз... – ўғил қип-қизариб, дастурхонга ишора қилди. – Иssiққина ичволақолинг, меҳмонла кегунча чарчаб қоласс...

Чол буғи чиқиб турган бир коса шўрвага, иссиққина обинонга, чойнак-пиёлага қаради. Кейин ўғлига боқди.

– Шўрвани меҳмонла минам ичарман...

– Нага? А... Боя...

– Юрагим увишиб турибди... Бирпас ётаман...

– Дўхтир қўшнимиззи чақирийми?

– Йў... бирпас ётий... Бахтиёр келадими? – негадир шу топда яна неварасини кўргиси келди.

– Бахтиёр кечро келади-ю... Бир... соат беш-олти-лада кеп қолади.

Ўғлиниң гапини эшитмади ҳам. Шу топда юраги ниҳоятда ғаш эди. Гүё ёқимсиз нимадир бўладигандек...

Холбуки, бугун одатда уйига келиб юрган маҳалла дошлари, қариндошларини меҳмон қиласди, Бодомзор мачитидан мулла Абдулкарим келиб никоҳ ўқиди, Қибрайдан ўнтача янги қариндошлар унинг хона-донига яна бир аъзо – Суюмахонни олиб келишади.

Суюмахонни унга бирров кўрсатиши, лекин у аёл дилига ўтиришдими ёки ўтиришмадими, буни ўйлаб ҳам ўтиргани йўқ. “Бу ёғига қанчаям умрим қолди? – ўйлади у. – Маъмура минам қирқ йил яшадим. Буниси минам шунча яшармидим? Шунақайкан, инжиқлик қилиб маъқаман”.¹

Холбуки, отаси кейинги хотини билан йигирма йил бирга яшаб, ёши тўқсонлардан ошиб, қайтиш қиласган. Яхши аёл эди у. Невараларни, кейинроқ эвараларни бағрига босиб олганча, чоли билан бир нималарни гаплашиб ўтираверарди. Отасининг яктаклари оппоқ, бошидаги юпқа каллапўши оппоқ, соқоли оппоқ, бутун вужудидан меҳр кўрган одамнинг бахтиёрлиги уфуриб турарди. У оқшом чоғи отасининг ёнига шошар, назарида отасининг мамнунлигидан унга ҳам нималардир “юқиб” қолаётгандек, кўнгли тўлиб, кўкси ўсиб кетарди, Маъмурага “шунақанги ўтиришдан бизагаям насиб қиса кошкийди”, деб қўярди.

Худонинг ишларига ҳайрон бўлмай илож йўқ, фаришта шунда нимага омин, деб юборганийкин? Фаришта унинг ниятини нотўғри талқин қилдими ёки унинг ўзи ниятини тўғри айта билмадими?

Хонасига кириб, кўрпачага ёнбошлади. Оббо, келингами, қизигами айтиб, кўрпачани қалинроқ қилиб

¹ Шевада – нима қиласман.

тўшатса бўларкан. Хаёлидан кўтарилибди. Деразадан қаради. Ҳовлида ғала-ғовур кучайган, қариндошлар бирин-сирин тўплана бошлаган эди. “Ҳм... Осмон тўла фаришта, ҳар қайсиси ҳар ишда... – ўйлади у. – Бирпас ётаман-у, тураман. Маҳалладан қарияла келади, чиқишим керей-ку!”

Бошини ёстиққа қўйди. Юраги баттарроқ увишди. Ёнбошида ётган адёлни олиб устига тортган бўлди. Энди увишиш баданига ўтди. Оёғи совқотди. “Ие, – ўйлади у. – Ёз чиллада совқотиш нимаси?”

Девордаги суратга кўзи тушди-ю, икки кун аввалги можарони эслади. Кечкурун қариялар билан ўтадиган “гап”дан келса, келин кўзлари қизариб ўтирибди. Суюмахоннинг кўчларини олиб келиб, ёйишган хотинлар девордан суратни олиб қўймоқчи бўлишибди-ю, катта қизи олдирмабди. Орага тушган келин у томондан ҳам, бу томондан ҳам дакки ебди. “Шунақаям бўладими, дода? – дерди бечора. – Қўйийла, тортишиб нима қиласила, деганимми биламан...”

Ўзича кулиб қўйди. Шу топда қизининг бир сўзлиги ҳам, қуда тарафнинг ўз сўзли эканлиги ҳам шу қадар майда, арзимас кўриндики...

Шу пайт оёгининг томири тортиша бошлади. Кимнингдир меҳрибон қўллари оёгини уқалади. Елкасига кўрпа тортилганини сезди. Бирам енгил тортидики... Қовоқларини йириб, кўзини очди. Ўзига қараб турган меҳрга тўла, таниш, қадрдон кўзларни кўрди. “Маъмура, – деди беихтиёр. – Қанаққиб келдинг?” Аёли жилмайди. “Нага келдинг?” – сўради яна. Аёли индамади. Фақат илиқ кафти билан унинг пешонасини силаб қўйди...

Худойидан келган отам сўрига чиқди-ю, хомуш тортганча ўтираверди. Пиёласидаги чойи ҳам совиди.

Онам отамнинг таъби хира бўлса, уни безовта қилиб бўлмаслигини яхши биларди. Шунинг учун ҳовлининг нариги бурчига бориб, катта сирли тоғорада қайнаётган олча мураббоси билан овора бўлди.

– Худони ишлари қизик-де... – деди отам. – Ҳайрон бўумий илож йўқ.

УШАЛГАН ОРЗУ

Ҳикоялар

- Ойи, сиз адамга эрга тегмаган экансиз-а?
 - Вай, уяting курсин! Шуям гап бўлдими? Сан қаёдан кеп қолдинг бўмасам?
 - Сизда закс қофози йўғакан-у!
 - Вай... туф-туф-туф... – кампир кўксига туфлади. – У пайтлада заксга бало бормиди?
 - Закс қофози бўмаса адамни хотини бўганизни исботлаб бўмасакан, шунинг-чун пенсияни ололмаса-кансиз...
 - Тушунтиримийсанми, у пайтлада закс одамлани эсига кемаган деб! Мана, ман у кишини ўғлиман, де-мийсанми?
 - Қўйинг, ойи, ўша пенсияни пулини мандан олар-сиз! Зарилми шунчалик? Шу пайгача ўшасизам тузук-кина яшаб турувдиз-ку!
 - Э, бор-ей, санга иш буюрибман-а? Ҳеч тўғрилаб бўмасаканми?
 - Бўларкан. Судга бориш керак экан.
 - Вой, шўри-и-им... Бир ками шу қолувди!
- Ойнисо хола ўзининг одатдаги букчайиб юриши билан уйга кириб кетди. Воҳид ҳовли юзида бирпас ўйланиб турди-да, айвонга чиқиб, қофоз папкани де-раза токчасига қўйиб, телефонини қўлига олди.
- ...Ҳаммаси Муқаддас шаддоднинг навбатдаги мақтанчоқлигидан бошланди. Сил касалларнинг ши-

фохонасида ҳамшира бўлиб ишлаган йиллари учун пул ҳисоблашиб, собесдагилар пенсия пулини яна ошириб беришибди. Ҳамманинг ҳаваси келди.

Аслида Ғурғуртепада катта пенсия оладиганлар талайгина. Масалан, Жамила амма темир эритадиган заводда фаррош бўлиб ишлагани учун, Зумрадхон мактабда ўқитувчилик қилиб, ҳукуматдан мукофот олгани учун, Насибаҳон бир умр дутор чалиб, орден олгани учун, Гулсум опа ўнта болани туғиб катта қилгани учун бошқалардан кўп пенсия олишади. Мана, Кумри буви юз ёшга тўлган куни собесдан келиб-кетадиган ақллигина бир йигит “хукуматнинг қарори бор”, деб, қайтадан ҳисоб-китоб қилиб берди, энди бувининг пенсиясига кичкина чеварасининг стипендиясига тенг келадиган пулни қўшиб беришяпти. Бунақа пенсия олиш учун бор-йўғи юз йил яшаб қўйса бўлди экан! Хуллас, бунақангি мисолларни кўп топиш мумкин. Ўйлаб қараса, маҳаллада пенсия масаласида эътиборсиз одам ўзи бўлиб чиқяпти.

Зумрадхоннинг айтишича, Ойниса хола ўзиники ўрнига чолининг пенсиясини олиши мумкинмиш, фақат буни суриштириш керак экан. Ахир чоли озмунча пенсия олармиди! Қўли гул уста эди-ю! Ҳукуматдан мукофотлар олган эди.

Қўпроқ пенсия олиш орзуси биринчи бўлиб ўғлига айтилди. Ўғил эса, мана, давлатнинг никоҳ қоғози йўқ деб ўтирибди...

Шом намозини тугатиб ҳам хола жойнамоз устида анчагача ўтириб қолди. Ўғли айтган гаплар ҳеч хаёлдан кетмасди. Суд! Қирқ етти йил яшаган чолини давлатдан никоҳ қоғоз олмабсан деб судга берса! Бу қанақаси!

...Ойниса хола ўзининг узатилаётганини тўйидан ўн кун аввал кеннойисидан эшитган. Эшитган-у, негадир ўзини бирданига ота уйига бегонадек сезиб қол-

ган. Кейин тушундики, ўзини отаси уйига бегонадек сезган куни тақдири қирқ етти йилга боғланиб қолибди. “Уйим иккита бўлди”, деганлар ёлғон айтишади. Одамнинг уйи битта бўлади. У туғилиб ўсган уйига бегона бўлиб қолган куни ўз уйини топган экан. Буни қирқ етти йил ўтгандан кейин тушунди.

Урушдан кейинги оғир замонлар эди, ўшанда тўй-томуша одамларнинг кўнглига сифибдими? Дастурхонга иккита нон, икки ликопча туршак-майиз қўйишиб, домлага бир жуфт кулча тутқизишган-у, шу билан тўйни ўтди, деб ҳисоблашган, қўйишган.

Энди қирқ етти йиллик умрини бағишилаган одамни бир парча қоғоз учун, қўлнинг кири учун судга берсинми? Не кунларга қолди? Негаям ўша Муқаддасга ҳавас қилди? Муқаддаснинг пенсияси ошган бўлсана има қилибди? Шунга ҳам шунча мақтанишми?

Орадан ўн кунча вақт ўтди. Ойниса хола энди пенсия тўғрисида оғиз очмас, ўғли ҳам ўзини ҳеч гап бўлмагандай тутарди.

Тонглар осуда отиб, оқшомлари тинч ўтарди. Неваралари ҳар доимгидек ҳовлини бошларига қўтаришар, келини ошхонада куймаланар, хуллас, одатдаги оддий ва баҳтиёр кунлар ўтиб борарди. Шундай кунларнинг бирида...

Ўғил келса, Ойниса хола айвонда йиғлаб ўтирибди. “Суддан чақирув қофози келди...”

Ўғил онасини юпатган бўлди, кейин ўзини оқламоқчи бўлди: “Ўзиз адангни пенсиясини обер” дедиз-ку!”

...Эртаси куни кампир ўғлиниң қистови билан учқўшни (гувоҳлар!) ҳамроҳлигига судга борди.

Судъя бағбақалари бўйинбоғи устига қат-қат бўлиб осилиб тушган сап-сариқ одам экан.

– Сиз – фуқаро Мўсўлмонкулова Ойниса...

– Мусулмонқул дегин, болам, ўқишни билмийсанми, ё?

– Ёзилганини ўқидим-де! Фуқаро Мўсўлмонкулова Ойниса... турмуш ўртоғиз ҳисобланмиш Ваҳобиддин Мўсўлмонкулов билан биргаликда қирқ етти йил яшаганингиз факти тўғрими?

– Болам, нага энди қирқ етти йил яшаганиз тўғрими, деб сўрийсиз? У пайтлада закс қофоз кимни эсига кепти? У пайтлада одамла қофозинг бўмасаям турмушинг ҳалоллигига ишонишган. Кейин... чолим мани бир парча қофозга алишмаган.

– Демак, тўғри...

– Худога шукур, чолимдан кейинам зориққаним йўқ, ўғлим бор, ўғлимдан котта учта қизим бор. Чолимни судга бериб пенса олишга... буниям жавоби бордир ҳали...

– Ман тушунмадим, бу нимаси? Ариза ёздиз, судга келдиз, энди пенсия керакмасми?

– Йўқ, керакмас!

Судья анқайиб қолди.

Ойниса хола кўзининг ёшини яшириш учун рўмолининг учини тишлаганча ташқарига йўналди. Катта қизи ортидан эргашиб чиқди.

Орқадан судьянинг товуши келд:

– Нима қиласиз энди? Давом эттирамизми? Ёки масалани шундоқ қолдирамизми? А, Воҳид Ваҳобиддинович... Мўсўлмонкулов! Нима дейсиз?

Ўғли пастроқ овозда нимадир деди. Ойниса хола эшитмади.

...Орадан бир ой ўтгач, собесдаги ўша ақллигина йигит “Ойниса Мўсўлмонкулова деган онахон шу уйда тураллами?” деб кириб келди.

* * *

Кенжак укам қўчадан қўйинини тўлдириб ширинлик кўтариб кирганда, отам ошдан келиб, кўк чойни майдалаб ўтиарди.

– Нодирни бувиси ҳа-а-амма боллага шакаладла, печениилар обердила. Вай... ким нимани егиси кеса, ҳаммасини обердила, пуллари роса кўп! Маҳалламизда ҳали ҳеч ким мунақа кўп шакаладла обермовди боллагат.

– Тинчлийми? – отам ҳайрон бўлди.

– Ойниса холага Ваҳобиддин уста амакини пенсасини беришибди. Хола пулларини ҳаммасини хайрия қилдила, – кулди онам.

– Э... Воҳид жа... яхши йигит-де! Онасини хурсанд қилувди, онаси, мана, маҳаллани болаларини хурсанд қиватти.

ЯХШИ-ЁМОН ХОТИРАЛАР

“Асал опа оғир ётганмишла...”

Бу хабар одатдагидек, Фуруртепани суръат билан айланиб чиқди-ю, ҳаммада ғайриодатий хавотир уйғотди. Чунки Фурғуртепа аҳли ҳаётида опанинг ўзгармас ўрни бор эди. Яъни, маҳалла кишиларининг ярми Асал опа қўлида савод чиқарган бўлса, қолган ярми опа директорлик қилган “тўқсон тўққиз” рақамли донгдор мактабга қатнаган, аксарият ўша донғи кетган мактабда ўқигани устига, ё ўғил-қизи ёки неварасини шу даргоҳ таълимига топширганди.

Опа асли маҳаллага келин бўлиб тушган эди, аммо чолу кампирлар бошқа аёлларнинг саломига “Ваалайкум ассалом, келин”, деб алик олганлари ҳолда, унга “Ваалайкум ассалом, устоз қизим”, дейишарди. Маҳалла келинчаклари эса Асал опа эридан қолган “Нексия” машинасини миниб ўтадиган йўлга аzonдан сув сепиб қўйишини ўзларининг муқаддас бурчлари деб билишарди, чунки тўйнинг индинига ёқ уй иchlаридан шу ҳақда кўрсатма олишарди.

Опа маҳалладаги ҳар бир йифиннинг азиз меҳмони ва шу билан биргаликда фаол бошқарувчиси эди.

У барваста қоматида тўкилиб турадиган ярашиқли кўйлагида салобат билан кириб келса, ҳамма оёқقا қалқирди, опа қўлларини кўксига босиб эгилган эркагу аёлга бир-бир боқиб ўзича кулимсираб қўярди-да, тўлиқ, тетик овози билан:

– Ваалайкум ассалом, – дея алик оларди.

...Мана, икки кун бўлибдики, аёллар маҳалланинг энг катта хабарига ўзаро муносабат билдиришади:

– Ва-ей, лоақал шу Асал опамла касал бўмасала нимайди-я?

– Бу дард қаёқда қараб турган экан-а...

– Қизлариям кемади-я? Қаёқдайкан ўзи?

– Термиздамиш! Чегарага яқин экан!

– Вай, қиз болани ҳечам йироққа кетадиган йигитга узатиб бўмасакан.

– Яхшиям Маҳбуба бор.

– Барака топсин, худди ўзларига ўхшаб, келинамас, қиз бўпти-де!

Гурғуртепа шу каби сўзлар билан қайнаган бир пайтда опа деразаси кўчага қараган кенг хонанинг тўрида, айвондан эшитилаётган сўзларга уйқусира-ганча қулоқ солиб ётарди.

– Кеча Анварим Бокудан телепон қилди. Кумуш медал опти! Неварамни шунаقا бўп кетишига Асал опам сабаб бўлувдила! Анвар болала минан муштлашганди, опа мани чақириб, “неварайиз шунаقا зўр бўса, боксга беринг, кучини ўша ерда кўрсатсан”, дегандила. Уйғонсала, Юсуповни бувиси раҳмат этти, дерсиз.

– Хўп, опоқи!

“Юсупов кумуш медаль оптими? – ўйлади опа. – Бу болани тўполонидан безор бўғандан, шунчаки гапирган эдим. Товба!”

Бир вақт кўчада машина ғийқиллаб тўхтади. Опа бошини деразага бурди: “Назира келдими?”

Қорин солиб юборган йигит ғалати бир хорижий машинанинг орқа ўриндиғидан шаффоф халтага солинган мева-чевалар олди.

“Ким бўлди бу? Танимадим... Бизаникига кирдими?”

Шу вақт ярим соатча олдин олинган муолажа таъсир кўрсата бошлади. Опа кўзлари юмилиб борар экан, айвондан “Ман Асал опани қўлларида ўқиганман...” – деган сўзларни эшилти.

“Хозир кеган йигит шакилли... Ким бўлди бу?”

– Тошкентга ҳозир кеп турибман... – деярди бояги овоз. – Адамдан эшилдиму...

“Вай, ким эди бу?” – деб ўйлади-ю, опа ухлаб қолди.

...Тушига негадир эри кирибди. “Нексия”сининг ойналарини ювар, тинмай шоширармиш:

– Тезроқ сув обке, ўзим ювиб бермасам, машинани шу ҳолича ҳам миниб юрвурасан!

...Босинқираб уйғонди. “Нимадандир безовта бўвотти, шакилли? Назира тинчмикин? Э, Тоҳир-а, бир тупконнинг таккинасига опкетти-я, кошки бориб-келиш осон бўса...”

Ташқаридан ғўнғир-ғўнғир овозлар келарди.

– Аслида опанинг исмлари Маъсудахон, Асал диган исмни у кишига мани қизим берган.

– Йўғ-э?

– Ишонмийсила-я! Ҳозир Олий Мажлисда ишлатгандан қизимни олти яшар пайти мактабга бермоқчи бўғанмиз. У пайтда биринчи синфга етти ёшдан кичкинани омасди. У ёқقا борганмиз, бу ёқقا борганмиз, ҳеч бўмаган. Шунда худо раҳмати қайнанам “устоз қизим ўзи ёрдам қилар”, деб мани шу ҳовлига жўнатгандла. Опа олдимизга дастурхон ёзиб, оққанд, майиздан ташқари, олтита пахта гулли пиёлада ҳар хил мураббо қўйганла. Олчаники, ўрикники, олхўриники, шафто-

линики, анжириники, яна аллақанаңа... Ўзи опа ҳар хил мураббо-ю, қиёмга жа уста эдила, ҳаттоким атиргулдан, довуччадан, памилдоридан қиём қиласыра-я... Вой, тарвузни пүчөғиям у кишидан қомасди, тавба. Қақажоним шунча мураббони күриб, “Вой, устоз опани исми Асал эканми?” деса! Роса кулибмиз. Опамла бу қизалоқда бир гап бор, деб боламни мактабга қабул қылдирғанла. Шу-шу опани исми Асал бўп кетган.

Айвонда кулги кўтарилди. Асал опа бўғзига тошиб келган кулги зўридан йўталиб юборди. Шу заҳоти хонага Маҳбуба юргилаб кирди. Кетидан уч-тўртга аёл мўралади. Семиз бир хотин пиёла тутди. Бемор илиққина чойни ичаркан, енгил тин олди.

– Тузукмисиз?

Асал опа бош силкиди: “Шукур...”

– Илойим кўрмагандай бўп кетинг...

Опа кўзларини юмиб-очди: “Рахмат...”

Кимдир кўз ёшини билдирамай артди, кимдир эшистилар-эшитилмас хўрсинди, кимдир лабини тишлади.

...Эри камгап, вазмин йигит эди, дилидагини ҳеч қачон тўкиб-сочмасди. Баъзан хотинига атаб бирон нима келтирса, худди уятли бир иш қилаётгандай тортинибгина тутқизарди. Бир марта, нимадир бўлиб ораларидан ола мушук ўтиб қолган пайт (ё тавба, нима сабаб билан жанжаллашишган эди-я, ҳеч эсида йўқ) аччиқланиб:

– Ўйланётганизда уйимга бека, ўзимга рафиқа бўлади, деп ўйлагандирсиз ахир? “Рафиқ” дегани бу “дўст” дегани. Ман сизга кимман? Шунчаки бир беками, хотинми ёки рафиқами? – деганди.

Эри бир пас қараб турди-да:

– Унақангি... китобий гапларга йўман, билиб туриб, гапирансан-а? – деди.

Хотинининг кўзига ёш олганини кўргач эса, шивирлади:

– Қизиғмисан, чиройли гапиришни билмийман, дедим-ку... Темир-терсак ичидә юрган одам бўсам...

Ўша оқшом эри унга яна бир гап айтди:

– Сани бир кўргандәёқ ёқтирганман, рост, ҳеч қа-
чон кўнмаса керей, у қаёқда-ю, ман қаёқдаман, деб
ўйлаганман. Уйингга потаҳа жўнатишаётгандаям, ман
ишонмий ўтирганман.

...Кечга томон Асал опа тағин босинқирай бошла-
ди. Энди тушига Назира кирди. Боласини бағрига бо-
сиб турганмиш... Оҳ, Назира-я, хусни бир олам эди! Қа-
ёқларга жўнади-я!

...Ўтган сафарги келганида хафа бўлиб кетди. Не-
варасини қаттиқроқ койиди-да... Э, педагог бўлмай...
Шу уч яшар қизча сенинг принципларингни тушуна-
дими? Кап-катта ўқувчи болаларга дакки бериб ўрга-
ниб қолгансан-да! Ҳа, мушукни урса нима қипти? Му-
шукка шунча ачиндингми? Э йўқ, сен болага тарбия
берилмабди, деб ўйладинг. Ажаб бўпти, ярашифини
олдинг!

...Маҳбубанинг кенжаси аллақайдан бир мушук то-
пиб келувди, ялина-ялина бувисини кўндирувди. Шу
мушук дастурхон тепасига миёвлаб келди. Маҳбуба
қайноаси ит-мушукни ёқти rmsligini билганидан
ўғилчасига қараб бир олайди. Ўғилча мушукни ҳовли-
га чиқариб юборди. Сал ўтмай, мушук яна пайдо бўл-
ди. Энди Назиранинг қизчаси мушукни танбеҳлади:

– Қанақа мушуксан ўзи? Тайтиб-интизомни бил-
мийсанми?

Ҳамма кулиб юборди. Куёви Тоҳир:

– Яшавор, митти лейтенант! – деди. – Қани, каман-
дирга бир “честь” бериб қўй!

Барно ўнг қўлини тирсақдан букиб, бармоқ учла-
рини чаккасига тиради.

Шу пайтда опанинг неварасига шу қадар меҳри
жўшдик! Юзларидан ўпиб-ўпиб олгиси келди! Қа-

ранг-а, миттигина бўла туриб тартиб-интизомни билар экан! Лекин нариги невараларига қўзи тушди-ю, тезда жиддий тортди. Ахир қаттиққўл буви ҳаммага бирдек бўлиши керак! Йўқса, адолат принципи бузилади!

Шу онда худди опанинг ўйларига жавоб бўлган-дек Барно мушукнинг тумшуғига урди. Мушук бифиллаганча нарига учиб тушди. Опа бир қалқиб кетди: “Ўжуда қаҳрли бўлиб ўсяптими?” Кейин қовоғини уйди:

– Бу қанақа тошбағирлик? Нага урасан?

Қизча ҳам бўш келмади:

– Нага дастуйхонга келади? Уни жойи буёқдамас!

Опа овозини бир парда кўтарди:

– Кимни жойи қаёқда, сан қайдан биласан?

Дастурхон атрофида жимлик чўқди. Ҳамма опанинг феълини билганидан орага тушишга ботинолмай қолган эди. Фақат Назирагина аралаша олди:

– Кўйсез-чи, ойи, шу кичкина болада нима ақл бор?

– Ҳа, бола кичкина, ақли йўқ, аммо қаҳри бор! – деди опа одатича қатъий.

Маҳбуба қайнонасининг кайфияти ўзгара бошлаганини сезиб, болаларига ишора қилди: “Қани, турларинг!”

Опа шундагина ноўрин қатъийлик қилиб юборганини пайқади. Лекин “пастга тушишни” истамади. Қошларини чимириб неварасига боқди. Шу онда Барно бошчасини дадиллик билан баланд кўтарди:

– Мунча бақиясиз? Нима ҳаққиз бой одамлага бақийишга?

Ҳамма нафасини ичига ютди. Тоҳир собиқ муаллимасининг бир вақтлардаги жаҳлини эслади-ю, қайнонағасига қараб қўйди: “О, момақалдироқ гулдурайди ҳозир!” Рустам эса жиянини чаққонлик билан қўлига кўтарди-да, ҳовлига қараб чопди. Опа ич-ичидан кулги тошиб келаётганини пайқаб, юзига фотиха торт-

ди-да, ичкари хонага йўналди. Эшикни ёпиб олди. Аммо кулги кучлилик қилди. Каравотига ётиб, юзини ёстиққа босди-да, елкалари силкиниб-силкиниб кулди. “Вой тирмизак, ҳақ-хуқуқ талашади-я! Яна ким билан? Халқ таълими аълочиси, “Эл-юрт ҳурмати” ордени соҳибаси билан!”

Лекин кечкурун барибир Назирани уришди.

– Боланг бетгачопар бўлиб ўсватти! Нега қарамайсан?

Назира аразлади:

– Бетгачопармас, ҳаққини бермийдиган бўлиб ўсватти. Шуниси яхши!

Опанинг ранги оқара бошлади: “Э, қизимни уришаман-у, ўзим битта бетгачопарни ўстириб қўйган эканман!”

Назира эса жим бўла қолмади:

– Ҳаммани жиловда ушлашни яхши кўрасиз. Ким буюрганиззи бажармаса, адабини бергиз келади-я. Мани Тоҳир акамниям ёқтиргмагансиз. Йўқ, дегансиз. Яхшиям, адам бор эдила.

Опанинг юраги бир қалқди. Назира йиғлади:

– Ҳалигача бизани уришвурасиз. Озиб-ёзиб бир келувдим... Адам тирик бўганларида...

...Кимдир елкасидан тутиб силкита бошлади. Кўзларини очса, тепасида ранглари оппоқ Маҳбуба турибди!

– Сизга нима бўлди, ойи? Ёмон туш кўрдизми?

Опа бош чайқади: “Хавотир бўма”. Кейин хаёлидан кечирди: “Ё худо, ҳар не азоб бўлса, рози эдим. Лекин... овозданам айирасанми?”

Маҳбуба кафти билан кўзларини ишқаб, нари кетаркан, ўйлади: “Лоақал нимага безовта эканини айтольсалди...”

...Бир вақтлар онаси узоқ хасталиқдан қийналган пайти кўп йиллар аввал қилган баъзи ишлари киши-

ни туну кун безовта қила бошласа, бу умр поёнидан дарак беради, деган эди. Демак, умри охирлаб қолибди...

...Назира жуда чиройли эди. Юзлари сутга чайилгандек, соchlари қора ипакдек... Тоҳир эса юзи тўла сепкил, кўккўз, сочи кирпининг тиканидек диккайган бир бола эди. Яна бунинг уришқоқ, безорилиги! Қаерда ёқалашиш бўлса, ўша ерда отабоши! Майли, отаси қамоқда, онаси икки болани овсинига ташлаб эр қилиб кетган, амакининг қўлида қарам, дея ҳар сафар тўполонларни ўзи бости-бости қиласарди, амакиси баджаҳл одам, шу тирик етим бечорани урмасин, сўкмасин деб, икки-уч марта тартиб посбонларининг қўлидан ҳам қутқариб чиққанди. Савобнинг таги тешик, дейишгани шу экан-да! Назира бу шумтаканинг нимасига учди, а? Онасидан бекитиқча учрашувлар қилиб юрибдими ҳали?

... – Ўзингнинг ёшлигингни эслагин, – деди эри.
– Мани темир-терсак жинниси дейишарди. Рози бўлдинг-ку! Қора мойга беланиб юришимгаям қарамадинг-ку!

– Лекин муштумзўр эмасдиз! Қўлизда касб-хунариз бор эди!

– Тоҳир Чирчиқдаги ўқишини тугаллаватти, дейишди-ку, “ваенний” бўлармиш. Кўй энди, қизингни йиғлатма.

– Шу бебош боладан камандир чиқарканми?

– Агар тинчимасанг, ана, Чирчиқقا борийлик, ўқишидан суриштириб келийлик! Амакиси ёлғон гапирдими, йўқми, дарров билинади!

...Опа ҳарбий кийим ярашган хушқомат йигитни кўриб бир дам эсанкиради. Тоҳир шунаقا бўлиб кетганми? Лекин сир бермади, босик, вазмин овозда сўрашди, уларни дарвоза олдигача кузатиб чиққан қорамағиз капитаннинг қўлини кўксига босиб, фарғона-

ча шевада: “Тўйингизда ўзимиз хизмат қиласиз, тоға”, деган гапига жавобан эрининг: “Хизмат нимаси, азиз меҳмон бўласиз, укам”, дея илжайганига индамай қараб турди. Йўл бўйи ҳам сукут сақлаб келди, эри буни “...аломати ризо”, деб билганига ҳам эътиroz қилмади. Гўё енгилганини тан олишни истамагандек... Никоҳ куни самарқандча зарбоф чопонда ўзига таъзим қилиб келган Тоҳирни кўриб, беихтиёр юраги тўлқинланди: “Мунчаям кўркам куёв-а...” Лекин яна ичидаги ни ташига чиқаргиси келмади, босиқлик билан куёвнинг елкаларига қоқиб кўришди...

...Шифтга тикилиб ётаркан, кўнгли тўлиқиб кетди. “Феълим қурсин!” – ўйлади беихтиёр. Шу онда кўзларидан ёш тошиб чиқди. “Оҳ, Назира, болам-а... Мунчаям сани қийнадим, қизим-а! Бир марта, бир марта гина эгаримдан тушсам ўлармидим?” Опанинг назарида сўзлари хона шифтига урилиб, акс-садо бўлиб қайтди. Аслида эса бўғзидан бўғиқ хириллаш чиқди, холос. Шу асно айвондан Рустамнинг овози эшитилди:

– Алё, Тоҳир, нима, Назира жинни бўғанми? Э, характеристирандан ўргилдим!

“Ҳой, Рустам, Назирагинамни уришма, уришма!” – деди она. Лекин овози чиқмади...

...– Хавотир оменг, ҳозир кўзларини очиб қолади-ла...

– Барака топинг, дўхтири қизим, кўлийиз дард кўрмасин. Шу опагинамиззи кутқазиб берсайиз...

“Була ким? Кўшнилами? – ўйлади опа қоронфилик ичидан келаётган товуш эгаларини танишга тиришар экан. – Дўхтири келдими?”

– Вой, Асал опа-ей, ҳаммага яхшилил қиласдила! Шундоқ одам ўрнидан туриб кетмаса-я?

“Оббо, ҳаммага яхшилиг-а!” – деди ичиди Асал опа энсаси қотиб.

– Энди чиқиб тура қолинг, опоқи... Озгина муола-жамиз бор, шуни қилволайлик...

Сал ўтмай, билагига нина санчилганини сезди. Уйқу элитаётиб, юзларини кимдир силағандек туюлди. Бирам енгил тортдик!

...Опа кўзини очиб, каравот ёнида юм-юм йиғлаб ўтирган Назирани, нарироқда уларга қараб турган Тоҳирни кўрди. Назира овози йиғидан титрай-титрай:

– Ойижон!.. Вой ман жинни нега аразлийман? Манга аразлашни ким қўйипти? – дерди.

“Э, бу нега йиғлийди? – ўйлади бемор. – Ман тирикман-ку!”

Бир вақт Тоҳирнинг орқасидан Барно мўралади. Невараси, унинг қақажон Барногинаси калта қирқилган соchlарига қўндирилган ясама капалакча, эгнидаги ним яшил кўйлакчаси билан бирам ширин, бирам ёқимтой кўринардики... Худди рангдор китобчалардаги қўғирчоқлардек... Шу онда неварасининг сўзлари эсига тушди-ю, кулиб юборди. Қизча бувиси нега кулаётганини тушунмади. Қўзларини катта-катта очганча қараб тураверди. Асал опа эса елкалари силкиниб, қўзлари ёшланиб куларди...

* * *

– Маҳаллақўмни кўрувдим, ошга чиқипти, – отам ёстиқни биқинига тортиб, ёнбошлади. – Шанби кунига Тоҳир келиб худойи қибервотганакан.

– Тинчлийми? – онам қийиб ўтирган лахтагини ташлаб, бошини кўтарди.

– Тоҳирри бошқа жойга ишга кўчирипти.

– Вай... яқингинамикин?

– Сурхандарёда, хўй, Туркманистонга чегара бўған жой боракан, денгиздан икки минг етти юз метр балон экан. Ўшаққа кетаркан.

– Вай-вуй... Термиз қайтага тузугакан-ку.

– Денгиздан шунча метр балонда бўса, бизани Чимён уни олдида ўйинчоғакан-де! Ёким у жойла Чимёндан пастмикин? Ҳали Илёс кеса, сўраволий, географиядан беш олуви, у билади.

ҚАДАМИНГГА ГУЛЛАР СОЧИЛСИН

Фургуртепанинг ҳар бир тонги ўзгача бир дарак келтиради. Бу сафар маҳалла аҳли Аброр аканинг дарвозаси таги бир олам қип-қизил чиннигулга тўлгани-ю, кетидан келиннинг аразлаб кетганидан хабар топди. Маҳалла қайноналари шу муносабат билан ўзларининг келин ушлаш борасидаги тажрибалари ва қарашлари билан ўзаро ўртоқлашган ҳолда Мухтабархоннинг бу масалада йўл қўйган бўлиши эҳтимол тутилган хатоларини таҳлил эта бошлишди.

Бутун маҳалла қайнаб тошган бир паллада шунчалик муҳокамага сабаб бўлган ҳовлига орқама-орқа тушган бошқа бир уйда, ток сўриси остидаги ёғоч катда озғин бир йигит ухлаб ётарди.

– Тўлаган, ҳей, тур, кун ёйилиб кетди-ю, – онаси, қотмагина жонсарак аёл арқондаги кирларни йиғаркан, неchanчи мартадир ўғлини уйғотишга уринарди.

– Ойи, кечаси минам ишладим-у... – йигит уйқу аралаш норозиланди.

– Вой, ишламий қол, парникда кечаси қанақа иш бўлади?

– Гул жўнатдик амаким минам...

– Э... – она “шунақами”, деган каби жим бўлди.

Сал ўтмай, уй ичидан кўчалик кўйлагини кийиб чиқди.

– Ман кетдим, – деди. – Ошхонада овқатинг турибти. Ерсан.

Йигит “ҳм” деган овоз чиқариб, жим бўлди. Аммо кўп ухлай олмади. Қаддини кўтарди-да, катда оёғини осилтириб ўтириб олди. Бир нималарни узоқ ўйлади. Охири туриб, ҳовли ўртасидаги кранни очиб, юзини ювди-да, сўрига тирмашди. Юқорига чиқиб, бошини чумак ура бошлаган чиллаки орасидан чиқариб, қўшини ҳовлига назар ташлади.

Ҳовли юзида кутгани қўринмаганидан, Тўлаган сўри поясига ўрнашиб ўтириб олди-да, кутишга аҳд қилди.

Бир вақт саҳнга қўшни хотин – Мухтабархон чиқиб келди. Бечора аёлнинг қўзлари йифидан қизарип шишган, бурнини дам-бадам тортиб қўярди.

Сал ўтмай, айвон эшиги очилиб, Аброр аканинг баҳайбат гавдаси қўринди.

– Арт қўзингни, – буюрди у гулдираган овозда. – Кўйнагимми дазмолла, қуданикига бориб келаман.

Мухтабархон изиллаб йиғлади:

– Ану аҳмоқни жўнатинг, қилгилигини қилиб, думалаб ётибди, жинни...

– Оғзидан анқиб ётган қўланса минам жўнатаманми? Бор, дедим!

Аёл ҳиқиллай-ҳиқиллай ичкарига кириб кетди.

“Нима бўлди? – ўйлади Тўлаган. – Шуҳрат хотини минам уришиб қоптими? Вой жинни-ей, келин минам у уришаркан-де, амаким яраштиарканми?”

Яна бирпас кутди. Лекин ҳовлига бошқа ҳеч ким чиқмади. Охири ҳафсаласи пир бўлиб, пастга тушди. Ошхона ёнига тупроқ уйиб қўйилган эди. Саҳнда кулча бўлиб ётган резина шлангнинг бир учини кранга улади-да, иккинчи учини уюм ёнига судраб келтирди. Уюмнинг бир чеккасини кетмон билан ағдариб, “ҳовузча” ясади-да, ўртасига шлангни ташлаб, сувни очиб юборди. Кейин шошиб ошхонага кириб кетди.

Тупроққа сув сингиб, лой бўларлик ҳолга келгунча овқатини еб олмоқчи эди...

Шу пайт қўшни ҳовлидан яна ҳокимона овоз эши-тилди:

– Онаси, Санобар қани, кўчани тозалавосин, жа... гап бўп кетдик!

Тўлаган энди кўчага югурди.

Орқа кўчага етиб борганда, Санобар чўнқайганча чиннигулларни битталаб териб, дарвоза ёнига ёйган катта дастурхонга олиб бориб тўкарди. Йигит ўзини кўчанинг нариги юзидағи бақатерак панасига олди. Тўлаганнинг назарида қиз эгнидаги қирмизи кўйлағи билан гуллар орасидаги гулғунчага айланиб қолди. Айниқса, гулларни териб олиш учун чўнқайган пайти этаклари ёзилиб, ерга тегарди-да, қизнинг нозик қадди атрофида гир айланиб, карнайгулнинг парпирақлари мисол ҳилпираб кетарди. Ўрнидан турганда, қучоғини тўлдирган чиннигуллар тирсаклари устидан ҳолсизгина бош эгиб тушарди.

Бир вақт дарвоза очилиб, отаси кўринди. Қизининг ишини кўриб, қовоғи уйилди.

– Қоп опчиқсанг бўмийдими? – дея норози тўнғиллади. – Дастанонни ерга ёйганини буни!

– Гул-ку, ада, – бўшашиб эътиroz қилди Санобар. – Увол бўлади.

– Э!..

Ота ўзича бир нималар дея тўнғиллаб қўйди-да, гулдан бўшаган ерларни мўлжаллаб қадам босганча ўйидан узоқлашди.

Тўлаган шунигина кутиб турганди, секингина хуштак чалди. Санобар ялт этиб қаради. Бақатерак панасидан бош чиқарган йигитни кўриб, олмадек қизарди. Тўлаган кўзини қисди-да, ишшайди. Қиз баралла “Жинни!” деди-ю, гул тўла дастурхонни кўтариб ҳов-

лисига кириб кетди. Йигит қулиб юборди. “Қани эндијам йўқ деб қўрсин-чи! Ман оғзимдан чиққан гапга жавоб берадиган одамман!”

...Она шу куни жуда ҳориди. Ҳамма ширинликхўр бўлиб қолганми, бетўхтов пирожний безади-я... Кун ботар пайти кўз олди жимирашиб, курсига ўтириб қолди. Кўз олдидан нуқул қип-қизил гулчалар ўтаверди. Бу унинг пирожнийлар устига уйган ясама, шакар сепилгандар гулларимиди ёки қўшниси Мухтабархоннинг эшиги тагида сочилиб ётган алвон чиннигулларми, ажратолмай қолди.

“Товба, – деди ўзича. – Одамлайам эринмаган. Шунча гулни сотовлиб опкепти-я! Шуҳратни ишидир... Одам яхши кўрса, пулниям аямасакан-де? Шунча бекорчи пули бўса, манга бермийдими? Тўлаганим йигирма бешга кирди, ҳали юрак ютиб бир ерга боролмадим. Тайёргарлигим йўқ... Бирорни уйига борсам, нима дийман? Шуни ўйлийман-де...”

– Чарчабсиз-а, Муқаддам опа, уйизга борвулинг, бу ёғи энди тугаб қолди, – ачинган бўлди цехнинг онабошиси Шарифа.

– Йўғ-е, тугатиб қўярман...

– Борвулинг, қизла тугатиб қўйишади.

Шарифа жавобни кутмай чақирди:

– Қизла-ю! Келақолийла!

Она ихраганча ўрнидан турди...

Уйи ёнида қайнисининг оппоқ “Ласетти”сини кўриб, шошиб қолди. Қайниси Тўлаганга берадиган иш ҳақидан ташқари, икки ҳафтада бир марта гўштёғ ташлаб кетарди. Лекин одатдаги бу бозорликнинг келишига яна тўрт кун бор эди. “Тинчликми?”

Она пилдираганча ҳовлига кирди.

– Ҳе, сандақа бойваччани... – дерди амаки. – Акамни хурмати бор-де! Бўмаса ўзим билардим!

– Тинчликми, Воҳиджон? Бу қулоқсиз қурмагур бир бало қип қўйдими?

Айвон олдида басавлат бир йигит икки қўлини шими чўнтакларига солиб туар, Тўлаган эса эгик бошини қўллари орасига олганча зинада ўтиради.

– Ассаломалейкум, кенайи... – деди йигит бир қўли чўнтағида, иккинчисини кўксига босиб. Кейин Тўлаганга ўгирилди: – Тур ўрнингдан, зина зах, шомоллаб қомагин тағин! Эртага ишга чиқасан-а?! Назарбекда-ги парникка борасан.

Тўлаган бош силкиди. Воҳиджон дарвозага қараб кетди.

– Вой, товба, бир гап бўғанми? Мандан нега гап бекитасила? – она жонсаракланиб, йигитнинг йўлини тўсади. – Манга қаренг, Воҳиджон, агар акейиззи ҳурматини қисайиз, манбу қулоқсиззи нима иш қиганини этасс. Иннайкейин, рўпарамда қўлиззি чўнтағизга солиб турмийсиз! Мундоқ... уйга кириб, бор гаплани одамга ўхшаб тушунтирас...

Воҳиджон чуқур уф тортди.

– Кенайи... Одамга ўхшаб гапиришши манам ҳоҳлийман... Манбу... қулоқсиз... жаҳлимми ушлаёлмий қомий тағин деп... қўлимми чўнтақка соп турибман... Қанча зарар қўрганимми гапирмийман, майли, бизнесда бундан баттариям бўп туради, лекин шерикларимми олдида уятга қоганим ёмон бўлди-де! Дардини гапирса, давосини топмийманми? Гапирмийди-де бу!

Шу пайт Тўлаган сапчиб ўрнидан турди.

– Бўйнимга олдиму! Ман қилдим, дедиму! Хўп десайиз, ман розиман, ойлигимдан босиб опқовуринг, дедиму!

– Нага қилдинг, дедим! Шу саволга жавоб бер, бойвачча! Сан қиганингни билдим, нага қилдинг? Сабабини билий, дардинг бўса, гапир, давосини топий! Бўмаса, яна иложсиз қоганда, тағин шу ишши қиласан-де!

– Ман иложсизликдан қимадим! Ёмон йўлга юрмаганман! Пақат... керей бўлди, олдим. Нагалигини гапирмийман! Тамом!

Она ўзини тутолмай қолди. Пиқиллаб йиғлаб юборди.

– Қайсар бўмий кет... – деди ҳиқиллаб.

Воҳиджон кеннойисининг кўз ёшини кўриб чи долмади. Елкасидан тутиб, ҳовлидаги катга ўтқизди.

– Сув обке онангга, – деб буюрди жиянига.

Аёл ҳамон елкалари титраб йиғлар эди.

Ўғли келтирган чинни пиёладаги совуқ сувни ютоқиб-ютоқиб ичиб олгач, инқиллаганча ўрнидан турди.

– Йў, кенайи, ўтируринг, ман жа... воҳима қивордим... – дея Воҳиджон кеннойисини қайтадан катга ўтқизди. – Ўзимам ғалатиман-де... Ҳе, йигитчилик, бир эркалик қипти манга, шунгаям ота гўри қозихонами... Бу болаем қизиқ-де... Худди акамга ўхшийди! Акам гапирмийман, деса, тамом, гапирмасийди! Шунақасиям бўладими, товба?! Мана, мани қизларим, биттасиям манга ўхшамийди, ҳаммаси овсиниззи ксеракўпияси!

Аёл зўриқиб илжайди:

– Олма дараҳидан узоқقا тушармиди, ўргилий, укам? Сиззи қизлариз яхши, овсинимга ўхшаб, мўмин-қобилгина... Шу қайсар тушмагур ёмонам чарчаторди-де мани! Адасини худди ўзи! Акейиз шунақа, қорани оқ дегиси кеса, шуни оқ деб турволарди. Охири, ялиниб-ёлвориб, майли, адаси, бу қорамас, оқмас, иккаласини ўртаси – кулранг, деб келишардик.

Воҳиджон кулиб юборди.

– Сизга гап йўқ, кенайи, мунақсанги ўхшатишлани қаттан топасиз-а?

Шу пайт қўшни ҳовлидан тарақа-туруқ товушлар эшитилди, кетидан жаранглаб ойна синди. Охирида

эркак кишининг: “Ҳе, с-с-сандақа қуёв тўрани!” – деган овози янгради.

– Кўшнимиззи келини кетиб қопти, – изоҳ берди аёл қайнисига. – Тузук жойлани қизи эди, Шуҳрат яхши кўриб уйланувди. Билмийман, нима бўлди...

Воҳиджон уҳ тортди. “Чатоқ бўпти,” – деб қўйди. Кейин бошини чайқай-чайқай чиқиб кетди.

Аёлни шу топда қўшнининг ғами кўп-да ўйлантиrmасди, унинг ўз дарди ўзига етарлик эди. Аввало манави қулоқсиз нима иш қилганини билиш керак эди. Бунинг учун Муқаддамхон овсинига мурожаат қилишга аҳд қилди. Ҳар ҳолда овсини бирон нимани кўргани ёки эшитгани аниқ. Қўнғироқ қилсамикин? Лекин қўл телефонини олган чоқда фикридан қайтди. Яхиси, ўзи бориб келади. Ҳасанбой яқин жоймас, аммо ҳар ҳолда йўли Тўйтепачалик келмайди, қош қорайгунча улгуради.

Аммо аёл кўча бошига етишга ҳам улгурмади. Рўпарасидан ҳарсиллаб-гурсиллаб келаётган қайнонасини кўрди.

– Вой, товба, – шивирлади аёл. – Тинчлиймикин? Нага ўzlари кевоттила? Доим мошинада обюриладигон одам...

– Қаққа кетвосс, келинпошша?

Қайнонаси одатда айб иш қилган келинларига шунаقا, “келинпошша” деб истеҳзо қиларди. “Оббо, бу қулоқсиззи иши ойимгаям етиб борибди-де, – ўйлади аёл. – Ойим биладила, Воҳиджон биладила, қулоқсиз курмагур билади, битта ман билмийман!”

– Ҳасанбойга, Воҳиджонникига кетвотувдим, – овози титраб чиқди аёлнинг.

– Керей бўса, Воҳидни ўзи келади.

– Воҳиджон ҳали келувдила...

– А? Келдими? Нима девотти?

- Ҳеч нарса демадила... Шунга... Сожидахонга учраб кесамми, девдим...

Қайнона “ҳм...” деди-ю, тўсатдан келинига: “Қани, олдимга тушинг! – деб буюрди. – Яқинда сизам қайнана бўласс. Баъзи нарсалани кўриб қўйинг. Керей бўлади”.

...Улар кирганда ҳовли юзасида Мухтабархон йиғлаб ўтирас, Санобар эса қўлида супурги, ерни ойна синиқларидан тозалаш билан овора эди.

Мухтабархон кутилмаган меҳмонларни кўриб шошиб қолди. Кўзёшларини кафтига артиб, ўрнидан сакраб турди, илжайишга ҳаракат қилди, аммо табасуми ўхшалмади, йиғидан шишган юзи аянчли қийшайди, холос.

- Уйга юрийла, – шошилиб манзират қилди у.

- Йўқ, – гапни кесди кампир. – Шўтта, ҳовлида ўтирамиз.

- Вай, қандо бўларкин...

- Яхши бўлади. Ҳали уйизга кирадиган, дастахониззи томоша қиладиган пайтимизам келади. Ҳозирча шошмий туринг.

Санобар юргилаганча уйдан духоба кўрпача олиб чиқиб, сўрига солди.

Мухтабархон маҳалладошларини сўрига чорлаб, ўзи айвонга қараб бурилди: “Ман ҳозир...”

Кампир уни тўхтатди.

- Дастахонни қизийиз солади, энди кичкина боламас. Сиз мана мундо-о-қ ўтириング. Ўғлиззиям чақиринг.

Муқаддамхон қизаринқираб дастурхон солган, патнисга тўртта обинон, тақсимчаларда мева-чеваларни чиройли қилиб териб кўтариб келган Санобарни кўриб, ичидан бир тўлиқди: “Мунчаям яхши қиз-а, қўлимми калталиги курсин, эшиқдан бирров бош суқиб, шу ёқимтойгинани ўғлимга сўромийман-а... Мунақсанги ҳурматли оила унча-мунча жойга қиз бермийди-де...”

Хаёлга толиб қолган онани қайнонасининг овози чўчитиб юборди:

– Ман Оққўрғонни қайвонисиман, шунаقا бўғандан кейин келин дардини манга гапирмий, карнайчи-га гапирадими?

Шуҳрат хўрсиниб:

– Ўша шоир шунаقا, йўлларингга гул тўкаман, деб шеър ёзганакан-де унга атаб... – деди. – Малоҳат ўзи манга мақтанувди... Кейин ман шоирри гуллариям гул бўптими, шоирри гули қофозда, маники ростакам бўлади, деганман.

– Хўп, ростакам гул тўқдингми йўлига?

– Йў-ў-ў... Шундоғам рози бўлди-ю...

– Сан аҳмоқ болайкансан, билсам, сани маҳалламга куёв қилдирмасидим. Аввало сўз берма, сўз бергандан кейин бажар, бажариш қўлиндан кемасаканми, бошқа одам шунаقا иш қиса, масалани тегига етмасдан тўполон кўтарма, хўпми?

Шуҳрат яна чуқур хўрсинди.

– Ман “душман тараф” минам келишиб қўйдим, – дея том устига том ёпа кетди кампир. – Малоҳатти қайтгиси бор, пақат... сан бориб, узр-кечиримни гапириб, опкеласан.

Кейин жавобни кутмасдан қўлларини фотиҳага очди:

– Омин, шу хонадонга тинчлик-тотувлик берсин, мана шу аҳмоққина қўшгани минам қўша қарисин, – Мухтабархонга ўгирилиб, қўшимча қилди: – Сиззи писмиққина қизизгаям яхши жойладан ато қисин!

“Писмиққина” деган сўзни эшитиб, Мухтабархон бир сесканиб тушди. Аммо қайвонига қарши бир сўз дейлмади.

...Кўчага чиққач, кампир бақатерак панасидаги ўриндиққа нафас ростлагани ўтириди. Хотиржамлик билан чўнтагидан шапалоқдек келадиган қўл телефонини чиқарди. Иккинчи чўнтагидан эса ингичка

ёндафттар, кўзойнак олди. Кўзойнагини бурни устига қўндириб, ёндафттарчани очди-да, керакли ёзувни топиб, телефондан рақам терди.

– Алё, Воҳид, – деди ҳокимона. – Валайкум ассалом. Ҳамма ишингни ташаб, тез Оққўрғонга ке, гапим бор!

...Воҳид келганда, онаси айвонда орқа ўгириб ўти-
ради. Йигит остоңада тўхтаб, салом берди. Кампир
инدامади. Воҳид ҳайрон бўлиб кеннойисига қаради.
Аёлнинг ҳайрати қайнисиникидан кам эмас эди, “бил-
мадим”, дегандек елка қисди.

– Ассаломалайкум, – деди йигит яна. – Она, мандан
бирон айб ўтдими?

Кампир яна индамади.

– Она...

– Она дема...

– Онажон... айбим нима?

– Сан гердайиб кетибсан! Етим болани хапа қип-
сан! Гулларинги кесса, нима бўпти?

– Ҳеч нарса бўмийди, она... Ман пақат, санга нага
керей бўлди, сабабини гапирсен, бир йўлини топаман,
дардинг бўса, гапир, давосини қиласман, дедим. Леки-
гин у гапирмади-де!

– Гапирмийди-де! Олма дарахтини тегига олма ту-
шади, нок тушмийди! Наварамми дардини ман гапи-
раман, давосини сан қиласан!

– Хўп, хўп бўлади, она!

– Агар мундан бўёғигаям гулларимдан айрилмий,
дейдиган бўсен, Тўлаганни тўйини қибер!

– Гап йўқ! Қиз топиила, бўлди!

– Ман қиз топиб қўйдим. Ойдеккина, писмиққи-
на... Эртага бориб, оқ ўратиб келаман.

– Вой ман ўлигина қўя қоли-и-ий... – Шу пайтгача
жим ўтирган Муқаддамхон тizzасига шапатилай кет-
ди. – Бу қурибгина кетмагури шунча ғалвани қилиб,
гапирмий ўтирганини...

– Тўлаган гапирмийди! Уни гапиртирмасдан ўзиз билишиз керей, келинпошша! Э, сиздака онани мушук есин!

Кеча оқшом меҳмон бўлиб келган аммам саҳарлабдан туриб олиб, онам билан чуғур-чуғур қилиб ўтиради, наҳорги ошдан қайтган отамни кўрибоқ ўрнидан сакраб турди. Онам чой дамлагани ошхонага кетаркан, отам сўрига чиқиб, ёстиққа суюнди.

– Ош зўр бўпти-де, лекин... – деди дўпписини бошидан олиб, кўрпачага ташларкан. – Воҳит акани воҳти йўғакан, Шивлидан кеган ошпаз дамлапти. Атейлаб бориб, ошпаззи кўриб, раҳмат деп келдим. Ёш бола, борса э-э-энди йигирмага борган. Яхши устоз кўрганга ўхшийсан, раҳмат, десам, кулип: “Ман Тошпўлат ошпаззи шогирди бўган Мансур ошпаззи шогирдиман”, деди... Ана... Бу бола адамми шогирдини шогирдийкан!

– Ошпаз бола Мухтабархонни келинини тоғасини ўғлийкан. Кеча хотинла шунаقا дейишли, – бижирлай кетди аммам. – Мухтабархонни қизига кеган сарпалани кўргани чиқувдик. Хотинла Муқаддамхонни қўли калта, дейишарди-ю... Ва-ай... энди камбағалликидан кеган сарпалани чиройлилигини кўрсейиз! Вай-вуй... Ҳаммасини кайвони қайнана уюштирган шакилли... Ишқилиб, хотинла...

– Э, ўша хотинлани... – отам жаҳл билан ёстиқни нари сурди. – Чойимми ичгани қўяссанми, йўми? Ўйингга қачон кетасан?

ҚАНДИЛ

Менинг энг... энг... энг яхши кўрган Зоир амаким уйланди! Келин атлас кўйлак кийиб, бошига каттакон оқ рўмолни ташлаб ҳаммага салом қилгани чиқди.

Маҳалламиздаги Зайнаб опоқи “Келин сало-о-ом!” – деган пайти келин эгилиб турди, қариндошларимиз совғалар беришди.

Дадам эса ичкари ҳовлимиздан каттакон картон қути кўтариб чиқиб, келиннинг оёғи тагига қўйди. Ичидаги нима экан? “Бу чироқ”, – деди ойим менга.

Мен дарров бувимнинг уйидаги чироқларни эсладим. Худди нокка ўхшаб кетадиган, дадам негадир ильичники, дейдиган, кичкина, ёрқин, арzon чироқлар. Агар қутидаги ҳам чироқ бўлса, унинг катталиги қанақа экан?

...Индени куни чойимни ичар-ичмас янги кеннойимни кўргани югурдим. Бўлмаса-чи, келин жуда чиройли экан, сочи кўйлагининг нақ этагига тушади, қўллари оппоқ, кўзлари қоп-қора, киприкларини пирпиратиб, кулиб туради. Зоир амаким шунаقا яхши қизга уйланибди!

Мен киргандга кеннойим ясатилган хонанинг ўртасида ўтириб, картон қутини очар эди. Тепасида амаким турибди. Кутининг белидаги ёзувини ҳижжалаб ўқий кетдим. Биринчи ҳарфини ҳали танимасдим. Да вомида эса “андил” деб ёзибди.

– Э, ҳалиям ҳарип танимийсанми? – амаким кулди.
– Бу – “қ” деган ҳарип, қани энди қўшиб ўқи!
– Қ... ан-н-ди-ил... Қандил!
– Лустра! Муни бу ёққа... – амаким қўли билан шифтга ишора қилди. – Осиб қўяди.

Кеннойим киприкларини пирпиратиб, амакимга қаради. Кейин худди мўъжизани кўргандек, бошини кўтариб, шифтга кўз ташлади-да, сўзларни чўзиб-чўзив:

– Шу ёққами? – деб сўради. Кейин қайрилиб, амакимга жилмайиб боқди.

Кеннойим шу туришида янаем чиройли бўлиб кетди. Эгнидаги ялтироқ кўйлаги ҳам, бошидаги дўп-

пичаси ҳам, қулоқларидағи тилла зираклари ҳам роса чиройли, ўзига хўбам ярашган эди.

Назаримда, амаким қандилни осиб, кеннойимни хурсанд қилмоқчи бўлди, шекилли. Чунки кеннойим:

– Қанаққилиб осади? – деб сўраган эди, Зоир амакимнинг тўсатдан кўзлари ёниб кетди.

– Лустрани қанақа осилишини кўрасанми? – деб сўраб қолди мендан.

Бўлмасам-чи! Бош силкидим.

– Бор, адангни энг котта болғасини опке, – деб буорди у. – Лустра осишаркан, дегин, ўзи топиб, оберади.

Кеннойим бирам қувноқ келинки! Қандил осилишини билиб, хурсанд бўлганидан қиқир-қиқир кулиб қолди. Ёки менинг дастёргимдан қувониб кетдими...

Хуллас, ичкари ҳовлига югуриб кирдим. Уйимиз Фургуртепанинг нақ тепа жойидан пастликка қараб эниб кетган кўчасида бўлганидан, ҳовлимизнинг бир қисми тепада, иккинчи қисми пастда, хуллас, табиий равишда иккига ажралиб қолган, ҳовлининг пастки қисмини эса бувим “ичкари ҳовли” деб атарди.

Дадам каталакдек устахонасининг ёнида чархини айлантириб, тешасининг дамини ўткирлаб ўтиради.

– Ада, – қичқирдим зинадан тушиб-тушмай. – Зоир амакимга тез болғайиззи бериб тураркансиз, лустра осарканла! Ану коттаконини бераркансиз!

Дадам бир зум чархини тўхтатиб, бошини кўтариб қаради. Гапимни эшитмади, шекилли.

– Зоир амаким кот-та болғайиззи сўравоттила!
Сиз берган лустрани осарканла!

– Нима? Лустрани котта болғада осарканми? – деб сўради гўё мен нотўғри гапиргандек. Жаҳлим чиқди.

– Амаким шунақа дедила! Коттакон болға керей, обке, лустра осаман, дедила!

– Бу устабузармон нима қимохчи? – дадам қизишиб, ўрнидан туриб кетди.

– Вай-й! Қизиқсиз-а! – деди устахона ёнидаги арқонга кир ёяётган ойим энсаси қотиб. – Керейдирки, сўраган! Бервулинг, нима, ейилиб қолармиди ўша болғайиз?

– Уйлани ўз қўлим минам ремонт қиганман, болға минам ҳаммаёни расво қилади-ю! – дадамнинг энди росмана жаҳли чиқди. – У коттакон болға дегани – бетонни тешадигон кувалда! Шуни сўраватти!

– Э, бўмаса, бориб ўзиз осиб берин! – ойим ҳам бир гапдан қолмайдиган хотин эди. – Эринмаган одамсиз! Зоир болғани бошқа нарсагаям ишлатар? Бу кичкина бола бўса, балки яхши тушунмагандир!

– Йў! Ман яхши тушундим! – дея қичқирдим. – Зоир амаким лустра осаман, дедила! Болға керей, дедила! Ко-о-оттакон болға!

Охири дадам устахонасидан амаким сўраган болғани топиб, олиб чиқди. Кейин менга бош-оёқ қаради-ю:

– Йў... Сан кўтаромийсан, – деди. – Оёғингга туширворсен, чатофинг чиқади. Ўзим обораман. Қани, кўрий-чи, нима иши боракан?

Қандил осилади-ю, мен томошадан қуруқ қоламанми? Дадамнинг ортидан югурдим.

Ташқари ҳовли кимсасиз, жимжит эди. Амакимнинг уйи тим-тирс ёпиқ, пардаларини ҳам тушириб қўйишибди.

Дадам саҳнга чиқибоқ: “Зоир!” – деб чақирди. Жавоб бўлмади. Мен югургилаб, айвоннинг эшигини итардим. Ичкаридан қулфлаб қўйилибди. Ҳайронликдан оғзимни очиб, дадамга қарадим. Дадам эса менга парво ҳам қилмади. Деразани тақиллатди.

– Хў, Зоир! – деди баралла. – Бу ёқقا чиқ, устабузармон! Шу коттакон болға минам қанаққилиб лустра осасан? Қани, бир кўрий-чи!

Ичкарида нимадир гурсиллади. Шу пайт эшик очилиб, сочи ҳурпайган Зоир амаким кўринди, довдираб илжайди:

– Шу... срочний керей бўп қоганига... Ҳозир ўзим чиқмоҳчи бўп турувдим болғага!

Орқада кеннойим кўринди. Бошидаги қийшайган дўппичасини тўғрилар экан:

– Вай, муллака, – деди киприкларини тез-тез пир-пиратиб. – Овора бўпсиз-де...

Хуллас, қандилни дадам осиб берди. Мен ҳам мурод-мақсадимга етиб, уни қанақа осишларини томоша қилдим. Лекин негадир болғани ишлатишмади. Мен бир-икки марта: “Ада, болғани қачон ишлатас?” – деб сўраб кўрдим. Дадам гапимга эътибор қилмади-ю, лекин амаким ўқрайиб қўйди.

* * *

– Вуй, қуриб кет, – кеннойим юзини тескари бурди. – Сан жа ёмон ёзувчи бўпсан. Уяting йўғакан!

– Йў, сиз ану жойини бошқаттан этиб берин, ойижон дўппиларини қанаққилиб тўғирлаб қўйдила?

– Йў, ану жойини, бор эди-ю... “Ман яхши тушундим, болға дедила!”

Кеннойимнинг иккала келини қотиб-қотиб кулар-кан, дарвоза тарақлаб ёпилди.

– Вай, додажон келдила, – келинлар баравар оёқقا қалқишиди.

Сўз якуни

Бу йилги саратон жуда оғир келди. Чилла тугагандан кейин ҳам жазира маъннинг кунча давом этди. Бунақасини қадрдан Ғурғуртепамизнинг энг кекса кишиси – Сижо бува ҳам эслолмади. “Бола пайтим ҳово роса-а-а... қизиганини биламан, лекигин чилла-

дан кейинам шунаقا исиганми, эсломийман", – деди.

Авжи шу кунларда маҳалламиизда катта воқеа бўлди: ўнтача кўчанинг номи ўзгарадиган бўлди. Оқкўрғон ариғининг пасти билан тушиб кетадиган кўча улуғ бир бастакорнинг шарафига Мусоргский деб аталган бўлиб, бир умр шимолда яшаб ўтган бу санъаткорнинг маҳалламииз ҳаётидаги ўрни нимадан иборат бўлганини ҳеч ким билолмасди. Шунинг учун бўлса керак, кўчанинг номига тиллари келишмаганидан, маҳалламиздагилар бу муҳтарам бастакорнинг исм-шарифини жуда ғалати талаффуз қилишарди-ю, меҳмонлардан уялиб кетарди киши. Қолаверса, маҳаллада Магнитогорск деган кўчалардан нақ еттитаси бўлиб, улар биринчи Магнитогорск, иккинчи Магнитогорск ва ҳоказо, ва ҳоказо рақамланган, бундан ташқари, озарбайжон, бошқирд, татар деган кўчалар ҳам бор эди. Энди эса буларнинг ўрнига Янги тарнов деган кўчадан нақ еттитаси (биринчи Янги тарнов, иккинчи Янги тарнов ва ҳоказо, ва ҳоказо) ва биттагина Мудофаачилар деган кўчалар пайдо бўлди.

Янгилик яхши-да! Аммо маҳалламииз аҳли ҳали-ҳамон ўша, эски, қадимги одамлар. Менимча, шуниси яхшироқ.

Тамом

УЧИНЧИ БАШОРАТ

Мовароуннахрда саратон иссиқлари авжга чиққан пайт. Саҳарги салқинлик кўп ўтмай кундузги жазира ма билан алмашади. Куёш гўё одамзод, наботот ва ҳайвонот оламини ўз қудратига яна бир бор ишонтиришга қасд қилгандай... Бутун борлиқ, ҳатто шамол ҳам нафас олмай қотган каби.

Уч ошёналик муazzзам расадхона ичи салқин. Яқинда қурилиши яқунлангани боис бино ичидаганч ва бўёқ ҳиди анқийди. Хоналарнинг аксарияти ҳали бўш, оёқ босган сари қадамлар акс-садо беради.

Расадхонанинг зиналаридан оппоқ ипак яктак устидан кенг, енгил шоҳи чакмон кийган ўттиз ёшлардаги йигит юқорилайди. Йигитнинг эгнидаги кийимларнинг ёқа ўйиқлари ҳамда елкаларида нозик чокли безаклар кўринади. Бошига ўралган ихчам оқ дасторида ёнғоқ катталигидаги шаффоф тош ярқирайди. Бу йигит Эрон ва Турон хоқони, темурийзода Шоҳруҳ Мирzonинг тўнғич ўғли ҳамда унинг ишончли ноиби, Мовароуннахр ва Туркистон ҳукмдори Мирзо Улуғбек эди. Улуғбекнинг ортидан шогирди Али Кушчи эргашади.

– Алоуддин Али, – деди Мирзо Улуғбек, – эртан оқшомга мавлоно Муҳаммад Ардистонийни расадхонага таклиф этдим. Биласен, бир мунча вақт аввал у киши билан бир важдан баҳс этиб қолган эдик.

Али Кушчи устозининг кейинги сўзларини кутиб сукут сақлади. Чунки Мирзо Улуғбек бирон баҳста-

лаб мавзу ҳақида сўз кетганда ўз-ўзи билан мушоҳада юритаётган каби ярим овозда сўзлар, Али Қушчи унинг шу одатини яхши кўярарди.

– Мавлоно Ардистоний рамл илмида соҳиби камол эрурлар, – дея сўзини давом эттири Улуғбек, – аммо мен у киши тақдири азал борасида бироз муболаға қилурлар, деб ўйламоқдамен. Оллоҳ ўз бандалири руҳига жисм бағишилар экан, дорилғанодаги умри учун ўлчов ҳамда вазифа ҳам ато этгай. Бу барҳақ рост. Аммо ҳамма ҳодисот фақат тақдири азалга битилган бўлса, инсонга нечун заковат ва идрок, шуур ва иқтидор берилмиш? Оллоҳ инсонни шу қадар суйиб, унга иқтидор ва истеъдод берар экан, уни тақдир олдида ожиз этиб қўймоғи мумкин эмас! Мен инсон дунёга бежиз келмас ва беиз кетмас деб билурмен.

Улуғбек учинчи ошёнага олиб чикувчи пиллапоя адоғида тўхтаб, ортидан келаётган шогирдига қаради:

– Нечун индамайсен, Алоуддин Али?

Али Қушчи кулимсиради:

– Устод, ўзингиз айтар эдингизким, фаразнинг муболаға эмаслигини исботламоқ учун синов лозимдур. Аммо мавлононинг сўзлари борасида илми синов иложсиз. Шундоқ экан...

Улуғбек қўлини кўтариб, шогирдининг кифтига қоқди:

– Балли, Алоуддин!

Кейин қулиб юборди:

– Илми синов иложсиз, дегин? Аммо иложсиз нимарсанинг ўзи йўқдур!

Али Қушчи устози нима сабабдан кулганини тушуна олмади. Улуғбек эса миясига келган фикрдан лаззатланган мисол яна бир бор кулди. Сўнг ёш мударрисни ортидан келишга ишора қилиб, ичкари кирди.

– Ўн кунлардан кейин асад кирур, – деди Улуғбек. – Бу йил Дубби Акбар асад пайтида эгилма авж

бўйлаб кўринур. Янги устурлобнинг таглиги кечикиб қолмайдиму?

– Устод, фақир уста Муҳаммадқули ила сўзлашдум. Тагликни уч кунлар ичида битирамен, деб айтди. Нуқсон чиқмаслиги учун унинг кўзи олдида паркор билан қайта бошдан ҳисоблатиб кўрсатдум.

– Балли!

Улуғбек йўлак бўйлаб юраркан, расадхона деворларига юзинчи мартадир, суқланиб қаради. Учинчи ошёнанинг қоқ ўртасида, супача устида бўз матога авайлаб ўралган нимадир кўринди. Супача пастиди икки ёш йигит – дурадгорлар қўлларида қирраси ярқираган теша, сувоқчиларнинг кичкина ҳавозасини пастга ётқизганча бўлаклашар эди. Улуғбек ортига қайтди. Али Кушчи яна унга эргашди.

Ховли саҳнида кун қизиғига қарамай одам кўп эди. Саҳн ўртасига улкан супа ясалган, атрофларда яна ўнларча кичик супачалар кўзга ташланар эди. Мешкобчилар супалар устига қўлоблатиб сув сепадилар, бозордан олиб келинган мардикор хизматчилар расадхона дарвозасидан бўйралар, гиламлар кўтариб кира дилар. Саҳн юзасида уч қават белбоғини айлантириб боғлаган девқомат ишбоши хизматлар тўғри адо этилишини назорат қилиб боради. Ора-сира унинг қисқа буйруқлари эшитилади. Ховлига олиб чиқувчи эшик ёнида турган посбонлар чиқиб келаётган ҳукмдорни кўришлари билан ғимирлаб қолишли. Ясовуллардан бири ҳукмдорнинг отини етаклаб келди. Иккинчиси уни отга миндиришга чоғланди. Ховлидаги хизматчилар таъзимга эгилишли. Улуғбек эса одамларнинг шошиб қолганига беътибор, ясовул ёрдамида отга минди. Ва посбонлар қуршовида дарвозадан чиқди.

Бино ҳовлисидан ташқаридағи кенг майдонга ўчоқлар қазилиб, дошқозонлар ўрнатилган, бўз ма-

тодан тортилган улкан соябон тагига, текис ерга ташланган бўйралар устига кигизлар тўшалган, уларда элликка яқин киши ўтириб сабзи тўғрап эди. Катта давра ўртасидаги дастурхонда сап-сариқ сабзи уюми. Дошқозонлардан нарида енгларини шимариб олган чайир қассоб ўрик дараҳтига осилган танаҷанинг тे-рисини шилиб тушириш билан овора. Мирзо Улуғбек расадхона қурилиб битгани шарафига элга ош беришга қарор қилган, расадхона ҳовлиси, кенг майдондаги ҳаракат – ҳаммаси эртаси наҳорга ёзиладиган дастурхон учун эди.

Али Кушчи отлиқлар узоқлаб кетгунча қараб турди. Кейин Муҳаммад Ардистоний билан бўлажак сухбат, балки мунозарани ўйлаганча ичкари кирди.

* * *

Мирзо Улуғбек халойиқни одатдаги қилар ишидан чалғитмаслик мақсадида доимо Самарқанд қўчаларидан иложи борича тезроқ ва дабдабасиз ўтиб кетишга ҳаракат қиларди. Чунки баъзи аъёнлар хукмдорнинг ҳар бир кўчага чиқишини асъасага айлантириш, шу баҳона ўзларининг Мирзо Улуғбек яқинида кетаётгандарини оломонга кўрсатиб олишга интилишар, бу эса Улуғбекнинг ғашини келтиrap эди. Шу сабаб бугун ҳам у шитоб юриб Кўксаройга келди. Саломхонага кирмай, бинонинг ўнг томонидаги салқин хоналардан бирига ўтди. Бу хона деворларидаги чизма нақшларнинг ҳаворанг жимжималари орасида майда оқ ғунчалар тасвири қўринади, шифтда осмон ва беғубор булутлар ранги уйғун, даричаларда оппоқ дарпардалар, ёзнинг жазирама кунларида бу хонада гўё салқин ҳаво ҳукмрондай туюлади. Мирзо Улуғбек кўпинча шу

ерда ором олишни, янги рисолалари ҳақида мушоҳада юритишни, чигал масалалар устида бош қотиришни яхши кўрарди. Шу сабаб сарой аъёнлари бу хонани ўзаро “гўшаи мушоҳада” деб аташар эди.

Улуғбек эгнидаги чакмонини ечиб эшик ёнидаги деворга ўрнатилган нақшдор қозиққа илди. Кейин дарича рўбарўсига ташланган ипак кўрпачага чўзилди. Ва беихтиёр Али Кушчининг сўзларини ўйлаб кетди. “Мавлоно Ардистонийнинг фаразлари борасида илми синов иложсиздур...”

Дарҳақиқат, заминдаги ҳаёт силсиласи юлдузларга боғлиқ. Яратганинг амри бешак-шубҳадур. Аммо инсон ҳаётида не мазмун мавжуд? Тақдири азал борми? Бор бўлса, у ҳолда инсоннинг саъии-ҳаракатлари боиси не? Наҳот одам бир умр яшаб, неларгадур интилиб, курашиб, меҳнат қилиб, жанг қилиб топгани фақат тақдири азал бўлса?

Агар мавлоно Ардистоний билан бўлган ўша сухбат-у, ўзининг ҳазил илтимоси бўлмаса, Улуғбек балки бу ҳақда ўйламаган ҳам бўларди. Мана, орадан беш йил ўтибди, у эса ҳамон ўша воқеаларни унутолмайди.

* * *

Ўшанда илк баҳор, қиши изғириллари илиқ шабадаларга ўрин бера бошлаган пайт эди. Мадрасанинг иссиққина китобхонасидаги сабоқ ниҳоясига етган, одатда ҳукмдор дарс ўтгандан кейин муллавачча ва мударрислар учун бериладиган зиёфат тугаган, Али Кушчи устози ва мавлоно Муҳаммад Ардистоний ўртасида бошланган сухбатга беихтиёр қулоқ солиб пастроқдаги кўрпача устида сукут сақлаб ўтирас, вақт-вақти билан содда нақшлар ила зийнатланган пиёлаларга кўзачадан илиққина олма шарбати қуйиб, сухбатдошларга узатар эди.

– Ҳазратим, башорат рост келувига бир неча сабаблар бўлур, – деярди мавлоно. – Бирламчи, инсон атрофидаги ҳаёт силсиласи ва муҳит башорат ўнгдан келмоғига шароит яратур. Иккиласми, ҳодисотлар уз-вийлиги борким, бу ҳам башоратни ўнг келтирур.

– Давом этинг, мавлоно, – жилмайди Мирзо Улуғбек. – Бунда башорат эгасининг иштироки бўлмасми?

Мавлоно илжайди:

– Иштироки бевосита ва... билвосита бўлур.

– Яъни?

– Яъни... инсоннинг ўзи юз беражак ҳодисотларга бевосита сабаб бўлур. Баъзан эса одам содир бўлажак воқиётни ўзи яратадур!

– Воажаб! – Улуғбек қўлидаги пиёлани қисимлаб ўйга толди. Кейин эса кулимсираб сўради:

– Мавлоно, меним учун фол очиб кўрмайсизми?

Ардистоний соқолини тутамлаб ўйга толди. Кейин ботинмайгина деди:

– Ҳукмдорлар ҳаётидан фол кўрмоқ салтанат тақдиридан башорат қилмоқ ила тенгдур, кўрагон.

– Йўқ, сиз меним салтанат ила боғланмаган ишларимдин фол кўрингиз!

Ардистоний кулиб қўйди. Кейин Али Қушчига қаради.

– Кўролмасман, бунда учинчи киши бор!

Улуғбек қўл силтади:

– Мавлоно, Алоуддин Али меним учун чет киши эмас! Айтаверингиз!

Ардистоний тасбеҳини қўлига олди. Шивирлаб дуо ўқиди ва киссасидан юпқа дафтар чиқарди.

Улуғбек юраги гурсиллаб, мавлононинг мош-гуруч соқолига, қовоқлари усти ва кўз тагини қоплаган майда ажинларга, пешонасининг ярмигача тушиб келган қаймоқранг дасторига, шивирлаётган қонсиз лабларига тикилди.

– Яқин қунларда кўрагон ҳаётида иккита нохушлик юз бергай, – деди ниҳоят мавлоно. – Кўз очиб кўрганидин айрилгай, севганидин ажралгай. Биринчи воқеа иккинчисига сабаб бўлиб, оқибатда кўрагон ёлғиз қоладур.

Улуғбек бу кутилмаган башоратдан гангиб қолди. Чунки у икки йил олдин ўлган ўғли Ибодулла Мирзо ўрнига ўғил туғилиши каби башоратни кутган, ҳатто мана шу каби сўзларни эшитса, мавлонога қандай тақдирлов бериш тўғрисида ўйлаб ўтирган эди.

Ардистоний Улуғбекнинг сукутидан хавотирга тушиб қолди.

– Магар кўрагон билвосита сабабкор бўлмасалар, балким, иккинчи башорат амалга ошмас! – деди секин.

– Аммо биринчиси бешак амалга ошадур.

– Шундоқ!

Ўртага сукут чўқди. Ниҳоят, Улуғбек:

– Майли, ўлмаган қул барини кўрадур, – деб шивирлади.

Шу куни Али Қушчи:

– Устод, мавлононинг сўзларидан бу қадар мутаассир бўлдингиз. Балким ушбу башоратлар тўғри чиқмас? – деди.

– Алоуддин Али, мен бунга ишонганим йўқ. Киши ўз кўнгли ила ажраша оладурми? Бу ишни осон деб биласенми? Йўқ! Иккинчи башорат рост келмоғи учун меним дилимни ларзага келтирувчи ва кўнглимни ажрашувга даъват этувчи бир куч лозим. Бундоқ куч мавжуд бўлишини ақлимга сиғдиролмасман! Ахир бу даъватга ким журъят эта олур?

Аммо ажаб, шундоқ куч бор экан!

* * *

Малика Ўги беги Хоним хасталаниб қолди. Сарой табиби айтган ташхис бир қарашда хавотирли эмас

эди. Малика баҳорнинг алдамчи қүёшига ишониб шамоллаган эди. Аммо хасталикнинг учинчи куни кутилмаганда уни иситма тутди. Тўртинчи куни эса кекса табиб ҳукмдор ҳузурида қалтираганча бош эгди:

– Маҳди улёнинг сиҳатлари хавотирлик, олампаноҳ. Пойитаҳтдаги маъруф табибларни чорлаб, машварат этиб кўрдук. Гумонимизча, Маҳди улёнинг дарди зотилжамдур.

– Тақсир, зотилжамнинг давоси мушкулми? – сўради Мирзо Улуғбек.

– Олампаноҳ, зотилжамни даволаб бўлур. Аммо фақирларингиз қўрқамизким, Маҳди улёнинг эски дарди – бод ўз ҳукмини ўтказмоқда...

Мирзо Улуғбек шу куни Ўги беги Хонимни кўргани ҳарамга кирди. Малика йигирма бир ёшга тўлган бўлса-да, ўз ёшидан каттароқ кўринарди. Ёш аёлнинг ранги хасталик боис синиққан, кўзлари остида кўкиш халтacha осилган, лаблари иситма зўридан порсиллаб ёрилган, иккала қоши ўртасида кўндаланг тушган иккита чуқур чизиқ кўринади, қорачиқларида ҳасрат ёнади, кўрпа устига беҳол ташланган қўлларида титроқ сезилади. Улуғбек беморни кўрибоқ юраги эзилиб кетди. Тўшак ёнига ўтириб, маликанинг кўм-кўк томирлар бўртган озғин билагига қўлини кўйди.

– Оллоҳ шифо берар, хоним, – деди, – табиблар дардингизга даво бор, демоқдалар.

Ўги беги Хоним ҳолсизгина жилмайди:

– Табиблар албатта, таскин берарлар...

– Нечун ундоқ дейсиз? Киши ҳамиша умид ила яшамоғи лозимдур. Бу хасталик бедаво эмасдур, хоним. Қизалоғимиз Ҳабиба Султонни ҳам ўйлангиз.

Аёл ич-ичидан тошиб келаётган хўрсиниқни босмоқчи бўлгандек қўлларини кўякраклари ўртасига босди. Кўзларида ёш ялтиллади. Кейин ҳукмдорнинг қўлларини ботинмайгина силади.

Мирзо Улуғбек шу куни маликанинг кўнглини ёзишга аҳд қилди: янги қурилаётган хонақоҳи ҳақида сўзлади, ўзи кўрган ва бошқалардан эшигтан қизиқ воқеаларни айтиб берди. Ўги беги Хоним жон қулоғи билан тинглади. Кечга яқин Улуғбек ўрнидан қўзғалди. Малика қўзларида табассум билан:

– Руҳимда ажиб енгиллик, – деди. – Сўзингиз рост, ҳазратим, меним дардимга даво бордур. Ҳабиба Султонни ҳам ўйламоғим даркор.

Аммо эртаси маликанинг аҳволи кескин ёмонлашди. Икки кундан кейин эса узилди.

...Қабрга тупроқ ташланаётган чоқ Улуғбек бирданига мавлоно Муҳаммад Ардистоний айтган башоратни эслади. “Ажаб, – ўйлади у. – Биринчи башорат рост келди. Аммо унинг ўнг келувига нелар сабаб бўлмиш? Муҳитми, ҳодисотлар узвийлигими ва ёхуд кишиларнинг бевосита ё билвосита иштирокими? Наҳот мавлоно ҳақ? Энди иккинчи башорат не бўлур?”

Беихтиёр юраги музлаб кетди. Ҳукмдорнинг ранги бўзариб кетганини кўрган амирлардан бири унинг қўлтиғидан олди.

* * *

Ўги беги Хоним Улуғбекнинг кўз очиб кўрган хотини эди. Бобоси соҳибқирон Амир Темур Шому Рум юришидан кейин Конигилда катта тўй бериб, набирадари Ийжал, Сайди Аҳмад, Пирмуҳаммад ва Бойқаро Мирзоларни уйлантириб, ўн бир ёшли Улуғбек ва Иброҳим Султонларни унаштирган эди. Шаҳзода етти ёшлардаги, олд тиши тушган, соч ўримлари диккайган, озғингина қизчани кўрганда кулиб юборай дегани эсида. Укаси Иброҳим Султон унинг енгидан тортқилагани ҳам кечагидек ёдида турибди.

– Келинчакларимиз хунук экан! – деганди у. – Қаранг, меникининг иккита тиши йўқ.

– Етти ёшда ўзимизнинг ҳам тишларимиз тушган эди-ку, ёдингда йўқми? – деди Улуғбек.

– Қизларнинг ҳам тиши тушадими? – дея астойдил ҳайрон бўлди Иброҳим.

Улуғбек ўзини тутолмай хохолаб юборди.

...Орадан олти йилга яқин фурсат ўтгандан кейин Улуғбек тўй-томуша билан Ўги Беги Хонимни никоҳига олди. Тўй оқшоми келинчакка аталган кўшкнинг мармар зиналаридан кўтарилад экан, бир вақтлар Конигилда Иброҳим Султон айтган сўзларни эслади: “Келинчакларимиз хунук экан. Тишлари ҳам йўқ...” Ва ўзича кулиб кўйди.

Кўшкнинг чоғроқ хонасида, оппоқ ипак парда панасида турган келинга яқинлашар экан, негадир юраги гурсиллай бошлади. Улуғбек ўтган йиллар ичида қаллиғи ўзгарганини ақлан тушунса-да, лекин унинг қандай қиз бўлиб етишганини тасаввур қила олмас, ёдида ҳамон ўша тиши кемшик, сочи диккайган, озингингина қизалоқ яшар эди.

Ёдида: келинчак юзидағи оппоқ ҳарир бурқаъни кўтарди. Улуғбек рўпарасида нозик қад, юмалоқ юзларида нафис қизиллик ўйнаган, бодомқовоқ, ёқимтой бир қизни кўрди. Келинчак күёвнинг довдираб қолганини кўриб билинар-билинмас жилмайди ва шу заҳотиёқ юзини четга бурди. Улуғбек бирданига келиннинг билагидан ушлади.

– Чеҳрангизни ўгирманг, – деди шошиб. – Фақирдан табассумингизни дариф тутманг!

Келинчак ийманиб бошини қуи солди ва эшитилар-эшитилмас:

– Нечун ўзингизни фақир дейсиз, ҳазратим? – дея шивирлади.

– Ахир сиздан биргина табассумни ҳам ўтиниб сўрасам, фақир бўлмай ким бўлурман?

Үги Беги ҳайрон бўлганидан қўзларини катта очиб қаради:

– Нечун сизга табассум бу қадар даркор бўлиб қолмиш?

Улуғбек даставал не деярини билмай қолди. Кейин бир хўрсинди-да:

– Мен... тишларингизни кўрмоқчиман, – деди.

Үги Беги бу ғалати истакни эшишиб хандон уриб кулди. Шунда қизнинг икки қатор садафдек оқ тишлари кўринди-ю, Улуғбек енгил тортди...

* * *

Үги Беги олти ёшида отадан етим қолганди. У Амир Темурнинг тўнғич ўғли Жаҳонгир Мирзонинг невараси бўлганиданми, соҳибқирон бу қизчани кичкина Муҳаммад Тарағай – Улуғбекка муносиб кўрган, севимли эвараси ва неварасини никоҳ иплари билан боғлаб, балки ёш кетган фарзанди Жаҳонгир Мирзо, ажал комига бевақт тортилган невараси Муҳаммад Султонлар сабабли дилига тушган жароҳатга малҳам босмоқчи, шу жажжигина етим қизалоқ балоғатга етганда ёт оиласа келин бўлса ўқсиб қолмасин дегандир? Ким билсин? Соҳибқироннинг дилидагини ёлғиз ўзи-ю, яратган билади...

Ҳар ҳолда Улуғбекнинг бошидан ўтган илк илиқ туйғулар мана шу аёл билан боғлиқ эди. Оталик туйғусини биринчи марта ҳадя қилган ҳам Ўги Беги эди. Мана энди қизчаси етим қолди...

Улуғбек таҳтда ўтирганча ғамли ўйларга берилди.

* * *

– Нечун ғамбодасиз, ҳазратим? – Оқ Султон Хон Оғо ҳукмдорнинг иккала кифтини нозик оппоқ қўллари билан силай бошлади.

Мирзо Улуғбек бошини кўтариб қаради. Малика эгнидаги оппоқ ипак кўйлак устидан кийган кумуш ранг зарбоф мунсаги, кумуш иплар билан зийнатланган дурраси, қулоқларида катта олмос кўзли балдоқлари билан гўё тун авжида нурларини ёйган тўлин ой каби эди.

– Нечун ғамнок бўлмай, гўзалим? – ҳукмдор хўрсинди. – Инсон умри гўёки япроққа қўнган шабнам эмиш. Ялт этармиш-у, ўчармиш.

– Шундоқ экан, ғам чекмоқдан не фойда? – малика ширин жилмайди. – Ёким Ўги беги сиз учун суюкли эдими?

– Хоним, ахир Ҳабиба Султон етим қолди!

– Ҳеч бокиси йўқ. Ўги Бегимнинг қизи Гавҳаршод-бегим ҳузурида. Онаси бор-йўғини сезмагай ҳам.

Мирзо Улуғбек хотинининг уятсизларча айтган сўзларида лол, жим бўлиб қолди. Оқ Султон Хон Оғо чиройли қайрилма қошларини чимириб юзини ноз ила четга бурди.

– Гўзалим, севгилим дейсиз-у, кундошим учун ғам чекасиз! – деди аразлаганнамо.

– Мен бир она бевақт кўз юмгани учун қайғурмоқдаман, бир гўдак етим қолгани учун ғам чекмоқдаман. Бунда кундошлиқ ҳақда не сўз бўлиши мумкин, хоним? – деди Мирзо Улуғбек бўғилиб.

– Мен эса маликангиз суймайдиган бир хотин учун ғам чекишингиздан норизо бўлмоқдамен, – Оқ Султон Хон Оғо “ажаб бўлди” дегандек терс бурилиб олди. Ва уни эркалаб қучишларини, ширин сўзлар айтишларини кутиб жим қолди. Чунки аввалги пайтлари икки ўртада бирон аразчилик бўлса, Оқ Султон терс бурилиб олар, Мирзо Улуғбек кула-кула бир-иккита ширин сўзларни айтар, малика бироз гина сақлаган бўлиб турарди-да, кейин кўнгли эриган каби жилмаяр ва ниҳоят, ярашиб олишарди. Лекин бу сафар ҳукмдорнинг

кўнглига гўзал маликанинг арази ҳам, карашмаси ҳам сиғмади. Малика эса бундан росмана аччиқланди.

Мирзо Улуғбек шу куни икки ўртада бўлган сўзларни эсласа ҳали-ҳамон юраги зириллайди. Оқ Султон Хон Оғо – Улуғбек севган Хон қизи кундоши ўлимидан шодлигини беҳаёларча изҳор этиб, ҳатто ҳукмдорга шу қадар кинояли сўзлар айтдики, Улуғбек чидай олмай қолди. Ўрнидан даст турди-да, эшикни тепиб чиқиб кетди.

Шу куни у ғазабини босиш учун Кўксарой ортида-ги боғ йўлкаларида узоқ тентиради.

...Мирзо Улуғбек Оқ Султон Хон Оғога бир кўришдаёқ мафтун бўлганди. Бу қиз сутга чайилгандек юзлари, кескин қайрилма қошлари, қоп-қора, қийғоч кўзлари, елкаларига шалола янглиғ тўқилган қуюқ қора соchlари билан эртакларда таърифланган париларни эслатарди. Оқ Султоннинг парилардан фақат биттагина фарқи бор эди. У ҳам бўлса, юрганида қадамидан гул унмас, сўзлаганда оғзидан гавҳар тўқилмас эди. Ва у Кўҳиқофдан келмаган, балки бир вақтлар соҳибқирон номигагина хон қилиб кўтарган мўғил Султон Маҳмудхоннинг қизи эди. Улуғбек шу қизга уйлангандан кейин “кўрагон” унвонига сазовор бўлган, сарой аҳли янги маликани ўзаро Хон қизи деб атай бошлаган эди. Оқ Султоннинг Ўги Бегини ёмон кўришга ҳам ҳеч бир асоси йўқ эди. Ахир Улуғбек унга уйлангандан кейин Ўги Бегини ойлар бўйи эсламаганди! Энди ўйлаб қараса, у сўнгги пайтлар ўз ишқидан кўзи қамашиб, бир мунглиғ аёлга ҳатто марҳамат ҳам кўрсатмаган экан! Ўги Беги – унинг кўз очиб кўргани ойлар бўйи ундан меҳр кутиб яшабдур, меҳрсизлиги учун иддао ҳам қилмабдур, Улуғбек эса оёғи остидаги хокисор севгини сезмай ўтибдур...

...Мирзо Улуғбек севимли хотини билан ортиқ

бирга қола олмаслигини ақлан идрок этса-да, унинг хаёлидан мавлоно Ардистоний айтган сўзлар кетмас эди: "...Магар кўрагон билвосита сабабкор бўлмасалар, балким, иккинчи башорат амалга ошмас..."

Мана, биринчи башорат рост келди. Иккинчи башоратнинг амалга ошиш ёки ошмаслиги эса ўз қўлида. Лекин ҳайҳот, иккинчи башорат рост келмаслиги учун маликанинг таъналарига чидаш, унинг беҳаёларча айтган сўзларини унтиш керак! Мирзо Улуғбек бунга қодирми?

...Ниҳоят, кун ботиб, баҳорнинг илиқ куни изгиринга ўрин бўшатди. Ҳукмдор бир қарорга келди. Йўқ, биргина башорат рост келувидан чўчиб иккиланиш унинг шаънига тўғри келмайдур!

Саройга қайтиб, ҳузурига шайхулислом Исомиддин ва қозикалон Хожа Мискин жанобларини чорлади. Улар етиб келганда ҳукмдорнинг қарори янада қатъийлашган эди. Лекин сўз бошлагандা товуши ўзига бўйсунмай, томоғи бўғилиб қолди. Шайхулислом ва қозикалон жаноблари тўсатдан чорланишлари сабабини англашга тиришиб, ҳукмдорнинг оғзига тикилдилар.

- Меним сиз шариатпаноҳ жанобларни чорламоғимдин мурод, - деди Улуғбек ич-ичидан тошиб келаётган титроқни босишга тиришиб. - Шаръий манкуҳам, мўғил хони Султон Маҳмудхоннинг қизи бўлмиш Оқ Султон Хон Оғони ҳарамдин эхрож этмоқ ниятимни билдиromoқ ва ушбу иш юзасидан сизлардан фатво сўрамоқдур.

Шариат пешволари ҳукмдор ўз қарорини изоҳлашини кутиб сукут сақладилар. Лекин Мирзо Улуғбек фақат:

- Мен қарорим қатъий эканига аминман, - деб қўя қолди.

Ниҳоят, қозикалон Хожа Мискин жаноблари тилга

кирди:

– Давлатпаноҳ ўз қарорларига нелар сабаб бўлганини билдира оладиларми? Сабабларни билсак, балки ихтилофни бартараф этмоқ иложи топилар ва та-лоққа ҳожат қолмас?

– Бартараф этмоқ иложсиз, жаноблар, – деди Улуғбек қатъий. – Мен Оқ Султон Хон Оғони талоқ қилмоқ қарорида событмен.

– Ас-салотин зиллаллоҳу фил-арз! Султонлар ол-лоҳнинг заминдаги кўланкасиур. Демак, аларнинг амри вожибдур! – деди шайхулислом.

Шу онда Улуғбек юрагидан тошиб келаётган хўр-синиқ аралаш: “Мана, мавлоно яна ҳақ бўлиб чиқмиш, – деб ўйлади. – Бу сафар ўзим билвосита сабабкор бўл-дум...”

* * *

Мирзо Улуғбек бу қизни биринчи марта Оқ Султон Хон Оғонинг хизматида кўрган ва беихтиёр қулиб юборай деганди. Ўрта бўй, дўмбоққина бу қизнинг юзларида гўдакларча табассум зоҳир, кўк кўзларида болаларча софлик, ўримга бўй бермаган жингала сочла-ри гўё жажжи қизчаларнинг кокиллари каби диккай-ган, хуллас, бутун вужудидан болаликнинг самимий нафаси уфуриб турар эди.

Ёдида: қиз кириб келган Мирзо Улуғбекни кўриб шошиб қолди ва ҳукмдор хузурида сўzsиз таъзим этиш одатини унутиб қўйиб, салом берди.

– Ваалайкум ассалом, – деди Улуғбек.

Қиз “дув” қизарди.

– Испинг нима? – деб сўради Мирзо Улуғбек қизнинг уятчанлиги нашъя қилиб жилмаяркан.

– Испим Руқия, – деди қиз титроқ овозда.

– Руқия? Бундоқ чиройли исмни сенга ким берган, қизалоқ?

Қиз соддадиллик билан елкасини қисди. Улуғбек кулиб юборди.

– Мен малика Оқ Султон Хон Оғонинг янги хос канизимен, – деда шоша изоҳ берди Руқия.

– Ҳа, дуруст, – деди ҳукмдор кула-кула ва хобгоҳига кириб кетди...

Мирзо Улуғбек Руқияни кейин ҳам кўп марта кўрди. Қиз уни қўриши билан қизариб, кўзларини ерга тикар, бу эса Улуғбекка гўё шошқалоқ боланинг ширин қилиғидай нашъя қилиб, кулгиси келарди. Баъзан қизнинг самимий сўзларини эшитгиси келиб уни гапга тутмоқчи бўлар, лекин каниз саволларга аксар қисқа жавоб бериб, тезроқ қочиш пайдан бўларди. Мирзо Улуғбек эса ўзича: “Бу қиз бунча уятчан, алҳол бола”, – деда бепарвогина кулиб қўярди.

Шайхулислом ва қозикалонни ўз қароридан хабардор қилган куннинг эртасига Улуғбек ҳарамда Руқияни кўрди. Қиз ўжар кокилларини қизил шол рўмол билан танғиб боғлаган, қўлида кичикроқ қути, боши эгик эди.

Дили зимистон Улуғбек бу соддадил қизни кўргач беихтиёр кўнгли ёришиб, салом эшитмаган бўлса-да:

– Ваалайкум ассалом, – деди.

Руқия чўчиб кетди ва бошини кўтармаёқ таъзимга шошилди.

Мирзо Улуғбек кулиб юборди:

– Ҳа, Руқия қиз, ассаломни еб қўйибсиз-да!

Шу асно канизнинг кўзлари қизариб шишганини кўрди.

– Не бўлди, қизалоқ? Сени ким йиғлатди?

– Ҳазратим, мен ҳам Оқ Султон Хон Оғо ила ҳарамдин кетаменми? – сўради қиз титраб. – Ахир мен унинг канизиман-ку!

– Сен кетиши истамайсанми? – деди Улуғбек ҳайрон бўлиб.

– Истамаймен!

– Нечун?

Қиз гүё ўлимни бўйнига олган кишидек қўзларини чирт юмди ва тезгина:

– Магар кетсам... сизни кўролмасмен! – деди-ю, қочиб кетди.

* * *

“Руқия қиз бунча уятчан десам, сабаби бор эркан-да! – ўйлади Мирзо Улуғбек. – Э, қизгина-я! Улуғбекка шайдо бўлган соддадил қизалоқ... Бу дунёда севилмоқ осон, аммо севмоқ осон эмас...”

Тонг отгунча ўтган фурсат йиллар каби узайди. Ё ажаб, ўзганинг муҳаббати ҳам қўзга уйқу бермас экан! Изҳор сабаб титроққа тушмоқ учун севмоқ ҳам шарт эмас экан... Соддадил қиз ўзининг оддийгина сўзлари билан Мирзо Улуғбек ниятида қандай ўзгаришлар ясаганини хаёлига ҳам келтирмаганди. Мирзо Улуғбек кўнглида уйғонган қайсар бир ҳис билан мавлоно Ардистоний башоратларини рост келтирмасликка аҳд қилган эди. Йўқ, дунёда уни севган қиз бор эканми, ҳукмдор ёлғиз қолмагай!

Эрталаб сарой аҳлига ҳукмдорнинг қарори маълум қилинди. “Мовароуннаҳр ва Туркистон ҳукмдори, Муҳаммад Тарагай ибни Шоҳруҳ Улуғбек Мирзо хос канизлари Руқияни ўз муборак никоҳларига киритмоқни ихтиёр этдилар! Ушбу муносабат ила энди у карима Руқия Султон Хотун номини олгай!”

Бир ҳафталардан кейин эса Ҳиротдан чопар келди. Онаси Гавҳаршодбегим ёзар эди:

“Оқ Султон Хон Оғо сабаб дилингизни хуфтон этмангиз. Ҳоҳишингиз йўлида танлаганингиз Руқия Султон Хотун бизнинг учун сизнинг жуфти ҳалолингиздур ва сизга рафиқангиз муборак бўлгай. Аммо Мовароуннаҳрга темурий малика лозим бўлиб, ке-

линликка Халил Султон Мирзонинг қизи Ҳусн Нигор Ҳон Оғони муносиб кўрдук. Падари бузрукворингиз хоқони сайд Шоҳруҳ Мирзо ҳазратлари тўйни Ҳиротда ўтказмоқни лозим топдилар ва зулқаъда ойининг йигирма учига қадар Ҳурросонга етиб келмоғингизни амр қилдилар”.

Мирзо Улуғбек мактубни ўқиб кулиб юборди: “Йўқ, мавлоно, башоратингиз рост келмади. Ҳукмдорни ёлғиз қўймадилар”.

* * *

Қуёш ҳали бош кўтармай туриб Самарқандни карнай ва сурнай садолари тутди. Ҳалқ Кўҳак тепалиги томон оқар эди. Ўттиздан ортиқ дошқозонлардан тарагидек таассурот берарди. Тепалик атрофида қатор ёзилган узундан-узун оппоқ дастурхонлар, қўлларида лаганлар билан қаторлар оралаб югуриб хизмат қилаётган муаззам айлана бино дарвозаси атрофида уймалашган одамлар, шодон ғала-ғовур – буларнинг барига Мирзо Улуғбек доруссалтанатда бунёд этган bemisл расадхона сабабчи эди. Ҳалқ ўз ҳукмдорининг бунёдкорлигига аллақачон кўнишиб улгурган, доруссалтанатдаги ҳар бир қурилиш одатий воқеа бўлиб, одамлар бинокор усталар шаҳарнинг ҳали у-ҳали бу ерида ғивирлаб қолишидан кўп ҳам ажабланишмас эди. Аммо расадхона катта шов-шувга айланди. Олонмон ҳали қурилиш поёнига етмасданоқ бинони томоша қилиб кетадиган бўлди. Бугунги эҳсонга ҳалқ оқиб келишининг яна бир боиси қизиқувчанлик, янги бинони бор маҳобати билан яна бир бор томоша қилиш истаги эди.

Мирзо Улуғбек расадхонанинг учинчи ошёнасига кўтарилиб, атрофга разм солди. Тепалик томон оқиб

келаётган одамларни кўриб кўнгли ифтихор билан тўлди. Мана, унинг ижтиҳодлари нишона бера бошлади. Бу расадхона ҳали мисли кўрилмаган изланиш ва кашфиёт маскани бўлур!

– Алоуддин Али, – деди Мирзо Улуғбек. – Расадхона ортида катта боғ барпо эттирамен. Мана шунда киши учинчи ошёнадан туриб боққанда кўнгли гўё яшил уммон ичра сузиг кетаётгандек лаззат оладур! Сен не дейсан?

– Устод, яратилажак боғ расадхонага мувофиқ равишли бўлур, деб умид қилурмен.

– Менга яна недир демоқчимисан?

– Шундоқ.

– Сўзла!

– Устод, фақир мавлоно Ардистоний хусусида бир сўз эшитдум. У киши рамл илмидан этак силккан эмиш!

– Нечун?

– Билолмадум.

– Демак, мавлоно букун оқшом расадхонага келмас экан-да! – деди Мирзо Улуғбек ўйчан. – Мен у киши бирлан яна бир суҳбат қурмоқчи эдим. Аттанг!

* * *

Мирзо Улуғбек мавлоно Муҳаммад Ардистоний очган фол сабаб инсон умри ва ижтимиоёт тўғрисида қўп мулоҳаза юритадиган бўлиб қолган, ҳатто бу мавзуда рисола ёзиши ҳам кўнглига туккан эди. У ижтимиоётнинг инсон тақдиридаги ўрни ҳамда ҳодисотлар силсиласи инсон ҳаётида қандай ўзгаришлар ясами ёхуд инсон ижтиҳоди унинг ўз қисматига, қоловерса, ижтимиоёт тақдирига қай тарзда таъсир этмоғи борасида ҳамон зиддиятли ўйлар сурар, жавоб излар эди.

Мирзо Улуғбек Али Кушчининг “рамл илмида синов ожиздур” деган сўзи сабаб миясига келган фикр

таъсиридан ҳамон қутула олмас эди. Ахир нима учун синовнинг иложи йўқ? Ахир мавлоно Ардистоний бундан беш йил аввал айтган башорат ва ундан ке-йинги ҳодисалар синов ўрнига ўтмасми?

Мавлононинг биринчи башорати рост келди. Иккинчи башоратини Улуғбекнинг ўзи била туриб рост келтириди. Яна бир сўзининг рост келувига эса йўл бермади. Мана, яратганга шукур, Руқия Султон Хотун унга икки қиз туғиб берди. Ҳусн Нигор Хон Оғо Улуғбекнинг хурматини баланд тутиб келади. Ўғиллари Абдулло Мирзо ва Абдураҳмон Мирзолар унинг дилини умидларга тўлдириб улғаймоқдалар. Мана, яқинда у яна бир ўғиллик бўлди. Ва унга Абдуллатиф деган исм берди. Буларнинг бари инсон тақдир олдида ожиз эмаслигини кўрсатмайдими? Йўқ, Оллоҳ инсонга зakovat ва иқтидорни бежиз бермаган!

* * *

Мавлоно Муҳаммад Ардистоний фол кўрмоқдан этак силкканини кексайгани билан изоҳларди. Аммо асл сабаби унинг дилида пинҳон эди.

Мавлоно иккала башорати рост келгач, яширинча яна бир бор, бу сафар Улуғбекнинг тақдиридан рамл очди. Ва... О, бу нақадар қўрқинч!

Мавлононинг кўз олдида очилган башорат шундоқ эди:

– Ҳукмдорни суюкли ўғли маломатга қолдирав, шоир ўғли қатл эттирап! Падаркуш ўлимидан ўн беш йил ўтиб, Мирзо Улуғбек авлодидан нишон қолмас!

Мавлононинг қўлидаги тасбеҳи тушиб кетди. У саждага бош қўяр экан, кўз ёшлирини тўхтата олмас эди:

– Ўзинг раҳм қил, парвардигор!

ЁНАЁТГАН ОДАМ

У сўнгги пайтларда тез-тез рангли тушлар кўрадиган бўлиб қолган эди. Деярли ҳар куни тун оққач, ўзининг совуқ тўшагига чўзилар, ёлғизлик гирдобининг қора тўлқинлари уни хаёлий тушлар тубига ғарқ этар эди. Тонг отгач, кўрган тушини кўпинча эслай олмас, тушининг тафсилотларини ёдига олишга уриниб анчагача ётиб қолар, сўнг имиллаб ювинар, тошойна қаршисида маъюслик билан кийинар ва албатта, ишига кеч қолар эди.

Йўлакда дуч келувчи ҳамкаслари билан йўл-йўлакай сўрашар экан, Асрора Юнусованинг Тамилланинг ранжиб гапиргувчи шикоятларининг эшикдан учебчиқаётган узуқ-юлуқ жумлалари қулогига илиниб қоллар эди.

Дилида қандайдир қувончнинг келишига умид боғлаб хонасига кирап, тўрдаги бағбақалари осилган бўлим бошлиғи ҳар доимгидай унинг саломига алик олиб, қофозларга мук тушиб ўтираверар эди.

Улар бўлимда олти киши эдилар. Кўл остидагиларнинг иши билан кўп ҳам қизиқавермайдиган, шу сабабли ҳамманинг ҳурматини қозонган бўлим бошлиғи, яқинда уйлангани сабабли қизларнинг телефон қўнғироқлари камайганидан афсусланадиган Файрат, телефон орқали эри билан эзмаланиб жанжаллашишдан чарчамайдиган Ойиби, бахти чопган (ҳар ҳолда ҳамма уни шундай деб ҳисобларди) Флора ва бир хил тусдаги бўйинбоғу кўкимтирик кўйлаклар кийиб кела-диган Носир.

Деярли ҳар куни Флора бўлимдагиларнинг диққат марказида бўлар, ўзининг Баҳриддин Каримови ҳақидаги жўшқин ҳикоялари билан кунни ўтказар эди. Бахти чопган Флоранинг айтишича, унинг Баҳриддин

Каримовидек йигит икки дунёда йўқ экан. Йигирма етти ёшида фан номзоди, иккита китоб муаллифи, эътиборли газеталар мақолаларини босиб туради, худонинг берган куни “ойнаи жаҳон”да кўринади. Баланд бўйли, келишган. Хуллас, бекаму кўст. Бахти чопган Флора ўз фаҳриясини шу тарзда адо этар эдики, ўзи тугул, бошқалар ҳам Баҳриддин Каримовнинг зўр йигит эканлигига ишониб кетишарди.

Ойбиби бўлса Флорага турмушда омади чопмаганидан нолир, нима учун мана шу “ландавур” эрига текканига ҳеч тушунолмасди.

Ғайрат бахти чопган Флоранинг вижирлашларига аллақандай тамшаниш билан қулоқ солар, ора-сира қўнғироқ қилувчилар билан муомала қилаётган бўлим бошлиғининг оғзидан: “Ғайратми? Ҳа, шу ерда”, – деган сўзларни эшитиш умидида ўтирас эди. Бўлим бошлиғи эса бағбақаларини осилтирганча тирсакларини столга тираб, Флоранинг чуғурлашларига меҳри ийиб қулоқ тутарди. У бўлса бахти чопган Флоранинг ҳикояларини ҳавас билан ўқинч оралиғидаги ғалати бир ҳис билан тингларди. Ёлғиз Носиргина бахти чопган Флоранинг сўзларига бефарқ кириб-чиқиб юради.

Ва шу алфозда кунлар ўтиб ҳафталарга айланар, унинг кетидан ойлар кечар эди. Ҳар ҳафтанинг сўнгги иш куни азобга айланарди. У ҳаммадан кейин кетар, уйигача бўлган ярим соатли йўлни бир соатда босиб ўтар, остона ҳатлаб отасининг солиқ қовоғи-ю, онасининг жонсарак нигоҳларига дуч келар эди. Кечки овқат отаси ва онаси даврасидаги оғир сукунат тагида эзилиб ўтарди. Идиш-товоқларни йиғишитирғач, кундалик ташвишлари тугагандек бўлар, лекин энг катта ва энг даҳшатли ташвиш – тунни қандай ўтказиш ғами қад ростларди.

Ухлаш олдидан қолган икки кунни қандай ўтказиш тўғрисида қийналиб ўйларди. Ҳаёлида эса ўн етти

ёшлигидан қолган орзу: катта ҳовли. Ҳовли тўрида кичиккина бир уй билан айвон. У айвонда қалпоқча тикияпти. Ҳовли саҳнида мусичалар қу-қулашганча нонушта дастурхонидан қоқилган увоқларни чўқи-лашяпти. Юзларида шира юқи қотиб қолган болакай қўлига хивич олиб мусичаларни ҳайдашдан завқла-ниб қийқиради. Ишком тагидаги супадан кампирнинг эркаловчи овози эштилади: “Мусичаларга тегиб бўл-майди-я, болам, ҳайдама уларни”. У болакайга, кейин кампирга қараб қулимсираб қўяди...

...Лекин у орзусининг ушалмагани, балки ушалмас-лиги ҳам мумкинлигини ўйларди-ю, бошини кўрпасига буркаб йиғлар эди. Эрталаб эса қовоқларининг шишга-нини яшириш учун совуқ сувда узоқ ювинар эди.

...Унга кўпинча ҳамма ачиниб, тўғрироғи, ижирға-ниб қараётгандай туюларди. Шунда юзидағи болалик-дан қолган яра чандиқларини силаб ғамга ботарди. Гўё дунё иккига бўлинган-у, бир томонда барча гўзал ва баҳтли одамлар, иккинчи томонда фақатгина у – хунук ва қари қиз қолгандай туюларди...

Шундай кунларнинг бирида ҳамкаслари орасида хусндан баҳс очилди. Аниқроғи, Ғайрат чиройли қизга уйланганидан афсусланди: “Кўчада хотиржам юрол-майман. Ёнида эри кетаётганини кўриб ҳам бақрайиб қарашади. Қайтага хунуги тузук экан. Бехавотир...”

Носир эътиroz билдириди: “Эрталаб уйғониб ёнингда битта таъвия ётганини кўрсанг, қай аҳволга тушасан-у...”

Бошидан бир челяк сув ағдарилгандек бўлиб ташқарига чиқаркан, Флорага дуч келди: “Нима бўл-ди?” “Ҳеч гап...”

Шу куни у биринчи марта Носирга эътибор берди. Негадир Носирнинг кўзга ташланмаслиги сабабини ўйлаб кетди. Кейин тушундики, Носир доимо мотамда юргандай кўку қора кийиб юраркан.

Бахти чопган Флора эса Носирнинг хотини хунук эканлигини, Носир ноиложликдан уйланиб қўйиб, ҳозир аросатда яшашини ачиниш билан гапириб берди.

Балки шу сабаблидир, у биринчи марта шу йигитга ачиниб кетди ва унинг хунук хотинини ёмон кўриб қолди. Кўзгуга боқар экан, ўзининг ҳам таъвия эканлигини, Носир ундан ҳам ижирғаниши мумкинлигини ўйлаб қийналиб кетди. Шу куни ёқ столини Носирнинг рўпарасидан Флоранинг ёнига сурдириб олди.

Кошки шу билан қийноқлар тугаган бўлса?

Ҳар куни рангли тушлар кўриш, кейин кун бўйи шу тушлар таъсирида юриш унга кундан-кунга оғир келаётган эди.

Бир куни у чидолмади. Кўрган тушини Ойбибига айтиб берди:

– Тушимда илонларнинг рақсларини кўрдим. Улар бутун дунёни босиб кетишибди. Офтобда терилари ярқираб рақс тушишармиш...

Ойбиби қулди:

– Бойиб кетсангиз биз фақирларни унутмассиз?

Носир қизга анграйиб қараб қолди.

У эса биринчи марта бирорвга юрагини очмоқчи бўлганига пушаймон еди.

Кунлар ҳамон ўтиб борарди. Қиз ҳаётида ҳеч қандай ўзгариш бўлмаслигини эзилиб ўйларкан, қайси гуноҳи учун хунук бўлиб яралганини ҳеч тушунолмасди.

...Унинг учун энди дунёда суюнадиган ҳеч нарса қолмаган эди. Кундуз кунлари Носирнинг кўзига таъвия бўлиб кўринаётганидан изтироб чекар, тунлари афсонавий тушлар уни исканжага олар, тушдан кеинги тонг отгунча бўлган бедорлик тинкасини қуритар эди. У ўн беш кунда озиб кетди.

Назаридаги орзусидаги каттакон ҳовли, ҳовли тўридаги кичиккина уй, битмай қолган қалпоқча, ҳовли

юзасида ку-кулашиб юрган мусичалар, юзида шира юқи қотиб қолган болакай, орзусида ҳатто бўй-бастини тасаввур ҳам қилолмаган йигит, болакайни эрка-лаб тергайдиган кампир – ҳаммаси саробнинг навбатдаги найрангидан ўзга нарса бўлмай қолди.

Йўқ, унинг барча қийноқлари ҳали олдинда экан.

Бир куни у тушида ёнаётган одамни кўрди. Ўт йигитнинг бутун борлиғини ямлар, олов устуни йигитнинг кўкка чўзилган қўллари узра осмонга сапчир, бутун дунёни босган сув ёнаётган одамнинг оёқлари тагида пишқирап, қиз эса йигитга хаёлан ёлворар эди:

– Ўзингизни сувга ташланг, тирик қоласиз, ташласангиз-чи!

Лекин йигит унинг сўзларини эшитмас, нажот истаб кўкка боқар эди...

...Қиз эрталаб бошида қаттиқ санчиқ билан ишга келди. Бутун хонани тутун иси босиб кетгандай бўғилиб деразаларни очиб ташлади.

Бугун у одатига хилоф ҳолда ишга барвақт келган эди. Салдан сўнг ҳамкаслари кела бошлишди.

Ишга ярим соатча кечикиб келган Носирни Файрат қарши олди:

– Нима бўлди? Кўзларингиз киртайиб кетибди, тинчликми?

– Ухломадим, – руҳсиз жавоб берди йигит. – Шу кунларда уйқумда ҳаловат қолмаяпти...

– Уй ичилар тинчми ишқилиб?

– Тинч... – Носир столи устида ётган гугурт қутисини олиб бурчакдаги ахлат саватига отди. – Кўзимдан узоқроқ бўлсин... Тушимда ёниб кетибман...

САҲАР

Киши ўз толеидан тиниқиб уйғонган сари талва-сага тушаркан. Айниқса, саҳарда...

Нега энди толе кишини бу қадар чўчитаркин? Бекаму кўстлиги учунми? Гули буни билмасди. Лекин у шу бугун, шу саҳар ҳис этдики, толе ҳам киши дилига кўрқинч соларкан.

...Саҳарга яқин туш кўрибди. Қандайдир аёл чорлармиш уни...

- Гули! Гули!

- Кимсиз?

- Танимадингми?

- Ё худойим-эй!

Ахир бу ўзи-ку! Гули-ку!

...Ташқарида эшик ғичирлади. Тонг отибди-да!

Юқори маҳалладан аzon товуши кела бошлади. Келинчак рўмолини танғиб боғлаганча, айвон зинасига оёқ босди.

Сал ўтиб, ҳовлида одатдаги тонгги ғивирлаш бошланди. Қайнонаси қувурдан обдастага сув тўлатди, ювиниб-тараниб олган қизлар кичик уйнинг деворига осиғлиқ кўзгуга боққанча пичирлашиб, соchlарини жингала қила бошлашди.

- Гули! Гули! – бир вақт деразадан эрининг паҳмоқ соchlари кўринди. – Қаёққа кетдинг, Гули?

- Ҳой, уятсиз, аввал юзингни юв, кейин чақирасан! Юзингни юв, деяпман! – койинди кампир.

- Ҳозир... Ҳозир! – йигитнинг боши ғойиб бўлди.

...Мана, яна ўша бир хилдаги ёруғ кунлари бошланди. Гули офтоб нури кўтарилган сайин кўрган тушини унута борди. Келинчакнинг кундалик ташвишлари бошланиб, у ўзининг доимий хаёлларини ҳам эсдан чиқарди. Одамзот ўзи шундай: ҳамма ўйлар, ҳатто доҳиёна фикрлар ҳам мияга фақат бекорчиликдан келади.

Кундалик ташвишлар эса ҳамма ўй-хаёлларни қувиб чиқаради. Шунда одамзот қўли ва оёғи ҳамда тилининг қулига айланади. Тил паловни қандай дамлаш

яхши бўлишини уқтиради, қўл сабзи тўғрайди, оёқ доимигидай овозини ютганча гавданинг бутун оғирлиги ни устига олиб тураверади. Мия эса катакчаларига ош ҳақидаги янги маълумотларни жойлаш билан овора бўлади.

Ташвишлар – буюк ҳукмдор! Унинг ҳукми фақат уйқу маликасининг амри олдидағина ожиз. Уйқу маликаси эса хаёлот салтанатининг арзандаси.

Кеч кириб, ташвишлар салтанати зил кета бошлагач, Гули ҳам қуллик занжирининг ихтиёрий кишаларини ташлайди.

Ундан сўнг...

- Чарчадингми, гулим?
- Йўқ...
- ...Саҳар...
- Мени танидингми?
- Танидим... Дилемсан менинг... Нега келдинг?
- Сен билан дардлашгим келди.
- Ҳозир-а?
- Бошқа вақт мени хаёлингга ҳам келтирмайсан-ку!

Гулининг иккинчи сахари шундай ўтди. Эрталаб эса яна ташвишлар...

...Келинчак ҳар сахар ўзининг ёруғ кунлари ҳақидаги ўйлари қюонига ўралиб уйғонар, уни бу ўйлар гирдобидан фақат ташвишларгина кутқарап эди. Гули кундалик ташвишларга боши билан шўнғир, гўё шу билан гирдобдан сузиб ўта оладигандек тасалли топарди. Тасалли эса алдов эди, ширин алдарди. Лекин алдовнинг кучи ожиз, сахаргача етарди, холос. Сўнг у ўзининг жулдур этагини судраганча ғойиб бўлар, кейин янги либосда келарди. Чунки унинг либослари бир кунлик эди, холос...

...Саҳарларнинг бирида келинчакнинг хаёлига гўдак иси урилди. Кўнглини наҳор ёруғлиги билан шом қоронғулиги босди...

Нималар бўляпти ўзи? Нега уни тинч қўйишмайди? У ҳаммасидан чарчади. Саҳарнинг кескир хаёлларидан чўчиб қолди. Унинг учун энди саҳар қийноқ эди. Фақат тун... Йўқ, энди тун ҳам азобга айланганди.

- Гулим... Нега индамайсан? Бир нима дегин?

- Қўйинг, ҳеч нарса керакмас...

- Гулижон... Мен сенга нима ёмонлик қилдим?

Дарвоқе, эри унга нима ёмонлик қилди? Ҳеч нима. Фақат... хотинини жуда яхши кўради. Бор-йўғи шу!

Гули эса бу севгининг ширин тасаллиси – оғриғи билан яшашга маҳкум. Унга бу оғриқ саҳар билан келди. Саҳар билан кетармикин? Қачон? У энди кунларни санарди.

- ... Қўрқаман...

Нимадан? Азобданми? Йўқ... Келинчак бу азобга кўнган эди.

Саҳарда эса...

- Ухлаяптими?

- Ҳа...

- Уйқуси қаттиқ... Нега кетгинг келмаяпти?

- У мени яхши кўради.

- Сен-чи?

- ...

- Сен-чи?

Кейинги саҳар...

- Унинг олдига ҳар саҳар келишинг мумкин, туш бўйиб... Худди мен сенинг олдингга келгандек...

- Кет!

- Ўйлаб қўр!

- Ўйлаб бўлдим! Кет!

- Паймонанг тўлиб қолди сенинг!

- У мени яхши кўради, кам-кўстим йўқ у билан!

- Шунинг учун ҳам паймонанг тўлиқ-да!

Саҳар bemажол, саҳар беилож, саҳар беимкон...

Такрор тушлар такрор саҳарларда келарди. Уларнинг такроридан ҳориган келинчак энди кундузнинг

ташвишларига ҳам ярамай қолди. Туннинг азоблари эса бениҳоя эди.

– Гули... Гулижон...

...Севилиш наҳот шунчалар азоб?

Бу азоблар бир кун келиб портлаши керак эди. Нихоят, ўша палла етиб келди...

Кеч кузнинг фавқулодда ёруғ саҳари. Келинчак чўчиб кўзини очди. Деразалар оппоқ, шифт оппоқ, боши устига эгилган эрининг юзлари оппоқ... Гули сезди. Юрагида оғриқ билан сезди. Эри уни яхши кўради. У билан кам-кўсти йўқ. У – бахтли! Демак, паймона тўла...

У қўлларини қорни устига қўйди. Кафтларига гўдагининг боши, елкалари уннади. Аста силай бошлади. Кейин бирдан оғриқ туйди. Севилишнинг оғригини, азобини ҳис этди.

Бахтиёрликнинг азоби вужудига ўтганини сезганда, дийдорнинг даҳшат эмас, балки роҳат эканини англади. Унинг вужуди қийноқлар юкидан енгил тортган эди. Бу қийноқлар унинг танини бурдалар, юрагини эса жисмидан олиб, кўкка томон узатар экан, кўз олдини қоплаган туман оралаб эрининг овозини эшилди:

– Гулижон, мен сенга нима ёмонлик қилдим?

ҚЎЗОЙНАК

Кун кўнгилсизлик билан бошланди. Қўзойнаги синиб қолди. Гардиш ва қулоқ ортига ўтадиган бандни бир-бирига улаб турадиган, митти мурватча жойлашган темир “кулоқча” узилиб тушди. Аслида унинг бу матоҳи алмисоқдан қолган эди. Қизи кўпинча аччиқланиб: “Йўқотсангиз-чи шуни, – дерди. – Ҳеч ўзингизга қарамайсиз-а? Ўзим бошқасини танлаб берақолайми сизга?”

“Ўзига қараш” деган ҳаракатми ёки шунга ўхшаш бир нарсага тузукроқ кўзойнак танлаш ҳам киради. Лекин у шу чоққача бу матоҳнинг ярашиғини учратмаганди. Назарида уларнинг бари бесўнақай, унинг юзида эса жуда ўхшовсиз кўринарди. Йўқса, у кўзойнак ярашган, ҳатто ўзгача чирой, салобат ва кўрк берган кўп кишиларни биларди. “Демак, менинг юзим... Йўғ-э... Кўзойнакдан омадим чопмаган, холос”, – дея ўзини-ўзи юпатиб қўярди баъзан.

Шу боис у ўн йилдан бери кўзойнак тақмас, контакт линзадан фойдаланадиган бўлган, кўзойнаги эса ҳар эҳтимолга қарши жавонда, филоф ичидан турадиган эҳтиёт чорасига айланган, эҳтиёт чора аталмиш нарса учун эса бош қотиришни, мўмай пул сарфлашни истамаётган эди. Икки ҳафтадан бери боши шамоллашдан чиқмагани учун линза тақмасди (ҳар тўкисда бир айб бор экан-да, линза қанча қулай бўлмасин, шамоллаганда, кўз оғриганда тақиш мумкин эмас эди), куни шу жигарранг гардишли, ойнаги қалин кўзойнакка қолган эди.

Кўзойнак унга болалигидан ҳамроҳ. Саккиз ёшларда эди, ўқитувчи “Болангиз синф тахтасига ёзганларимни кўра олмай қийналяпти”, дея ўзича танбеҳ берганди. Шу куни ёқ онаси уни кўз шифокорига олиб бориб, бир парча қоғоз ёздириб келган, ойнали узун пештахталарига турли гардишли кўзойнаклар териб қўйилган дўконга кириб, пушти гардишли кўзойнак сотиб олиб берган эди.

Ўзининг кўзойнакни тақиб деворга илиқлик кўзгуга қарагани ҳали-ҳамон эсида.

Ўзига пушти гардиш тагидан боқиб турган сариқ сочли қизчани кўриб юраги увишди. Телевизорда кўрган аллақайси бир фильмни эслади. Шунда кўзойнак таққан малла аълочи ялмоғиз кампирнинг сехрини

енгиб, вақтни орқага сурган, жоду билан тошбақаларга айлантириб қўйилган ялқов синфдошларини кутқарган эди. Йўқ, кўзойнакли аълочиларни қанча мақташмасин, бунағанги истиқбол унга маъқул эмасди. Беихтиёр йиғлаб юборди.

– Ие, бу кўзёши нимаси? – сотувчи амаки астайдил ҳайрон бўлди. – Ёқмадими? Энг чиройлисини танлаб бердик-ку!

Онаси қовоғини солди: “Эркалик қиляпти”.

Йўқ, у эркалик қилмаган, кўзгудаги аксини ёқтиримаган эди, холос.

Онаси бурчакда шаффоф ойна билан ўралган тор хоначада ўтирган бақалоқ хотинга пул тўлади-да, эвазига ўша хотин қўпол темир машинасидан шигиллатиб чиқариб берган бир парча қофозни олиб, ҳамёнига тиқди. Кейин қизрасини олдига солиб оптикадан чиқиб кетди.

Эртасига у онаси билан биргаликда қилган харидининг дастлабки мевасини терди: “Тўрткўз, тўрткўз!”

Аламидан рўпарасида ишшайган қоп-қора башарачага шапалоқ туширди. Башарача ўшшайди. Кейин кўзойнаги аралаш тушган муштдан кўз олди қорайди. Йиқилаётиб елкаси нимагадир урилди. Оғриқ кучидан чинқириб юборди. Шу онда кимдир синф хонасига югуриб кирди. Кўз олдини қоплаган қоронғилик аралаш муаллиманинг хавотирли овозини эшилди:

– Вой, Худо, бирпасга ҳам қолдириб бўлмайди-я!
Нима қилдиларинг?

Синфдошлари чувиллашди:

– Акмал, Акмал урди!

– Аввал ўзи урди! – қичқирди болакай.

Синфдош қизчалар эса бири олиб-бири қўйиб бидирлашди:

– У “Тўрткўз” деб масхара қилди!

- Энди бунинг ойисига нима дейман, а? Нега масхара қиласан? Нега урасан?

...Шу куни синган кўзойнакни кўрган онасининг қанчалик жиғибийрони чиққанига қараб тушундик, кўзойнак шунчаки буюм эмас экан. У ҳамёнга тушадиган қўшимча юқ, елкага келадиган ортиқча ташвиш экан. Отасининг қовоқ солиб чўнтак титкилаганидан англадики, масхара қилган синфдошининг адабини бериш доим ҳам яхшилик келтиравермас экан.

Эртаси мактабга бошқа бир кўзойнак тақиб борди. Буниси қалин кўқимтири гардишли бир матоҳ эди. Баттар хўрлиги келди.

Синфдошлари энди очиқдан-очиқ масхаралашни бас қилишди. Лекин унинг миттигина кўнгли кирланиб улгурган эди. Шу кундан эътиборан синфдош дугоналаридан ажратиб турадиган алоҳида битта чизгига эга бўлди. Яъни бошқа қизчаларни таърифланганда “сочи узун”, “бўйи баланд”, “тўлача” каби сифатлар ишлатилганда унинг учун биргина “кўзойнакли” деган сўз етарли эди.

Бу таъриф уни то мактабни битиргунга қадар таъқиб этиб келди. Бир қарашда ҳаммаси табиийдек. Кўзойнак таққандан кейин “кўзойнакли” дейилади-да! Аслида эса бу таърифни ким қачон ва кимга айтади, ҳамма гап шунда эди.

Баъзида дарс пайти, қаншарида оғриқ сезилган пайт кўзойнагини ечиб кўярди. Шунда атроф хиралашиб, ноаниқ бир парда ортида қолгандай бўларди. Рўпарасида турган ўқитувчининг юзи чизгилардан айрилиб, теп-текис, буғдойранг, япалоқ бир баркашга айланарди. Қизча кўзларини қисиб қараганда эса муаллиманинг бурни қирра эканлиги, кўзлари қисиқ, бақбақалари осилиб тушганлиги аён бўларди. Бу жуда ғалати эди.

Ҳар ҳолда, қўзойнак ортидан назар солганда, атроф тиникроқ, яққолроқ кўринарди. Бу, албатта, яхши эди. Лекин ойнаклар охир-оқибат гардиш билан тугарди. Гардишга келиб тақалувчи ўша бир жуфт ойнакнинг рўпарасида аниқ-таниқ нарсалар ва кимсалар кўрингани ҳолда, кўз қири билан ўнгга ёки сўлга назар ташлаганда, гардиш четидан ғира-шира мубҳамлик мўраларди. Бу ўта ғаройиб хусусият эди. Қизча аксаран шу хусусиятнинг асрорини англаш нијатида кўз қири билан тез-тез четга назар солиб, қўзойнак гардишларининг шу қизиқ хоссаларини қайта-қайта синаб кўрарди. Бир куни онасига ўзи очган кашфиётни айтиб берди. Онаси ҳайрон бўлди: “Кўзойнак кичкиналиқ қиляптимикин?”

Оқшом чоғи одатдагича кўрпасидан бошини чиқариб, айвонда ўтирган ота-онасининг гангир-гунгурига қулоқ солиб ётаркан, кўзи илинаётиб, онаси айтган биттагина сўзни англаб қолди: “Кўзойнак...” Шу онда-ёқ кўзлари очилиб кетди: “Нима дейишяпти?”

Отаси аччиқланди шекилли, зардали товушда деди: “Хе, ўргилдим, ўша...”

Эрталаб отаси унга кўзойнагини тақдириб кўрди.

– Чаккангни қисмаяптими?

Қизча бош чайқади: “Йўқ”.

– Бурнинг-чи? Бурнингни қисмаяптими?

– Йўқ...

– Кўзингни оғритмаяптими?

– Йўқ.

– Бошингни айлантирмаяптими?

Қизча яна бош чайқади.

Отаси пешонасини қашиди. Кейин қизининг сочини силаб кўйди: “Майли, боравер”.

Ота-онасининг муҳокамаси нима билан тугади, билолмади. Келаси ой бошида эса отасининг ўзи уни шаҳарнинг нариги четидаги клиникага етаклаб борди.

Малласоч аёл уни баланд суюнчиқли курсига ўтқазиб, кўзларига дурбинсифат асбобни теккизди-да, жим ўтираверди. Қизчанинг кўзларида оғриқ турди.

- Қимиirlама, - буюрди аёл. - Тўғрига қараб тур. Манави липиллаётган чироқчани кўряпсанми?

- Ҳм...

- Шунга қара. Кипригингни пирпиратма!

Асбоб ғалати тарзда фўнғиллай бошлади. Сал ўтмай, тинчлик чўқди.

Аёл ўгирилиб, ўрисчасига бир нималар деди. Отаси жимгина эшилди. Кейин дўхтир ёзиб берган шапалоқдай қофозни олиб чўнтағига солди.

Йўқ, унга янги кўзойнак олиб беришмади, “ўшаниси дуруст экан”, дейишди, лекин онаси анчагача қиззининг кўзларига ҳар хил дориларни томизиб турди.

Шу-шу ҳар баҳор ва кузда кўзларига ҳар хил томчи дорилар томизиш, вақти-вақти билан кўз дўхтириларига учраб, ҳар хил, катта-кичик ҳарфларни овоз чиқариб ўқиб бериш, йилига бир-икки марта кўзойнак янгилаш одат бўлди.

Ота-онаси ҳам бунга кўникди, отаси “Шаҳноза-нинг кўзойнагига”, деб алоҳида пул ажратадиган бўлди. Шунда тушундики, кўзойнак ота-онасининг оладиган маошини ҳам ўзича режага солар экан, кўзойнак ортидан оиласа бутун бир одатлар шаклланар экан. Буларнинг бари қизча учун кутилмаган яна бир кашфиёт эди.

Ёши улғайган сари кўзойнак баҳона яна бир турли кашфларга дуч келди.

Саккизинчи синфда ўқирди. Алгебра дарси эди. Олдига, шундоққина очиқ дафтари устига қофоз қушча келиб қўнди. Орқа партадаги Фарҳод кўпинча, айниқса, назорат иши ёзганларида мисолларни кўчириб олишни сўраб унга шунаقا усуlda хатлар жўнатиб турарди. Қиз күшчани қўлига олар-олмас ёнида ўтирган партадоши шивирлади:

– Сенга эмас, тегма!
– Кимга?
– Бу Нилуфарга аталган! Сенга адашиб тушди.
Орқага узатиб юбор!

Күшчани елкаси оша орқа партага ташлади-да, Нилуфарга ўгирилиб қараб қўйди. Узун қора соч ўри-мини кўксига ташлаб олган Нилуфар қизаринқира-ганча күшчани дафтари тагига яшириб олди.

“Вой-бўй!” – ўйлади Шаҳноза. Тушундикি, Фарҳо-ди тушмагур мисол ечишга қийналгандা унга, бошқа кунларда эса Нилуфарга қушча йўлларкан. Негадир кулгиси қистади. Болалигида кўрган ўша фильмда-ги кўзойнакли аълочига айланибди-да! Бошларига ташвиш тушгандагина уни эслашади, бошқа пайт эса хатлар чиройли қизларга аталади...

Кечқурун телевизор кўриб ўтирган онасидан сў-ради:

– Ойи, нега кўзойнак таққанларни ёқтиришмайди?

Онасининг ҳайрон қараб турганини кўриб, изоҳ берди:

– Мана, сиз кўраётган шу кинода ҳам директор ху-нук хотин, кўзойнак тақади, унга ҳеч ким уйланишни хоҳламаган. Ўзи ҳамма киноларда шунаقا: хунук қиз-лар, лапашанг йигитлар албатта кўзойнак тақади.

Онаси кулиб юборди:

– Киночиларнинг ақли шунақа бўлса, нима қилайлик?

Қиз шунда англадики, кўзойнак одамларнинг ту-шунчаси даражасини кўрсатувчи мезон вазифасини ҳам ўтар экан. Кўзойнак – фикрлаш тарзининг қай да-ражада кенг ёки бирон-бир қолип доирасида эканли-гини кўрсатиб турадиган кўзгу. Шу маънода кўзойнак тақишини фазилат ёки иллат деб билиш ҳам чеклан-ганлик белгиси.

– Сен шунинг учун кўзойнагингни тақмай қўй-дингми? – дея ўсмоқчилади онаси. Кетидан қўшим-

ча қилиб қўйди. – Онанг индамаса, билмас экан, деб ўйлама. Уйда тақиб юрасан-да, остоңадан уч қадам узоқлашдинг, ечиб чўнтакка соласан, а?

Қиз довдираб қолди.

– Дарсда тақиб ўтирибман-ку... – эътиroz қилган бўлди бўшашиб.

– Дарснинг ўзида тақиб ўтирганингдан нима фойда? Ойнакларинг йил сайин қалинлашиб боряпти, сезяпсанми? Ойнак қанча қалин бўлса, гардиши шунча қўпол бўлади, юзинг шунчалик хунук кўринади. Шу оддий ҳақиқатни тушунасанми?

Онаси “гап тамом” деган каби телевизорга қаради. Салдан кейин ўз-ўзига гапирган каби деди:

– Кўзойнак аввало соғлиғинг учун керак. Неча марта айтаман сенга?

Ха, онаси неча марта айтган? Сон-саноқсиз марта. Фақат... фақат кўзгу сон-саноқсиз марта бошқа бир манзарани намойиш этаверарди: думалоққина юзда қўнқайиб турган гардишли иккита ойнак. Ойнак ортида эса кичрайтириб кўрсатувчи шиша шарофати билан биткўзга айланиб қолган, қораҷиклари қўнғир бир жуфт кўз, икки гардиш орасидан чиқиб турган бурун...

Кейинроқ, ёши улғайганда қайсиdir бир илмий мақолада ўқиди: “Одамнинг кўнглидаги қисиниш туйғуси ўз-ўзига ишончсизлик ортидан келиб чиқади”. Англадики, унинг кўзойнак билан боғлиқ муаммоларининг қалити шунда.

– Бўлмаган гап, – деди эри. – Сен жуда ҳам қисишиб-қимтиниб ўтирадиганлардан эмассан. Бўлмаса, эркакча касбнинг этагини тутмас эдинг.

– Кўзойнак тақишига тортинганим-чи?

– Бе! Бу ўсмирликдаги ҳиссиёт, ҳар жиҳатдан тўқисликка интилишдан бошқа нарса эмас.

Аёл енгил нафас олди.

– Масалан, мен сенинг кўзойнагингга ҳам қараб ўтирмаганман, – дея қўшимча қилди эри.

Рост, эри – унинг кўзойнак тақишига парво қилмаган ягона йигит. Лекин... лекин иккови биринчи бор бир-бирига дуч келгандা Шаҳноза кўзойнаксиз эди. “Ҳамма гап шунда-да, – деб кулганди аёл бир куни. – Юрагингиз жазиллаб бўлгандан кейин кўзойнагим парвонгизга келармиди?” Эри бунга жавобан хохолаб юборганди.

...Ўшанда Наврўз куни, университет ҳовлиси тўлиб-тошган, унинг эса яна эски ташвиши қўзиган – кўзойнаги синган эди. Шу ҳолича ҳам туртина-суртина бир-иккита юмушларга уринди. Охири ўчиб қолган магнитоланинг пластинкасини алмаштира бошлади. Стол устида, мўъжазгина овоз кучайтирувчи ускуна ёнида бир уюм пластинкалар ётарди. Қиз каттагина пластинка жойланган ҳаворанг ғилофни қўлига олди. Ёзуви кўринмаганидан кўзларига яқин келтириб ўқий бошлади. Шу чоғ кимдир рўпарасига келиб тўхтаганини сезиб, бошини кўтарди. Кўтарди-ю, ўзига қараб турган қушбурун, шалпангқулоқ бир йигитни кўрди. Йигит кутилмаганда илжайди. “Вой, тавба, – ўйлади қиз. – Ўзидан-ўзи нимага иршаяди бу?”

Шу асно ўзи ҳам жилмая бошлаганини сезди-ю, кафти билан оғзини тўсади...

Биринчи кўришувлари шунаقا бўлган эди...

...– Кўзойнак одамнинг кўриш қобилиятини ҳар хил таъсирлардан ҳимоялайдиган восита, холос, – дея сўзини якунлади эри.

Шаҳноза эрига қараб кулиб қўйди. “Нима қилса ҳам файласуф-да!”

Лекин эрининг сўзлари аёлнинг кўзойнак борасидаги қарашларини кўп ҳам ўзгартира олмади. “Кўзойнакни контакт линзага алмаштираман, – деди бир куни. – Линза қулайроқ”. Кейин эрининг мушоҳадалиги тақлидан қўшиб қўйди: “Кўзойнак кўриш доирасини чеклаб қўяди”.

Эри елка қисиб қўя қолди. Бу “билганингни қил”, дегани эди. Аёл хурсанд бўлиб, ишхонаси ёнидаги салонга кирди. Кўрдики, линза ҳам кўзойнак каби шунчаки буюм эмас, эрининг таъбирича, “кўриш қобилиятини ҳар хил таъсирлардан ҳимоялайдиган восита” бўлишдан ташқари, оиласа келувчи қўшимча харажат, режаларни ўзгартирувчи бир омил... ва ҳоказолардан ташқари, олифтагарчилик белгиси ҳам экан. Чунки кўз рангини ўзгартириш учун ҳам, қорачигига бошқача шакл бериш учун ҳам линза тақишаркан! Фақат, линзада кўзойнак каби гардиш йўқ экан! Шунисига ҳам шукур!

Мана энди шамоллади, линза тақиши мумкин эмас, куни алмисоқдан қолган шу кўзойнакка қолганда, у ҳам синиб ўтирибди!

Аёл шу дамда англадики, шу кунгача кўзойнак ва ҳоказолар билан боғлиқ бошоғриқлари ҳар кимга ҳар турда насиб қиладиган ташвишларнинг бир кўриниши экан, холос.

...Оқшом чоғи қизи онасининг олдига чиройли қора чарм ғилоф кўйди. Аёл ғилофни очмаса ҳам дарров билди. Кўзойнак!

Кизи жилмайди:

– Махсус буюртма билан ясаттирдим! Ҳар ким ўзига муносабини танлагани тузук-да! Ҳар ҳолда кўзойнак ҳам кишининг қанақа одам эканлигидан дарак беради.

Аёл ўзича кулиб кўйди: “Маҳмадона... Мана, кўзойнакнинг яна бир хоссаси очилди!”

ДАРАХТ МЕВА ТУГГАНДА

Ўша куни Ҳамида баногоҳ баҳор кириб келганини пайқади. Чунки тўрт ойдан бери биринчи марта тонг чоғи уйғонганда совуқдан сесканмади.

Тунги қўйлагининг узун этакларини осилтириб, ойнабанд айвончага чиқди.

Осмон аста-секин зангор тусга кириб борарди. Дераза орти ёришаётганидан айвончаларининг рўпарасида шох ўйган ўрик ғунчалари яққолроқ кўринди.

Нафасини ютиб тонгги сукунатга қулоқ тутди. Борлиқ эрталабки шовқин олдидан сўнгги бор ором олар, қувват тиклар эди. Кўп ўтмай, атроф бирин-сирин ғийқиллаган, чийиллаган, гувиллаган товушларга тўла бошлайди. Бунга одамларнинг ғовур-ғувури кўшилади. Шу билан тонг ўзининг ғалати, турли-туман шовқинлардан яралган мусиқасини бошлаб юборади. Бу мусиқанинг суръати жуда шошқин, кишини ўз домига тортиб юборар даражада кучли.

Хозирча атроф осойишта, қалдироқ олди сокинлиги каби жим. Ҳатто бешикдаги ўғилчаси ҳам тамшанмай қўйган, сўрғичини унугиб ухлар эди.

Ҳамида одатдаги юмушлари олдидан бир зум тин олиш истагида дераза олдидаги курсига чўқди. Тўр парда чеккасини кўтариб, ташқарига боқди. Уйидан бошлаб ўттизлаб одим жойгача чўзилган, пастаккина буталар билан иҳоталаниб, ўрик, беҳи, олма дараҳтлари экилган майдончадан нарида катта текис йўл кўринади. Ундан у ёғида баланд тераклар сафи, саф ортида эса ҳайдалган ернинг узун-узун палахсалари қорайиб ётади. Ёз чоғи у ерлар ям-яшил экинларга айланади, ҳозирча у ёқларга уруғ қадалмаган. Ҳали ернинг захи кетмаган. Қайнонаси “кўч кўтарар” куни ғуурланиб: “Бераётган уйимиз кўм-кўк дараҳтлар ўртасида, нақ боғнинг ўзи”, деганди. Фақат Ҳамида ҳали бу боғнинг кўркини рўй-рост кўрганича йўқ, келганларида авжи қишиш эди.

Бир вақт эрининг телефони ожизгина товуш чиқарип қўйди. Ҳамида шошиб ётоқقا кирди-да, мусиқа овози баландлаб улгурмасдан тугмачани босди. “Бошланди, – ўйлади у. – Уйғониш, иш, юмуш, югуриш...”

Бешик ғирчиллади, гаврапўш ичидан ўғилчаси-нинг ғингшиган товуши чиқди. Она қўлини ичкарига суқиб, сўрғични топди, гўдагининг кўзлари юмуқ ҳо-лича оғзини катта очиб “овунчоғи”ни излашига бир зум кулиб қараб турди.

– Болани қийнамасанг-чи, – каравотдан эрининг овози келди. – Бер “шакалат”ини!

Ҳамида “пик” этиб кулди, сўрғични чақалогининг оғзига тиқиб, ўзини кўрпага ташлади-да, эрининг бўйнидан маҳкам қучиб олди.

Мирсоат уйқусираган кўйи хотинининг эркалик қилишига бирпас йўл қўйиб берди. Кейин шивирлади:

– Бугун ишга эртароқ кетмасам бўлмайди, турақол энди.

Келинчак норозиланди:

– Нуқул иш, иш дейсиз-а...

Йигит жиддий туриб:

– Агар ўша ҳисботини эртароқ қилиб бермасам, иш ҳақим кам чиқади, – деди. – Унда ўша сен мақтай-диган витаминли бўтқани нимамизга оламиз, а?

Бу саволга эътироуз қилиб бўлмас эди. Ҳамида ўрнидан туриб, кундалик кўйлагини кийди-да, ошхонага чиқди.

Айвончага дастурхон ёзаркан, дараҳт учида илиниб турган оқ булат парчасига қараб: “Мунча момиқ бўлмаса, – дея шивирлади. – Ростдан ҳам баҳор келибди”.

Биргина шу сўзнинг ўзи унинг кайфиятини тамомила кўтариб юборди. Назарида қайнаётган чойгуми, товада вишиллаётган қуймоғи, ҳатто жаранглаганча қўлидан тушиб кетган қошиқчалари – бари келаётган куннинг руҳини ўзига сингдириб улгурган, шу боис шошқин, шовқинли эди.

Сариёғ суртилган нонни апил-тапил чайнаётган эрига қарап экан, кулгиси келди. Мирсоат оғзини тўла-тиб олганидан иккала лунжи шишган, чайнаш зўридан ҳатто қулоқларигача қимирлар эди. “Шошмасангиз-чи,

– хаёлидан кечирди келин. – Нонуштанинг таъмини ҳам сезмайсиз-а...” Лекин индамади. Чунки эри унинг бу эътирозига ҳам бирон-бир мантиқли жавоб топиб беришига, шу билан мот қилишига ишонар эди. Йигит эса доимгидай, вақтдан ютиш ниятида пиёласидаги чойи илишини кутаётиб, телефонига келган SMS-хабарларга кўз югуртириб чиқди, сўнг телефонига яна бир нималарни қайд қилди. Охири илиб улгурган чойдан бир пиёла ичди-ю, фотиҳа ўқиб ўрнидан турди.

Эшик ёнида курткасини кияркан, хотинига кўз қисиб қўйди. Келинчак кулимсиради. Йигит илжайди-да, Ҳамиданинг бурнига бармоқ учини аста теккизib қўйиб, ташқари чиқди, “Яхши бориб келинг”, – тилагига жавобан бош силкиди.

“Ана бўлди, – ўйлади Ҳамида. – Ишга кузатдик. Энди қолган юмушларни бош-лай-ми-и-из...”

Ўғилчаси уйғонди, ташқарида кўз таниш бўлиб қолган сутчи хотиннинг “Сут, қатик, қаймо-о-оқ” деган чақириғи эшитилди, сал ўтмай, ўзи эшик қўнғироғини жиринглатиб келди-да, доимий мижозларига пластик идишда сут ташлаб кетди. Шу билан навбатдаги кун бошланди.

Баҳор келгани, изғиринли кунлар ортда қолгани ҳақидаги ёруғ ўйлар келинчакнинг бугунги кунини ўзгача изга солиб юборди. Оҳ, кўклам келяпти! Ниҳоят, мана шу тўртта деворга тиқилиб ўтиришлар йўқ бўлади, энди ўғилчаси камроқ шамоллайди, болани қаватма-қават кийинтиришларга чек қўйилади, шу боис гўдагини кўтариб юришга қийналмайди, ўзи ҳам шу дардисар пальтони киймайди. Келинчак сарпо талабларидан келиб чиқиб танланган қимматбаҳо сувсар ёқали оғир, узун пальтосини эгнида тасаввур қилди-ю, гўё юқ тушгандек, елкаларида оғриқ туйди. Турсолиб, кўрпаларини ағдариб, сандигини очди. Кор тушганда баҳорги кийимларини тахлаб, эҳтиёт-

лик билан ўраб, жойлаб қўйган эди. Мана, қўшни келинчакларнинг ҳавасини келтирган, ёқа, ўмиз, енг ва этакларига олтин ранг нозик¹ қадалган кўйлаги. Манави қаймоқранг костюмини ўзи ҳам севиб киярди. Э, бу қирмизи лиbos ҳозир унга мос келармикин? Ишқилиб, тўлишиб кетмаганмикин? Ахир уни устига илмаганига ҳам анча бўлди-да! Ўтган баҳор оғироёқ эди, эгнида тўкилиб турадиган тўғри бичим кўйлакларга куни қолганди. Каттакон қорни билан қайнотасига кўринишга уялгани учун онаси унга мана шунаقا кўйлаклар тиктириб берганди. Келинчак ўша пайтдаги аҳволини эслаб, ўзича қулиб қўйди. Соддалик қурсин, гўё кенг кўйлак кийса, қайнота-қайнукаси ҳеч нарсанни сезмайдигандек... Уй ичида кийимларини ҳилпиратиб юраркан, эри “Э, елканли кеманинг ўзи бўлибсан-ку, бўғирсоқ”, дея кулган, у эса чидомлай йиғлаб, қайнонасига шикоят қилган эди. Ох, қайнонаси ўшанда ўғлининг адабини боплаб бериб қўйди-я!

...Тушлиқдан кейин боласини бешикка белаб, эмизди-да, кўзлари юмила бошлаган гўдакка бирпас маҳлиё бўлиб ўтириди. Кейин гаврапўшни ёпиб, ўрнидан турди. Тошойна қархисига келиб, тарофини қўлига олди. Вой-бўй, сартарошхонага бориши керак экан, упаси ҳам тугай деб қолибди.

Либосларини бирма-бир кийиб кўра бошлади. Эҳ, қирмизи кўйлак баданида тортилиб қолди. Тўлишибди-да... Қаймоқранг костюм дуруст, манави мовий ранглиси ҳам ёмонмас, чидаса бўлади... фақат... шу... бўкса томони ғалатироқ турибди-да...

Охирги кийимни ечгач, толиқиб, гилам устига ўтириб қолди. Баҳор, умид билан қаршиланган баҳор келинчакнинг дилига қувонч билан биргалиқда ғусса ҳам келтирган эди. Ҳамида аввалги нозик-ниҳол келинчак эмас экан!

¹ Либосларга қадаладиган майдада мунҷоқсимон безак, яъни, бисер.

Хўрсиниб, либосларини йиғиштириди-да, жавонга тиқиб юборди. Ваннахонага ўтиб, боласининг иштончаларини ювишга тутинди. “Ҳаммаси бекорчиликдан мияга келадиган хаёллар”, – ўйлади у ортиқ ўзини қийнамасликка аҳд қилиб.

Ҳамида шу билан яна ўзининг кундалик юмушларига шўнғиди. Гёё эндиғи ҳаёти фақат шунгагина боғланиб қолгандай жидду жаҳд билан бир нималарни тозалар, ювар, тикиб-чатар, дазмоллар, пиширас эди.

Фақат қош қораяр маҳали тин олар, одатича беихтиёр сурмасини қўлига олиб, тошойна қаршисига келаркан, тўлиша бошлаган қомати, осила бошлаган бақбақаларига назари тушиб, юраги ачишар, ўз-ўзидан хўрсиниб қўярди.

Лекин Мирсоат хотинидаги кайфият ўзгаришларини сезмасди. Чунки зоҳиран ҳеч нарса ўзгармаган эди. Оқшом чоғи уйга келганда плита устида кечлик таом тайёр, Мирсоатнинг эртага ишга киядиган кўйлаклари силлиқ дазмолланган, пайпоқлари текис тахланган, озода дастурхон устига чиройли ликопча, пиёлалар териб қўйилган бўларди. Мирсоат хурсандликдан иккала қўлини бир-бирига ишқаб, қозонга назар соларди, хотини эса худди ёш болани кўндиromoқчи бўлгандек: “Мана ҳозир, кийим алмаштириб чиққунингизча овқатингизни косага сузиб тураман, борақолинг”, дея жилмаярди.

Телевизор қаршисига ёнбошлагандан эса Ҳамида унинг ёнига келиб чўйкаларди. Шу онда телевизор икковининг ёдидан чиқиб, эътиборлари рўпараларида, кўрпачада ётган ўғилчаларига қаратилар, зўр бе-риб эмаклашга уринаётган болага қараб кулишар эди.

Оқшомги осойишталик руҳи аста-секин тунга сингиб кетарди. Тун ўзига юқдан шу атворни тонгга узатарди. Келинчак кўз очиб, теваракдаги сокинлик-

ка қулоқ тутаркан, дили ёришиб келаётган осмон билан уйғунлашиб, тиниқлашиб кетарди. Кейин у енгил тортиб айвончага чиқарди-да, ўрик ғунчаларининг гулга айланишини кузатарди. Ёришиб келаётган осмоннинг ранги қандай ўзгариши, уфқдаги булуларнинг тузи тиниқлашиб бораётгани, ер усти кўқараётгани кун сайин яққолроқ кўринарди. Деразани очиб, юзини саҳарги салқинликка тутганда, назарида шабаданинг вазни ҳам енгиллашгандек туюларди.

Шундай кунларнинг бирода сутчи хотин иккита каттакон сумкани кўтариб келди.

- Уҳ, нафасим тиқилди-я, – хотин остона ёнига чўнқайди. – Бир пиёла сув беринг, ўргилай.

Ҳамида илиққина чойни хўплаётган хотинга биринчи бор кўраётгандек, қизиқсиниб разм солди. Қотма, офтоб ялаган юzlари гўё сингиб пишган кулча янглиғ, буриша бошлаган ёноқларида қорамтири қизиллик ўйнайди.

- Яқинда бу киши сигир ёнига иккита қўй ҳам қўшиб бердилар, – деди ишчанлик билан сутчи хотин. – Агар семиртириб олсак, сут-қатиқнинг пулидан ташқари, қўйни сотишдан келадиган тушум ҳам меники бўларкан. Анчагина камим бор эди, шуларни тўғрилаб оламан, девдим-да... Ҳозир қиз узатишга билир дунё нарса керак! Ўқиши битса, насиб қилса...

- Қаерда ўқийди қизингиз? – бепарвогина сўради келинчак.

- Бухгалтерликка ўқияпти, шу иш ёқар экан, ўқийман деб қўймади. Ҳозир анча нуфузли касб экан, билганлар шунаقا дейишиди. Майли-да, бу ҳам маҳаллада обрў... Ўқишининг пулини отаси тўляяпти, сепини мен йиғяпман... – хотин ўз ишидан мамнун кишилар каби ғурурланиб қулиб қўйди. – Уйингиздан пўчоқ чиқса, бегона қилманг, ўзим кунора олиб кетаман. “Ҳарна-да... Бўлса, ҳозир ҳам чиқариб бераверинг.

...Сутчи хотин кетгач, келинчакка уй ичида шамол, дала иси қолгандек туюлди. Кираверишни супураркан, остоңага тушиб қолган қуриган қоқи ўт баргини күриб қолди. Қўлига олиб, гўё ноёб топилдиқдай томоша қилди. “Қатиқ идишлари жойланган сумкадан тушган шекилли, ёки опоқининг калишига ёпишиб қолганмикин?” – ўйлади у.

Бир вақт бу барг яшаган банднинг учида сап-сариқ гул очилган, кейин у момақаймоқ “бошча”сига айланган, охири шамолларда тўклилиб, кузги хазонлар қатори қорлар тагига тушган... Чириб кетмагани ғалати...

Шу куни ўғилчасини кўтариб, нон дўконидан қайтаётганида уйи ортидаги дарахтлар тагидан ўтган ингичка ариқ лабида ялпиз япроқчалари бўй кўрсатганини кўриб қолди. Нарироқда жағ-жағ, отқулоқ кўкарибди. Боласини бағрига маҳкам босди-да, энкайиб, кўкат теришга тутинди. Анчагина, елим халтачасининг оғзи баравар чиқди.

Оқшом дастурхон устига кўк чучвара, сомса кўйди.

– Шунақа пазандалигингни яхши кўраман-да, онаси, – илжайди Мирсоат.

– Ўзимни-чи? Мени ҳам яхши кўрасизми?

Йигит қошларини кериб хотинига қаради:

– Ие, бу қанақа гап бўлди энди? Яхши кўрмасам, уйланармидим?

– Ҳозир, уйланганингиздан кейин ҳам яхши кўрасизми мени?

Эри оғзини тўлдириб сомса чайнаётганидан, гапиромлай, бошини силкиди:

– Ҳа.

Бу жавоб келинчакни қониқтирмади. Кўзларига ёш тўлди. Эри эса ҳайрон бўлди:

– Қизиқмисан, шунга ҳам йиғлайдими одам?

– Бу гапни... бу гапни мунақа айтмайди-да!

– Қанақа айтади?

– Авваллари... авваллари қанақа айтган бўлсангиз,
шунақа!

Мирсоат хохолаб юборди:

– Аввалгидек, дегин? Япон боғи, тош йўлка, сунъ-
ий булоқ... А?

Хотинининг хиқиллай бошлаганини кўриб, йигит
хижолат аралаш:

– Қўй энди, – деди. – Йиғламагин, кунлар исиб кет-
са, япон боғига яна олиб бораман сени...

– Керакмас...

– Жон... – Мирсоат хотинини юпатгиси келса, ҳа-
миша шундай дерди. – Жон... Қаролмаган бўлсам...
ишим жуда кўпайиб кетди-да, ишга қўмилиб қолдим,
ジョン! Лекин сени эсдан чиқарганим йўқ!

Барибир келинчакнинг дилидаги ўқинч тарқама-
ди. Эрининг сўзлари замиридаги мазмун тўғри: энди
у аввалги Ҳамида бўлмаганидек, Мирсоат ҳам бурунги
ошиқ йигит эмас, бир вақтлар икковининг дил-дили-
га титроқ солиб юборувчи сўзлар энди оддий гаплар-
га айланган. Чунки улар шундоқ ҳам ёнма-ён, бир-би-
рини кўриш учун минг бир ҳаяжон, юз бир изтироб,
хавотир чекиб йўл босиб келишлари шарт эмас, шун-
доққина бошларини буриб ёnlарига қарасалар бас!
Шу боис ўрталарида хотиржамлик яшайди. Эртанги
қун ҳам бир-бирларини кўришлари аниқ, айтадиган
гаплари тайин, шундоқ экан, ташвиш чекиши на ҳожат?

Ҳамиданинг назарида эрининг бамайлихотир-
лигига сабаб шу эди. Айнан шу бамайлихотирлик
ёш аёлни хавотирга соларди. Хотиржам яшай-яшай,
ахийри анави сутчи хотин сингари бор ишchanлигини
ташвишларини битиришга қаратиб қолса, эҳтимол.
Ёки қайнонасига ўхшаб, бир фарзандининг орзу-ҳа-
васини битириб, иккинчисининг орзу-ҳавасига бел
боғласа керак. Ахир келинлар бора-бора қайнонасига
тортиб кетар экан-ку! Онаси шунақа деган эди.

У ҳолда аввалги туйғулари қаёққа кетади? Беиз, бенишон йўқоладими ёки келаётган қатор-қатор оддийгина кунларига, болаларининг орзу-ҳавасларига, рўзғор аталмиш мана шу иншоотнинг кам-кўстлари ни ямашга сарфланиб, парча-пурчаларга, балки зараларга бўлиниб кетадими? Агар шундай бўлиб чиқса, туйғуларнинг уйғонишида нима маъни?

Келинчак юрагидан шуларни кечирди-ю, ваҳм ичра йифлай бошлади. Мирсоат аввалига ҳайрон бўлди: “Хафа бўларлик гап ўтмади-ку?” Кейин хавотирланди: “Тинчлиқмикин? Нега тўсатдан сўраб қолди? Чакки юрмаган бўлсан...” Охири аччиқланди: “Жуда нозик бўпти-да”. Сўнг тескари ўгирилиб ётиб олди. Хотинининг хўрсанишларини эшитмаганга солди.

Эрталаб Ҳамиданинг қовоқлари қизариб, шишганини кўриб, кўнгли хижилланди-ю, нонуштага қарамай, ишига жўнади.

Кўча эшик секингина ёпилди. Аммо келинчакнинг назарида эшик қарсиллади-ю, уйнинг деворларини зириллатиб юборди. “Хафа бўлибди, – ўйлади у. – Эркалик қилиб юборибман-да! Бояқиши бизни зориқмасин деб уриниб ётибди-ю, мен...”

Шу пайт қўнғироқ жиринглади. “Қайтиб келди!” Ҳовлиқиб эшикни очди. Остона ёнида биринчи қаватдаги қўшни аёл турарди, ёнида маҳалланинг онабоши, икковининг қўлларида биттадан тоғора.

– Келинпошша, бугун қозонга сумалак соламиз, – шанғиллади онабоши. – Ҳаммага ундирилган буғдой тарқатяпмиз. Сизга ҳам олиб чиқдик. Ниятингизни айтиб-айтиб майдаланг, зора, рўёбга чиқса...

Гўшт қиймалагични ўрнатиб, идишларни тайёрлар экан, бирдан ўпкаси тўлиб кетди. Ниятлари... Ҳамиданинг рўёбга чиқадиган қандай ниятлари бор? Аввало, тинч-тотув, баҳтли яшашни, дилидаги ўша

туйфулари сўнмаслигини истайди, ўғилчасининг эсли-хушли йигит бўлиб улғайишни ҳоҳлади, кейин... кейин ширингина қизчаси бўлишини... Келинчак овсинининг қақажон қизини эслаб, юраги ҳавасдан энтиқди. Унинг ҳам қизчаси бўлгандайди, қўғирчоқдай ясантиради, қўлларида кўтариб, сайрга чиқарди, гулларнинг, дараҳтларнинг номларини айтишни ўргатарди... Исми... майли, қайнонаси қандай исм берса, бераколсин!

Шу аснода ташқаридан аёлларнинг шодон ғовур-ғувурлари, болаларнингчувур-чувури эши билди, кимдир гумбурлатиб ўтин ёрди. Ҳамида деразаларни очиб юборди. Шу заҳоти уй бурчагига ўрнашган новвойхонадан янги ёпилган нон иси келди, айвонча ўрик гулларининг сархуш қиласлик ҳидига тўлиб кетди.

Келинчак тоғорага уйилган буғдой танаворига¹ қараб, бирдан ўйлаган ниятларининг ҳаммаси оиласи билан боғлиқ эканлигини тушуниб қолди. Ахир ёнида Мирсоат бўлмаса, у қандай қилиб баҳтли яшайди? Ўғли ақлли йигит бўлиб улғайиши, ширингина қизчага она бўлиши, ҳатто қайнонасининг шу қизчага исм бериши учун ҳам ёнида Мирсоат бўлиши зарур-ку!

Келинчак тоғорани кўтара зиналардан пастга қараб чопди. Тўрт томони қўп қаватли уйлар билан ўралган майдон ўртасида қаққайган тўйхона ичи куймалангандар аёлларга, нарироқдаги яланглик эса тўп тепаётган болаларга тўла эди. Ҳамма ёқда баҳор, серташвиш, серғалва, лекин севимли ҳаёт ҳукмрон!

Ҳамида яна зиналар оша юқорига югурди. Боласини апил-тапил кийинтирди. Уйидан чиқар пайти йўлакчадаги катта кўзгуга қаради. Бошидаги дуррачаси тагидан мўралаган сочини четга қайирди, қошига

¹ Пишириш ёки шарбатини сиқиб олиш учун тайёрланган ярим маҳсулот.

яна бир бор қалам теккизиб, эгнидаги яшил камзул-часининг тугмаларини солди-да: “Мана, биз қанақа бўлибмиз”, – деб кулди.

Сумалак қайнаб чиққунга қадар қўшни келинлар билан кулишиб, ун қумоқ-қумоқ бўлиб қолмасин учун навбатма-навбат қозондаги аталасимон суюқликни човли билан аралаштириб турди.

Бир вақт юраги ўз-ўзидан сиқила бошлади. Секин-гина даврадан чиқди-да, ўғилчасини кўтариб, уйига кирди. Бир нарсани йўқотган каби яна ташқарига чиқди. Ичкари кирди. Охири жавонни очиб, кўйлаклари ни ахтарди. Кўлига қайчи, нина-ип олди. Агар либоси қоматига мос келмай қолган бўлса, уни мослаштириб, қайтадан тикиб олади! Шунга ҳам йиғлаб юрибдими?

...Мирсоат автобусдан тушаётиб, бекатда турган хотинини кўрди. “Қаёққа отланишди?” – ўйлади ҳайрон бўлиб.

- Сизни кутяпмиз, – жилмайди Ҳамида.
- Ясан-тусан жойида-ку! – кулди йигит.
- Ярашибдими?
- Ярашиш ҳам гапми?

Мирсоат майда-чўйдалар солинган халталарни бир қўлига, ўғилчасини иккинчи қўлига олиб, хотинига:

- Юр, уйга кетайлик, ҳаво айнияпти, – деди.

...Ёмғир ярим тунгача ёғди. Ҳамида эртаси эрталаб лойга қоришган гул япроқчаларига кўзи тушгач:

– Гуллари тўкилиб кетибди, битта ҳам қолмабди-я! – дея хўрсинди.

Мирсоат ўғилчасини бағрига босганча деразага қаради.

– Дараҳт мева туғибди, қара, довуччалари бўртиб турибди, – деди. – Ҳали пишганда кўрасан, шунағанги чиройли, ширин ўрикка айланадики, гулининг чиройи мевасининг олдида ҳеч гап бўлмай қолади!

ТҮЙДАН КЕЙИН

У бутун хонани эгаллаган хонтахтага, гажимдор дастурхон устини безаган ярқироқ чинни идишларга, “чақ-чуқ”лари яримланиб қолган биллур вазачаларга, шоколадларидан бўшаб қолган зарҳал тақсимчаларга боқаркан, беихтиёр узун сўлиш олди. Девор бўйлаб тўшалган духоба кўрпачаларнинг устига парвосиз ташланган ёстиқларга, кечагина кўрган кўзни ҳаваслантириб яшнаган, бугун эса олд пардаси йиғиштириб олинганига кемтикланиб қолган гўшангага кўзи тушгач, ич-ичидан хўрсиниқ келди. Шу пайт ташқаридан идиш-товоқларнинг шарақлагани, сувнинг шовуллагани эшитилди.

Шошиб уйдан чиқди. Ҳовлида, сўри тагига ўрнаштирилган қатор столлар устида ювиб тўнкариб қўйилган косалар, пиёлалар, лаганлар тўп-тўп бўлиб уйилган, бўй етган жиянлари ўзаро қиқирлашиб, тоғораларни чайишар эди. Нарироқда ўспирин ўғли ҳовлининг гир четига терилган енгил пластмасса курсиларни йиғиб, тахтайди, эри қўл телефонини қулоғига босиб олганча, хушнуд, ким биландир гаплашади.

У шундагина уй ичига нега кирганини эслади. Дастурхон устини йиғмоқчи эди. Ортига қайтди. Писта-бодомларни халтачага соларкан, қанчалар чарчаганини ҳис қилди.

Барибир юмушини охирига етказолмади. Юраги сиқиб келаверди. Халтани шундоққина оёқ остига ташлаб, нариги хонага, қизининг ётоғига ўтди. Бу ер ҳам бесаранжом, курсилар суюнчиғида жиянларининг узун этакли кўйлаклари, тошойна устида тароқ, упа-эликлар жойланадиган мўъжаз чарм жилдчалар, сочни жингала қиласидиган симли темир қисқичлар, гилам устида баланд пошнали ялтироқ пойафзаллар...

Кимдир шошиб ёпганидан кийим жавонининг эшиги четидан бинафшаранг кўйлакнинг этаги “мўралаб” турибди, каравот устида қизининг қаймоқранг никоҳ кўйлаги тахлоғлиқ, тахлам устида билур тошчалари ярқираган чиройликкина тож... Шундагина юрагини нима сиқиб келаётганини англади. Қизи, йигирма бир йил бағрида авайлаб юрган Камоласи энди ёнида йўқ. Тожни қўлига олиб, ҳафсала билан, ҳар битта тошчасини, ҳар бир безагини бирма-бир кўздан кечириб чиқди. Кейин кўйлакнинг тахламини ёзиб, томоша қилди. Кечагина қизи мана шу либосда яшнаб эшикдан чиқиб келган эди, бўй қизларнинг ҳавасларини келтириб, зарбоф тўнга ўранган күёвнинг ёнига тушиб жўнаган эди. Кўйлакни юзига босиб кўрди. Силлиқ шойи кафтлари орасидан майин сирпаниб ўтди. Либосда билинار-билинмас олма ислари қолибди. Бу Камола севган атирнинг ҳиди эди.

Тўлиқиб йиғлаб юборди.

...Камоласи жуда қақажон эди. Эсида, рўзгорлари эндинина бўлак бўлиб, Сирғалидаги янги қурилган уйларига кўчиб ўтишган пайтлари. Сирғалидан шаҳар марказига, ота-онасини кўргани келиб-кетиш анча маҳол, автобуслар доимо тирбанд бўларди. Бир сафар автобусга чиқадиганлар шунчалик кўпайиб кетдики, Камолани бағрига босиб олганча, туртина-суртина зиналардан юқорига аранг чиқиб олди. Ўриндиқларнинг ҳаммаси банд эди, қизчасини бир қўллаб кўтарганча иккинчи қўли билан пайпасланиб ушлаб туришга тутқич излай бошлади. Камола бошини адл кўтариб, у ёқ-бу ёққа аланглади-да: “Болали онага жой бейингла”, – дея қичқирди...

...Ўшанда Камоланинг қилиғини неча кунгача гапириб, кулишиб юришган эди.

Камоланинг бу қақажонлиги кейинроқ ажиб бир зукколикка, зарифликка айланди. Қизгинаси ҳар нар-

сага кутилмаган, ҳеч кимнинг хаёлига келмаган тарьиф топа билар эди. Бир куни қайнонаси кулганча: “Бу қизимга Зарофат деб исм берсак ҳам бўлар экан”, – деса, қайнотаси илжайиб: “Бувисининг ёшлиги-да”, – деганди...

Аёл қизининг зукколигидан бир ғуурланса, бирда чўчириди. “Қизларнинг ювош бўлгани тузук, дерди онам, ўзим шундоқ эдим, бу қақажон қурмагур... Ҳамма ҳам хотиннинг ақлли бўлишини ҳоҳламайди-да! Ишқилиб...”

Бир куни, навбатдаги совчини кузатгач, хавотири ни эрига айтди. Эри яйраб кулди.

– Камолага, худо ҳоҳласа, ақлли хотинга уйланиши ни истайдиган йигит учрайди. Ҳеч қўрқма! Сен отам билан онамга қара!

Ростдан ҳам, қайнота-қайнонаси кам учрайдиган, ажиб бир жуфтлик эди. Аёл икковига ҳавас билан қараган пайтлари кўп бўлган. Қайнонасидаги тўлибтошган ғайрат, зукколик, қайнотасидаги вазмин закийлик ажойиб бир тарзда уйғунлашган эдики, уларнинг бир-бирларига қилган мурожаатларининг ўзи ибратомуз томоша бўлар эди.

– Акмал менга тортган, – дерди кўпинча қайнонаси. – Сиз, ё тавба, худди дадангизнинг феълини кўчириб олгандайсиз.

Яратганинг қудрати ҳайратомуз: ўзи бино қилган гўзал уйғунликни бандаси олдига у ёки бу талқинда қайтаравераркан. Она ўша куни уйига кириб келган совчи хотин билан бир-икки оғизгина гаплашибоқ дили ўз-ўзидан равshan тортди. Ўрта бўй, қорамағиз совчи аёлнинг сокин овозда, ипга тизилган мунчоқдек бир текис терган сўзларига маҳлиё бўлганидан, сўрайдиган саволлари ҳам ёдидан кўтарилид. “Жуда истарали хотин экан, – ўйлади беихтиёр. – Гап-сўзлари бирам маънили...”

Оқшом эрига “ахборот” берди. У хотинининг сўзларини эшитиб ўтирди-ўтирди-да:

– Совчи сенга маъқул кепти, шекилли... – деб илжайди. – Жуда... батафсил таърифладинг.

Аёл тутилиқди. Ўйлаб қараса, совчи аёлнинг феълида ўзини кўзгуда кўргандек бўлган, шунинг учун дили ёришган, кўнгли исиган экан!

Йўқ, қизи яхши жойга тушди. Куёв ўзига ҳам жуда ёқди. Қизига эса инчунин...

...Унинг Камоласи оқшом чоғи бир қўлида алвон гулдаста, иккинчи қўлида ширинлик солинган катта қути билан остонаяда кўринганда юраги бир қалқиди. Қизининг эгнидаги зумрад рангли соддагина кўйлак, оёқларидағи қошиқдеккина туфли кўзига худди суратли китобчаларга чизилган қўғирчоқларнинг безакларига ўхшаб кўринди. Камола остона ҳатлаб ўтди-ю, онасиға кўзи тушиб, “дув” қизарди, нима қиласини билмай, тўхтади. Бошини солинтирганча, салом берди.

Она бўғзига йиғи тиқилиб келаётганини сезиб, шошиб алик олди.

– Кел, қизим, – деди овози титраб. – Уйга кир. Да-данг ҳам келиб қолади.

Кейин ўзи ҳайрон бўлди. Нега йиғи босиб келяпти? Қизи бўй етгандан бери шу кунни орзу қилмаганми эди? Кўзига чиройли кўринган нимаки мато бўлса, Камоласига илинмаганмиди? Эрталаб отаси розилигини билдириб, Камолага фотиҳа берганда шу кунларга етганига шукурлар қилмаганмиди? Нега кўзларига ёш тўлиб кетди?

Назарида қизалоғи, Камоласи бирданига улғайиб қолди. Чеварникидан сарполари олиб келинганда аввало қайинсинглиси, кейин овсини, кеннойиси айвонни тўлдириб ўтириб олишди-да, Камолага кўйлакларини бир-бир кийгазиб томоша қилишди. Она бошига

авайлаб қўндирилган ипак дўппи устидан зар сочилган рўмолни ташлаб, майдатароқ адрес қўйлак-лозимда бир-бир босиб чиқиб келган қизини кўрганда юраги бир шувиллади. Қариндошлар ўзаро қулишиб, ҳазил-хузул билан Камолани яна либос алмаштиришга ундашди. Қиз қизаринқираб бошқа бир кийимни, узун мовий қўйлак устидан заррин нақшлар билан зийнатланган нимчани кийиб, бошига чиройли дуррачани ўраб чиқди. Аёллар чувиллашиб олишди. Она эса қариндошлари шовур-шувур қилишгани сайин юраги тушункисиз бир ҳисдан тўлиқиб бораверди. Қизи болалик оламидан аллақачонлар чиққанини ақлан тушунса-да, неча йилдан бери совчи кутиб, Камоласини хаёлан келинлик либосида кўриб юрган бўлса-да, ўша дамда, чиройли ипак либослар қучоғида яшнаган қизини кўрганда кўзларига ишонмай тураверди. Қизи, қизалоғи улғайибди! Аёллик дунёсига қадам босиш арафасида турибди! “Илойим, қадамлари енгил бўлсин!” – деб шивирлади беихтиёр.

Бир вақт кимдир елкасига аста қўлини қўйди. Она шошиб кўзларини артди.

– Ойи, чарчадингиз, дам олинг, қолган ишларни ўзимиз тугатиб қўярмиз, – деди кенжা қизи, Наргизаси меҳрибонлик билан.

Она индамай бош силкиди. Нариги хонадан жиянларининг кулгиси, чиннининг жаранглагани, патнисларининг шарақлагани эшитилди. Аёл кўзларини рўмоли учлари билан артиб, эшиқдан мўралади. Наргиза опасининг уй қўйлагини эгнига илиб олибди. Она беихтиёр кулимсиради: “Эгачим эрга тегди, эскиси...” дейишармиди?”

Кейин яна қўнгли бузилди. Юмушга андармон бўлишга уриниб, уй ичидагизина бошлади. Бир нарсаларни йиғиштирган бўлди: майда-чуйда буюмлар-

нинг бирини у ёқقا, иккинчисини нариги ёқقا олди, жавонларнинг ичига нималарни дир тиқди, кенжаси эса ҳали у томонга, ҳали бу томонга ўтар, даста-даста чинни, тахлам-тахлам сочиқ, дастурхонлар кўтариб юрар, уни кўргани сайн онанинг юраги янада тўлиқарди. Назарида уй ичида юмушга уриниб юрган Наргиза эмас, Камола эди. “Ё тавба, уй тўла одам-ку, юрагимнинг хувиллашини қаранг”, – ўйлади беихтиёр.

– Амма, ўзимиз уddeлаймиз, чарчагансиз, дам олинг, – дея бижирлади жиянларининг бири.

– Иш тугаб қолди, дам олаверинг, кеннойи, – деди иккинчиси.

Аёл ҳовлига чиқди. Эри ҳамон қўл телефонини қулоғига босиб олганча, ким биландир берилиб гаплашар, ўғли эса бир тўп ўртоқлари билан ҳангомалашганча, қозон-ўчоқни кўтариб, аравага ортишарди.

Она уҳ тортди. Шу топда эри билан гаплашгиси келди, ҳеч бўлмаса, пиёзнинг нархини муҳокама қилишса ҳам майли, фақат гаплашса, кўнгли ёзилса бас...

Аммо эри телефондан ортадиганга ўхшамасди. Яна кўзларига ёш келди. “Бу уйда дардимни англар киши борми ўзи?” – деб ҳайқиргиси, оламни бузгиси келди. Сал ўтмай, ўзидан ўзи уялди. Хўп, дардингни айт, дейишса, у нима дейди? Қизимни узатдим, энди юрагим сиқиляпти, ҳаммаёқ хувиллаб қолди, дейдими? Қиз узатган фақат сенми? Агар шу дардга чидолмасанг, қизингни олиб ўтиргин эди, дейишмайдими?

Шу пайт кимдир келиб билагини сиқди. Бошини кўтарди. Эри.

– Бас энди, кўзингни арт...

Аёл кафтлари билан қовоқларини ишқади. Жилмайишга уринди. Лекин лаблари сал тортилди, холос.

– Наргиза опасининг кўйлагини кийиб олибди, – деди. – Яна у ёқдан-бу ёқقا ўтаверади, ўтаверади...

Эри илжайди:

– Майли... Энди бу ёғига... сандифингни тўллатаве-расан...

Онанинг ўпкаси тўлиб кетди. Эркак бошини чай-қади: “Етар энди...”

“Тушунмади, – хўрсинди аёл. – Тушунмади-я...”

Бу дардни тўлигича фақат она англай олади. Бир вақтлар унинг ўзи оппоқ келин либосида, карнай-сурнай садолари остида эрининг уйига кириб келган эди. Шунда онасининг кўнглидан нималар ўтган, ўйламабди ҳам. Ажаб ҳикмат, кеча унинг қизи карнай-сурнайнинг шодон суронига кўмилиб, жўнади. Онасининг дилидан нелар кечганини эса, турган гап, билмаган, англамаган...

Қизларнинг чекига тушгани шу экан-да! Аввало ота-онасининг кўнглини яшнатар, кейин қуш мисол учирма бўлиб, ўзга оилани гуллатар экан.

Энди ўиласа, карнайнинг “ваҳа-ваҳа”си куёв томоннинг тоғдан ошар шодлигини, сурнайнинг ҳазин ноласи келин томоннинг ғусса аралаш қувончини тасвиirlар экан. Тўйнинг олағовур хурсандчилиги алдамчи бир томоша, қизини бағридан юлиб олиб берадётган онанинг дилидаги оғрифини ўлдириб турадиган дори экан, чиройли сарпо-сурук, сават-сават патибу ҳолвалар, ширинликлар билан, карнай-сурнай, ноғора билан келишиб, она бечоранинг кўнглини овлаган бўлишар экан-у, кўзининг гавҳарини, қалбининг оташини қанотларига олиб кетишаркан! Яна шуниси қизиқки, оналарнинг энг катта орзуси мана шу кунга етиш экан!

Бир пайт Наргиза қўлида телефон кўтарганча югуриб келди:

– Сизни аммам сўраяптилар.

Телефонни қулоғига тутди, нариги томондан қайинсинглisisининг шодон товуши келди.

- Чарчоғингиз тарқай деяптими, кеннойи?
- Раҳмат, – деди аёл ҳорғин.
- Ҳали кечроқ олдингизга ўтаман, – давом этди қайинсингил. – Эртага тағин шошиб қолмайлик.
- Нимага?
- Вой, тавба! Куданикига йўқлов жўнатмаймизми?
- Ҳа-я... – жавоб қилди аёл паришонҳол.
- Қайинсингил шарақлаб кулди:
- Бу ёғига энди, кеннойи, қудачилик дегани бошланди.
- Аёл беихтиёр жилмайди.
- Лекин тўй жуда чиройли ўтди, илойим, борган жойида униб-ўссин, – алқади амма.
- Айтганингиз келсин! – деди она жавобан. Ўзи эса ўйлади: “Ростдан ҳам, тўй жуда чиройли ўтди”.

МУНДАРИЖА

Карантин (<i>қисса</i>).....	3
Ғурғуртепада саратон (туркум)	
Сүзбоши.....	133
Күёв тўра.....	134
Осмон тўла фаришта.....	141
Ушалган орзу.....	151
Яхши-ёмон хотиралар.....	155
Қадамингга гуллар сочилсин.....	165
Қандил.....	175
Сўз якуни.....	179
Ҳикоялар	
Учинчи башорат.....	181
Ёнаётган одам.....	201
Саҳар.....	205
Қўзойнак.....	209
Дараҳт мева туггандা.....	218
Тўйдан кейин.....	230

Адабий-бадиий нашр

Рисолат ҲАЙДАРОВА

ҒУРҒУРТЕПАДА САРАТОН

Қисса ва ҳикоялар

Мұхаррір Дилрабо Мингбоева
Бадиий мұхаррір Фаррух Эрматов
Мусақхих Шаҳзода Ҳакимова
Саҳифаловчи Азамат Қаюмов

Ўзбекистон Ёзувчилар уюшмаси
«ADABIYOT NASHRIYOTI» МЧЖ

Нашриёт лицензияси: № AA 0043. 27.01.2020
100129, Тошкент, Марказ 15. 1/90.

 (+98) 128-30-04. e-mail: mashkhur-press@mail.ru

Босишига 2021 йил 18 февралда рухсат этилди.
Бичими 84x108 ¹/₃₂. Офсет босма. “Cambria” гарнитураси.
Шартли босма табоги 13,44. Адади 1000 нусха. Буюртма №

«AZMIR NASHR PRINT» МЧЖ босмахонасида чоп этилди.
100200, Тошкент шаҳри, Адҳам Раҳмат кўчаси, 10-уй.